

Dio Atti

Dio Atti madijadsa bacco tajaro

Porciones del Nuevo Testamento
de nuestro Señor Jesucristo
en el idioma
culina (mádija)



Las ilustraciones en las páginas 10, 12, 57, 65, 69, 81, 83, 93, 98, 104, 113, 115, 118, 127, 134, 138, 141, 151, 152, 159, 175, 177, 182, 194, 216, 235, 250, 283, 300, 316, 343 y 346 se usan por cortesía de
© David C. Cook Publishing Co., 1978.

Las ilustraciones en las páginas 32, 46, 156 y 265
por Louise Bass se usan por cortesía de
© The British & Foreign Bible Society, 1994.

La ilustración en la página 163 por D. Koop, ILV, Perú.

Porciones del Nuevo Testamento
de nuestro Señor Jesucristo
en el idioma
culina (mádjia)

Primera edición, 2011
300 ejemplares

Publicado por © La Liga Bíblica del Perú
Av. Bolivar 1273, Pueblo Libre

Hecho el depósito legal en la Biblioteca Nacional del Perú
Nº 2011-04144

Imprenta:
Representaciones El Manantial S.R.L.,
Av. Via Evitamiento, Mz. B, Lt. 4,
Urb. Matazango, La Molina, Lima - Lima

Índice

	página
Prólogo	5
Notas explicativas	6
Mateo Mateo	9
<i>Mateopa Jesocristo tahimari dsodo inajaro</i>	
Maraco Marcos	53
<i>Maracopa Jesocristo tahimari dsodo inajaro</i>	
Roca Lucas	94
<i>Rocapa Jesocristo tahimari dsodo inajaro</i>	
Huano Juan	147
<i>Huanopa Jesocristo tahimari dsodo inajaro</i>	
Tahimarideni Hechos	173
<i>Jesocca dodosse tabaqui tahimarideni</i>	
Romanodenidsa Romanos	221
<i>Pabloda Romanodenidsa ima teppe dosse inajaro</i>	
1 Corintodenidsa 1 Corintios	234
<i>Pablodenipa Corintodenidsa ima teppe tahidecca dosse quinajaro</i>	
2 Corintodenidsa 2 Corintios	244
<i>Pablodenipa Corintodenidsa ima teppe dsotodecca dosse quinajaro</i>	
Carasiadenidsa Gálatas	249
<i>Pabloda Carasiadenidsa ima teppe dosse inajaro</i>	
Epesodenidsa Efesios	255
<i>Pabloda Epesodenidsa ima teppe dosse inajaro</i>	
Piripodenidsa Filipenses	267
<i>Pablodenipa Piripodenidsa ima teppe dosse quinajaro</i>	
Corosadenidsa Colosenses	274
<i>Pablodenipa Corosadenidsa ima teppe dosse quinajaro</i>	
1 Tesaronicadenidsa 1 Tesalonicenses	282
<i>Pablodenipa Tesaronicadenidsa ima teppe tahidecca dosse quinajaro</i>	

2 Tesaronicadenidsa . . . 2 Tesalonicenses	288
<i>Pablotenipa Tesaronicadenidsa ima teppe dsotodecca dosse quinajaro</i>	
1 Timoteodsa 1 Timoteo	291
<i>Pablopa Timoteodsa ima teppe tahidecca dosse inajaro</i>	
2 Timoteodsa 2 Timoteo	295
<i>Pablopa Timoteodsa ima teppe dsotodecca dosse inajaro</i>	
Titodsa. Tito	302
<i>Pablopa Titodsa ima teppe dosse inajaro</i>	
Piremaodsa Filemón	306
<i>Pablopa Piremaodsa ima teppe dosse inajaro</i>	
Ebreodenidsa Hebreos	308
<i>Tohuatti ebreo cajimanajaridenidsa ima teppe dosse inaridsajaro</i>	
Satiacocca Santiago	320
<i>Satiacocca ima teppe</i>	
1 Pedrocca 1 Pedro.	324
<i>Pedrocca ima teppe tahidecca</i>	
2 Pedrocca 2 Pedro.	330
<i>Pedrocca ima teppe dsotodecca</i>	
1 Huanocca 1 Juan	334
<i>Huanocca ima teppe tahidecca</i>	
2 Huanocca 2 Juan	340
<i>Huanocca ima teppe dsotodecca</i>	
3 Huanocca 3 Juan	341
<i>Huanocca ima teppe dsotodemanicca</i>	
Jodacca Judas.	343
<i>Jodacca ima teppe</i>	
Apocalipsis Apocalipsis.	345
<i>Jesocristopa Huanodsa itedsejemacca ima ahuato inanajaro</i>	
Glosario	363
Mapas	375

Prólogo

Este volumen contiene porciones del Nuevo Testamento de las Sagradas Escrituras que han sido traducido para poner al alcance de la población culina-hablante del río Purús, tanto en el Perú como en el Brasil. Esta traducción servirá para que todos sus lectores y oidores lleguen a conocer el amor, el perdón y la salvación que se puede encontrar en Dios por medio de su hijo Jesucristo.

Dio Atti madijadsa bacco tajaro

Ajijaro Dio Atti oninipi Nuevo Testamento. Ajidsapi Jesocristo tahimari, pocca dodosse tabaqqi tahimarideni naqui dsodo nani anini. Maittaccadsama Dio Corimepa Jesodsa pajissa quinajarideni acco icamabaquidsa pohuadenina Jesocristo tahimari dsodo quinapojaro. Pohuadenipa dsama Creciacca madija attidenidsa dsodo quinapojaro (Najaro tohuattipi griego). Dsotode huajano 1 mil 500 tossoniquimadsapa Jesodsa pajissa quinajari ohuahadenipa dsama Españacca madija attidenidsa dsodo quinapomajaro (Najaro tohuattipi español, castellano). Dsotode huajano huapi taha tossoniquima-pomadsapa madija ohuaha, ohuaha attidenidsa dsodo inaridsamana-pomajaro. Jidapana ia naqui Dio Atti etticca icajijaro.

Dio Atti Nuevo Testamento nemanhe dsodo nanipi 27 nehe cajijaro. Najaro 27 nehedsa: libros, inajaro caria attidsa. Ajijaro Dio Attipi libros 27 nehe cajijaro. Naraha capítulo motara, versículo motara aniridsacajaro. Nidsa dsotode madija atticca Nuevo Testamento cattemade jicanissa tadsana nemanhe qquedse nanicca tojanitohui. Nanidsana capítulo, versículo huapima cajinitohui.

Notas Explicativas

Dio Attidsa anijaro dsodo nani qquide iattana

Índice. Najaropi Nuevo Testamentodsa anijaro 27 nehera anijaro. Libro onini madija atticca, caria atticca naqui anini. Página onini número naqui nanidsa qqui inajaro.

Libros. Nuevo Testamentodsa anijaro 27 najarodsapi: libros, inajaro. Mateo, Maraco, Roca, Huanodenicca dsodonijidsa: Jeso tahimari, inajaro ettidsa. Caria attidsapi: Evangelios, quinajari. Nuevo Testamento motapi ima teppe, inajaro. Caria attidsapi: Cartas, Epístolas.

Introducciones. Najaropi Dio Atti jeraraha ima denima imittanijine Nuevo Testamento 27 nehedsa dsodo nani anijaro. Pina ¿nejecojarina libro dsodo inajaro? ¿Nejecojaridenidsa dsodo inajaro? ¿Nejeco imara dsodo inajaro? inadsapi nani introducción'dsa qqui inanijine.

Secciones. Najaropi librocca ima badsira badsira naridsajaro. Sección tetepidsapi ima onini anini. Caria attidsapi: título, quinajari. Sección onini hua inapodsapi nejeco ima anini nahatoto inanijine. Sección jicadsapi ima onihi tojani, título onihi cajini.

Capítulos, versículos. Najaro imapi números aniridsajaro. Naraha Dio Atti dsododedenipa números dsodo quinapo-jerani. Madija ohuahadenina dsotode dsodo inaridsamanajaro. ¿Nejecotohui números aniridsajaro? Ajima nanijine: Madija Dio Atti mamarihuaji queriquimanadsa Dio Atti maridepa libro onini hua, capítulo onini hua, versículo onini hua inadsapi madija huapima poccadeni Nuevo Testamentodsa qqui qqui quinadsa bacco quinanjine.

Referencias. Najaro qqui inadsapi nahatoto inanijine: Dio Atti onihidsa naqui najaro imassa najaro anini. Pina Mateo capítulo 5, versículo 12'dsa sección onini qqui inajaro:

Saho tahimarini, jojororo tahimari

Maraco 9.50; Roca 14.34-35

Najaro sección onini dopanidsa referencia qqui inajaro. Hua inadsapi saho tahimarini Maraco 9, versículo 50'dsa anini, Roca 14, versículo 34-35'dsa anini naqui nahatoto inajaro.

Paréntesis. Dio Atti dsodo nanidsa jeo nani pamani jocadsani () cajiridsajarodsa: paréntesis, inajaro. Najaro jeo nani bodidsapi Dio Atti jeraraha ima denima imittanijine anijaro. Pina Roca 2, versículo 1’dsa qqui inajaro:

Pohuadsa: “Sesaro” quiquina najari. (Ettidsapi: Tamine deni tojahicca, inajaro.)

Najaro paréntesis bodidsapi Sesarocca ima qqui inajaro.

Asterisco. Najaripa abadsico bedi corime. Najari qqui inadsapi nahatoto inanijine: Dio Atti jicanihuaji ima denima anini. Pina Mateo 2 versículo 1’dsa qqui inajaro:

*Pohuapa odsa panani *Jerosaredsa madijari.*

Jerosarecca ima denima hua inanijine glosariodsa dsodo nani anini.

Quotaciones. Najaropi jeo nani badsira tajaro “ ” ahuaji pama, ahuaji pama nani aniridsajaro. Bodidsapi madija huati huati quina-hicca anini, madija bodi huatohicca naqui anini, pina Mateo 1, versículo 19’dsa qqui inajaro:

“Maria jiani” ima mittadsa Dsodse pohua bodipa:

“Maqquideje ohuahajine jiajaro” najari.

Dio Atti cacomerabotedenicca dsodonaja naqui jeo nani bedeni cajini. Pina Mateo 1, versículo 23’dsa qqui inajaro:

“Ticattomama canaji. Dsohuato maqquideje ssamo taraha jidsapi ejedeni cajinitohui. Poni bedidsapa: Emanohueo, quiquina nahitohui” napohui nade Isahia.

Najaro jeo nani badsira tajaro naqui madija huati huati tajari attidsa qqui inajaro. Pina Mateo 5, versículo 42’dsa Jeso huati huati tajaridsa qqui inajaro:

–Nadsama madija tiadsa: “Jari, ohuadsa manaconi jirehe da taji” nadsapa pohuadsa da tinaji, onajaro –nahi nade Jeso.

Guiones. Najaropi jeo nani pamani toponanissa tajaro – –. Madija atti anidsapi tahide saca nani pamani anini. Nattinipi jeo nani ojarini anini. Najaro qqui inadsapi nahatoto inanijine: Madija huati huati tajari. Pina Mateo 1, versículo 19’dsa qqui inajaro:

Nadsapa Dsodse pohua attipa: –Epejena, ocaji-jerana –najari.

Madija atti jicadsapi jeo nani onihi anijaro. Jeso huati tadsa, Abi Dio huati tadsa naco guiones qqui inaridsanijine.

Corchetes. Najaropi jeo nani naminihuaji doco, memehuaaji docodsani pamani cajijaro []. Najaro bodidsa dsodo nanicca imapi Dio Atti dsodo quinapojarideni tahide dsodo quinanitide, dsodo quina-jerajaro nitide. Ssamomo inani, quinajari Dio Atti nahato-qquiri najarideni. Ima najarossa najaropi Maraco 11, versículo 26'dsa qqui inajaro:

[Naraha tibodideni najaridsa epeje tiquinejeradsapi ticcadeni Abi Dio memehuaaji madijaripa ticcadeni imasiri epeje inanejera-nitohui, onajaro –nahi nade Jeso.]

Glosario. Dio Atti jicarinihuaji glosario anini. Najaropi pina diccionariosa najaro. Tohuatti najo tanicca, ima jidsa tanicca naqui imittanijine ima anijaro. Abadsico bedi corime qqui inadsapi nahatoto inanijine: najaro tohuatti glosariodsa anini. Pina Mateo 7, versículo 6'dsa qqui inajaro:

*Porocopa pohuadsa huatini ccara tanicca, bica tanicca *perla da tiquinaraha ssamo tadsa ttai ttai inananitohui.*

¿Perlapi nejecossa najaro? inadsapi glosariohuaji perlacca ima hua inadsa nahatoto inanijine.

Mapas. Dsama corimanidsapi: mapa, inajaro. Najarodsa jodio-denicca dsama corimani qqui inajaro. Odsa panani onini, passo imeni onini, hueni oni naco cajiiridsajaro. Mapa onihidsapi Jesocca dodosse Pablo ccaridsahicca dsama corimani qqui inajaro.

Mateopa Jesocristo tahimari dsodo inajaro

Mateo

Introducción: Mateopa Jesocca dodosse. Ajijaro namidsa Jeso madidsapa Mateopa Jesodsa ccaccaridsa najari.

Tahide Jeso pocca dodosse tojahijine pohuadsa huahua najaraccadsapa Romanodenicca taminecca dodosse tojapojari. Madijadenicca dsiniro mota taminedsa da quinanijine nanaccade tojajari. Mateopa Isaraeri potemahi jodio madija. Imehi onipa Arapeo. Mateo pohua oni ohuahapa Rebi.

Jodiodenipa Diocca Cattaniji pohuadeni Idinide Cristo-Mesia tohui madimanajonajari. Jesopa Cristo-Mesia bacco najonajari tahimari jodiodeni nahatoqqiri nahijine Mateo dsodo inajaro.

Jeso tossonahicca ima

- 1.18-25 Jeso tossonahicca ima
- 2.1-12 Abadsico bedi tahimari nahatoqqiri napojarideni

Jesopa madija mari mari ihicanabaqquridsa najaricca ima

- 5, 6 y 7 Diocca cacahuehecca ima Jeso mari icanabaqqujari
- 9.35-38 Jesopa madijadsa huati cahanari canajari
- 11.28-30 Ja tiquejenadsapi Jesodsara tiquejenaji
- 13.1-52 Jesopa ajijaro namidsa imadinicca ima tadsajani mari icanabaqqujari
- 24 y 25 Dsama jicani tohuajiradsa nahatoqqiri inanijinecca ima
- 28.16-20 Jesopa pocca dodosse tabaqqi dosse inabaqquridsajari

Jeso tossonahicca ima

Roca 2.1-7

1¹⁸ Jesocristo tossonahijinecca imapi ajima napojaro. Jeso imeni Mariapi Dsodse icajihijine tahide imehidenipa jehe canirepojari. Mariapi maqquideje ssamo taccani. Dsodsepa pocca odsahuaji Maria iaccani-geraccadsapi ponidsa huada-jaraccahi. Naraha ponipi jiajaro. Dio Corime huati tadsapa poni

idsonidsa ejedeni nahatodsa huittidsajari. ¹⁹Ponicca maqqui tojahijine Dsodsepa imari bica taja najari. “Maria jiani” ima mittadsa pohua bodipa: “Maququideje ohuahajine jiajaro” najari. Nadsapa pohua attipa: –Epejena, ocaji-gerana –najari. Naraha ponidsa ima oppina tani toja-geranijine Dsodsepa poni tahimarini ecomajaro. ²⁰Pohua bodi nama naraha pocca huadadsa Diocca dodosse memehujicca ahuatodsa huati tajari: –Dsodse, tiapi tamine Dabi potemahi tijani. Ticappina-geraji. Maria jiaporaha ticajinijine oppinera tani. Aja, Maria poni idsonidsa ejedeni huittidsajaripa madijajine jarahi. Dio Corime huati tadsa ejedeni cajijaro –najari. ²¹–Nidsa poni bedi tossona-dsapa onipa “Jeso” tana. (Ettidsapa: Ia Medsedepa madija Tonassiajade, inajaro.) Najaripa pocca madija inassiajabaqqui-hitohui, poccadeni imasiri manaconi najidsohue pohuadenidsa inassonari-geranitohui –najari Diocca dodosse memehujicca. ²²Najaro ima huapima ima tojaponijinepi maittaccadsama Diopa Pohua Atti cacomerabote Isahiadsa huati tadsa Isahiana huati iqqumajaro. ²³Pohua attipa:



“Ticattomama canaji. Dsohuato maqquideje ssamo taraha jiadsapi ejedeni cajinitohui. Poni bedidsapa: ‘Emanohueo’ quiquina nahitohui”

napohui nade Isahia. Emanohueo ettidsapi: Dio iadsa madihi, inajaro.

²⁴Nadsapa Diocca dodosse memehujicca Dsodsedsa huati taha jicadsapa Dsodse nocco tojajari. Diocca dodosse memehujicca attidsa ibora tadsapa Maria icajijaro. ²⁵Nadsapi pocca amoneje tojaraha poni idsonicca ejedeni tossona-jaraccadsapa ponidsa huada-jarajari. Poni bedi tossonadsapa Dsodse ejedeni oni hua inajari: “Jeso” najari.

***Abadsico bedi tahimari nahatoqqiri
napojarideni Jeso qquide jahijonajari***

2 ¹Jesopa odsa panani onini Berenedsa tossonajari. Najaro odsapi Jodeahuajicca dsamacca. Jeso tossona-hicca huajanodsapa tamine Herode dsama Jodeacca madija cacahuade tojajari. Puhuapa odsa panani *Jerosarelsa madijari. Nadsapa Herode nahidsa madihi paja naccadsa dsama huaji tanicca madija maji ccajonahihuaji jahijonadsa Jerosarelsa bacco najonamanajari. Pohuadenipa abadsico bedi tahimari nahatoqqiri napojarideni. ²Jerosarelsa bacco najonamanadsa attidenipa: –¿Nija? ¿Nejecohuaji Isaraeri potemahi aja jodiidenicca tamine tossonajaritta? –najonamanajari. –Iapi maji ccajonahihuaji imadidsa abadsico bedi dsati qqui icanade. Najaro imapi tamine deni tojajari tossona-hitohui quinapojaricca ima tojajaro. Najari qquide jahijajonajaro. Ipitodsa jassi inadsa: “Icca tamine” inanijine –quinajari.

³Nadsapa tamine Herode najaro ima mittadsapa bodi tocasserajari. Pocca madija nahi Jerosarelsa madimanajarideni ima mittamanadsa naco bodideni cappinamanajari. ⁴Nadsapa tamine Herodepa *Diodsa dada toqquimade taminedeni, jodiidenicca marinaja maridedeni naco inequeriqquihijine huahua inabaqqujari. Queriqquidsapa pohuadenidsa huati tajari: –Aji Dio Atti dsodo nanidsa ia Idinide Cristo-Mesia tossonahicca imapi ¿nejecoma napojarotte? ¿Nejecohujina Cristo-Mesia tossonahitohui napojarotte? –nahi nade Herode. ⁵Tamine Herodedsa ima ecomeramanajaro: –Jodeahuajicca odsa panani



Berenedsana tossonahitohui. Najaro imapi Dio Atti cacomera-
bote Miqueo dsodo inapojaro. ⁶Pohua atti ajama napojari:

“Berenecca ima huati onana. Jodeacca dsamahuaji odsa
panani huapi taraha Berenepi ajimani toja-jerani. Ima
bicani deni tojanicca cajinitohui. Nahidsa tamine deni
tojahicca tossonahitohui. Puhuapa occa madija Isaraeri
potemahideni eahuabaquihitohui”

napohui nade Dio Atti cacomerabote Miqueo dsodo inadsa
–quinahi nade jodiodenicca marinaja maridedeni.

⁷Herode najaro ima mittadsapa aja abadsico bedi tahimari
nahatoqquri napojaridenitohui cacomehedsa huahua
inabaquijari, poccadeni ima mittahijine. Jahijonadsapa
pohuadenidsa huati tajari: –Aja abadsico bedi dsati qqui
ticanamanajaripa ¿nejecoma nadsa cahatojaritta? –nahi
nade. Nadsapa pohuadsa abadsico bedi tahimari ecomera-
manadsa mittajari. ⁸Nadsapa Herode Berenehuaji dosse
iqquimabaquijari: –Berenehuaji jai tijana. Nanihuaji ejedeni-
tohui qqui taridsamanana. Bacco tiquinadsapa ohuadsa huati
tanimanana. Ohua naqui pohua qquide occadsa opitodsa
ohuittadsa pohuadsa: “Occa tamine” onanijine, onajaro
–naraha maidsajari, tamine ohuahadsa jiperatajari.

⁹⁻¹⁰Herode atti mittamanadsapa jai tojajari. Jai toja, jai toja nanaja abadsico bedi aja qqui icanamanapojari pohuadeti tedsejema cahatopomajari. Cahatopomadsa abadsico bedi tahimari nahatoqquiri napojarideti huatidsemaneri najari. Puhuadeti tedsejema tohuaccadsa ejedeti tossonahicca odsadsa quehenacossajari. ¹¹Nahidsa jai tojedsimadsapa ejedeti qqui, imeni Maria qqui toquinajari. Puhuadsa huatidsemanadsapa pohuadeti pitodsas jassitadsa: –Tamine deni tojahi –quinajari. Puhuadeti dsepetaji baho bedeni bicaqquiri najaro itaboridsamanadsa poccadeti daniji ejedenidsa da inaquimanajaro. Dsiniro macconi dsibehi tajaro oropi huatini ccara tajarocca da quinajaro. Ahua majicone tohuessihi majo bica tajari naco da quinajari. Ahua ohuaha oni mirra majicone majo ocassa tahicca naco da quinajari.

¹²Nadsa dsome nahidsa cahadijadsapa huada cajimanajari. Dio pohuadenidsa huati tajari: –Tamine Herodehuajipi jai tijani-jeraji. Pocca ima oppina tani –najari poccadeti huadadsa. Nama nadsapa poccadeti dsamahuaji jai tojanihijinepa Jerosarecca jahuihuaji jai tojani-jarahi. Jahui onihina jai tojanijari.

Ssonohuaji Jeso mari icanabaqquijaricca ima

5 ¹Jesopa madija huapima pohuadsa queriqquihiqui qqui tadsapa ssonohuaji toquemorajari. Nahidsana maride huittarijari. Jesocca mamari tabaquipa pohuahuaaji huajijira canajari. ²Nadsapa mari icanabaqquijari.

Diopa madijadsa ima bicani inanajarocca ima

Roca 6.20-23

³–Tiadeti motta tibodideti tobicanijine tipajiramana-jerani nahatoqquiri tiquinadsapi Diopa tiadenidsa ima bicani inanajaro. Diocca cacahuehe tiadenidsa tojanitohui.

⁴–Tibodideti huanacossadsa oji tiquinaraha Diopa tiadenidsa ima bicani inanajaro. Dio tibodideti acco camahitohui.

⁵–Tiadenidsa ima tabaccora tanicca bacco taraha tedimanageradsa tibodideti: “Nidsa Dio ohua acco camahitohui” tiquinadsapi Diopa tiadenidsa ima bicani inanajaro. Nidsa Diojine dsama dsati tojadsapi najaropi ticcadeti cacahuehe tojanitohui.

⁶–Tibodidenipi pina: “Occa ima Diodsa pajiranissa taccaraho, Pohua Attissa onananijine dissera onana” tiquina-dsapi Diopa tiadenidsa ima bicani inanajaro. Tibodidenidsa jipa tinajarocca Dio tiadenidsa inananitohui.

⁷–Tiadenipi madijadsa tetideni huanaququiri nadsa pohua-denidsa ima tojadsapi pohuadeni acco ticamabaququi-manadsapa Diopa tiadenidsa ima bicani inanajaro. Diopa tiadenidsa naco huati huana tahitohui, tiadeni acco tocamabaququihitohui.

⁸–Dio tohuira tiquinadsapi ticcadeni ima quejema-
jeradsapi Diopa tiadenidsa ima bicani inanajaro. Jidapapa Dio tiadenidsa tojidserajari. Nidsa memehuajipa Dio pohua qqui tiquinahitohui.

⁹–Madija ohuaha tijinedeni cajoneradsapa Diopa tiadenidsa ima bicani inanajaro. Diopa tiadenidsa: “Occa ejedenideni” najari.

¹⁰–Diodsa disseraququiri tiquinadsa Dio Pohua Attissa tina-
namanadsapi jehe quina-jarajarideni tiadeni tonajidsobaququi-
raha Diopa tiadenidsa ima bicani inanajaro. Diocca cacahuehe tiadenidsa tojanitohui.

¹¹–Occa madija tiquejenajarojinepi madija tiadeni totamasso-baququimanadsa, tiadeni tonajidso-baququimanadsa, ticcadeni ima totabaccoranijine maidsa maidsa quinadsa naco Diopa tiadenidsa ima bicani inanajaro. ¹²Tetidsemanaji, “Epejeni bica tani” tiquinaji. Memehuaji bacco tiquinadsapi Diocca daniji bicabote ticajimananitohui. Maittaccadsama naco Diodsa jiperaququiri najaridenipa aja Dio Atti cacomera-
ququiri najarideni inajidso-baququimanaja najonapohui najari.

Saho tahimarini, jojororo tahimari

Maraco 9.50; Roca 14.34-35

¹³–Tiadeni aji ohuadsa jehe tiquinajaropi pina sahocca imassa tiquinajaro. Sahopi bani bica tahijine. Aji tiadenipi pina sahossa tiquinajaro; ajijaro dsamacca madija tinanabica-baququi-manahijine. Aji sahopi ajiboni idi taraha passodsa quejemadsapi ajiboni tomajidera tani. Ajiboni cajipomanijine ssamo tani. Nadsapi tiadeni naqui ajijaro dsamacca madijadsa ima bicani tinanamanaridsanijine nebomana tiquinejeraji, ticcadeni jeheniji ponima toja-
jerana. Saho ponima tojadsapi madija coro quinadsa madijajine ttai ttai toja tani.

¹⁴–Tiadeni aji ohuadsa jehe tiquinajaropi pina ajijaro dsamacca ssiajanissa tiquinajaro. Ossiejene ticajimana-dsapi dsama huapimacca madijadsa otahimari tijinedeni ahuatoridsajaro. Tissiejenedeni ahuato tadsapi pina odsa panani ssono tetepihuaji ahuato tajarossa najaro. Ssonocca odsa pananipi najimanijine ssamo tani. ¹⁵Jojororo naco toquehessidsapa icanajimahijine jarahi. Sspotods boco icanahijine jarahi. Nadsa jojororo toquehessidsapa aja pohua cacahittari nahidsana cacahittari najari, nahi madija huapima odsa bodihuaji jahidsimajarideni ssiajani cajimanahijine. ¹⁶Tissiejenedenipi pina najaro ssiajanissa tiquinajaro, madija huapimadsa tossiajabaquinijine. Ima bicani titinanamana najaro, madija huapima qqui toquinahijine. Nema tinamanadsapi Abi Dio memehuaji madijaridsa pohuadsa huatidsemanadsa: “Diopa bica tahi” quinahijine –nahi nade Jeso.

Jesocca marinajapi: –Dio Atti dsodo nanicca marinaja huapima onapajiranissa tanitohui –najari

¹⁷Jesopa denima mari icanabaquidsapa pohua atti ajama najari: –Tiadenipi: “Jesopa *Moisesicca marinaja jicanijine ccajonajari” tiquinejeraji. Tettideni onihi naqui: “Jesopa maittaccadsama Dio Atti cacomerabotedenijine dsodo nani naqui inajicanijine” tiquinejeraji. Ohuapi najaro marinaja huapima pajiranissa tanijine occajonajaro. ¹⁸Ohuapi pajissehera tiadenidsa huati onajaro. Aji meme, nami jicajeraccadsa Moisesicca marinajapi nebo-jeranitohui. Meme, nami jicadsapi Dio Atti dsodo nanicca marinaja huapima pajiranissa tanitohui. Tohuatti ojarie dsori teje cama-jeranitohui. ¹⁹Nadsama madijadenipa Dio Atti ojariedsa iboqqiri nadsapa imasiri cajimanajari. Madija ibo tajari pohua tesse tohuibohuijine mari icanajari attipa: “Diocca marinaja motapi najo tani, tineboji” nanaja nadsapa najaripa Diocca cacahuehedsa ajamani tojahitohui. Naraha madija ohuaha Diocca marinaja huapimadsa ibora tajaripa pohua tessedsa: “Diocca marinaja huapimadsa ibora tinaji” nanaja nadsapa najarina Diocca cacahuehedsa deni tojahitohui. ²⁰Tiadenidsa huati onajaro: Diocca cacahuehedsa tiquejena-nijinepi Dio Pohua jipa tajaricca tinanamanadsana pocca

cacahuehdsa tiquejenanijine tipajiramanani. Aja jodiodenicca marinaja maridedeni, jodiodeni pariseo imadsa jehe quina-jarideni tedsejepa Diocca marinaja cacahuade disseraquiri najari. Tiadeni naqui pina najarideni disseraquiri najarissa tiquinana; naraha tiadenipi denima tinapajiramananissa tana. Nema tiquinadsapi Diocca cacahuehdsa tiquejenanitohui, onajaro –nahi nade Jeso.

***Jesocca marinajapi: –Huadiepi pina ijinedeni
ahuamanahicca imassa najaro –najari***

Roca 12.57-59

²¹–Ticcadeni ididenicca marinaja timittamanajonajaropi ajima najaro: “Madijapa tinanadsoque-jarajo. Madija tinanadsoquedsapa ima cacattemahuaji tia iaccamanadsapi tiadsa ima tojanitohui” quiquina nade. ²²Naraha tiadenidsa huati onana: Timecotedsa titessedsa naqui tedidsapi ima ticajinitohui. Ima cacattemahuaji: “Ticca imapi tabaccora tani” quinahitohui. Ticca huadie tinebo-jeradsa timecotedsa denima tatamasso tadsapi ima cacattemadedeni deni toquejenajarideni tiadsa ima inassonarimananitohui. Ticca huadie deni tojadsapi timecotedsa tabaccorehema totamasso taraha ticca imana denima tabaccora tajaro. Nidsa ticca imapi Dio mittahitohui. Ticca ima nema nadsapi poni ehuerani diji tehe nema dsanaponihuaji tijanitohui.

²³–Nadsama ticca daniji: “Diodsa da onana” tiquinadsa naqui Diodsa da tahijinecca huahuanarihuaji ticca daniji tiaccaraha aji timecotedsa ima tinanapojaro tibodi huato-dsanapocani. ²⁴Nadsapi ticca daniji dsojo tidsimaraha Diodsa da tahijinecca huahuanaridsa hua tari-jaraccadsama nahidsa tinebocajo. Nadsapi timecotedsa ticcaji, ticca ima ticattema-mananijine. Ticca ima ticattema-manadsa ticajonera-pomadsana Diodsa da tahijinecca huahuanarihuaji ticcanipomaji. Nadsana ticca daniji Diodsa da tinahijine hua tarihi bica tahi.

²⁵–Nadsama madija ohuahadsa ima tinanadsa naqui pohua attipa: “Tia ohuaccana ima cacattemahuaji” nadsa naco tahide tia tohuacca-jaraccadsama pohua tedseje ticcadeni ima ticattemamanapoji. Pohua huati tinassonapojo, nahi taminehuaji tia tohuacca-jarahijine. Ticcadeni ima

ticattemamanapo-jeradsapi ima cacattemahuaji bacco tina-
dsapi ima tinanajaro manaconi todsepe tjanitohui. Toponi
cocorohuaji tia coro idsimamananitohui. ²⁶Nani toponi cocoro-
huaji timadidsapi amadsati tiqquena-jeranitohui. Ima tina-
najaro manaconi nema nehe tinajicanissa tadsana tiqquena-
nitohui –nahi nade Jeso.

***Jesocca marinajapi: –Tibodidenidsa
huananehe tohui tiquinejeraji –najari***

²⁷–Ticcadeni ididenicca marinaja timittamanajonajaropi
ajima najaro: “Amoneje ticajidsapi amoneje onihipi tija-jeraji.
Maquideje ticajidsapi maquideje ohuaha tinaja tajarajo”
quiquina nade. ²⁸Naraha tiadenidsa huati onana: Madijapa
amoneje onihi qqui tadsa tohuini inacomadsapi pohua bodidsa
imasiri inanajaro. Pina amoneje ijajarossa najaro –nahi nade Jeso.

²⁹–Nadsama imasiri tinana-jeranijinepi tibodidsa daco
tjiradsa “poni” taji. Poni tejeradsapi ima oppina tani tiadsa
ssonarinitohui. Nadsama pina tinocodsas tohuini tanicca
qqui tinadsapi najarodsas imasiri tinananijine tohuini taraha
daco tjiradsa “poni” taji, imasiri tinana-jeranijine. Nema
tadsapi pina tinocco huari, joca, jeo, coro tinajarossa najaro,
imasiri tinana-jeranijine. Tinocco ojarie amossi naraha
jepeje! tessirema tissiajanitohui. Poni ehuerani diji tehe nema
dsanaponihuaji tija-jeranitohui. ³⁰Nadsama pina tidsepedsa
imasiri tinanabote naraha daco tjiradsa “poni” taji, imasiri
tinana-jeranijine. Nema tadsapi pina tidsepe ca ticajidsajarossa
najaro. Tidsepe cajarie amossi canaraha jepeje! tessirema
tissiajanitohui. Poni ehuerani diji tehe nema dsanaponihuaji
tija-jeranitohui –nahi nade Jeso.

***Jesocca marinajapi:
–Ticca amoneje nebomana tejeraji –najari***

Mateo 19.9; Maraco 10.11-12; Roca 16.18

³¹–Ticcadeni ididenicca marinaja timittamanajonajaropi
ajima najaro: “Maquideje: ‘Occa amoneje onebona’ nadsapa
tahide nebohuecca papeo dsodo inadsa ponidsa da inadsa
inebodsapi pohuadsa ima nohuerani” quiquina nade. ³²Naraha
ohuattipi ajima onajaro: Ticca amoneje tinebodsapi imasiri

tinanajaro. Ticca amoneje tinebodsma maqquideje ohuaha icajidsapa tijine poni naqui imasiri inanajaro. Ponicca maqqui icajidsati naco imasiri inanajaro. Diocca marinaja naqui ecahuamana-jerajaro. Nadsama ohuattipi: ¡Paji! Ticcadeni amoneje nebomana tejeraji, onajaro. Naraha ticca amoneje maqquideje ohuaha inajadsana “Onebona” tadsa tinebodsapi tiadsa ima nohuerani. Ticca amoneje maqquideje ohuaha inajadsapa poni ponijine imasiri inanajaro. Nadsana tineboni oppinera tani –nahi nade Jeso.

***Jesocca marinajapi: –Pajissa tiquinadsapi
pajissehera pajissa tiquinaji –najari***

³³–Ticcadeni ididenicca marinaja timittamanajonaropi ajima najaro: “Diodsa: ‘Pajissa ajima onanana’ tadsapi timaidsajeradsa aji huati tinajarossa tinanaji” quiquina nade. ³⁴Naraha ohuattipi ajima onajaro: “Pajissa ajima onanana” tadsapi ticca pajissehepi tohuatti onihi tadsajani huati tina tejeraji. Madijapa maidsamanadsa: “Pajissa huati onajaro” quinadsapa tohuatti onihi tadsajani inatassaquidsa pina pajissehessa najaro huati toquinaraha maidsamanajari. Pohuadeni attissa inanamanageradsa: “Oppinera tani, Dio onidsa huati onapo-jerade” quinaraha Diopa attideni mittajari. Ajana madija attidenipa: “Occa imapi pajissa, memehuajicca nahato tahi” quinahipa bica tejerani. Memehuajipi Diocca huihuittari. Diopa mittahi. ³⁵Attidenipa: “Occa imapi pajissa, ajijaro namipi nahato tani” quinadsa naco bica tejerani. Namihuajipi Dio amori cabajari. Diopa mittahi. Attideni onihi naqui: “Occa imapi pajissa, Jerosarepi nahato tani” quinadsa naco bica tejerani. Jerosarepi Diocca Cattaniji, tamine deni tojahicca odsa panani. ³⁶Attideni naco: “Occa imapi pajissa, occa nahatohuema huati onajaro” quinaraha pohuadeni attidsa tatideni amadsati tosohuehue nanijinepi ssamo tani. Pohuadeni tatideni amadsati tonopopo nanijine naqui ssamo tani. ³⁷Nadsama “Pajissa” tiquinadsapi pajissehera: “Jehe, pajissa” tiquinaji. Naraha “Poni” tiquinadsa naqui “Jehe, poni” tiquinana. ¡Epeje! Nema najarora huati tiquinanjine bica tani. Naraha tettidenipi tohuatti onihi tadsajani tinatassaquimanadsapi bica tejerani. Najaropi pina mamaidasadedeni attidenissa najaro –nahi nade Jeso atti.

Jesocca marinajapi:
–“Manaco, manaco” tiquinejerana –najari
Roca 6.29-30

³⁸–Ticcadeni ididenicca marinaja timittamanajonaropi ajima najaro: “Madija ohuahajine tinocco sia tadsapi manaco pohua nocco sia tinanadsapa bica tani. Tino naqui. Madija ohuahajine tino jai tocanadsapi manaco pohua ino jai ticana-nadsa bica tani” quiquina nade. Manaco manacopi nama najonamanajari. ³⁹Naraha ohuattipi tiadenidsa ajima onajaro: madijapa tiadenidsa tabaccorehe inanadsapi “Manaco” tiquinejeraji. Madija tipano idanidsa naco “Ohuaccone manaco odana” tiquinejerana, onajaro. ⁴⁰Madija attipa: “Ohuadsa ima tinanani” nadsa ima cattedehuaiji tia tohuaccadsa tamine attipa: “Ima tinanajaro manaconi pohuadsa titetepicca da tinaji” nadsapa pohuadsa da tinaji. Titetepicca onihi ssirinijine huatini ccara taraha najaro naqui nema nehe pohuadsa da tinaji, onajaro. ⁴¹Nadsama madija naco benehi huaji tani toccahijine tiadsa huati tadsapa: “Jari, ohua acco ticamaji. Ajicca odsa onihidsa ohua tineboji” nadsapa pohua attissa tinanaji. Pohua tinebohuihuaji tineboraha denima pohua accode ticcanijine bica tani, onajaro –nade Jeso. ⁴²–Nadsama madija tiadsa: “Jari, ohuadsa manaconi jirehe da taji” nadsapa pohuadsa da tinaji. Madija ohuaha atti naco: “Pohuama ohuadsa da taccajo. Nidsa tiadsa da onanihijine” nadsapi teccocco-jarajo. Pohuadsa da tinaccajo, onajaro –nahi nade Jeso.

Jesocca marinajapi: –Tiadeni huadidedeniraha
pohuadenidsa tetideni huanacquiri nana –najari
Roca 6.27-28, 32-36

⁴³–Moisesicca marinaja timittamanajonaropi ajima najaro: “Titessedenidsa tetideni huanacquiri nana” quiquina nade. Ticcadeni ididenicca marinaja timittamanajonajaro naqui: “Tiadeni huadidedenipa manaco ticahadibaquuijo” quiquina najari. ⁴⁴Naraha ohuattipi ajima onajaro: Tiadeni huadidedenidsa naqui pina tetideni huanacquiri naji. Tiadeni najidsodedenipa Dio pohuadeni bodi acco icamabaquuihijine Diodsa huati huati tiquinana, onajaro. ⁴⁵Nadsana tiadenipi Abi Diocca ejedeni

tiquejenani ahuato tanijine. Dio memehuaaji madijaripa bica tajari. Madija huapimadsa huati huana tajari. Bicaqquri najari-denidsa huati huana tajari, tabaccoraqquri najari-denidsa naco huati huana tajari. Dio pocca nahatohue majipa Pohuadsa jehe quinajarideni, Pohua Attidsa iboqquri najari-deni huapimadsa tossiajabacquiari. Pocca nahatohue passo naqui Dio Pohuajine huapimadsa caji taridsajaro. ⁴⁶Tiadenidsa ohuatti ajima najaro: Madija tiadenidsa huatideni huanaqquri najari-denidsara tetideni huanaqquri nani ojari nadsapi pina madija dsama huapimacca imassa tinanamanajaro. Najarossa tinanamanadsapi nidsa memehuaaji Dio tiadenidsa: “Jehe bicaqquri tiquinani” najarahitohui. Ajana, imasiri cajimanajarideni pina *romanodenicca taminedsa dsiniro da tanijine nanaccadenipa aja pohuadenidsa huatideni huanaqquri najari-denidsara huatideni huanaqquri nahi ojari najari. Paji, pohuadenissa tiquinejerana. Tiadenipi tohuati huanehe denima bica tanicca ticajimanadsana bica tani. ⁴⁷Nadsama tiadenipi ticcadeni madijadsa tetidsemanadsa: “Nija, ¿bica tinaqui?” tiquinaraha madija ohuahadsa: “Nija ¿bica tinaqui?” tiquinejeradsa pina madija ohuahadenicca madiessa tiquinajaro. Ajana, Diodsa jehe quina-jarajarideni poccadeni madijadsa: “Nija, ¿bica tinaqui?” nanaridsamana naraha nocco-deni jidsa tajaridsapa: “Nija, ¿bica tinaqui?” quina-jarahi. Paji, tiadenipi pohuadenissa tiquinejerana. ⁴⁸Ticcadeni Abi Dio memehuaaji madijaripa pocca tohuati huanehe pajiranissa tajaro. Tiadeni naqui tinapajiramananissa taji, pina ticcadeni Abi Diocca tohuati huanehessa tinanamanana, onajaro –nahi nade Jeso.

***Jesocca marinajapi: –Dio Pohuadsa ima bicani
tinanamananijinepi ajima tiquinani bica tani –najari***

6 ¹–Pajissara Dio Pohuadsa tidsepedeni ijimanadsa ima bicani tinanamanadsapi madija qqui toquinahijinera tidsepedeni ijimana tejeraji. Madija tiadeni qqui toquinadsa attidenipa: “A., tijinedeni bica tani. Bicaqquri tiquinani” quinahitohuira timadimana tejeraji. Paji, attideni nama quinahitohuira timadimanadsapi Abi Dio memehuaaji madijaripa najaro ima nahato tapoja najari. Nidsa dsotode pohua baccohuaji tidomodeni huadsapi: “Tijinedeni bica tani. Bicaqquri tiquinani” najarahitohui. Pocca daniji bica-bote naqui tiadenidsa da inejeranitohui, onajaro –nahi nade Jeso.

²–Nadsama cappiramanajaridenidsa manaconi jirehe da tina-baqquinijinepi pohnadenidsa teti huana tadsa manaconi jirehe da tinabaqquni bica tani. Naraha madija tijine bica tani qqui toquinadsa: “A., bica tahi. Pohnuapa cappiramanajaridenidsa manaconi jirehe da da najari” quinahijine tohuini tadsapi bica tejerani, onajaro. Attideni nama quinahi tohuini tadsapi pina maidsajidederabotedenissa tajaro. Pohnuadeni naco cappiramana-jaridenidsa da da quinaraha huatideni huanaqqiri najarajari. Pohnuadenipa madija mittamanahijine jodiodenicca Dio Atti mamarihuaji huati huati toquinajari, amossinihuaji naco huati huati toquinajari. Pohnuadeni poccadeni imaraha: “Ijine bica tani, bicaqqiri inani” quiquina najari. Madija ohuahadeni attidenipa: “¡Pajissa! Bicaqqiri tiquinani” quinahitohuira madimanajari. Naraha ohuapi pajissehera tiadenidsa huati onajaro: Najaridenipa tohuini quinahicca cajimanapodsapa nidsa dsotode Dio Pohnu baccohuaji domo huadsa najaridenidsa Diopa: “Jehe, epejeni. Bicaqqiri tiquinani” najarahitohui. Pocca daniji bicabote naqui da inejeranitohui, onajaro. ³Naraha tiapi cappiramanajari-denidsa da tinanijinepi ticca ima tecomeraridsa tejeraji. Titesse bica tajaridsa naco ticca ima huati tina-jeraji, onajaro. ⁴Ajina, cappiramanajaridenidsa da tinanijinepi madija ohuahadeni qqui toquina-jaradsana da tinani bica tani, onajaro. Nema tadsapi madija ohuahadeni ticca daniji nahatoqqiri najararaha Abi Diona nahato tahi. Nidsa dsotode Dio Pohnu baccohuaji tedsa tia catidsedsapa: “Jehe, epejeni. Bica tinani” nahitohui. Pocca daniji bicabote naqui tiadsa da inanitohui, onajaro –nahi nade Jeso.

***Jesocca marinajapi: –Diodsa huati tiquinanijinepi
ajima tiquinani bica tani –najari***

Roca 11.2-4

⁵–Abi Diodsa huati tiquinanijine naqui pina maidsajidederabotedenissa tiquinejeraji, onajaro. Najaridenipa Diodsa huatide toquejenadsapa pina madija Diodsa disseraqqiri najarissa quinaraha maidsamanajari. Nadsa najarideni nama quiquina najaridenipa jodiodenicca Dio Atti mamarihuaji domo huedsadsa, amossinihuaji domo huadsa naco madija ohuahadeni mittamanahijine Diodsa huatide totoquejena najari. Madija ohuahadeni attidenipa: “A., Diodsa huatide disseraqqiri nahi” quinahitohuira mamadimana

najari. Noccodeni jo najonahi quinahitohuira madimanajari. Nadsama ohuapi pajissehera tiadenidsa huati onajaro: Najaridenipa tohuini quinahicca cajimanapodsapa nidsa dsotode Dio Pohua baccohuaji domo huadsa najaridenidsa Diopa: “Jehe, epejeni. Bicaqquiri tiquinani” najarahitohui. Pocca daniji bicabote naqui da inejeranitohui, onajaro. ⁶Naraha tiapi Abi Diodsa huati tinanijinepi “Ohua icattaquimana-jerana” tadsa ticca odsa bodihuaji tiqqedsima, noccobiji ticahacossa nadsa tia motta Diodsa huati tinaji. Nema tadsapi madija ohuahadeni ticca huatinaja mittamanageraraha Abi Diona mittahi. Nidsa dsotode Dio Pohua baccohuaji tedsa tia catidsedsapa: “Jehe, epejeni. Bica tinani” nahitohui. Pocca daniji bicabote naqui tiadsa da inanitohui, onajaro –nahi nade Jeso.

⁷–Diodsa huatide tijadsa naqui ticca huatinaja huati tinadsapi huati tinajaro, huati timanipomajaro, huati timanipomajaro tejeraji, onajaro. Ajana, Diodsa toquejena-jarajaridenipa nama nama quiquina najari. Tohuini quinahicca tohui pohuadeni cacahuade huatide toquejenadsapa huati toquinajari, huati nimanimana-pomajari, huati nimanimana-pomajari quiquina najari. “Nema inadsa etti mittahijine” quiquina naraha pohuama huati huati toquinajari. ⁸Naraha tiadenipi pina pohuadenissa tiquinejerana. Diodsa ponima huati huati tiquinejerana, onajaro. Ajana, ticappiramananicca huapima Dio pohuadsa huati tiquinejeraccadsama Pohua bodipa nahato tapohui, onajaro –nahi nade Jeso.

Diodsa huati huati inanijinecca ima

Maraco 11.25-26; Roca 11.1-4

⁹–Nadsama Diodsa huatide tiquejenanijinepi tettidenipi ajima tiquinaji:

“Jehe, Abi Dio, memehuaji timadijaro, tiadsa iquejenaropi ticca madija iquejenajaro. Tiapi nahatojide tijirani ojari tani. ¡Bica tinani! Madija huapima: ‘¡Dio, tiapi deni tijani!’ quinana, inajaro.

¹⁰ Ticca cacahuehe huapimadsa tinanaridsana, inajaro. Pina memehuaji tiadsa madimanajarideni huapima tettidsa iboraqquiri dsadsanapomana najarissa quinahijine aji namihuaji imadijaro ia huapima naqui tettidsa iboraqquiri inana, inajaro.

¹¹ Itapari naco huada huajijiradsa iadsa da da tajo.

¹² Madija iadsa tabaccorehe inanamanadsa poccadeni tabaccoreheda: ‘Epejena, huadi onejerani’ inadsapi manaco icca tabaccorehe epeje tinanaji, Abi Dio. Icca tabaccorehe manaconi najidsohue iadsa tinana-jeraji, inajaro.

¹³ Imasiritohui ibodi huatodsas naqui najaro tohuini inejeranijine ia acco ticanabaquiji, imasiri inana-jeranijine, inajaro. Tabaccorehe jinede Satana pohuahuaaji ia joca todsimanibaquij-jarahijine ia tecahuabaquinissa taji, inajaro. [Tiana ia huapima tecahuabaquij-dsanapojaro. ¡Daco tijirani! ¡Bica tinani! ihidsanapo najaro.] Epejeni.”

¹⁴ Nadsama Jesopa pohuadenidsa denima huati tajari: –Jehe, ajina madija tiadsa ima inatabaccoradsa naqui tiapi: “Najaro imadsa ohuati ajimana. Pohuadsa ohuadi-gerana” taji. Nema tadsana ticca Abi memehuaaji madijari ticca imasiridsa huati ajamahitohui. ¹⁵ Naraha madija ohuahacca imadsa epeje tejeradsapi ticca Abi Dio naco ticca imasiri epeje inana-geranitohui, onajaro –nahi nade Jeso atti.

***Jesocca marinajapi: –Jipehe tinebocossamananijinepi
ajima tiquinani bica tani –najari***

¹⁶ –Diodsa huatide tiquejenanijine jipehe tinebocossa-manadsapi tipanodeni odsaquiri nejerana, pina tipanodeni bica tadsa timadimanana, onajaro. Naraha tipanodeni odsaquiri nadsapi pina maidsajidederabotedenissa tiquinarana. Najaridenipa madija ohuahadeni qqui toquinadsa: “A., jipehe nebocossamanahi, Diodsa disseraquiri nahi” quinahijine tohuira quinadsapa pohuadenijine pohuadeni cacahuamanahissa tajaradsapa ocasseraquiri nanaja najari. Nadsama pajissehera tiadenidsa huati onajaro: Najaridenipa madija attideni tohuira quinadsapa pohuadeni tohuini quinahicca cajimano-gerari. Nadsapa dsotode Dio Pohua baccohuaji domo huadsa Diopa pohuadenidsa: “Jehe, epejeni. Bicaquiri tiquinani” najarahitohui. Pocca daniji bicabote pohuadenidsa da inejeranitohui, onajaro.

¹⁷ Naraha jipehe tinebocossanijinepi tahide tipano ssahua., titati ssiri tadsana jipehe tinebocossani bica tani. ¹⁸ Nadsama jipehe tinebocossani madija ohuahadeni ssamoquiri naraha Abi Diodsapi ahuatani. Pohuana nahato tajari. Nidsa dsotode Pohua baccohuaji tedsa Diopa tiadsa: “Epejena, ticca ima bica tani” nahitohui. Pocca daniji bicabote naqui tiadsa da inanitohui, onajaro –nahi nade Jeso atti.

**–Memehuaji Dio madihidsa ima bicanira
tinahapimanana –najari Jeso**

Roca 12.33-34

¹⁹–Jehe, aji namidsa timadimanaccadsapi tidsepedenitaji tinahapimananijine tohuinira timadimana tejeraji. Ajina, todsepetaji tinahapimanadsapi poni maccanijine ssari nani caji tani. Motapi ponira majatoni caji tani. Motapi ponira botedsa jadsi tani. Motapi botie toja tani. Nema nadsapi tidsepedenitajipi jica-ca-ca... nema nehe amossi nani caji tani, onajaro. ²⁰Nadsama aji namidsa timadimanani paji naccadsama Dio Pohua tohuini nahicca tohuira timadimanaji, onajaro. Memehuaji aja Dio madihidsana ima bicani tiadenidsa tohuapiponijinepi ajijaro namidsa tidsepedeni ihijimana naji. Nema tiquinadsapi Diocca daniji bicabote tiadenidsa da inanitohui. Najaro Diocca danijipi poni maccanijine ssari nanijine nohuerani. Majatonijine nohuerani. Bobotide botihijine nohuerahi. Paji jicarinijine naqui nohueranitohui, onajaro. ²¹Ajina, tiadenipi ajijaro namicca todsepetaji tohui, dsiniro tohuira timadimaneje nadsapi najarodsara tetidseridsamanajaro. Naraha Dio Pohua tohuini nahicca tohuira timadimanadsapi Diocca danijidsana tetidsemananitohui, onajaro –nahi nade Jeso.

Dio ssiejene ibodidsa qquedsimahijine bica tani

Roca 11.34-36

²²–Inocopi essiredsa pina jojororossa najaro. Inocco bica tadsapi essire ssiajani ijini. Idsepedsa naqui damade nahato inajaro. Emoridsa naqui ccaridsade nahato inajaro. Icca tarabajidsa naqui ipajirajaro. Ibodi huatode naqui nahato inajaro. ²³Naraha inocco bica tejeradsapi pina inocco dsidsi tajarossa najaro, issamo tani. Dama inanijine naqui ssamo tani, iccaridsanijine naqui ssamo tani, icca tarabajidsa naqui ssamo tani. Imapi najarossa najaro tibodidenidsa Dio ssiejene toquedsimadsapi tibodideni ssiajani cajini. Naraha Dio ssiejene toquedsima-jeradsapi tibodidenidsa pina dsidsini ijiridsajarossa najaro. Aji tiadenipi: “Nahatoququiri inani. Ibodi ssiaja tani” tiquinaraha najaro ssiajanipi occa imassa nejera-dsapi ssiajani ticajimana-jerajaro. Dsidsini oppina tanicadsa timadimanajaropaji, onajaro –nahi nade Jeso atti.

Diotohui, dsinirotohui imadinijine ssamo tani

Roca 16.13

²⁴–Jehe, madija pohua dossede pamahadsa dsepe ijihijinepa pajira-jarahi. Dossede pamaha cajidsapa ojaria-dsana huati huana tajari. Pohua attidsana ibora tahitohui. Ohuahadsa ajimani huati huana tadsapa pina pohuadsa jipera tajarissa nahitohui. Pohua attidsa ibo tahitohui.

–Madija Diocca medse tojadsapa dsinirodsa medse tojahijine ssamo tahi. Dsinirotohuira huatidsedsapa Diodsa huatidsehijine ssamo tahi. Ima pamehepi Diotohui, dsinirotohui najaripa madihijine ssamo tahi, onajaro –nahi nade Jeso atti.

Dio pocca ejedeni ecahuabaquijari

Roca 12.22-31

²⁵–Nadsama tiadenidsa ohuattipi: Timadimananijinecca ticappiramanani noppineni ticappinamana tejeraji, onajaro. Pina ¿nejecora ojipapadseje? ¿Nejeco dsamatapa ppejenera dse onapadsaja? ¿Nejecora ohuedsapadseje? tiquinejeraji. Najarotohuipi tibodideni huahuatomacca nejerana, onajaro. Icca madipepi dsamatapaha ojari-jarahi. Icca madiena denima bica tajaro. Essire naqui etero edsanijinea ojari-gerani. Essirecca imana denima bica tajaro –nahi nade Jeso.

²⁶–Ajana, meme abarideni memedsa jahiridsajaripa qqui qqui tiquinani. Najaridenicca imadsa tibodideni huatomamanaji. Pohuadenipa huidsajacca ppa nahi pperaquiri, huidsajacca ppa nahi bono poreraquiri nadsapa nidsa dsotode jipamanahijine ppa nahi bono naco odsadsa ecahuamana-jarajari. Naraha ticcadeni Abi Dio memehuaji madijaripa pohuadenidsa jipamanahijine da da ihinanajari. Diopa meme abaridenidsa huati huana taraha tiadenidsana denima huati huana tajari. Tiadenidsa naco tijipamananijinecca da da ihinana-hitohui. ²⁷Naraha tiadenipi ¿nejecotohui tibodideni: ¿Denima omadi-dsanapopadseje? tiquinajaro? Najarotohui tibodideni huahuatomacca nadsapi ¿ticcadeni madie denima tinamananijine nahatoquiri tiquinaqui? ¡Nahatoquiri tiquinejerani! Ponima tibodideni huahuatomacca nejerana, onajaro –nahi nade Jeso.

²⁸–Nadsama ima onihi naqui: ¿Nejecotohui etero ticajica-manani noppineni ticappinamanajaro? Najarotohui tibodideni huahuatomacca nejeraji. Jari, qqui tiquinanaja mohue ppata taridsajari. Mohuepa tarabaidsera, huepe picocora, etero ssequiquira taraha ppata taridsadsapa pina etero bicani huedsamanajarissa najari. ²⁹Ajana, maittaccadsama naco Isaraeridenicca tamine Saromopa dsepe ssejideradsapa etero bicani huatini ccara tanicca huedsadsapa bica tataja naraha mohuena denima bicaquiri najari, onajaro. ³⁰¡Jaho, ticcadeni jehenijipi badsira tani! ¿Nejecotohui tiadenipi “Dio ia tohuacahuabaquihí” tiquinejerani? Ajina, dseropi etero huedsanijine cappiraraha Diojine poni mohueni cajidsapi pina etero bicani huedsajarossa nani. Dseropi mohueni cajini bica taraha huada huada huada nadsa dsequeri nadsapi botta ina tani. Naraha dseropi ajimanicca. Tiadenipi pina aji dserossa tiquinejerani, Diocca cacatidse tabaqqi tiquejenajaro. Nadsama Diopa tedsamananijinecca etero naqui denima tiadenidsa da inanitohui, onajaro –nahi nade Jeso.

³¹–Naraha tiadenipi timadimananijinecca ticappiramanani noppineni ticappinamana tejeraji. Pina ¿nejecora ojipapadseje? ¿Nejecora dsamatapa ppejenera dse onapadsaja? ¿Nejecora ohuedsapadseje? tiquinejerana, onajaro. ³²Diodsa toquejena-jarajaridenipa nama nama nanaridsamana najari. Poccadeni jijipa tohuira, pohuadeni dsepetaji tohuira bodideni huahuatomamana najari. Naraha ticcadeni Abi Dio memehuaji madijari ticajimanani. Pohuapa ticappiramananicca huapima nanahato najari. ³³Diocca cacahuehecca imadsa tibodideni huatomaridsanijine Diotohuira tataridsamana naji. Dio Pohua jipa tahiccadsara tetetidsemana naji, onajaro. Nema tiquinadsana Diojine ticappiramananicca tiadenidsa inanaridsanitohui, onajaro –nahi nade Jeso.

³⁴–Jehe, titedsejemadenicca huada tahimarini tohui tibodideni huahuatomamana nejerana. Pina: “¿Dsemassa nejeco imara tojapadseje?” titiquina nejerana, onajaro. Jidapanacca ssiaja tahimarinira tibodideni huahuatomamana nana, onajaro –nahi nade Jeso atti.

Madija ohuahacca ima nattome tiquinejeraji

Roca 6.37-38, 41-42

7¹–Nadsama tiadenidsa ohuattipi: Madija ticatte-jidsamana tararajo. Pina madija ohuahacca ima tiadenidsa bica tejeradsapi: “A, nama jiderahi, pocca ima bica tejerani” tiquinejeraji, onajaro. Madijadenidsa tetti-deni nema tiquinejeradsapi manaco Diopa tiadenidsa: “Ticcadeni ima naqui bica tejerani” najarahitohui.

²Madija ohuahacca ima tibodidenidsa huatomamanageropi pina pocca ima nattome tiquinajarossa najaro. Naraha madija ohuahacca ima nattome tiquinadsapi manaco ticcadeni ima naqui nattome quinanitohui. Madija ohuahadsa tinanamanajarocca imapi manaco tiadenidsa najarossa inanamananitohui, onajaro. ³Naraha tiadenipi timecotecca madie pina Diocca marinajassa nejerani qqui tiquinadsa tettidenipi: “A, tijine bica tejerani” titiquina naraha tiadeni naqui imasiri ticajimanani. Nadsama najaro ticcadeni imapi pina timecote noccodsa ahua majiconi huedsani qqui tinajarocca imassa najaro. Timecotedsa: “A, tinoccodsa ahua majiconi huedsaha, tire oninena” taraha tinoccodsa naqui ahua majiconi imeni huedsani. Qqui tinanissa tejerani, tinocco ahuatora tani. ⁴Nadsama tiadenipi imasiri ticajimanadsapi ¿nejecotohui timecotedsara: “A, tijine bica tejerani. Tia acco ocamana, ticca ima tobicanijine” titiquina naraha tiadenipi tahide ticcadeni imaha tijinedeni tobicapo-jerajaro? ⁵¡Jaho, nema tiquinadsapi pina mamaisadedenissa tiquinajaro! Ticcadeni ima bica tejeradsapi aji ticcadeni imaha tinabicamanapoji. Nadsana timecote acco ticamamanahijine tipajiramananitohui, onajaro –nahi nade Jeso.

⁶–Tiadenidsa ohuatti onihi naqui: Madija Dio Atti mittade jiperaqu岸ri najaridenipa pina ette huadi tararissa quinajari. Ettepa pohuadsa jijipa bicahicca da tiquinaraha tiadenidsa jone tararadsapa tiadeni ccanaja camahitohui. Poroco naco. Porocopa pohuadsa huatini ccara tanicca, bica tanicca *perla da tiquinaraha ssamo tadsa ttai ttai inananitohui.

Diodsa huatide dissera inanijinecca ima

Roca 11.9-13; 6.31

7–Jehe, Abi Diodsa huati huati titiquina naji, onajaro. Dio Pahuadsa huati tiquinadsapi tiadenidsa ticcadeni huatinajassa nehe da inanitohui. Pina tohuini tanicca qquide dissera tinadsapi bacco tinanitohui. Najarossa najaroa Diodsa huatide dissera tinadsapi Pahuapa ticca huatinaja tiadsa inapajiranissa tanitohui. Pina madijacca odsadsa tiqquedsimanijine tohuini tadsapi odsa jinededsa huahua tadsa tiadsa noccobiji icatabojidsanitohui. Najarossa najaroa Diodsa huati huati tiquinadsapi ticcadeni huatinaja mittahi. ⁸ ¡Pajissa! Madija Diodsa huati tadsapa Diopa pahuadsa pocca huatinaja da inanitohui. Madija naco Diodsa huatide dissera tadsapa Dio Pahuajine pocca huatinaja inapajiranissa tanitohui. Madijapa pina Diocca noccobijidsa huahua najarissa nadsa Diopa pahuadsa noccobiji icatabojidsanitohui, onajaro.

⁹–Ajana, madijapa pocca ejedeni pan tohui huati tadsapa ¿pohua bedidsa siba da ina taqui? Nohuerani. Tiadenidsapa madija nama najari nohuerajari. ¹⁰Madija ohuaha naco pocca ejedeni aba tohui huati tadsapa ¿pohua bedidsa macca da ina taco? Nohuerahi. ¹¹Tiadenipi tabaccorehe ticajimanaraha ticcadeni ejedenidsa bica tahicca dade nahatoqquri tiquinani. Nadsapa ticcadeni Abi Dio memehuaji madijari Pahuadsa huati tiquinadsapi tiadenidsa bica tahicca dade denima jipa tahi, onajaro –nahi nade Jeso atti.

¹²–Jehe, nadsama tiadenidsa madija huapima ima bicanira inanamananijine tohuini tiquinadsapi madija huapimadsa naqui ima bicanira titinanamana naji, onajaro. Nema tiquinadsana Dio Atti tecahuamananissa tajaro. Aji Moisesicca dsodonijsa tinamanajaro, Dio Atti cacomerabotedenicca dsodoniji naqui najarossa tinamanajaro, onajaro –nahi nade Jeso atti.

Jahui pamanicca ima

Roca 13.24

¹³–Diocca cacahuehedsa tiquejenanijinepi ohuadsa jehe tiquinanissa taji. Pina noccobiji tojera tanihuaji jai tijedsimajarossa tiquinaji. Madijapa ohuadsa jehe quina-jarajaridenipa pina noccobiji toja tanihuaji jai tojedsimajarissa quinajari. Pina jahui imeni toccade najora tanihuaji jai tojararissa

quinajari. Naraha najaro jahuiipi nanajidso jiquejerani-huaji toccajaro. Nahihuajina madija huemaha toquejenajari. ¹⁴Naraha madija ohuadsa jehe quinahissa tajaridenipa nocco-biji tojera tanihuaji jai tojedsimajari, pina jahui bedenihuaji jai tojajarissa quinajari. Najaro jahuihuaji jai tojadsa Diocca cacahuehedsa bacco toquinadsapa camittehe jiquejeranicca cajimanahitohui. Nahihuajipa madija pamadema dsanapojari –nahi nade Jeso atti.

Ahua bono tahimari

Roca 6.43-44

¹⁵–Jehe, tiadenidsa ohuattipi: Paji, madija mamaidsa-dedeni tiadeni tocamidsabaquihijine tiadenihuaji bacco toquinadsapa: “Dio tahimari ecomeraridsajaro” quina-hitohuiraha ¡paji! onajaro. Pohuadeni attidenipa majida taraha maidsamanajari. Pohuadenipa pina edede joneqquri najarissa quinaraha bodidenipa pina dsomaji oppinabotessa quinajari. ¹⁶Poccadeni madie tinocodenidsa qqui tiquinadsa otahimaridsa dsepedeni ijimana-jaradsapa nahatoqquri tiquinanjine: mamaidsadedeni quejenajari. Najaro imapi pina ahua bono cahuahi qqui inadsa pohua ede oni nahato inajarossa najaro. Nahatoqquri tiquinani: Jobo bono tohui inadsapi cotihi ininedsa pore inajarahi; jobo pohua ininedsana pore pore inajari. Iquiera bono tohui inadsa naqui jessi ininedsa pore inajarahi; iquiera pohua ininedsana pore inajari. ¹⁷Ahua ede bica tadsapa bono naco bica taha cahua tahi. Naraha ahua ede bica tajaradsapa bono naco tabaccora taha cahua tahi. ¹⁸Ahua ede bicahipa bono tabaccora taha cahua-jarajari. Ahua ede tabaccora tadsapa bono bica taha cahua-jarajari. ¹⁹Ahua huapimapa bono bicahi cappiraridsamanadsapa ca ippiridsamanadsa botta quinajari. ²⁰Aji madijacca ima naqui pina ahua bonocca imassa najaro. Madijapa: “Dio tahimari ecomeraridsajaro” quinaraha poccadeni madie bicani cappiramandsapa mamaidsadedeni quejenajari nahatoqquri tiquinani. Pina ahua tabaccora tajaro botta quinadsassa nanitohui najaridenipa nidsa dsoqquemanahi nattihuaji dsama jicadsa naqui poni ehuerani diji tehe nema dsanaponihuaji toquejenahitohui –nahi nade Jeso atti.

***Madija motapa Diocca cacahuehehuaji
jai tojamacossa-jarahitohui***

Roca 13.25-27

²¹–Madijapa ohuadsa attideni: “Ohua Medsede” quiquina nahi huapi taraha motapa Diocca cacahuehehuaji jai tojedsima-jarahitohui. Occa Abi Dio memehuaji madijari Pohua tohuini nahiccara inanamanajarodenina Diocca cacahuehehuaji jai tojedsimahitohui, onajaro. ²²Nadsapa nidsa madija huapimacca ima Dio icattemanijinecca huada bacco tadsapi ohuattidsa iboqquri najarideni ohuadsa ajama quinahitohui: “Ohua Medsede, ticca ima huapimapi ohohuacomeraridsa nadija. Tia oni hua onadsa naqui madija bodidenidsa Satanacca dodosse tabaqqi madidsamanajarideni dosse dosse ohoninebaqqi nadija. Tia oni hua onadsa naqui qqi toquinapo-jarajaricca ocanahatori canani huapi tadija” quinahitohuiraha najaridenipa Diocca cacahuehehuaji jai tojedsima-jarahitohui, onajaro. ²³Jehe, nidsa dsotode najarideni motadsa ohuattipi: Tiadenidsa onocco jidsa tani; occa madija tiquejena-jerani. Dio Attidsa iboqquri tiquinadsapi Pohua tohuini nahicca tinanamana-jerajaro. ¡Aji ohuadsapi huajiji tinaji! onanitohui –nahi nade Jeso atti.

Odsa capamajarocca ima

Maraco 1.22; Roca 6.47-49

²⁴–Madija ohuatti mittamanadsa ohuattissa inamanajaropi pina aja madija pocca odsa nahatode nahato tajarissa quinajari. Madijapa pocca odsa icanahatodsapi nami ccara tanihuaji bacco tadsana huehuema ppa idsajaro. Nadsapi odsa daco cajirajaro. ²⁵Nadsapi passo cca, hueni cappanima, passo toqqemoja, jojode jadsirema jo jo nadsapi odsadsa ssonari ssonari naraha toquehedima-jerajaro. Odsa toquehedima-jerajaropi huehuema nami ccara tanihuaji bacco teje najaro. ²⁶Naraha madija ohuatti mittamanaraha ohuattissa inanamana-jerajaropi pina aja madija pocca odsa nahatode ssamo tajarissa quinajari. Najari madijapa pocca odsa icanahatodsapi nami ccara tanihuaji bacco tejeradsapi huehuema ssiqui daco nanidsara ppa idsajaro. ²⁷Nadsapi passo

cca, hueni cappanima, passo toqqemoja, jojode jadsirema jo jo neje nadsapi odsa toquehedimajaro. Odsa toquehedimadsapi catirorijarossa najaro –nahi nade Jeso.

²⁸Nadsama Jeso iadsa huati huati taha jicadsa nahi-dsa madija huapima taharibobo canajari bodidenipa: “A., pohua attipa bica tahi” quinade. ²⁹Jeso pocca marinaja mari icanabaquidsapa pohuana nahatojiderajari, atti caji tajaria. Aja jodiodenicca marinaja maridedeni attissa najarajari. Najarojine pohua atti madijadenidsa bica tajaro, quinahi nade.

***Jesopa dsama huapimacca madijadsa
huati cahanari canajari***

9 ³⁵Nadsama Jesopa odsa panani onihi, onihi naridsa-jarodsa, odsa capamema najaro onihi, onihi naridsa-jarodsa bacco bacco nanaridsa nadsapa poccadeni Dio Atti mamarihuaji mari mari nanaridsa najari. Jesopa Diocca cacahuehecca ima bicani mari mari nanaridsa najari, comani onihi, onihi cajiridsamanajarideni naco ihinanomibaquirdsa najari. ³⁶Jeso madija pohuatohui jahijonana canahi qqui inabaquidsapa pohuadenipa pina edede pohuadeni cacahuade jiraha pohuama mamadiri naridsamanajarissa quinajari. Nama quinadsapa Jeso pohua bodidsa: “A, tohuati nahanaquiri nahi” nadsa pohuadenitohui huati cahanariri canaridsajari. Madija huapimapa pohuadeni acco camade, pohuadeni maride cappiramanadsapa pina edede pohuadeni cacahuade nohueradsa nanajidso toquejenajarissa quina tahi. ³⁷Nadsapa Jeso pocca mamari tabaquidsa huati tajari: –Madija Dio jiraha madimanageripa ohuadsa jehe quinahijinepa huapi taraha pohuadeni maridea madija pama quinajari. Pohuadenipa pina huidsajacca bono jadahi jica-jarajarissa quinara huidsajacca bono poredea madija pama quinajari, pajiramana-jarahi. ³⁸Nadsapi huidsaja jinedecca dodosse tabaqqi denima porede tosi bahi nahijine jinededsa huati tiquinaji. Nadsama aji tiadenipi Diodsa huati huati tiquinaji; nahi aja Dio Atti mamaridedenipa denima tosi bahi nahijine, madija huapima Dio Atti mittamanaridsadsapa ohuadsa toquejenaridsahijine –nade Jeso.

Ticcadeni imajine ja tiquejenadsapi Jesodsara tiquejenaji

11 ²⁸–Nadsama ima ccanajani temanadsapi pina ccanajabote jore tiquinadsa ja tiquejenajarossa nadsapi ohuahujira jai tijajonaji. Otahimaridsa pajissa tiquinadsapi tibodideni jassi onanabaqqunitohui. ²⁹Occa marinaja tiadenidsa tojanijinepi ohuadsa tiadeni teccoramanaji, ohuadsa iboraqquri tiquinanijine, onajaro. Ohuadsa ticahatteraji. Tiadeni Maride ohuapi jone onani, bica onani. Tibodideni onabicabaqqunitohui. ³⁰Occa marinaja tiadenidsa tojanijinepi ojine pajiranissa tani. Ohuadsa pajissa tiquinadsapi pina ppahua taniccassa nani –nade Jeso atti.

Jesocca marinaja huidsaja ppappadecca ima tadsajani mari icanabaqqujari

Maraco 4.1-9; Roca 8.4-8

13 ¹Dsotodepa najaro huadadsa Jeso odsadsa qquenadsapa coridsa inidicca ssiquihuaji toqqedsippadsa huittajari. ²Madija huapi taha nahi pohuahujari jahidsippadsa Jeso mari icanabaqquihijine canoadsa toqqedsadsapa canoacca huihuittaridsa huittarijari. Nadsama madija huapimapa nahi coridsa inidicca ssiquidsa domo huajari. ³Nadsapa Jeso pocca marinaja ajijaro namidsa imadinicca ima tadsajani pohuadenidsa huati huati tajari. Pocca imapi ajima najarode:



–Huidsaja ppappadepa pocca huidsaja huirade toccajari.
⁴Nocco huira inaridsajari naraha motapa jahuihuaji catojaja najari. Nadsapa ppiriri jahironadsa amadsati saca quinajari.
⁵Aja nocco huira naridsajari mota naco siba ccababa tanidsa catojajari. Nanidsapi ssiqui bicani badsira taraha nama naha huassinaja moro tajari. ⁶Moro taraha jabo huapihuajira tocca-baqqujari. Maji ccajonadsapa maji ppoconejine botejari.
⁷Nocco mota naco namidsa cotihi caji tahihuaji catojajaria cotihi tedseje paja moro toquinarihi naraha cotihijine ssomi tojajari. ⁸Naraha nocco mota huira naridsajaripa nami bicanidsa catojaridsadsapa mororo canaridsadsa bica taha napijari. Bono cajiridsadsapa ede ojariapa bono 100 naha cajijari, ede ohuahaccapa bono 60 naha cajijari, ede ohuahaccapa bono 30 naha cajijari. ⁹Nadsama teribodeni ticajimanadsapi ohuatti timittamananissa taji, onajaro –nade Jeso atti.

Jeso attipa: –Ajijaro namidsa imadinicca ima tadsajani mari ocanabaqqujaripa ajima onajaro –najari

Maraco 4.10-12; Roca 8.9-10

¹⁰Nadsama ia, pocca dodosse tabaqqi iquejenajaropi Jeso pohuahuaaji huajijira icanadsa ajima inade: –¿Nejecotohui titahimari ajijaro namidsa imadinicca ima tadsajani pohuadeni mari mari titicanaridsabaqqi najaritta? –inade.

¹¹Naraha Jeso iadsa ecomerade: –Jehe maittaccadsama Diocca cacahuehecca ima dsati najoraporaha madija inahattabaqqi-jaraccade. Naraha jidapanana Dio Pohujine pocca cacahuehe tahimarini dsati tiadenidsana ahuato tani. Naraha madija motapa Dio Pohujine pohuadenidsa ahuatora tadsa mittamana-jarajari –nade Jeso atti.
¹²–Ajina, Diocca cacahuehe tahimarini mari ocanaridsabaqquihicca madija tohuattajaripa Diojine najaripa denima tohuattahitohui. Nadsapa najarina denima nahato tahissa tahitohui. Naraha Diocca cacahuehe tahimarini mari ocanaridsabaqquihicca madija mimitta naraha tohuattajaradsapa occa marinaja cappirahissa tahitohui. Badsira taha tohuattadsapa najaro naqui amossi nanitohui, onajaro.
¹³Nema najarojine otahimari ajijaro namidsa imadinicca ima tadsajani madijadeni mari ocanaridsabaqqi

naridsapohui najari, onajaro. Pohnadenipa qqui qqui toquinaraha pina qqui toquirahi najaripaja. Diocca marinaja mimittamana naraha pina mittamanerahi najari. Pohnadeni bodi naco ssamoqquri najari. ¹⁴Nadsama poccadeni imapi pina maittaccadsama Dio Atti cacomera-bote Isahia dsodo inapojarocca imassa najaro. Jidapana najarossa najaro ima inanamanajaro. Aji, Isahia dsodo inapojaropi:

“Nidsa dsotodepi ohuatti mittamana-dsanaporaha bodideni ohuadsa jehe quinahissa tajaradsapa pina mittamanerahi naridsamanahitohui.

Nidsa pohnadeni noccodsa naco occa nahatonaja qqui dsanapomanaraha bodideni ohuadsa jehe quina-jaradsapa ssamoqquri dsanapomanahitohui.

¹⁵Ajajari madijapa bodideni tossamoridsadsapa paja tossamomanarihi nahitohui. Huaribodeni moda nahi nadsapa pina mittamanerahi nahitohui. Noccodeni naco modsi quinadsa pina qqui toquirahi nahitohui.

Naraha noccodeni modsi quina-jaradsapa nahissa qqui toquinahitohuiraha. Huaribodeni naco pina moda nahi najaradsapa nahissa mittamanahitohuiraha. Pohnadeni bodi naco tossamomana-jaradsa nahissa pajissa quinahitohuiraha.

Nadsama otohui quinadsapa pohnadeni onabicabaqquihi-tohuiraha jiperaqquri nahitohui” najari Dio napohui nade Isahia dsodo inapodsa –nade Jeso atti.

¹⁶–Naraha aji tiadenina ohua ocanahatoriri canajaro tinoccodenidsa qqui tiquinaridsajaropi Dio tiadeni tonahatidse-baqquijaripaja. Teribodenidsa naqui occa marinaja timittamanajaropi Dio tiadeni tonahatidse-baqquijaripaja. ¹⁷Pajissehera tiadenidsa huati onajaro: Maittaccadsama Dio Atti cacomeraqquri najarideni, Diodsa iboraqquri najarideni naco occa nahatohue aji jidapana tiadeni qqui tiquinajarocca qqui toquinahijine tohuini quina-poraha tahide tojicapodsapa qqui toquina-jarajari. Aji occa marinaja timittamanajarocca naqui najaro mittamanahijine tohuini quina-poraha tojicapodsapa mittamana-jarajari –nade Jeso atti.

***–Huidsaja ppappadecca imapi ajima najarona paji
–najari Jeso***

Maraco 4.13-20; Roca 8.11-15

¹⁸Nadsama Jesopa pocca marinaja ajijaro namidsa imadidnicca ima tadsajani mari icanabaquipomadsa naco pohua attipa: –¡Jari, titaharibomananissa taji! Huidsaja ppappadecca imapi ajima najaro –nade. ¹⁹–Nocco huira inaridsajari mota jahuihuaji catojaripapa pina madija Diocca cacahuehe tahimarini mittamanaraha “Ja...” quina-jaradsa pina mittamanerahi nadsapa bodidenidsa Dio Atti toquedsima-jerajarossa najaro. Aja ppiriri nocco saca inaridsajaripa pina maidsehe jinede Satana ccajonadsa bodideni inassamobaquijarissa najaro. Nadsapa Dio Atti pohuadenidsa nohuerajaro. ²⁰Madija ohuaha bodidenicca imapi pina aji siba ccababa tajarocca imassa najaro. Dio Atti mittamanadsa amadsati huatidsemanajari. ²¹Pohuadenipa Diodsa jehe dsanapomanahijineraha Dio Atti pohuadeni bodidsa toja-jerajaropi pina aja nocco siba ccababa tanidsa moro taraha jabo huapihuajira toccabaquijaricca imassa najaro. Nadsama aja maji ppoconejine botejaricca imapi Dio Attidsa jehe quinajarijine pohuadenidsa najidsohue ssonaridsa, ocasserani ahuamanadsapa jehe quidsati attidenia: “Epejena, Dio Attipi inebona” quinajari. ²²Madija ohuaha bodidenicca imapi pina namidsa cotihi caji tajaricca imassa najaro. Pohuadenipa Dio Atti mittamanaraha pohuadeni dsepedeni ihijimana najarotohuira disseraquiri nadsapa Dio Atti tocatterahissa tajarajari. Dsiniro tohuira quinadsa naco najaro imajine Dio Atti huatideni ajamamanajari. Poccadeni jeheniji pina aja nocco moro taraha cotihijine ssomi tojadsapa bono-jarajarissa najaro. Dio Atti mittamanaraha pohuadenijine Dio Atti madija ohuahadenidsa toja-jeranitohui. ²³Naraha madija ohuaha bodidenicca imapi pina aji nami bica tajarocca imassa najaro. Dio Atti mittamanadsapa jehe quinahissa tajari. Poccadeni jeheniji napsapi pina aja nocco nami bicanidsa moro tahissa tadsapa bono cajijari. Ede ojariapa bono 100 naha cajiridsajari. Ede ohuahaccapa bono 60 naha cajijari. Ede ohuahaccapa bono 30 naha cajijari. Aja Diodsa jehe quinahissa tajaripa madija mari icanabaquidridsadsapa madija ohuaha ohuaha quinaha Diodsa inanabaquimanahitohui –nade Jeso atti.

Aroso jidsadsa trigo tedseje dsero quejemanicca ima

²⁴Jesopa pocca marinaja ajijaro namidsa imadinicca ima tadsajani madija mari icanabaquipomajari: –Jehe, Diocca cacahuehe tahimarini onihi naqui pina huidsaja jinede pocca huidsajahuaji nocco bicahi huira inaridsajaricca imassa najaro –nade Jeso. ²⁵–Naraha dsome huapima cahadijadsapa pocca huadi ccajonajaria aroso jidsadsa trigo bicahi tetepidsa dsero nocconi pina trigossa najaro huira inaridsajaro. Huira inaridsaha jicadsapa aja huidsaja jinededsa huadi tajaripa toccanijari. ²⁶Nadsapa trigo bicahi moro tajari, bono cajijari. Dsero pina trigossa najaro naqui moro tajaro. ²⁷Nadsa huidsaja jinedecca dodosse tabaqqi qqui toquinadsa pohuadeni dossedehuaji jai tojanidsapa huati toquinajari: “Ia Dossede, ¿trigo noccora ticca huidsajadsa huira tajarajari-ttaco? ¿Nejecohuajicca dsero pina trigossa najaro nocconi ccajonajarotte? inajaro” quinajari. ²⁸Naraha huidsaja jinede attipa: “Jaho, madija ohuadsa huadi tajaripa dsero nocconi huira inaridsajaroa” najari. Nadsa pocca dodosse tabaqqi attidenipa: “Jipa tinadsapi dsero dsoppade jai janipomana, inajaro” quinajari. ²⁹Naraha jinede attipa: “¡Poni! Najaro dsero dsoppa tiquinejerana. Trigo naco dsoppa tiquirana” najari. ³⁰“Apajaccana, pamaha napimanaccana. Nidsa trigo bono jadadsana ahuato tahitohui. Nadsana bonotohui edema ti tiquinaridsahijine bica tahi. Nadsapa titidedenidsa ajima onanitohui: Jari, tahide dsero ti tiquinapona, onanitohui. Tide jicadsa ponira hua naqquidsapi jore nacossadsana botta tiquinaji, onanitohui. Naraha trigo bicahi bonotohui edema ti tiquinadsapa occa odsahuaji ohuadsa tojahijine jore jore tanimanajo, onanitohui” najari huidsaja jinede atti. Jehe, Diocca cacahuehepi najaro imassa najaro –nade Jeso atti.

***Jesopa mostaza noccocca ima tadsajani
mari icanabaqqijari***

Maraco 4.30-32; Roca 13.18-19

³¹Nadsapa Jeso pocca ima huati tapomahijine ajijaro namidsa imadinicca ima tadsajani mari icanabaquipomajari: –Diocca cacahuehepi pina mostaza noccocca imassa najaro. Madijapa pocca huidsajadsa mostaza nocco ppa idsajari. ³²Najari mostaza noccopa potera tajari. Ppa nahi nocco

ohuaha naco potera tajari caji taraha mostaza noccopa denima potera tahi. Naraha mostaza nocco moro tadsapa huidsajacca ppa nahidsa pohuana deni tojajari. Napidsapa pina ahua imehissa najari. Motaradsapa pohua ininedsa ppiriri pohuadeni tonine bina tarimana tahi. Jehe, Diocca cacahuehecca ima mari ocanabaquijaripa pina najaro imassa najaro. Tahidepi madija pamahadsa tojapojaro, dsotodena madija huapimadsa tojaridsadsapi Diocca cacahuehedsa madija tohuapihitohui –nade Jeso atti.

Jesopa pan ssaja tahijine quequejemacca ima tadsajani mari icanabaquijari

Roca 13.20-21

³³Nadsa Jeso pohua tahimari ajijaro namidsa imadinicca ima tadsajani mari icanabaquipomadsa naco: –Jehe, Diocca cacahuehe tahimarini onihi naqui pina pan ssaja tahijinecca imassa najaro. Amonejepi pan inahatohuijinepa pan ssaja tahijine quequejema oni levadura aja trigo ria nahidsa ijine quejemajari. Ssaja tahijine quequejema badsira taraha trigo ria nahi harina 3 kilopa motarajari. Naraha ssaja tahijine quequejema trigo ria nahi harinadsa tojaribaquidsapa ssaja tajari. Aji Diocca cacahuehecca ima naqui najaro imassa najaro. Tahidepa madija pamaraha dsotodena Diocca cacahuehecca ima dsama huapimadsa tojaribaquidsa madija huapimadsa tojaridsajaro –nade Jeso atti.

Jesopa pohua tahimari ajijaro namidsa imadinicca ima tadsajani mari mari ihicanabaquui najari

Maraco 4.33-34

³⁴Jehe, Jesopa pohua tahimari ajijaro namidsa imadinicca ima onihi onihi najaro tadsajani madija huapima mari mari ihicanabaquui najari. Pohuadenidsa huati tadsapa ajijaro namidsa imadinicca imadsara mari mari ihicanabaquui najaride. ³⁵Jeso nama najaripa aja maittaccadsama Dio Atti cacomerabote ojaria Jeso tedsejemacca ima dsodo inaponicca najarossa inanajaro. Najaro ima Dio Attidsa dsodo naniccapi ajima najaro:

“Otahimari ajijaro namidsa imadinicca ima tadsajani mari mari ohocanabaquui nahitohui.

Dsama onahato-geraccadsama naqui otahimari ahuatora tajonaraha.

Nidsa ojine najaro ima ahuatoridsadsapi madija huapima mari ocanabaquuiridsahitohui”
napohui nade Dio Atti cacomerabote.

***–Aroso jidsadsa trigo tedseje dsero quejemanicca
marinajapi ajima najaropaji –najari Jeso***

³⁶Nadsapa nahidsa Jeso madija huapima inebobaququidsapa toqqemoranihari. Odsahuaji toqquedsimanidsapa nahidsa pocca dodosse tabaquuideni iapi pohuahuaaji huajijira inadsa huati inajaro: –Jari, jidacca huidsajacca aroso jidsadsa trigo tedseje dsero quejemani tahimarini huati tinapojaro iadsa huati timanipomaji, imittanissa taniijine, inajaro –inade.

³⁷Nadsapa ia mari tocanabaquuihari: –Jehe, ohuapi Madija Bedi ojajaroa pina trigo bicahi huihuiradessa onajaro. ³⁸Nadsama huidsajapi ajijaro dsamassa najaro. Trigo bicahi noccopa pina madija Diocca cacahuehedsa toquejenajarissa najari. Pohuadenipa Dio Attidsa iboraququiri najari. Naraha dseropi pina madija Diocca huadi Satana attidsa iboraququiri najaridenissa najaro. ³⁹Nadsa dsero nocconi huihuiradepa huidsaja jinedecca huadi Satana. Nadsama nidsa trigo bono jadadsa ti nahijinecca huada bacco tarjari pina nidsa dsama jicadsa Dio Pohuadsa toquejenajarideni icattejidsabaquuihijine tahimarissa najaro. Nadsa trigo titidedenipa Diocca dodosse tabaqui memehuaicca. ⁴⁰Nadsa aji dsero huanacquidsa botta quinanijinecca imapi nidsa ajijaro dsama jicadsa madijadsa najarossa najaro tojanitohui, onajaro. ⁴¹Naraha nidsa ohuapi Madija Bedi ojajaroa memehuaaji omadipomadsa occa dodosse tabaqui memehuaicca dosse onaronaridsabaququidsapa imasiri mamaridedeni, imasiri totonanadedeni tedseje huapima icattejidsabaquui-manahitohui, Diocca cacahuehedsa toquejena-jarahijine. ⁴²Najarideni huapimapa poni ehuerani diji tehe nema dsanaponihuaji hua idsimabaquui-manahitohui. Nahihuajipa ocasserani

ahuamana-dsanapodsapa panodeni todsahi nadsa oji oji quinahitohui, onajaro –nade Jeso. ⁴³–Nadsama icatte-jidsa-baqquimanaha jicadsapa madija Dio Pohua jipa tahi-cca inanamanajardenina aja Pohuadsa toquejenajarideni huapima Abi Diocca cacahuehedsa madimana-dsanapodsapa pina maji dsibehi tajarissa quinahitohui. Nadsama teribodeni ticajimanadsapi ohuatti timittamananissa taji, onajaro –nade Jeso atti.

***Todsepetaji huatini ccara tanicca inajimani
tahimarinidsa mari icanabaqqijari***

⁴⁴–Jehe, Diocca cacahuehepi pina todsepetaji bicabote huatini ccara taniccassa najaro. Madijapa pajimaranihuaji qquide ccaridsadsa todsepetaji tonajimani bacco inajaro. Todsepetaji bicabote, huatini ccara tanicca qqui tadsapa najaro todsepetaji denima inajimapomajaro. Nadsapa huatidsedsa toccanijari. Pocca odsahuaji bacco tanidsapa pohua dsepetaji nema nehe manaconitohui da inehe jicajaro. Najaro manaconi cajidsapa aja pohua qquide ccaridsapohuihuaji toccapomajari. Nadsapa najaro dsama mita inadsapi pocca tojajaro. Aji todsepetaji bicabote huatini ccara tanicca pohuajine tonajimani naqui pocca tojajaro. Najaro imassa najaro Diocca cacahuehe denima bica tadsapi madija pocca imabote nema nehe inebodsapo Diodsara huatidse-dsanapohuitohui –nade Jeso.

***Bicabote huatini ccara tanicca perla
tahimarinidsa mari icanabaqqijari***

⁴⁵–Jehe, Diocca cacahuehe tahimarinini onihi naqui pina madija tomatocca huatini ccara tanicca *perla mittade tohuini nadsa qquide ccaridsajari. ⁴⁶Nadsama perla bicabote huatini ccara tanicca bacco tadsapa jinededsa: “Ohuadsa tecahuaji” nadsa pocca odsahuaji toccanijari. Pohua dsepetaji inequeriqquidsapa nema nehe da inadsapa najaro manaconidsa perla mittade toccapomajari. Mita inadsapi pocca tojajaro. Jehe, Diocca cacahuehepi najaro imassa najaro. Icca imabote nema nehe inebodsapo Diocca cacahuehe bicabote iadsa tojajaro –nade Jeso atti.

Aba cocoro tahimaridsa mari icanabaquijari

⁴⁷–Jehe, Diocca cacahuehe tahimarini onihi naqui pina aba cocoro imenibote passo imenihuaji tappa icadsippa-manadsa joca icamoranimanadsapa aba ohuaha, ohuaha naha huemajari. ⁴⁸Nadsapa aba cocorodsa ijihissa tadsapa ssiquihuajina joca icamoranimanadsapa jassi tadsa aba bica tajarira icattejidsamanadsa dsamedsa hua idsa-ridsamanajari. Naraha aba tabaccora tajaripa hua quina-jari. ⁴⁹⁻⁵⁰Najarossa nanitohui, nidsa ajijaro dsama jicadsa naqui. Tahidepa Diocca huadidsa toquejenajarideni Dio inajidsobaquihijinepa pina aba tabaccora tajari tocatte-jidsadessa quinahitohui. Diocca dodosse tabaqui memehuaajiccana madija tabaccoraquiri najari icattejidsabaquimanaccahitohui. Puhuadenira domo huahitohui. Najaridenipa poni ehuerani diji tehe nema dsanaponihuaji hua todsimabaquihitohui. Nahihuajipa ocasserani ahuamana-dsanapodsapa panodeni todsahi nadsa oji oji quinahitohui. Naraha ohuadsa toquejenajarideni, aja Dio pohua jipa tahicca inamanajarodenina Dio madihihuaji toquejenahitohui, onajaro –nade Jeso atti.

Todsepetaji jadani, todsepetaji dsati tadsajani tahimaridsa mari icanabaquijari

⁵¹Nadsapa Jeso iadsa huati tajari: –¿Nija? Occa ima aji tiadeni mari mari ohocanabaqqui najaro ¿timittamananissa taqui? –nade Jeso. Nadsapa: –Jehe, imittani –nade, ia huapima.

⁵²Nadsa iadsa Jeso attipa: –Nema nadsapi jodiodenicca marinaja maridedeni Diocca cacahuehe tahimarini dsatidsa toquejenadsapa pina odsa jinedessa quinajari. Odsa jinedepa pohua dsepetaji odsa bodihuaji ecahuajaro. Todsepetaji jadani caji, todsepetaji dsati naqui caji najari. Nadsapa pohua bodi nahato tadsa todsepetaji jadani dsojo inine tani, todsepetaji dsati naqui dsojo inine tani. Nadsama aja Dio Atti maridedeni madija maride toquejenadsapa Dio Atti dsodo naponicca, Diocca cacahuehe tahimarini dsati tadsajani maride nahatoqquri najari –nade Jeso atti.

**–Diodsa dada toqquimahuajicca odsa
taboridsanitohui –najari Jeso**

Maraco 13.1-2; Roca 21-5-6

24 ¹Nadsapa Diodsa dada toqquimadsa Jeso qquenadsapa toccadsa ia pohua huatimadedeni pohuadsa iajire-ssidsa huati inajarode: –Ia Maride, aji dada toqquimahuajicca odsa huapimapi bicaqquri naha –inade. ²Nadsapa Jesoa: –Aji odsa imeni sibadsa nahatoridsani jidapana qqui tiquinaraha pajissehera tiadenidsa huati onana: Nidsa dsotode ajijaro odsa huapimapi taboridsehe jicanissa tanitohui –nade Jeso.

***Dsama jicani tohuajiradsa
nahatoqquri inanijinecca ima***

Maraco 13.3-23; Roca 21.7-24; 17.22-24

³Nadsapi ssono Oribohuaji jajemorajaro. Nahidsa Jeso huittaridsapa ia pohua huatimadedeni iara pohuadsa huajijira icanadsa pohuadsa huati inajaro: –Ia Maride, jidacca ima huati tinajaropi ¿nejecoma nadsa tojapadseje? Aji namihuaji ticca-ronapomanijinecca ima, aji dsama jicanicca ima tohuajiradsa nahatoqquri inanijinepi ¿nejecora qqui inapopadseje? –inade.

⁴Nadsapa Jesoa: –Paji, madija tiadeni tocamaidasabaqqurana. ⁵Nidsa madija huapi taha pohuama ohua onidsa maidsamanadsapa: “Ohuapi Cristo-Mesia ojani” quiquina nahitohui. Nadsapa madija huapi taha icamaidasabaqqui-manahitohui. ⁶Ima onihi naqui: “Jadsire tojaridsani” timittamananitohui. Naraha ticappinamana tejerana. Jadsirepi epeje tojaponitohui. Naraha dsamapi jiquejeraccanitohui. ⁷Nadsama madija dsama onihicca, dsama onihicca tedseje jadsire inanamana-ridsanitohui. Tamine ohuahacca madija, tamine ohuahacca madija tedseje cahadire-ridserahitohui. Pemi naqui cajiridsanitohui. Nami dsadsa naqui tojaridsanitohui. ⁸Najaro ocasserehe tahide tojaporaha denima ocasserehe tojadsanaponitohui.

⁹–Nadsapa tiadeni tadamamanadsapa todsepedsa tiquejena-ridsanitohui. Pohuadenijine nanajidso tiquejenadsapi tijica-ridsanitohui. Occa madija tiquejenajarojinepi madija huapima tiadenidsa jiperaqquri nahitohui. ¹⁰Nadsama ohuadsa toquejenajarideni motapa ohuatti nebomanadsa ima ponimacca

maidsanijdsara toquejena-ridsahitohui. Nama quinadsapa pohuadeni tesse dsoquehijine ahuaji eccora, ahuaji eccora naridsamanahitohui. Pohuadenira pohuadeni tessedsa ahuaji jipera, ahuaji jipera naridsamanahitohui. ¹¹Dsama jicanijinepi mamaidsade ahuatomaridsa-manahitohui. Attidenipa: “Ohuapi Diocca dosseniji, Dio Atti ohuacomerajaro” quiquina naraha Diocca dosseniji jarahi. Naraha pohuadenipa madija mota huapi taha icamaidsabaquui-manadsapa huapima attidenipa: “Jari, najaridenicca imadsara iquejenana” quinahitohui. ¹²Dsama huapimadsa madijapa imasiri denima denima inanaridsa-manahitohui. Dsama huapimadsa imasiri ijiridsajarojine tohuati huanehepi huatideni ajamamanahitohui.

¹³–¡Naraha tiadenipi dacoco tijiraji! Najaro huadie tinahanamana-dsanapodsapi tijicaraha ticassiejeranitohui. Timadimanaccadsa dsama jicani bacco tiquinadsa naqui ticassiejeranitohui. ¹⁴Naraha dsama jiquejeraccadsama Dio pocca cacahuehecca ima bicani dsama huapimadsa ecomeraridsa-manaccanitohui. Najaro imapi otahimari madija tocassiejerahijinecca madija dsama huapimadsa madiridsa-manajarideni mittaridsa-manahitohui. Nadsana dsama jicanicca huada bacco tanitohui –nade Jeso.

¹⁵Jesopa dsama jicanicca ima denima ia mari tocana-baqqujari. (Pocca marinaja hua tiquinadsapi timittamana-nissa taji.) Pohua attipa: –Nidsa jodio quejena-jarajari-denijine Diodsa dada toqqimahuaji oppinabote corime huedsadsapa toppinanitohui. Nadsapi pohuadenijine icca madija jodiodenipa icappina-qquimanadsa dada toqquima paji inebomanarinitohui. Najaro imapi maittaccadsama Dio Atti cacomerabote Daniel dsodo inapojaro. Najaro ima tojani qqui tiquinadsapi tidomo toccaji, onajaro. ¹⁶Aji dsama Jodeahuaji timadiridsa-manajaropi ssonohuaji tidomo toqqemorana. ¹⁷Madija pocca odsa amossinihuaji ccaridsadsapa pohua dsepetajitohui pocca odsahuaji toqquedsimani-jarana. ¹⁸Madija pocca huidsajahuaji dsepe ijijari naco paja joppa tarina. Pocca eterotohui odsahuaji ccani-jarana. ¡Poni! ¹⁹Jaho, amoneje jiamanajarodeni, bacconideni ijimanajarodeni naqui joppa toquinanijine tohuati nahanaqquri nanitohui. ²⁰Najaro ima oppinabote tojadsa tidomo toccadsapi ssirini

nohueranijine, jassinajacca huadadsa naqui nohueranijine Diodsa huati huati tidsanapomanapoji, onajaro. ²¹Najaro ima oppina tanicca bacco nadsapi madija huapima ocasserani imeni inahana-mananitohui. Maittaccadsama Dio dsama inahatoponipi nema nanicca ocasserehe qqui quinapo-gerani. Nohuerani. Ia naqui qqui inejerani paji nani. Nidsa dsotode naqui nema napoma-geranitohui. Nohueranitohui. ²²Najaro ocasserehe nema dsanapodsapi madija tossiajaja cama-jarahitohuiraha najaro ocasserehecca huada Dio ajimani inananitohui. Dio pocca madija pohua icattejidsa-baqquijaridenidsa huati huana tadsapa: “Nanidsa epejena, jicana” nahitohui Dio –nade Jeso.

²³–Nadsapa madija tiadenidsa pohuama: “Qqui, ajajari-paja Diocca Cattaniji ia Idinide Cristo-Mesia” quinadsa, madija ohuaha attideni naco: “Qqui, ajaccajarina Cristopaja” quinadsapa pajissa tiquinejerana, onajaro. ²⁴Madija mamaidsadedeni naco tiadenidsa jahijonahitohui. Pohuadenipa: “Ohuapi Cristo-Mesia ojani” quinahitohui. Ohuahadeni naco: “Ohuapi Diocca dosseniji ojani, Pohua Atti ohuacomeranijine” quinaraha maidsamanajari. Pohuadeni bodipa: “Dio icattejidsa-baqquijarideni icamaidsa-baqquina” quinadsa poccadeni maidsehe canahatorimana canaridsahitohui. Madija pohuadenidsa: “Pajissa Diocca dosseniji” quinahijine tohuini quinaraha Dio pohua icattejidsa-baqquijarideni motapa pohuadenidsa pajissa quinarahitohui. ²⁵Aji, huati huati onajarocca imapi nidsarانبote tojanijineraha jidapana tiadenidsa huati onajaro-pajipa. ²⁶Nadsama madija attideni: “Ajacca madija madide marahihuaji ia Idinide ccanihi” quinadsapa nani qquide jai tija tejerana. Madija ohuahadeni naco: “Ajicajaro odsa bodidsa ia Idinide pohua najimahi” quinadsa naco pajissa tiquinejerana, onajaro. ²⁷Aji ohuapi Madija Bedi ojajaroa nidsa occarona-pomadsapi ahuato tanitohui, pina ssissiede dacorehema ssie nadsa meme nema nehe tossiajabaqquijarossa nanitohui. ²⁸Abaridsa toqueriqquinidsa bani huatiahi ponahi nahatoqquri tiquinajaro. Pina najaro imassa najaro occarona-pomadsapi madija huapima nahatoqquri nahitohui –nade Jeso.

Jeso ccaronapomahicca ima

Maraco 13.24-37; Roca 21.25-33; 17.26-30, 34-36

²⁹Jesopa ima denima huati huati tajari: –Naraha ocasserehe inahanamanani nattinipi maji ohuihitohui. Abadsico naco cahuihitohui. Memecca abadsico bedi naco catojahitohui. Jidapapa memecca huapima dacoraququiri naccahi naraha dsotodepa meme dsadsa nadsapi huenene huenene canahitohui. ³⁰Nadsana ohuapi Madija Bedi ojajaroa occarona-pomadsapi memehuaaji ahuato tanitohui. Nadsapa dsama huapimacca madija cappinamanadsa oji oji quinahitohui. Nadsapi meme essenima oquejemehe occarona-pomani qqui toquinahitohui. Occa dacorehe, occa deni tojehe ahuato tanitohui. ³¹Nadsapa occa dodosse tabaqqui memehuaajicca dosse onaridsa-baqquidsa jadsirema jori jori quinadsa Dio icattejidsabaqquiipojarideni inequeriqquinibaqqui-manahitohui. Dsama nema nehe madiridsa-manajarideni huapima ahuajicca, ahuajicca inequeriqquinibaqqui-manahitohui –nade Jeso.

³²–Jari, ahua iquiera tahimaridsa ticahatteraji. Eppe moro nimanishi qqui tiquinadsapi: “Jehe, dsadsajade tojemanini” titiquina najaro. ³³Pina najaro imassa najaro aji dsama jicani tahimarini huati huati onajaro qqui tiquinadsapi: “Jehe, Jeso ccanihi, pina icca noccobijidsa huajarissa najari” tiquinana, onajaro. ³⁴Pajissehera tiadenidsa huati onajaro: Aji dsama jicani tahimarini huati huati onajarocca madija dsoqquemana-jaraccadsama najaro ima huapima tojanissa tani qqui toquinaccahitohui. ³⁵Meme, nami naqui jicaridsanissa tanitohui. Naraha ohuattipi jica-jeranitohui. Aji huati huati onajaropi najarossa nanitohui –nade Jeso.

³⁶–Occaronapomanicca huada, maji naco madija huapima ssamoququiri nahi. Diocca dodosse tabaqqui memehuaajicca naco ssamoququiri nahi. Dio Bedi ohua naqui najaro ima ssamo onani. Naraha Abi Dio pohuana nahato tahi ojarihi –nade.

³⁷–Jehe, ohuapi Madija Bedi ojajaroa nidsa occaronapomadsapi pina maittaccadsama Nohue madipodsa ppani ccajonajarrocca imassa nanitohui. ³⁸Nohue madipohuipa madijadenipa jijipamana najari, dse dse quinajari, caji caji canajari. Nama

quiquina napojaria aja Nohue pocca canoa imenidsa toqqe-dsimahicca huada bacco tajarpaji. ³⁹Madija motapa ppani tojanicca huada ssamoquiri nadsa najoramanapo-jarajari. Nadsapa ppani huassinaja bacco najonadsapi huapima je tocaniredsa jicajari. Najarossa nanitohui nidsa ohua Madija Bedi ojajaroa occaronapomadsa naqui madija mota otohui najoramana-jaradsapa ajaro namidsa jicahitohui. ⁴⁰Jehe, nidsa occaronapomadsapi ima ajima nanitohui. Madija pamaha huidsajadsa dsepedeni ijimanajari. Ojaria otohui najorapojarina iaccamacossani-hitohui. Naraha ohuahapa otohui najora-jaradsapa inebohuitohui. ⁴¹Amoneje pamehe naqui dododsa dode toquejenajaro. Ojarie otohui najorapojarona iaccamacossani-nitohui. Naraha onihipi otohui najora-jeradsapi inebonitohui –nade Jeso.

⁴²–Nadsama tetideni huatodsa ticattomama canaji. Ohua tiadeni Medsede occaronapomanicca huada ssamoquiri tiquinani. ⁴³Ajijaro imadsa tibodideni huatoji: Odsa jinedepa bobotide qquedsimahijinecca huada nahato tadsapa pocca odsadsa qquedsima-jarahijine najaro dsomedsa nocco bissahitohuiraha ssamo taja najari. ⁴⁴Nema nadsapi tinajoramanehe timadimanaji. “Jidapana itide” titiquina nana. Madijapa ohua Madija Bedi ojajaroa occaronapomanicca huada ssamoquiri nahi. Nidsa huatideni ajamama canadsa bacco onanipomanitohui –nade Jeso.

***Madijacca dodosse ibora tadsapa ima bicani
cajahitohui; tabaccora tadsapa nanajidso tojahitohui***

Roca 12.41-48

⁴⁵⁻⁴⁶Jesopa ima onihi huati tajari: –Madija dsepe ssebotepa huaji tani toccahijine najoradsapa pocca dodosse ojariadsa huati tajari: “Occa madija tecahuabaququina. Jipamanahijine bacco tadsa pohuadeni tapari da da titinabaququi nana” najari. Nadsapa dsepe ssebote toccajari.

–Nadsapa pocca dodosse nahato tadsa, ibora tadsapa madija ecahuabaququihissa tahitohui, pina pohua dossede attissa inananitohui. Nama nadsapa dsepe ssebote ccanidsa qqui tadsapa pocca dodossedsa ima bicani inananitohui. ⁴⁷Nadsapi pajissehera tiadenidsa huati onajaro: Madija dsepe ssebotepa pocca dodosse ibora tajaridsa ajama nahitohui: “Tiapi occa odsa, occa huidsaja, odsepetaji huapima tecahuaji” nahitohui –nade Jeso.

⁴⁸–Naraha dsepe ssebotecca dodosse tabaccora tadsapa pohua dossede attissa inana-jeranitohui. Pohua bodipa: “Ohua dossede najoccai, qqui tajarahi” nahitohui. ⁴⁹Nadsapa pohua dossedecca dodosse tabaqqi ohuahadeni ihinajidso-baqqi nahitohui. Nadsapa pohua naco noccodeni janoqqiri najaridenidsa quejemadsapa jipadera ccaridsadsapa coma tanicca naco dse dse nanaridsa nahitohui. ⁵⁰Pocca dodosse tabaccorabotepa pohua dossede ccanihicca maji, huada ssamo tadsa pohuatohui najora-jarahitohui. Nama nanaridsa nanaja dsepe ssebotepa bacco nanihitohui. ⁵¹Nadsapa pocca dodosse inajidsohitohui. Dsoqqedsapa maidsajidedera-botedenihuaji inahitohui. Nahihuajipa ocasserani ahua-dsanapodsapa pano todsahi nadsa oji oji nahitohui –nade Jeso.

***Jesopa dsohuato 10 quinajaro
tahimarinidenidsa mari icanabaqqijari***

25 ¹Nadsapa Jeso madija denima mari icanabaqqijari: –Diocca cacahuehe tojadsapi pina ajjaro imassa nanitohui: Dsohuato 10 quinajaropi dsabisso dsohuato cacajirehicca jipaqqietohui najoramanadsapi ponidenicca jojororo equidiridsamanadsa dsabisso cajibote najari bacco



ijidsamanahijine dsome jai tojajaro. ²Naraha dsohuatodeni mota 5 quinehepi bodinideni huatonissa tejerajaro. Naraha dsohuatodeni mota 5 quinehepi bodinideni huatonissa tajaro. ³Nadsapi dsohuato bodinideni huatonissa tejerajaropi ponidenicca jojororo iaccamanaraha ppejene jicadsa denima sso idsamanahijine dsojo quina-jarajari. ⁴Naraha dsohuato bodinideni huatonissa tajarodenipi ponidenicca jojororo iaccamanadsapa ppejene jicadsa denima sso idsamanahijine dsojo quinajari. ⁵Nadsapi jai tojajaro, boronidsa bacco toquinaraha dsabisso cajibote najari najodsapa dsohuatodeni cahadijate nadsapi nanidsa cahadijajaro.

⁶–Naraha dsome nocconi tojadsana madija jadsirema huahua najari: “¡Dsabisso ccajonahi, ccajonahi! ¡Jai tijajonaji, bacco tijidsamanahijine!” najari. ⁷Nadsapi dsohuatodeni huapima nocco toquejenadsa tothemamanadsapi ponidenicca jojororo denima ssaja tahijine najoramanajaro. ⁸Naraha dsohuato bodinideni huatonissa tejerajaropi motadenidsa attinidenia: “Ticcadeni jojororo ppejene badsira taha iadsa da tiquinajo, icca jojororo ohuiridsabote nahi” quinajaro. ⁹Naraha dsohuato bodinideni huatonissa tajarodeni attinidenia: “Poni. Tiadenidsa badsira taha sso idsajarahi. Tiadenidsa, iadsa nadsapa pajarajari. Dadahuaji jai tijaccaji, jojororo ppejene ohuaha mitta tiquinahijine” quinajaro. ¹⁰Nadsapi mittade jai tojajaro.

–Naraha nanihuaji najomanadsapi aja dsabisso amoneje cajihiijine bacco najonajari, cacajirehica jipacquiedsa toqqe-dsimajari. Nadsapi dsohuato bodinideni huatonissa tapojarodeni pohuadsa jai tojedsimajaro. Nadsapi noccobiji icahacossajaro. ¹¹Naraha dsohuatodeni mota 5 quinehepi dadahuaji mittade najomanadsa dsotode bacco nanimanajaro. Amossinidsa domoni huadsa dsabisso cajibote najaridsa huahua quinajaro: “¡Ia, ia! ¡Jaijedsimanijine noccobiji ticanahabaji!” quinajaro. ¹²Naraha dsabissopa noccobiji icatabojidsa-jerani. Pohua attipa: “Tiadenidsa onocco jidsa tani. Occa madija tiquejena-jerani” najari –nade Jeso.

¹³Nadsapa madija huapimadsa Jeso attipa: –Tibodideni huatonissa taji. Ohua occaninicca huada ssamoquiqui tiquinani. Maji naco ssamoquiqui tiquinani. Tinajoramanehe timadimanaji –nade Jeso.

***Jesopa dsiniro inahapimananijinecca imadsa
mari icanabaquijari***

Roca 19.11-27

¹⁴Jesopa ima onihi huati tajari: –Diocca cacahuehe tojadsapi pina ajijaro imassa nanitohui. Madija pocca benehi toccahijinepa pocca dodosse tabaqqi queriqquihijine huahua inabaquijari. Queriquidsapa pocca dsinirodsa dsepedeni ijimanahijine pohuadenidsa da inaridsajaro. “Aja, occa dsiniro tinahapimanadsa nidsa occanidsapi ohuadsa nema nehe da tanimananijine” najari.

¹⁵Pocca dodosse ojariapa dsiniro inahapinijine nahato tahissa tadsapa pohuadsa ccarara 5 mil nehe da inajaro. Ohuaha naco dsiniro inahapinijine nahato tadsapa pohuadsa ccarara 2 mil nehe da inajaro. Ohuahapa dsiniro inahapinijine ajamani nahato tadsapa pohuadsa ccarara 1 mil nehera da inajaro. Nadsapa dsiniro jinede pocca benehi toccajari.

¹⁶–Nadsapa ccarara 5 mil nehe cajijaripa amadsati toccajari. Mitta, da, mita, da naridsajari. Dsepe ijiridsahissa tadsapa 5 mil cajiporaha denima 5 mil cajijari. ¹⁷Nadsapa ccarara 2 mil nehe cajijari najari naco mita, da, mita, da naridsajari. Dsepe ijihissa tadsapa denima 2 mil cajijari. ¹⁸Naraha ccarara 1 mil nehe cajijaripa nema inana-jerajaro. Najaripa pohua dossedecca dsiniro inajimanijine nami hui idsadsa ppa idsajaro.

¹⁹–Dsiniro jinedepa huada huapi tadsa ccanijari. Bacco nanidsapa pocca dodosse tabaqqicca ima mittahijine pohuadenidsa huahua najari, poccadeni cuenta icattemanijine.

²⁰Nadsapa ccarara 5 mil nehe cajijari ccajonajari. Ccarara 10 mil nehe jinededsa da inanijaro. Pohuadsa da inanidsa pohua attipa: “Ohua dossede, ohuadsapi ccarara 5 mil nehe da tade. Naraha qqui taneje, odsepe ijiridsanissa tadsapi denima 5 mil nehe tojajaro” najari. ²¹Nadsapa dsiniro jinede attipa: “Jehe, tiapi occa dodosse ohuattidsa ibora tinajaro. Bica tinani. Tiadsa badsira tehe da onaporaha denima tojanijine dissera tinadsapi denima tiadsa da onanitohui. Tiqquedsimaji, etidsena” najari pocca dodossedsa.

²²–Nadsa pocca dodosse ohuaha ccarara 2 mil nehe cajijari ccajonajari. Pohua attipa: “Jehe, ohua dossede, ohuadsapi ccarara 2 mil nehe da tade. Naraha qqui taneje, odsepe

ijiridsanissa tadsapi denima 2 mil nehe tojajaro” najari.

²³Nadsapa dsiniro jinede attipa: “Jehe, tia naqui occa dodosse ohuattidsa ibora tinajaro. Bica tinani. Tiadsa badsira tehe da onaporaha denima tojanijine dissera tinadsapi denima tiadsa da onanitohui. Tiqquedsimaji, etidsena” najari pocca dodossedsa.

²⁴–Nadsa pocca dodosse ohuaha ccarara 1 mil nehe cajijari ccajonajari. Pohua attipa: “Ohua dossede, tiapi madijadsa daco tijirajaro. Tiapi tarabaisda tejeraraha ticca dodosse tabaqquijine titicaji najaro. ²⁵Nadsapi tinoppine ocappinadsa nami hui odsadsa ticca dsiniro ppa odsajarode. Aji, anini. Ticca dsiniro tiadsa da onanina” najari. ²⁶⁻²⁷Naraha dsiniro jinede attia: “¡Occa dodosse ibobote! ¡Tabaccora tinani! Tettipi ohuadsa: ‘Madijadsa daco tijirajaro. Tarabaisda tejeraraha ticca dodosse tabaqquijine titicaji najaro’ taha. Naraha ohuadsa nahato tinadsapi occa dsiniro aji dsiniro ehecahuamana nanihuajina tinebodsda tohuapidsapi occanidsa denima ohuadsa da tani-nitohuiraha” najari dsiniro jinede atti.

²⁸–Nadsapa pocca dodosse tabaqqui ohuahadenidsa huati tajari: “Jari, occa dsiniro ccarara ibobotedsa da onapojaropi tidinimanaji. Tidinimanadsapi madija dsiniro ccarara 10 mil nehe cajjaridsana da tiquinaji. ²⁹Aja, cajjaripa pohuadsa denima, denima, denima tojadsapi huemani cajihitohui. Naraha ibobotepa badsira taha cajiraha pohua cajjaricca todininitohui. ³⁰Nadsama aja occa dodosse ibobotepa dsidsini-huaji coro tininemanajo. Nahihuajipa ocasserani ahua-dsanapodsapa pano todsahi nadsa oji oji nahitohui” najari dsiniro jinede atti –nade Jeso.

–Madija ocattejidsabaqquihitohui –najari Jeso

³¹Jesopa denima mari icanabaqquijari: –Ohuapi Madija Bedi ojajaroa nidsa occaronapomadsapi occa deni tojehe ossiejenema occaronapomanitohui. Diocca dodosse tabaqqui memehuajicca ohuadsa jahironahitohui. Nadsapi deni ojanicca huihuittari bicanidsa ohuittaridsa dosse dosse onanitohui. ³²Nadsana dsama huapimacca madija obaccohuaji querieqquihitohui. Nadsapa ohuana madija ocattejidsa-baqquihitohui, pina edede cacahuadepa pocca edede icattejidsa-baqquijarissa onana-baqquihitohui. Edede cacahuadepa edede bicahi pohuadenira

icattejidsabaquui, edede jidsadsa cabra pohuadenira icattejidsabaquui najari. ³³Pohua biji nahatonihuajipa edede bicahi pohuara. Pohua biji ssamohuajipa edede jidsadsa cabra pohuara inanabaquuijari. Ohua naqui madija ocattejidsa-baqquidsapa madija bicaquui najari Dio Pohua jipa tahicca inanamanajarodenipa obiji nahatonihuaji onanabaquuihitohui. Madija tabaccoraquui najari Dio Pohua jipa tahicca inanamanajerarodenina obiji ssamohuaji onanabaquuihitohui.

³⁴–Nadsapi ohua tamine ojadsa aja madija obiji nahatonihuaji domo huajaridenidsa huati onanitohui: “Nija, occa Abi tiadenidsa ima bicani inanaridsajaro. Pocca cacahuehe tiadenidsa tojani. Najaropi dsama nahato-jeraccadsama tiadenidsa najorapojaro. ³⁵Ohuadsa bicaquui tiquinadsapi opemidsa ohua titapamanade. Obacco dsaridsa ohuadsa passo da ticanamanade. Tiadenihuaji bacco onajonadsa ohuadsa tinoccodeni jidsaquui naraha: ‘Iadsa timadiccaji’ tiquinade. ³⁶Etero ocappiradsa naqui ohuadsa da tiquinade. Coma onadsa naqui ohua qquide jajahi tijajona nade. Toponi cocorodsa ohuedsadsa naqui ohua qquide jajahi tijedsima nade” onanitohui pohuadenidsa.

³⁷–Nadsapa aja madija bicaquui najarideni ohuadsa huati toquinahitohui: “Ia Medsede, ¿nejecoma nadsa tipemidsa tiadsa dsamatapa da inajaritta? ¿Nejecoma nadsa tibacco dsaridsa tiadsa passo da icanajarotte? ³⁸¿Nejecoma nadsa tiadsa inocco jidsa taraha, ‘Iadsa timadiccaji’ inajarotte? ¿Nejecoma nadsa etero ticappiradsa tiadsa da inajarotte? ³⁹¿Nejecoma nadsa coma tinadsa tia qquide jajedsimajarotte? ¿Nejecoma nadsa toponi cocorodsa tedsadsa tia qquide jajedsimajarotte? Ssamomo inani” quinahitohui. ⁴⁰Nadsapi ohua tamine ojadsapi pohuadenidsa ohuatti ajima onanitohui: “Pajissehera tiadenidsa huati onajaro. Aja madija occa tojajari ojaría tohuati nahana tajari acco ticamamanadsapa pina ohua acco ticamamanajarossa najaro” onanitohui, obiji nahatonihuaji domo huajaridenidsa –nade Jeso.

⁴¹–Naraha obiji ssamohuaji domo huajaridenidsapi ohuatti ajima onanitohui: “¡Aji ohuadsapi huajiji tinaji! Diopa tiadenidsa najidsohue inanajaro. ¡Poni ehuerani diji tehe nema dsanaponihuaji jai tijaji! Najaropi pocca huadi Satanadsa, Satanacca dodosse tabaqquidenidsa najorapojaro. ⁴²Tiadenipi

opemidsa ohua titapamana-jerade. Obacco dsaridsa ohuadsa passo da ticanamana-jerade. ⁴³Tiadenihuaji bacco onajonadsa ohuadsa tinoccodeni jidsaquiri nadsa: ‘Iadsa timadiccaji’ tiquinejerade. Etero ocappiradsa naqui ohuadsa da tiquinejerade. Coma onadsa naqui ohua qquide jajahi tijajona nejerade. Toponi cocorodsa ohuedsadsa naqui ohua qquide jajahi tijedsima nejerade” onanitohui pohuadenidsa.

⁴⁴–Nadsapa aja madija tabaccoraquiri najaridenipa ohuadsa huati toquinahitohui: “Ia Medsede, ¿nejecoma nadsa tipemidsa tiadsa dsamatapa da inajarajaritta? ¿Nejecoma nadsa tibacco dsaridsa passo tiadsa da icana-jerajarotte? ¿Nejecoma nadsa tiadsa inocco jidsa tadsa, ‘Iadsa timadiccaji’ inejerajarotte? ¿Nejecoma nadsa etero ticappiradsa tiadsa da inejerajarotte? ¿Nejecoma nadsa coma tinadsa tia qquide jajedsima-jerajarotte? ¿Nejecoma nadsa toponi cocorodsa tedsadsa tia qquide jajedsima-jerajarotte? Ssamomo inani” quinahitohui. ⁴⁵Nadsapi ohua tamine ojadssapi pohuadenidsa ohuatti ajima onanitohui: “Pajissehera tiadenidsa huati onajaro. Aja madija occa tojajari ojaria tohuati nahana tajari acco ticamamana-jaradsapa pina ohua acco ticamamana-jerajarossa najaro” onanitohui pohuadenidsa –nade Jeso.

⁴⁶–Jehe, tabaccoraquiri najaridenipa najidsohue jiquejearniccadsa madimana-dsanapohuitohui. Naraha madija bicaquiri najari Dio Pohua jipa tahicca inanamanajarodenina camittehe jiquejeranihuaji madimana-dsanapohuitohui –nade Jeso.

Jesopa pocca dodosse tabaqqi dosse inabaquiridsajari

Maraco 16.14-18; Roca 24.36-49; Huano 20.19-23

28 ¹⁶Nadsapi ia Jesocca dodosse tabaqqi 11 inajaro Carireahuaji jaijanijaro, pina tahide amonejedenidsa Jeso huati tapojarissa inanajaro. Jeso attipa: “Najaro ssonohuaji jai tijemorana” nadsa najaro ssonohuaji jaijemorajaro. ¹⁷Bacco imoradsapi Jeso qqui inajari. Qqui inadsapa pohuadsa etidsedsa: –¡Tiapi deni tijani, tiapi nahatonie jinede tijani! Aja tiassa najari ohuaha nohuerahi –nade. Naraha mota bodidenipa: “¿Pajissa Jeso nahatonijarico?” quinajaride. ¹⁸Nadsapa Jeso dsaboradsa iadsa huati tade: –Abi Diopa pocca nahatohue huapima memehujicca, namihujicca naco

ohuacahuaridsahijine pocca dacorehe ohuadsa inanajaro. ¹⁹Nema nadsapi dsama huapimadsa otahimari maride jai tijaridsaji. Madija ohuadsa toquejenahijine maride dissera-qquiri tiquinaji. “Jehe, Jesodsa iquejenana” quinadsapa Abi Dio onima, ohua Dio Bedi ohua onima, Dio Corime onima passodsa topa topa titidsana-baqqumana nana, onajaro. ²⁰Aji occa marinaja tiadeni onahattabaqquijaro nema nehedsa iboraqquiri nahijine naco mari mari titicanabaqqui-ridsamana nana, onajaro. Ohuapi huada huajijiradsa tiadenidsa ohomadiridsa nanitohui. Nema odsanapojaroa dsama jicani bacco tanitohui –nade Jeso.

Epejeni.

Maracopa Jesocristo tahimari dsodo inajaro

Marcos

Introducción: Maracopa jodiodeni, odsa panani Jerosarecca madija. Pohnapa Jesocca dodosse jararaha Jesocca dodosse Pedro huatimade tojajari. Pedrodsa ccaridsadsa Jesocca ima tohuattajari quinahi nade. Dsotodepa Pablo, Bernabedenidsa Jeso tahimari maride ccaridsajari.

Maraco dsodo inajaropi: Jesopa madija bedissa naha tossonara-raha pohnapa Dio Bedi. Najaro ima madija mittamanahijine dsodo inajaro. Jodio quejena-jarajarideni Jeso tahimari mittamanahijine pohnadenidsa dsodo inajaro.

Jesopa dsepe ijiridsajari, canahatori canaridsajari

- 1.1-8 Huano Baotista tahimari
- 1.9-11 Jeso totopa cajijari
- 1.12-13 Satanapa Jeso nattome inajari
- 1.14-20 Jesopa pocca dodosse tabaqqi huahua inabaqqijari
- 1.21-45 Comaqqiri najarideni inanomi-baqquiridsajari
- 2.1-12 Madija ssomi tojahi tobiqemanijari
- 2.13-17 Jesopa Rebidsa huahua najari
- 2.18-22 Jipehe nebocossanicca ima
- 2.23-28 Aroso jidsadsa trigo bono pore quinajari
- 3.1-6 Madija dsepe siricca ima
- 4.35-41 Jesopa jojode inatappa ssodadani inatappa nanicca ima
- 5.1-20 Jerasahuajicca madija bodidsa Satanacca dodosse madidsajari
- 5.21-43 Jairo bedeni tonominicca ima. Amoneje amaissoranaja coma taraha tonominicca ima

Jesopa mari mari naridsajari

- 9.1-13 Jeso assire tojidsa, jidseremani najari
- 9.14-29 Jesopa ejedeni bodidsa Satanacca dodosse dosse ininejari
- 9.30-32 Jesopa pohna dsoqqehicca ima huati tapomajari
- 9.33-37 –¿Nejecojarina deni tojajari? –quinajari
- 9.38-41 Madija iadsa huadi-jarajaripa ia acco camajari
- 9.42-50 Imasiri tinanadsapi oppina tanihuaji ticcanitohui

- 10.1-12 Amoneje nebo nebocca ima
 10.13-16 Diocca biquehe ejedenidsa tojanijine Jeso huati tajari
 10.17-31 Madija dsepe sse tajari
 10.32-34 Jesopa pohua dsoquehicca ima huati nimanipomajari
 10.35-45 Satiaco, Huano quinajari
 10.46-52 Bartimeo nocco ssire tajari

Jeso dsoquehicca huada huajira tadsa mari icanabaquijari

- 11.1-11 Jesopa Jerosaredsa bacco todsimajari
 11.12-14 Ahua iquiera bono-jarajaricca ima
 11.15-19 Dadadedeni mohua ininebaquijari
 11.20-26 Ahua iquiera botejari
 11.27-33 ¿Jesopa nejecojaricca dacorehe cajijari?
 12.1-12 Huidsaja cacahuadedenicca ima
 12.13-17 Romanodenicca taminedsa dsiniro mota da
 quinanicca ima
 12.18-27 Jicamanajarideni nahatonimanadsapa caji caji cana-
 jarahitohui
 12.28-34 Diocca marinaja deni tojanicca
 12.35-37 ¿Cristopa nejecojari potemahi?
 12.38-40 Jodiodenicca marinaja maridedenicca madie
 12.41-44 Amoneje tabira tocajajarocca daniji Diodsa

***Huano Baotistapa dsama huamonihuaji madija
 mari icanabaquijari***

Mateo 3.1-12; Roca 3.1-9; Huano 1.19-28

1 ¹Ajjaro ima bicanipi Jeso tahimari. Jesopa Dio Bedi, Dio Pocca Cattaniji ia Idinide Cristo-Mesia ihina najaro. Pohua tahimari madija huapimadsa tojaridsanijine ajima najaro:

²Maittaccadsama Dio Pohua Bedidsa huati tapojarissa najaro Pohua Atti cacomerabote Isahia dsodo inajaro. Dio Attipa:

“Tahide titahimari tohuaccade madija ojaria titedsejema dosse onapohuitohui. Nahi mittamanadsa madija bodidenipa titohui najoramanapohuijine, onajaro”
 napohui nade Dio.

³ “Najarina dsama huamoni ssono caji, siba caji tanihuaji madidsapa atti mohui taha madija huahua huahua ihinajonabaqqi nahitohui. Pohua attipa: ‘¡Ia Medsede ccajonabote nahi! ¡Tinajoramanaji! ¡Pohua tedsejema

jahui tijinedeni tobicapoji! Najaroa aji tibodideni pahuatohui tinajoramanaji' nanaja nahitohui dsama huamonihuaji madijaripa" napohui nade Dio Atti Isahiajine dsodo nanidsa.

⁴Najaria aja madija oni Huanopa dsama huamonihuaji madija maride tojajaripaja. Pahuadsa: Baotista, quiquina najari. (Ettidsapi: Totopade, inajaro.) Pohua attipa: –Ticcadeni imasiri tineboridsamanaji! –nanaridsa najari. –Tibodideni ajima tiquinaji: “Occa imasiri onebona; jidapapi Diotohuira odsanapona” tiquinaji. Nadsana totopa ticajiridsamanaji. Nema tiquinadsapi Dio ticcadeni imasiridsa: “Epeje, ohuati ajimani” nahijine –nahi nade Huano. ⁵Madija huapima Huano atti mittamanahijine jahijonana canajaridenipa odsa panani *Jerosarecca, Jodeacca dsamadsa madi-ridsamanajarideni huapima bacco bacco najonamanajari. Poccadeni imasiri Diodsa ecomeramanadsapi Huanopa hueni Jordaodsa topa topa ihidsanabaqqui najari.

⁶Nadsama Huanopa dsama huamonihuaji madidsapa pocca eteropi camello cone ba nani ssequi nadsa huedsajari. Pocca ssoquepi bani etero. Pohua taparipa sese, dsamacca jidsi oquine najari.

⁷Huano mari icanabaqquidsa ajijaro ima huati tajari: –Madija dacorajaripa ccajonabote nahi. Ohuapi tahide mari mari onaporaha aja dsotodecca mamaride ccajonajarina deni tojajari. Ohuapi ajimani ojani. Ohuapi pocca dodossessa onejerani. Pocca dodossedsa naqui denima ajimani ojani.

⁸Ohuapi passodsa tiadeni topa odsanabaqquijaro. Naraha aja ccajonabote najarina Dio Corime tibodidenidsa madihijine tiadenidsa inanaridsahitohui –nahi nade Huano.

Jeso totopa cajjaricca ima

Mateo 3.13-17; Roca 3.21-22

⁹Nadsapa Jeso dsama arobeni onini Carireacca odsa Nasaretidsa madiraha hueni Jordaohuaji qquedsippajari. Bacco dsippadsapa Huano Jeso topa idsanajari. ¹⁰Nadsa Jeso passodsa toتهمadsa tocattamacossa nanaja meme tohuaba najaro. Dio Corime ahuato taha pina midsorissa naha Jesohuaji ccaronajari. ¹¹Bacco naronadsapa memehuaji atti mittaronajari: –Tiapi occa ejedeni. Tiadsa ohuati huana tajaro. Tiacca ima bica tajarojine ohuatidsejaro –nahi nade Dio.

***Jeso imasiri inananijine Satana nattome inaraha
jehe najarajari***

Mateo 4.1-11; Roca 4.1-13

¹²Huano Jeso topa idsanaha jicadsapa Dio Corime Jeso iaqqemorajari, dsama huamoni ssono caji, siba caji tanihuaji madihijine. ¹³Jeso madihi inoridsapa bani huadi tahicca caji tajari. Nahidsa Jeso huada 40 naha madidsana imasiri totonanade *Satanapa Jeso nattome inajari. Puhuapa Jeso imasiri inananijine dissera taraha Jesopa Satana attidsa jehe najarajari. Nadsapa Diocca dodosse tabaqqui memehuaajicca Jeso acco icamamanajari.

Jesopa Carireahuaji maride tojapojari

Mateo 4.12-17; Roca 4.14-15

¹⁴Naraha Huano Baotista toponi cocorodsa coro idsimanahi nattipa Jeso dsama arobeni onini Carireahuaji toccanijari. Nahihuaji Diocca ima bicani icassiejeranijinecca mari icanabaqqui-ridsajari. ¹⁵Pohua attipa: –Jidapapi Diocca cacahuehe iadsa bacco najonabote nani, pina Dio huati tapohuissa najaro. Ticcadeni ima Diodsa tecomeramanadsa ticcadeni imasiri tinebomanaji. Diotohuira tidsanapomanaji. Diocca ima bicani ticassiejeranijineccadsara jehe tiquinanissa taji –nahi nade Jeso.

***Jesopa aba cocorodedeni 4 quinaha
huahua inabaqquijari***

Mateo 4.18-22

¹⁶Jeso Carireacca coridsa inidi toccabacossadsa Ssino, pohua ohuaha Adiri tedseje qqui inabaqquijari. Pohuadenipa aba cocorodedeni. Aba corode toquejenaraha Jeso bacco najonajari. ¹⁷Pohuadenidsa huati tajari: –Jina, ohuadsa ticadaridsaji, ohuatimade tiquejenadsapi tiadeni onahatta-baqquinijine. Tahidepi abadsa tidsepedeni ijimanaporaha jidapapi madija ohuadsa toquejenahijinena tidsepedeni ijimananitohui, onajaro –najari Jeso. ¹⁸Najaro ima mitta-mananaja poccadeni tajapa icanebomanadsa Jesodsa tohuedajari.



¹⁹Nadsapa denima jai tojabacossanaja Jesopa Sebedeo bedi-deni Satiaco, pohua imecote Huano tedseje qqui inabaqqi-jari. Poccadeni tajapa ssequinimade canoadsa jassi dsajari.

²⁰Nadsapa Satiaco Huano tedseje Jeso huahua inabaqqi-jari. Najarideni naco amadsati poccadeni abi Sebedeo, pocca tatarabaidadedeni tedseje canoadsa jassi dsadsa inebobaqqi-manajari. Nadsapa Satiaco, Huano tedseje Jesodsa tohuedajari.

Satanacca dodosse madija bodidsa madidsajari

Roca 4.31-37

²¹Nadsama Jesopa pohua huatimadedeni Capernaohuaji bacco toquinajari. Nahidsa jassinajacca huadadsa Dio Atti mamari-huaji jai tojedsimadsa Jesopa madija mari icanabaqqijari.

²²Nadsa mittamanadsapa: –A., pocca marinaja bica taha –quina-jari. –Mari icanabaqqidsapa atti cajijariraha. Aja jodiodenicca marinaja maridedeni attissa najarajari –quinahi nade. ²³Nadsapa Dio Atti mamarihuaji madija pohua bodidsa Satanacca dodosse cajijari pohua naco nahidsa huittarijari. Jeso qqui tadsapa pohua bodicajine jadsirema atti atti najari: ²⁴–;Nasaretihuajicca Jeso! ¿Nejecotohui tiamani icca imadsa tiquejemajaroneje? ¿Icca ima tinajicanijine ticcajonaroqui? Ticca ima nahato onani. Tiapi Diocca Cattaniji tijajaro –nahi nade Jesodsa.

²⁵Naraha joma nahijine Jesopa atti dacoradsa huati tajari: –;Epeje! ¡Didi taji! ¡Najari madijadsa tiqqenaji! –najari. ²⁶Nadsapa Satanacca dodossejine madija mona tojajari tohuedimadsa pitora pitora najari. Nadsapa jadsirema johua johua nadsapa pohua

bodicca qquenajari. ²⁷Nadsapa qqui toquinajaridenia huajo caniredsapa: –A., ¿nejecoma najari? –naridsamanahi nade. –Jesocca marinaja pina dsatissa naha. A., atti cajidsa dosse imaha –quina-jari. –Mona tojajari pohua bodicca Jeso attidsa ibora taha –quinahi nade. ²⁸Nadsapi Jesocca ima amadsati tojaribaqquijaro. Carireacca dsama pohuadeni inoricca huajirema nahicca madi-ridsamanajarideni naco pohua tahimari mitta-ridsamanajari.

Jesopa Ssino-Pedro massodini inanomijaro

Mateo 8.14-15; Roca 4.38-39

²⁹Nadsapa nani jodiodenicca Dio Atti mamarihuaji jahinine-dsapa Jeso, Satiaco, Huano quinadsa Ssino, Adiridenicca odsahuaji jai tojedsimajari. ³⁰Nanidsapi Ssino massodini coma tehe, huapini ppcorehe pori canajaro. Naraha nahidsa jai tojedsimadsapa amadsati ponicca dsamacoma tahimarini Jesodsa huati toquinajari. ³¹Nadsapa Jeso ponidsa tohuajiressidsa dsapani equidi, joca imadsapi huapini tonahuihui najaro. Tonomidsapi pohuadeni inajipabaqquijari.

Jesopa comaqquri najarideni inanomi-ridsabaqquijari

Mateo 8.16-17; Roca 4.40-41

³²Nadsapa maji tonahuidsas madija comaqquri najarideni, aja madija pohuadeni bodidenidsa Satanacca dodosse tabaqqui cajimanajarideni naco eccajonabaqquijari nade. ³³Nadsapa nahicca madija huapima madi-ridsamanajarideni Ssino, Adiridenicca odsacca noccobijidsa queriqquimanajari. ³⁴Naraha Jesopa comaqquri najarideni huapima comani onihi onihi caji-ridsamanaraha inanomibaqquijari. Satanacca dodosse tabaqqui naco huapima dosse ininebaqquijari. Pohuadenipa Jesodsa nahatoqquri nadsa: “Jesopa madija Idinide Cristo-Mesia” quinahijineraha Jeso pohua tahimari ecomeramananijine jipera tadsapa didi inanabaqquijari.

Jesopa Isaraeridenicca Dio Atti mamari caji taridsajarohuaji mari icanabaqqui-ridsajaricca ima

Mateo 4.23; Roca 4.42-44

³⁵Nadsapa ssiajaricossadsa Jeso totehema., odsa pananidsa toqquenadsapa madija madide marahihuaji toccajari, Diodsa huati tahijine. ³⁶Dsotodena Ssino Pedro pohua tessedeni tedseje Jesotohui qqui naridsamanajari. ³⁷Bacco quinadsapa: –Huapima

tia qquide jahijonapomapaja –quinahi nade. ³⁸Naraha pohuadenidsa huati tajari: –Jina, odsa onihihuajina jaijana. Odsa onihicca, odsa onihicca mari ocanabaqqui-ridsahijine occaronajarode –nahi nade Jeso. ³⁹Nadsapa dsama Carireahuaji Isaraeridenicca Dio Atti mamari onihi onihi naridsanihuajicca mari icanabaqqui-ridsajari. Satanacca dodosse madija bodicca qqenaridsahijine naco dosse dosse ihinineridsa najari nade.

Huapi jadsimarojari Jeso inanomijari

Mateo 8.2-4; Roca 5.12-16

⁴⁰Nadsapa madija huapi jadsimarohi Jesodsa ccasonajari. Pocca dsamacoma oninipi lepra. Najaro dsamacomapi Diodsa bica tejerani, jodiodenidsa naqui *oppina tani, quiquina najari. Nadsa lepra cajijari pohua bodipa: “Jesopa deni tojahi, ohuapi ajimani ojani” nadsa Jeso baccohuaji pohua pitodsa huitta nadsa Jesodsa huati tajari: –Ohua Medsede, ohuapi bica onejeraraha tia jipa tinadsapi ohua tinanabicanijine nahato tinani –najari. ⁴¹Nadsapa Jeso pohua bodidsa: “Tohuati nahana tahi” nadsa pohua dsepedsa bara inadsa: –Jehe, jipa onani. Tibicaji –najari. ⁴²Nanaja amadsati pohua huapicca tomossissi nadsapa tobicajari. ⁴³Nadsapa Jeso pohua dosse inajari. Pohua tobicahicca ima madija ohuahadenidsa huati naridsa-jarahijine naco pohuadsa huati tajari. ⁴⁴Jeso attipa: –Aji tibicanicca ima madijadenidsa huati tinaridsa tejerana –najari. –Naraha *Diodsa dada toqquimahuajina ticcaji, onajaro. Nanidsa tiqquedsimadsapi dada toqquimade ojariadsara tepi tobicani tia nohue tinaji. Nadsapi Diodsa ticca ima bica tejeranicca toppineradsapi ticca daniji Diodsa tojanijine ohuaha ohuaha naha pina edede, ppiriri, oqui najari dada tidsimana, pina Moisesicca marinajadsa iboraqquri inajarossa tinanaji, onajaro. Nadsapi huapimadsa ticca ima toppinerani ahuate tadsapi: “Pajissa tibicajaro” quinahijine, onajaro –nahi nade Jeso. ⁴⁵Naraha aja tobicajaripa toccajari, Jeso pohua inanabicahe tahimari huati naridsajari. Najarojine Jeso pocca nomietohui madija disseraqquri nadsapa odsa panani onihi, onihidsa amossini totoqquedsima najarajari Jeso, pohua qqui toquinahi noppine. Nama nadsapa madija madide marahihuajina ccaridsa ccaridsa najari. Naraha madija huapimapa nama naha pohuatohui quinadsapa jajahi toja najari pocca nomietohui.

Jesopa madija ssomi tojahi inabiquemanijari

Mateo 9.1-8; Roca 5.17-26

2 ¹Nahidsa Jesopa madi madi nanaja odsa panani Capernaohuaji toccanipomadsapa bacco tanijari. Nadsapa madija ima mitta-ridsamanajari: –Jeso odsadsa bacco nanihi –quinajari. ²Nadsapa pohuatohui queriquimanadsa poccadeni odsa boronima, odsa bodima ijiridsa najari. Nadsapa Jeso Dio Atti mari icanabaquijari. ³Nadsapa madija ssomi tojahi pohua taboroma dsojo icanajonamanajari. Pohua tesse ahuaji pama, ahuaji pama najonamanahi nade. ⁴Naraha madija siba tadsapa Jeso bacco quinahijine pajiramana-jaradsa odsa tetepihujaina iaccamaromanajari. Jeso huedsahi tetepidsa odsa icatabojidsa-manajaro. Nahidsana madija ssomi tojahi pohua taborodsa poridsa odsa bodihuaji tappa icanaronamanajari. ⁵Jeso pohuatohui dissessera tahi qqui tadsapa pohua bodidsa nahato tajari: “Pajissa, Jesopa madija inanomihijine nahato tahi” quinahi Jeso pohuadsa ahuate tadsapi coma tajaridsa huati tajari: –Otesse, aji imasiri tinanajaro huapimapi onanamossini. Jidapapi ticca ima Diodsa tobiani –nahi nade Jeso.

⁶Naraha nahidsa jodiodenicca marinaja maridedeni naco jassi tariridsajari. Pohuadeni bodipa: ⁷–Apaja, Jesopa: “Imasiri onanamossina” naha. Pohua attipa: “Ohuapi pina Dio ojani” nanaja najarissa naha. ¡Jesocca imapi bica tejerani, pina Dio itamassojarissa nahi! Naraha Dio Pahuana ojarijari imasiri inanamossinijine –quinahi nade jodiodenicca marinaja maridedeni. ⁸Nama quinarahe Jesopa pohuadeni bodidenicca ima nahato tadsapa pohuadenidsa huati tajari: –¿Nejecotohui tibodidenidsa nema tiquinajaro? –najari. ⁹–Jari, tibodideni huatomamanaji ¿nejecoma najaro imana tiadenidsa denima najora tani? Aja madija coma tajaricca imasiri onanamossini ¿najora taqui? Coma tajari onanabicahina ¿denima najora tajarorane? ¹⁰Aji ohua *Madija Bedi oजारopi tiadenidsa occa ima ahuate onanana. Madijacca imasiri onanamossinijine Diocca dacorehe ocajini. Aji namidsa naqui ohuatti ocajini nahatoquiri tiquinanijinepi coma tajaridsa huati onana –najari Jeso. ¹¹Nadsapa madija ssomi tojahidsa huati tajari: –Tiadsa huati onadsa: ¡Titehemaji! ¡Titaboro tididsa ticca odsahuaji ticcaniji! –nahi nade Jeso.

¹²Nadsapa totehema., madija huapima cattomama canaraha amadsati pohua taboro idi nadsa pocca odsahuaji toccanijari. Nadsapa madija huapima cappinamanaraha huatidsemanadsapa: –A, ¡Diojine bica tani! –quinajari. –Nema nani qqui qqui inejeraccade –quinajari.

Jesopa Rebidsa huahua najaricca ima

Mateo 9.9-13; Roca 5.27-32

¹³Coma tajari inabiquemanihi nattipa Jeso coridsa poni huapihuaji toqquedsippapomajari. Madija sibema pohuadsa queriqquimanadsapa mari icanabaqquijari. ¹⁴Nahidsa Jeso denima toccadsapa madija oni Rebi qqui inajari. Najaripa Arapeo bedi. Puhuapa romanodenidsa dsiniro da tanijine ihinaccamana nanihuajicca odsa bedeni bodidsa huittidsajari. Nadsapa Jeso pohuadsa huati tajari: –Jina, ohuadsa ticcaji –nadsa Jesodsa toccajari.

¹⁵Nahi dsotodepa Rebi tadsarihuaji Jeso tedseje jipaqqi-manahijine madija huapi taha huahuanaridsa jassi nahuajanijari. Nahidsapa *romanodenidsa dsiniro da tanijine nanaccadedeni, jodiodenicca marinaja cacahuamana-jarajarideni naco Jeso pohua huatimadedenidsama jassi nahuajanijari. Najarideni Jesodsa jahiridsajaripa huapi tahi. ¹⁶Naraha jodiodenicca marinaja maridedeni pariseo imadsa jehe quinajari nahidsa madija bicaqquri najarajarideni Jeso tedseje jipamanahi qqui toquinadsapa najaro imadsa jiperaqquri najari. Nadsapa Jeso huatimadedenidsa atti atti quinajari: –A., ¿nejecotohui tia maridepa romanodenidsa dsiniro da tanijine nanaccadedeni tedseje, aja imasiri cajimajarideni tedseje jipajari? –quinajari nade. Aja madija nama najarideni tedsejepa jipade *oppina tani quiquina najari.

¹⁷Naraha Jeso pohuadeni attideni mittadsa manaco Jeso huati tajari: –Nomiqquri najaridenipa toponi totonanomide tohuini quina-jararaha comaqquri najaridenina toponi totonanomide tohuini quiquina najari. Ohuapi pina toponi totonanomidessa onajaro. Madijadenicca ima Diodsa tobicanijine pohuadeni accode occajonajarode. Naraha madijapa: “Iapi bicaqquri inani” quinajaridenicca ima onanabicanijine occajona-jerajaro. Imasiri totonanadedenicca ima onanabicanijinena occajonajaro –nahi nade Jeso.

Jesodsa jipehe nebocossanicca ima huati toquinajari

Mateo 9.14-17; Roca 5.33-39

¹⁸Huano Baotistacca mamari tabaqqi jipehe nebocossamana, jodiodeni pariseo imadsa jehe quinajarideni naco jipehe nebocossamana najari, Diodsara huati huati dsanapomanahijine. Nadsapa madija Jesohuaji bacco najonamanadsapa pohuadsa huati toquinajari: –Huano Baotista pocca mamari tabaqqi tedseje jipehe nebocossamanajari. Jodiodeni pariseo imadsa jehe quinajarideni naco jipehe nebocossamanaraha ¿nejecotohui ticca mamari tabaqqia jipehe nebocossamanaha najarahi? –quinahi nade.

¹⁹Nadsapa Jeso pohuadenidsa huati tajari: –Dsabissopa amoneje cajibote najari pocca ejete tojadsapi ¿pohuadsa jassi taridsajaridenipa jipehe nebocossamana taco? Nebocossamanajarahi –nahi nade. –Dsabisso cajibote najari tedseje huatidsemanadsapa jipehe nebocossamana-jarajari. ²⁰Naraha nidsa huada onihiccadsa dsabisso cajibote najari iaccamanadsapa pohua tessedenipa jipehe nebocossamanahitohui –nahi nade Jeso. (Aja pohua atti nama najaripa pohuapa pina dsabisso cajibote najari. Pohua huatimadedeni jipehe nenebocossamana najarajari, najari.)

²¹–Ima onihi naqui ajima najaro. Etero ssessequidedenipi etero jadanidsapi etero dsati ihibedsacossamana nejerao. Etero dsati etero jadanidsa podsacossadsa dsotode ssahua nadsapi joca naqqi tani. Nadsapi etero jadani sseo tapomadsapi denima totabaccora tani –nahi nade. (Aja pohua atti nama najaripa pocca marinaja pina jodiodenicca marinajassa nejerani. Jeso pocca marinajapi dsati.)

²²–Ima onihi naqui ajima najaro. Uva ppejene nahatodsati naco bani etero ssequi nahi jadahidsapa sso sso ihidsamana najarajari. Uva ppejene nahatodsati bani etero ssequi nahi jadahidsa sso todsadsa ssicatadsapa bani etero jadahi jocaquera tajarijine sseo tahi caji tahi. Sseo tadsapa uva ppejene sso taha jica tahi, bani etero ssequi nahi naco totabaccoradsapa cora quina tahi. Nadsama uva ppejene dsatipa bani etero ssequi nahi dsatidsara sso sso totdsa najari –nahi nade Jeso. (Aja pohua atti nama najaripa madija bodi dsati tojadsana Jesocca marinaja dsati ecahuanijine pajirahi, najari.)

***Jassinajacca huadadsa Jeso huatimadedenipa
aroso jidsadsa trigo bono pore dsanapomanajari***

Mateo 12.1-8; Roca 6.1-5

²³Nadsapa dsotode naco jassinajacca huadadsa Jeso pohua huatimadedeni tedseje huidsaja nocconi motta jai toje-qquimajari. Jai tojeqquimadsapa aroso jidsadsa trigo bono pore ippimanadsa apa dsanapomanajari. ²⁴Naraha jiodideni pariseo imadsa jehe quinajarideni qqui toquinadsapa pohuadenidsa bica tejeradsa Jesodsa huati toquinajari: –¡Ajana! Tetimadedenipa huidsajacca bono pore quinadsapa pina jassinajacca huada jerajarodsa dsepedeni ijimanajarissa quinaha. Jassinajacca huadadsapi idsepe ijiniijine *oppina taraha –quinajari.

²⁵Naraha Jeso pohuadenidsa huati tajari: –¿Naraha tiadenipi aji Dio Atti maittaccadsama dsodo naniccadsa Dabicca ima hua hua titiquina naraha tetideni ajimamanajarorane? Najaro imapi Dabipa pohua tessedeni tedseje dsamatapa cappiramanadsa pemimanadsapa pan Diodsa da tahicca oppina taraha jipamanajari. ²⁶Aja maittaccadsama Diodsa dada toquimadedenicca tamine deni tojajari onipa Abiata madidsa nahihuaaji Dabi toqquedsimadsa pantohui huati tajari. Pan ohuaha nohueradsa Diodsa da tahiccaraha Dabi jipajari, pohua tessedenidsa naco da inabaquidsa jipamanajari. Najari pan Diodsa da tahipa dada toquima cacahuadedenira jijipamana najararaha Dabideni pemimanadsa jipamanajari oppinera tahi –nahi nade Jeso.

²⁷Naraha Jesopa denima pohuadenidsa huati huati dsanapojari: –*Jassinajacca huadapi madija inapajiramananissa tanijinena Diopa madija inahatobaqqui-jarajari. Diopa jassinajacca huada tahimarini huati tapojaripa jassinajacca huadapi madijadsa bica tanijinena huati tapojari –nahi nade. ²⁸–Ohua Madija Bedi onajarona jassinajacca huada jinede ojani. Jassinajacca ima cacahuadepi ohuana paji –nahi nade Jeso.

Madija dsepe siricca ima*Mateo 12.9-14; Roca 6.6-11*

3¹Naraha Dio Atti mamarihuaji Jeso toqqedsimani-pomadsapa madija dsepe siri naco nahidsa huittarijari. ²Nadsama jodiodeni pariseo imadsa jehe quinajaridenipa Jeso inoccodsamanajari. Jesopa *jassinajacca huadadsa madija inanomibaqquidsapa pohuadenidsa pina jassinajacca huada jerajarodsa pohua dsepe ijjarissa najari, quinajari. Pohuadeni bodipa: –Jidapana jassinajacca huadadsa ajari dsepe siri inanomidsapa Jesodsa ima inahananijine –quinajari. ³Naraha Jesopa dsepe siridsa huahua najari: –Titehemadsa ahuaji ticcajonaji –najari. ⁴Nadsapa dsepe siri ccajonadsa Jesopa cattadedenidsa huati tajari: –Jari, Moisesicca marinaja, icca madijacca marinaja naqui nahatoqquiri tiquinadsapi ohuatti tecomeramanaji. Jassinajacca huadadsapi ¿nejecoma najaro ima inananina “Bica tani” tiquinajaro? Jassinajacca huadadsa madija inabicabaqquidsana “Oppina tani” ¿tiquinajaroqui? Madija inajidsobaqquidsana “Bica tajaro” ¿tiquinajarorane? –najari. –Jassinajacca huadadsa naco ijine madija tossiajadsa ¿oppina taqui? “Paja dsoqquerina” ¿tiquinajarorane? –najari. Naraha pohuadeni cacomamanajari. Nahatoqquiri naraha cappina-manadsa joma quinajari. ⁵Nadsapa Jeso madija huapima jassi nahuajanijari icahadibaqquidsana noccodeni icatabaqqui najari. Nadsapa pohua bodi ojijari, huaribodeni sibaqquri nadsa. Nadsapa dsepe siridsa: –Jari, tidsepe ohuahuaji da ticanajonaji –nahi nade. Nadsa pohua dsepe pohuahuaji da icanadsapi tocanomijaro. ⁶Naraha jodiodeni pariseo imadsa jehe quinajarideni jai tojenadsapa tamine Herodecca madija tedseje queriquimanajari. Nahidsa ima idimamanajaro Jeso dsoqquehijine.

Jesopa jojode inatappa ssodadani inatappa nanicca ima*Mateo 8.18, 23-27; Roca 8.22-25*

4³⁵Najaro ssiajadsa maji tonahuidsapa Jesopa pohua huatimadedenidsa huati tajari: –Jina, coridsa jippehuaji jaijana –nahi nade. ³⁶Nadsapa pohuadsa queriquimanajari-deninebobaqquijari. Jesopa najaro canoadsa huittaridsa maride tojaraha maride jicadsa paja iaccamanarihi najari.

Madija ohuahadeni naco canoa onihidsa pohuadeni natti tohuaccamissamanajari. ³⁷Jai tojadsapa jojode dacorehema ccajona, passo dacorehema ccajona nadsapi coridsa ssoda ssoda najarojine canoadsa passo ssonidsa ssonidsa najaro.

³⁸Naraha Jesopa canoa dsotonihuaji pohua tati poponima ibemadsa tohuittamissadsa huadajonajari. Nadsapa Jeso pohuadsa huahua quinajari: –¡Ia Maride nocco tijaji! ¡Je icanabote nani! ¿Nema nehe poni ijicanijinequi? –quinajari.

³⁹Nadsapa Jeso nocco tojadsa totehemadsa jojodedsa passodsas huati tajari: –¡Epeje taji! ¡Mohua tejeraji! –nahi nade. Nadsapi jojode, passo ssoda ssoda najaro naqui joma najaro. Joma nadsapi passo podsippanissa tajaro. ⁴⁰Nadsapa pocca mamari tabaqquidsas huati tajari: –¿Nejecotohui ticappinamanajaro? Tiadenipi ohuadsa: “Jehe, Jesopa ia tohuacahua-baqquihijine pajirahi” ¿tiquinejerajarorane? –najari Jeso.



⁴¹Naraha pohuadenipa cappinamanajari. Bodideni jabojo quinadsa pohuadenira imahaha canajari: –Aja ia Maridepa, ¿nejeco madija? Puhuapa jojode, passo ssodadanima quejema naraha jojodetsa: “Epeje taji” nadsa jojode joma naha –quinajari.

***Jerashuajicca madija bodidsa
Satanacca dodosse madidsajari***

Mateo 8.28-34; Roca 8.26-39

5 ¹Aja coridsa jippehuaji bacco toquinajaricca dsama oninipi Jerasa. ²Nahidsana Jesopa toqqemoraraha madija bodidsa Satanacca dodosse madidsajari tonoccobirihuaji qqenadsa Jesohuaji qqedsippaja najari. ³⁻⁴Puhuapa tonoccobiri caji tanihuaji mamadi najari. Nadsapa nahi Jerashuajicca madijapa biji jore quinaraha joca tajojo, joca tajojo najari. Isso naco jore quinaraha ttai tajojo, ttai tajojo najari. Cadenadsa naco jore quinaraha pohuajine tajoppi tajoppi najaro. Jore quinapomadsa naco nama dsanapodsapa pohuaha deni tojadsanapojari. Jore quinadsa eahuamanahijineraha jojorededeni ajamani toquejenadsapa paja inebomanarihi najari. ⁵Puhuapa ssiaja ccaridsa, dsome ccaridsa nadsapa ji ji naridsajari, huahua naridsajari. Ssonohuaji ccaridsa, tonoccobirihuaji ccaridsa nadsapa sibadsa pohua ime ca jeo, ca jeo tonamarojari. ⁶Nanaja Jeso huaji tanidsa qqemorahi qqui tadsapa joppa najonajari, Jeso baccokuaji pohua pitodsa huitta najari. ⁷⁻⁸Naraha Jesopa amadsati pohua bodiccadsa huati tajari: –¡Satanacca dodosse, najari madija tinebojo! –najari. Nadsapa Satanacca dodosse jadsirema huati tajari: –Jeso, ¿nejecotohui tiamani occa imadsa tiquejemajaroneneje? Tiapi Dio deni tojajaricca ejedeni tijani. ¡Dio onima ohua tinajidso tejeraji, onajaro! –najari. ⁹Naraha Jesopa Satanacca dodossedsa huati tajari: –¿Tia onipi nejeco? –najari. –Ohua onipi Siba tani, Satanacca dodosse huapi inani –nahi nade.

¹⁰Nadsapa Satanacca dodosse tabaqqui madija bodidsa madidsamanajaridenia Jesodsa denima huati toquinajari: –¿Ettidsa jehe taqui? Ajijaro dsama huaji tanihuaji ia dosse tinabaqqui tejeraji –quinajari. ¹¹Naraha nahi

ssonos dsaboradsapa poroco huapi taha jiparidsamanajari.
¹²Nadsapa Satanacca dodosse tabaquia: –Poroco huapimadsana ia dosse tidsimabaquiji. Nanidsana iquejenana –quinajari.

¹³Nadsapa Jeso: –Jehe jporocodsana tiquejenana! –najari. Nadsapa Satanacca dodosse tabaqui aja madija bodicca jahininedsapa porocodsana toquejenajari nade. Poroco huapimapa 2 mil quinajari. Nadsapa porocodsa jai tojedsimadsapa paja domo toqquedsipparihi najari. Coridsa inidi sseberanihuaji diri-ri-ri todsippadsapa cojo-jo-jo quinajari, tocatojedsippajari. Nadsapa poroco huapima je tocaniredsapa coridsadsa cacotedsanajari.

¹⁴Nadsapa poroco cacahuadedenipa ahuaicca odsa panihuaji ima joppa tocanajari, ohuahapa huidsajahuaji ima joppa tocanajari. Nama naridsamanajari. Ima inanaridsamandsapi cattade jahionana canajari, madija huapima. ¹⁵Nadsapa qquide jahionadsapa Jeso huahihuaji bacco najonamanajari. Nadsapa madija tonomihira qqui toquinajari. Etero huesdaha huitta canajari. Satanacca dodosse tabaqui aja pohua bodidsa jahininedsapa pohua bodi huatomahissa tapomajari. Nadsapa madija cappinamanajari. ¹⁶Qqui toquinapojaridenia aja madija Satanacca dodosse tabaqui pohua bodidsa jahininejari tahimari huati, poroco tahimari huati toquinajari. ¹⁷Nadsapa poccadeni dsamadsa Jeso toccanihijine huatide dissassera tajari: –jTiccaniji, aji icca dsamadsapi timadi tejeraji! –quinajari.

¹⁸Nadsapa Jeso toqquedsippanidsapa canoadsa toqquedsanijari. Nadsapa madija pohua bodicca Satanacca dodosse tabaqui cajiporaha tonomijaripa Jesodsa huahua najari: –jOhua naqui tiadsa occana! –najari. ¹⁹Naraha Jeso attipa: –Poni, ticcaniji. Ticca odsahuaji ticca madijadsa tijaniji. Ticca madija huati tinabaquina: “Onomijaropi Diojine. Diopa ohuadsa huati huana tajari” tinanina –nahi nade Jeso.

²⁰Nadsapa toccanidsapa pocca ima huati naridsajari. Dsama arobeni Decaporicca odsa huapimadsa pohua tonomihicca ima, Jeso pohua inanomihicca ima huati taridsajari. Nadsapa huapima mittamanadsapa: –A., Diojine bica taha –quinahi nade.

Jairo bedeni tonominicca ima.
Amoneje amaissoranaja coma taraha tonominicca ima
Mateo 9.18-26; Roca 8.40-56

²¹ Jesopa pohua huatimadedeni tedseje canoadsa jippehuaji tohuaccanimanajari. Bacco tanimanadsapa madija Jeso qquide jahidsippappa canajari. Jesopa coridsa inidihuaji huajari. ²² Nanaja jodiodenicca Dio Atti mamarihuajicca tamine ojaría naco ccajonajari. Pohua onipa Jairo. Jesodsa bacco najonadsapa pohua bodipa: “Jesopa deni tojahi, ohuapi ajimani ojaní” nadsa Jeso baccuhuaji pohua pitodsa huitta nadsa tocattedsa najari. ²³ Nadsapa Jesodsa huati tajari: –Occa ejedeni amoneje bedeni tomijirani. Jina, occa odsahuaji icadaccana. Tidsepedsa poni bara tadsa tonomidsa madi-pomanijine –nahi nade Jairo. ²⁴ Nadsapa Jeso Jairo tedseje jahui tohuedanijari. Naraha madija huapima Jesodsa cahuaja tamissajari.

²⁵ Madija huapima jai tojahidsa naqui amoneje coma tajaro tohuanajaro. Ponipi dsamacoma onini amaissoranaja cajijaro. Poni coma tanicca huajanopa 12 naraha ama jicaquera tanicca tonahana tonahana dsanapojaro. ²⁶ Coma tadsa toponi cacana-ccaridedenihuaji ponima tocca tocca naraha tonomi-jerajaro. Denima coma dsanapojaro. Toponi cacanaccaridedenidsa poni manaconi cajicaridsajaro. ²⁷⁻²⁸ Naraha Jeso tahimari madija huati huati toquinahi mittajaro. Nema najaroa aji Jesotohui toccajaro-paji. Poni bodinipi “Pocca eterora bara onadsapi onominitohui” najaro. Madija si tocajajari canajonaraha amoneje coma tajaropi Jeso nattihuaji toccamissadsa tohuajjressissi nadsa pocca etero bara inajaro. ²⁹ Nahi poni bara inahidsa amadsati amani totappajaro. Nadsapi poni bodini “Jidapapi onomia” najaro.

³⁰ Nadsapa Jeso pohua bodi nahato tajari, pocca dacorehejine madija inanomijaro. Nanaja amadsati Jeso pohua nattihuaji piti nahujanidsa huati tajari: –¿Nejecojari occa etero bara inajaro-neje? –najari. ³¹ Naraha pohua huatimadedeni attidenia: –Madija si tocajajari canajonaripa. Naraha tiapi: “¿Nejecojarina ohua bara najari?” tajaro –quinahi nade. ³² Naraha Jeso pohua bara inanicca madijatohui ahuaji qqui, ahuaji qqui naridsajari.


³³ Nadsapi amoneje cappinehe ccajonadsa taccacca canajonajaro. Jeso baccuhuaji poni pitonidsa huitta nadsa poni cacomera-jaro: –Ojinepa –najaro. Nadsapi poni amaissoranaja cajijaro

Jeso pocca etero bara inadsa amadsati tomossijarocca ima huati tajaro. ³⁴Nadsapa Jeso ponidsa huati tajari: –Jehe asi, ohuadsa tibodi: “Jehe, Jeso ohua tonanomihijine pajirahi” tadsapi najaro-jine ticca dsamacomapi toccapa. Ticcanidsapi ticappina tejerana. Najaro comanidsa quidsa tapoma-jeranitohui –najari.

³⁵Nahidsa Jeso huati huati taraha, jodiodenicca Dio Atti mamarihuajicca tamine pocca odsacca madija bacco najona-manadsa ejedeni imehidsa huati toquinajari: –Jairo, ticca ejedeni dsoqqueni. Jidapapa ia Maride ccajona-jarana. Dsoqqueni. Epejeni, poni –quinajari. ³⁶Nama quinaraha Jesopa Jairodsa: –Tibodipi ticappina tejerana. Pina “Jehe, poni tonominijine” tana –nahi nade Jeso atti. ³⁷Jeso pohua natti jai tojamissajari-deni pohuadsa jai toja-jarahijine Jeso eccocobaquijari. Naraha pohuadsa jai tojahijinepa Pedro, Satiaco, Huano quinajari. Aja Huanopa Satiaco ohuaha. Pohuadenira jina inabaquijari.

³⁸Nadsapa Jairocca odsahuaji jai toja, bacco toquinajari. Bacco toquinadsa pina mohua mohua camajarissa najari Jeso qqui tajari. “Ejedeni dsoqqueni” quinadsa jadsirema oji oji camajari, johua johua camajari. ³⁹Odsadsa toqquedsimadsapa Jeso huati tajari pohuadenidsa: –¿Nejecotohui ticcadeni ojinaja dacorajaro? ¿Nejecotohui johua johua ticamajaro? Ejedenipi dsoqqe-jerani. Huadani –nahi nade Jeso. ⁴⁰Naraha pohuadenipa Jeso atti jaja icanamanajari.

Naraha Jesopa madija huapima dosse ininebaquijari amossini-huaji. Nadsapa Jeso, pohua huatimadedeni, ejedeni imehi, imeni quinadsa ejedeni huatijaro porinihuaji jai tojedsimajari. ⁴¹Nadsapa Jesoa ejedeni dsapani equididsa pohua attidsa huati tajari: –Taritta ccomi –najari. (Najaro ettidsapi: –Ejedeni, titehemaji –najari.)



⁴²Naneje ejedenipi amadsati tonomidsapi totehemajaro. Nadsapi ccaridsajaro. Huajanorini 12 najari. Najaro ejedeni ccaridsadsapi madija huapima jabojo quinaraha huatidsemanajari: –A., apaja bica tahi –quinajari. ⁴³Nadsapa Jeso atti pohuadenidsa: –Ajijaro imapi huati taridsamana tejerana. Poni –najari. Nadsapa Jeso attia: –Ticcadeni ejedeni tinajipamanaji –nahi nade Jeso.

Jeso assire tojidsa, jidseremani najari

Mateo 17.1-13; Roca 9.28-36

9 ¹Jesopa pohuadsa queriquijaridenidsa denima huati tajari: –Ohuapi pajissehera tiadenidsa huati onajaro. Ajidsa tidomdeni huajaro motadenipi tidsoququemanajeraccadsama Diocca cacahuehe dacorehema ccajonani qqui tiquinanitohui –nahi nade.

²Nadsapa Jeso najaro ima huati tahi nattini huada 6 nadsa ssonohuaji toqqemoradsapa Pedro, Satiaco, Huano quinajari-denira iaqqemorabaqqijari. Jai tojemoradsapa ssono tetepihuaji bacco tomoramanajari. Nahidsa qqui toquinanaja Jeso pano todsibehijaro. ³Pocca etero naqui amadsati todsibehijaro; nopo tajaro. Najaro noponipi madija ssamoququiri nahi. Madija iapi etero ssabo ssabo inaraha ijine najarossa nanijine pajira-jerani. ⁴Nadsapa qqui toquinanaja Eria, *Moisesi tedseje Jesodsa ahuatomanadsa imahaha canajari. Pohuadenipa Dio Atti cacomerabotedeni maitta-ccadsama madimanaporaha Jesohuaji ahuatomanajari.

⁵⁻⁶Nadsapa Pedrodeni cappinamanajari. Naraha Pedro pohua bodidsa: “¿Nejecora huati onanijine?” nanaja pohuama pohua atti Jesodsa: –Ia Maride, iapi ajidsa iquejenadsa bica tani. Ticcadeni odsa huahuaqquide 3 canehe huaqqi inana. Nadsapi ajaro tiadsa, Moisesidsa, Eriadsa cananijine –nahi nade Pedro. ⁷Naraha amadsati pohuadeni tetepihuaji essen ccaronajaro. Ccaronadsapi pohuadenidsa ijihuajanijaro. Nadsapa nahi essen bodidsa atti qquenajaro: –Ajajaripa occa ejedeni. Pohuadsa ohuati huana tajaro. Pohua atti timittamananissa taji –nahi nade Dio. ⁸Nanaja qqui toquinaraha Jesodsa madija ohuahapa domo hua-jarahi. Pohua motta hua canajari.

⁹Nadsapa ssonohuaji jahidsippanidsa Jeso pohuadenidsa huati tajari: –Aji ssono tetepidsa qqui tiquinajarocca imapi tecomamancana. Ohuapi Madija Bedi ojarropi nidsa odsoququeni nattini onahatonidsana najaro ima tecomeramananijine bica tani –nahi

nade Jeso. ¹⁰Pohua atti nama nadsapa madija ohuahadsa huati toquina-jararaha pohuadenira imahaha canajari: –¿Nejeco imara huati tajari? Pohua attipa: “Onahatoninitohui” naha –quinahi nade.

¹¹Nadsapa Jesodsa huati toquinajari: –¿Nejecotohui jodio-denicca marinaja maridedeni attipa: “Cristo-Mesia ccajona-jaraccadsama Dio Atti cacomerabote Eriana tahide ccanipohuitohui” quiquina najari? –quinahi nade pohua huatimadedeni.

¹²Nama quinadsapa manaco Jeso pohuadenidsa: –Pajissa, tahidepa Eria ccanipohuitohui, ima huapima icattermaridsapomijine. Naraha ohua Madija Bedi otahimaripi Diojine Pohua Atti cacomerabotedeni dsodo quinapojaro. Najaroa aji nanajidso ojadsapo ocasserani ohuanitohui. Madija naco ohua jaja icanamananitohui –nahi nade Jeso. ¹³–Naraha ohuattipi: Eriapa ccanipode, onajaro. Aja Eria dsoquejari ccanipo-jararaha madija ohuaha pina pohuassa najari ccajonadsa ima icattermaridsapode. Naraha nacasserehe pohuadsa inanamanade. Najaro ima pohuadsa tojajaropi maittaccadsama Dio Atti dsodo quinapojarossa najaro –nahi nade Jeso.

***Ejedeni bodidsa Satanacca dodosse madidsaraha
Jeso dosse inejari***

Mateo 17.14-20; Roca 9.37-43

¹⁴Nadsapa Jeso, Huano, Satiaco, Pedro quinajarideni Jeso pohua huatimade mota madimanahihuaji bacco dsippanimanabote nadsa qqui toquinajari; pohuadeni tesse madimanahidsa madija huapi taha toqueriqqui najari. Nahidsapa jodiodenicca marinaja maridedeni Jesocca madija tedseje ahuaji huati, ahuaji huati quinajari. ¹⁵Naraha Jeso bacco nanihi qqui toquinadsa huatidsemanajari: –A, Jeso bacco nanihi –quinadsapa pohuadsa: –Nija –quinahijine pohuahuaaji domo toqqejidsajari. ¹⁶Nadsapa Jeso pohuadenidsa huati tajari: –¿Nija, nejecotohui ahuaji huati, ahuaji huati tiquinajaroneje? –nani nade. ¹⁷Nahidsa madija ojaría Jesodsa huati tajari: –Ohua Maride, occa ejedeni tiadsa ohuaccajonajaripa. Pohua bodidsa Satanacca dodosse madidsajari. Najarijine atti cappirajari. ¹⁸Pohua dama inadsa jadsirema cco inacossadsapa namidsa edima bhua nadsapa pohua ajari ssabojene tocca tocca najari. Pohua ino ccado-do-do najari, pohua assirema ccara-ra ccara-ra najari. Occa ejedeni nama nama nadsa tetimadedenidsa huati onajaropa: “Occa ejedeni

pohua bodicca dosse tininemanajo” onaraha ssamoquuri napaja –nahi nade imehi atti. ¹⁹Nadsapa Jesoa: –Jaho, madija huapima Diodsa jehe tiqunanissa tejerani. Tiadeni mari mari ohocanabaqqi naraha ¿nejecoma nadsa ticahatterapadseje? Ticcadeni jeheniji pajiranissa tejeradsapi ohuadsa ocassera taraha ¿nema nehe onahana-dsanaponijinequi? –nanaja: –¡Jari, ticca ejedeni ohuadsa teccajonajo! –nahi nade Jeso.

²⁰Nama nadsapa pohuahuaaji ejedeni eccajonamanajari. Naraha Satanacca dodosse Jeso qqi tadsapa ejedeni quidsa inanajari. Namidsa tohuedimajari. Dehue naridsadsapa ajari ssabojene naco toccajari. ²¹Nadsapa coma tajari imehidsa Jeso huati tajari: –¿Pohua coma tahicca abadsico nejecoma canahi? –najari. Naraha imehi attipa: –Badsira tadsamade –nahi nade. ²²–Huajjiradsa quidsa inanadsapa dsippodsa naco ihinassonidsana najari. Passodsa naco ihinassonippa nanaja najari, inanadsoqquehijine. Nadsapi Jeso tiana nahato tinanitide. Iadsa teti huana taji, ia acco ticamabaqqinijine –nahi nade Jesodsa. ²³Naraha Jesopa: –Jaho, tettihi ohuadsa: “Tiana nahato tinanitide” tajaro nema tejeraji. Madijapa pohua bodi Diodsa jehe nahissa tadsapa nahato tajari: “Diopa ima huapima inananiijine pajirahi” najari –nahi nade Jeso. ²⁴Nadsapa imehia atti mohui tadsa huati tajari: –¡Jehe, Diopa pajirahi! onajaro. Naraha obodi acco ticamaji, occa jeheniji todacorani nanijine –nahi nade.

²⁵Nadsapa Jeso qqi tanaja madija pohuadsa queriqquijonahi tohuapihi nahi qqi tadsapa Satanacca dodosse dosse ininejari. Pohua attipa: –Satanacca dodosse, tohuaribo sibehe totonanade, tohuebeno totonassamode, tia dosse omajaro. ¡Ejedeni tinebojo! ¡Tiqquenadsapi tiqqedsimanipoma-jeraji, onajaro! –nahi nade Jeso. ²⁶Nadsapa Satanacca dodosse johua najari. Pohuajine ejedeni huatiacossadsa dari-ri-ri nadsapa qqenajari. Nadsapa ejedeni pina huatiajarissa naha ponajari. Nama nadsapa: –Huatiahi –quinajari nade. ²⁷Naraha Jeso ejedeni dsepedsa dama inadsapa nomi taha inatehema najari.

²⁸Nadsa dsotode Jeso odsahuaji toqqedsimanidsapa pohua huatimadedeni motaha: –¿Nejecotohui iaha ajari ejedeni bodicca dosse inehijine ipajira-jerapa? –quinajari. ²⁹Nadsapa Jeso attia: –Nama nahicca dosse tininemanahijinepa Diodsa huati tiquinadsana toqquena tahi –nahi nade Jeso.

Jesopa pohua dsoqquehicca ima huati tapomajari

Mateo 17.22-23; Roca 9.43-45

³⁰Nadsama nahidsa nebomanadsapa jai tojanijari. Dsama arobeni Carireahuaji jai tojeqqumajari. Naraha Jesopa madija huapima pohua toqqeqqumahi nahatoqquri najarahijine pohua cacomadsa toqqeqqumajari. ³¹Aja Jeso pohua cacomadsa toqqeqqumajaripa pohua huatimadedeni pohuadenira maride dsepe ijihijine. Pohua attipa: –Ohuapi Madija Bedi ojjaroa nidsa dsotode madija ojaria ohua ccacoradsapa madija dsepedenidsa ojadspahi ohua inanadsoqqumana-nitohui. Ohua ppa idsamanaraha huada huatinimade tojari nadsapi Abi Dio ohua nahatonihitohui –nahi nade Jeso.

³²Naraha pohuadenipa pocca marinaja mittamanahissa tajarajari. “¿Nejecoma tajaro?” quinahitohuiraha cappinamanadsapa Jesodsa huati toquina-jarajari.

–¿Nejecojarina deni tojajari? –quinajari

Mateo 18.1-5; Roca 9.46-48

³³⁻³⁴Nadsapa Jeso pohua huatimadedeni tedseje odsa panani Capernaohuajicca jahui jai tojanidsa Jeso huatimade pohuadenira imahaha tocananijari: –Aji ia huapimapi ¿nejecojarina deni tojajari? –tanimanajari. Odsadsa bacco tanimandsapa jai tojedsimanijari. Nadsapa Jeso pohua huatimadedeni huati icanabaqqijari: –¿Nejeco imara jahuidsa imahaha ticananijaroneje? –nahi nade. Naraha pohuadeni bodipa: “Jeso icca imadsa jipera tahitide” quinadsapa ecomeramana-jerani. Dididi canajari. ³⁵Nadsapa Jeso huittaridsa pohua huatimade 12 quinajarideni huahua inabaqqidsapa pohuadenidsa huati tajari. Pohua attipa: –Madijapa: “Ohuana deni ojani” najaripa Diodsa bica tajarahi. Madijapa: “Ohuapi ajimani ojani” najarina Diodsa bica tajari. Najaripa madija huapimadsa acco camade dissera tadsapa najarina Diodsa bica tajari. Aji pocca ima bica tadsapi pocca deni tojehe pajissehecca ahuateo tajaropaji –nahi nade Jeso.

³⁶Ejedeni huahua inadsa pohua huatimadedeni jassi nahuajanihi nocconidsa inahuajari. Nadsapa idi, dsojo ijidsadsa pohua huatimadedeni mari icanabaqqijari.

³⁷Pohua attipa: –Ajajari ejedenissa najaridsa tetideni huanaqquiri naji, onajaro. Occa tiquejenajaropi ejedenidsa tetideni huanaqquiri nadsapi ohuadsa naqui tetideni huanaqquiri najaro. Ohuadsa tetideni huanaqquiri nadsapi ohua cadossede Abi Diodsa naqui tetideni huanaqquiri najaro –nahi nade Jeso.

**–Madija iadsa huadi tajaradsapa
ia acco camajari –najari Jeso**

Mateo 10.42; Roca 9.49-50

³⁸Nadsapa Huano Jesodsa huati tajari: –Ohua Maride, madija ohuaha tia oni hua nadsa Satanacca dodosse madija bodidsa madi-dsajari dosse ininehi qqui inade. Naraha pahuapa iadsa ccaridsa-jaradsa pahuadsa: “Epeje taji. Poni” inade –nahi nade Huano.

³⁹Naraha Jeso attipa: –Pohuadsa “poni” tiquinejeraji. Madija ohua oni hua nadsa canahatoriri canadsapa nidsa dsotode ohuadsa atti tabaccora tajarahitohui. ⁴⁰Madija nama najaripa iadsa huadi tajaradsa ia acco camade tojajari –nahi nade Jeso. ⁴¹–Pajissehera tiadenidsa huati onajaro: Aji ohuadsa tiquejenadsapi madijadenipa: “Jehe, pohuadenipa Jesocca madija, pohuadenidsa accora onana” quinadsa tiadenidsa da quinadsa bica tani. Passo dse tiquinanijine da icanamanadsa naqui manaco nidsaranibote Dio Pocca biquehe pohuadenidsa inananitohui –nahi nade Jeso.

Imasiri tinanadsapi oppina tanihuaji ticcanitohui

Mateo 5.29-30; 18.6-9; Roca 17.1-2

⁴²Jesopa denima huati huati tajari: –Nadsama madija ojariajine ohuadsa jehe quinajari imasiri inananamadsapi pahuadsa najidsohue oppina tanicca ssonarinitohui. Ejedeni ohuadsa jehe quinajarideni naco madija imasiri mamaride-jine imasiri tocahatteradsapa aja imasiri mamaride pahuadsa najidsohue oppina tanicca ssonarinitohui. Pina ajiaro imassa najaro: Siba ccanajabote pohua mattodsa ssoque dsanadsa passo imenihuaji je tahijine cco todsippadsapa oppina taraha najidsohue denima oppina tanicca pahuadsa ssonarinitohui.

⁴³⁻⁴⁴–Nadsama imasiri tinana-jeranijinepi tibodi daco tijiradsa “poni” taji. Poni tejeradsapi ima oppina tanicca tiadsa ssonarinitohui. Pina tidsepedsa imasiri tinanabote naraha daco tijiradsa “poni” taji. Nema tadsapi pina tidsepe ca ticajidsajarossa najaro.

Tidsepe cajarie amossi canaraha Diocca cacahuehedsa timadidsapi tetidsenitohui. Naraha imasiridsa dissera tinadsapi pina tidsepe capamehe ticajijarossa naraha poni ehuerani diji tehe nema dsanaponihuaji ticcanitohui. Najaro jororonipi ohuihuira tani.

⁴⁵⁻⁴⁶–Nadsama ima onihi naqui. Imasiri caji tanihuaji ticcanijine tohuini taraha “poni” taji. Nema tadsapi pina temori ca ticajidsajarossa najaro. Temori cajariraha Diocca cacahuehedsa timadidsapi tetidsenitohui. Naraha imasiridsa dissera tinadsapi pina temori capamehe ticajijarossa naraha poni ehuerani diji tehe nema dsanaponihuaji tia coro todsimahitohui.

⁴⁷–Nadsama tinocodsas naqui tohuini tanicca qqui tinadsa imasiri tinananijine tohuini taraha daco tijiradsa “poni” taji. Nema tadsapi pina tinocco huari, joca, jeo, coro tinajarossa najaro. Tinocco ojariraha Diocca cacahuehedsa timadidsapi tetidsenitohui. Naraha imasiridsa dissera tinadsapi pina tinocco pamehe ticajijarossa naraha poni ehuerani diji tehe nema dsanaponihuaji tia coro todsimahitohui. ⁴⁸Nanihuaji ocasserani tedsanaponitohui. Timeqqene ssari-ri cadsanaponitohui. Jororoni ohuihuira taniccadsa time ca dsanaponitohui.

⁴⁹–Aji tiadeni huapima Djojine tibodideni tohuire-nijinepi pina sahojine bani jadsijarajarissa nanitohui. Pina dsippo jororonijine bani cadsapa jadsijarajarissa nanitohui. ⁵⁰Sahopi bica tani. Banidsa huira nadsapi jadsijaraji. Naraha saho ajiboni tomossidsapi tomajidera tani, icca bani naco totabaccora tahi. Tiadenidsa ohuatti pina sahossa onanajaro. Ohuatti ticajimanana, imasiri tinanamana-jeranijine, madija ohuahadeni tinanabicabaqqui-manahijine. Titessedeni tedseje ticajonerara canaji, onajaro –nahi nade Jeso.

***Jesopa amoneje nebo nebocca ima
mari icanabaqqijari***

Mateo 19.1-12; Roca 16.18

10 ¹Jeso odsa panani Capernaodsas nebotsapa dsama arobeni Jodeahuaji toccajari. Hueni Jordao jippehuaji toccadsapa dsama arobeni Pereaahuaji bacco tajari. Nahidsapa madija sibema pohuadsa queriquipomadsapa mari icanabaqqijari. Jesopa nama nanaridsa najari. ²Nahidsapa jodiodeni mota pariseo imadsa jehe

quinajarideni Jesodsa jiperaquuri nadsa pocca marinaja inassamananijine ima najoramanajari. Jesodsa tohuajire-ssimanadsapa pohuadsa huati toquinajari: –Nija, Jeso ¿maquideje pocca amoneje inebodsapi pohuadsa ima nohueraqi? –quinahi nade.

³Nadsapa Jeso attia: –Maittaccadsama najaro imapi Moisesi Diocca marinajadsa dsodo inapode. Jari, najaro pocca marinaja tecomeramanaji –nahi nade. ⁴Nadsapa pariseo imadsa jehe quinajari attidenipa: –Jehe, Moisesicca marinajapi ajima nade: “Maquidejepa pocca amoneje inebonijinepi nebohuecca papeo dsodo inadsa ponidsa da inadsa inebodsapi pohuadsa ima nohuerani” nadija –quinahi nade.

⁵Nadsapa Jeso huati tajari: –Jehe, naraha najaropi maittaccadsama ticcadeni idideni huaribodeni sibaquuri nadsa nebohuetohui quinadsapa Moisesi najaro marinaja pohuadenidsa dsodo inajarode. ⁶Naraha Dio dsama inahatoponipi amoneje nebo neocca imapi nohueraccade. Djojine madija toquejenapodsapa ima ajima najaro:

“Maquideje amoneje tadsajani inahatobaquijari. ⁷Nema najarojinea maquideje pohua bedimenidsa tojadsapa imehi imenidenidsa nebo., pohuadenira madimanajari.

⁸Nadsapa pamaraha pina ojarijarissa quinajari” najaro Dio Atti dsodo nanidsa. Nadsapa pajissa assiredeni pamaraha cacajiredsapa Djojine pina ojarijarissa dsanapomanahijine. ⁹Nadsama Djojine pina ojarijarissa quinaraha caneboredsapa bica tejerani. Madija ohuaha atti noppine caneboredsa naco bica tejerani –nahi nade Jeso.

¹⁰Nadsapa Jeso pohua huatimadedeni tedseje odsahuaji jahinipomadsa odsa bodihuaji jassi dsadsapa Jesodsa huati toquinajari: –¿Ticca marinaja nejecoma najaro? –quinahi nade. ¹¹Nadsapa Jeso pohuadenidsa ima ecomerajaro: –Jehe, maquideje pocca amoneje inebodsapa amoneje onihira icajidsapi pocca amoneje tahide ineborodsa imasiri inanajaro. Nama nadsapa Diocca marinaja ecahua-jerajaro. ¹²Amoneje naqui ponicca maquideje inebodsapa ohuahara icajidsapa ponicca maquideje tahide ineborodsa imasiri inanajaro. Nema nadsapi Diocca marinaja ecahua-jerajaro –nahi nade Jeso.

Jesopa: –Abi, ticca biquehe ejedenidsa tinanaji –najari
Mateo 19.13-15; Roca 18.15-17

¹³Nadsapa madija poccadeni ejedeni Jesodsa eccajonabaqqi-manajari; “Jeso tatideni bara inabaqqidsa Diodsa huati tahijine” quinadsa. Naraha Jeso huatimade attidenia: –¡Ejedenipa pohua! ¡Jesohuaji teccajonabaqqi-mana tajarajo! –quinahi nade. ¹⁴Naraha Jesopa pohua huatimadedeni ejedeni tedsejemadeni huacossamanahi qqi tadsapa huadijari. –¡Poni, nema tiquinejeraji! Pahuadeni jahijonana, onajaro. Eccajonabaqqi-manahijine tecossamana tejeraji. Madijapa pina ajajari ejedenidenissa quinajarina Diocca cacahuehdsa toquejenahitohui. ¹⁵Pajissehera tiadenidsa huati onana: Madijapa pohua bodicca jeheniji pina ejedenicca jehenijissa najaradsapa Diocca cacahuehdsa toja-jarahitohui –nahi nade Jeso.

¹⁶Nadsapa Jeso ejedeni idi..., dsojo ijidsadsa tatidsa bara nadsa huati tajari: –Abi Dio, ticca biquehe ajajari ejedenidsa tinanana, onajaro –nahi nade. Ejedeni ohuahadeni naco nama inanabaqqi-ridsajari.

Madija dsepe sse tajari Jesodsa huati tajari
Mateo 19.16-30; Roca 18.18-30

¹⁷Nahi dsotodepa Jeso jahui toccadsa pohuahuai madija ojaría joppa najonajari. Jeso baccohuai pohua pitodsa huitta nadsa huati tajari: –Nija, Mamaride bicahi, ¿Nejecoma onadsa camittehe jiquejeranicca bacco onanijine? –nahi nade. ¹⁸Naraha Jesopa: –¿Nejecotohui ohuadsa: “Mamaride bicahi” tajaro? Madija bicahi nohuerahi. Diona bica tahi ojaríhi. ¹⁹Naraha camittehe jiquejeranicca bacco tinanijinepi Diocca marinaja Moisesi dsodo inajarocca nahato tinani. ¿Najaro huapima tecahuanissa taqui? Pocca marinajapi ajima najaro: “Madija tinanadsoqqe-jarajo. Ticca amoneje jerajaropi dama tejeraji. Tiboti tejeraji. Maidsehedsa naqui madijadsa ponima ima tinahana tejeraji. Madija ticamaidsa tajarajo” nani Diocca marinaja. Pocca marinaja oníhi naqui: “Ticca abi, ticca amidsa bica tinadsa tinamadibaqquihissa tajo” nani Diocca marinaja Moisesi dsodo inajaro –nahi nade Jeso.

²⁰Naraha Jeso baccodsa huittajari attipa: –Mamaride, najaro marinaja huapimapi dsabisso ojapodsama ohuacahua-jonajarode –nahi nade. ²¹Nadsapa Jeso icattoma nanaja pohuadsa huati tohuanahi nadsa huati tajari: –Naraha ima ojarie tiadsa dsori taccani. Ticcanidsa tidsepetaji nema nehe manaconidsa da tinaridsaji. Nani najaro dsiniropi madija tohuati nahanaquiri najaridenidsa da tinabaquini. Nema tinanadsapi nidsa memehuaji Diocca biquehe tiadsa tojanitohui. “Nema onana” tadsapi nidsa dsotode ohuadsa paji ticcariji –nahi nade Jeso.

²²Najaro ima mittadsapa pano todsahi najari. “Jehe, nema onana” najarajari. Pohua dsepetajitohui, pocca dsinirotohui huati huana tajari. Pohuapa dsepe sse taja nadsapa bodi ocassera taha toccanijari.

²³Nadsapa Jeso cattahuajanihi nadsa pohua huatimadenidsa huati tajari: –jA, madija dsepedeni sseqquiri najaridenipa Diocca cacahueheda toquejenahijine najo tani! –nahi nade. ²⁴Nema najaro ima pohua huatimadedeni mittamanadsa huajo canirejari. Nadsapa Jeso huati nimanipomajari: –Jaho, otessedeni, madija Diocca cacahueheda toquejenahijine najo tani, onajaro. ²⁵Pina bani imehibote came dsopa etero ssessequi odinidsa toqqequimahijine pajira-jarajarissa najari madija dsepe sse tajaripa Diocca cacahueheda tojahijine ssamo tani –nahi nade.

²⁶Nadsapa Jeso pohua huatimadedeni najaro ima mittamanadsa bodideni jabojomanadsapa huati tocanirere canajari: –Jaho, madija tocassiejerahijinepa ssamo tani. ¿Nejecojarina tossiapadsaja? –quinahi nade. ²⁷Nadsapa Jeso pohuadeni icattabaqqi nadsa huati tajari: –Madijapa ssamomo taraha Diodsapi ssamo tejerani. Pohuajinena madija tocassiejerahitohui –nahi nade Jeso.

²⁸Naraha Pedropa Jesodsa huati tajari: –Ia Maride, iapi tiadsa jaijaridsanijinepi icca odsa, icca madija, huapima inebo-ridsabaqquide –nahi nade.

²⁹Manaco Jeso atti: –Pajissehera tiadenidsa huati onana: Madija ohua acco camahijinepa pocca odsa icanebo., pohua imecote inebobaqqi., pocca ami, abi inebobaqqi., pocca ejedeni inebobaqqi., pocca dsama inebo nadsapa

icassiejeranijinecca ima tojaridsanijine dsepe ijiridsajari.
³⁰Nadsapa nidsa dsotode huapima pohua ineboridsajarossa nehe Dio pohuadsa da inaridsadsapa cajipomahitohui. Jidapana ajijaro namidsa pohua madicadsa huemani cajihitohui. Pohuadsa pina pocca odsa tohuapijarossa nanitohui. Pohua imecotedeni naco tohuapiridsahitohui, pohuadsa pocca amissa najaro cajiridsanitohui. Ejedeni ohuahadeni pina pocca ejedeni toquejenajarissa naridsahitohui. Dsama naqui pina pocca dsamassa najaro pohuadsa tojaridsanitohui. Naraha otahimari pohuadsa tojajarojine pohuadsa najidsohue ssonarinitohui. Nema nanitohuiraha nidsa dsama dsati tojadsapi camittehe jiquejeraniccadsa madi-dsanapohuitohui. Pajissa –nahi nade Jeso.

³¹–Naraha jidapana tiadenipi ajimani tiquejenaraha ajijaro imadsa tibodideni huatomanaji: Madija jidapana madimanagerideni motapa deni toquejenaraha nidsaranibotepa ajamani toquejenahitohui. Jidapana madimanajarideni mota ajamani toquejenajarideni naco nidsaranibotepa deni toquejenahitohui –nahi nade Jeso.

Jesopa pohua dsoqquehicca ima huati nimanipomajari

Mateo 20.17-19; Roca 18.31-34

³²Jeso pocca madijama Jerosarecca jahui jai tojadsapa pohuana tahide toja-dsanapojari. Pocca dodosse tabaqquipa pohua nattihuaji jai tojajari. Jesopa Jerosaretohui toccadsa pocca dodosse tabaqqui pohua dsoqquehijine noppine cappinamanadsa huatideni huatoto cadsanapojari. Madija ohuahadeni pohuadeni nattihuajicca jai tojamissajari naco cappinamanajari. Nadsapa pocca dodosse tabaqqui 12 quinjari pohuadenira huahua inabaqquids pohuadsa queriqquijari. Nadsapa jahui jai tojadsa pohuadsa ima tojanijinecca huati huati dsanapojari. ³³Jeso attipa: –Jerosarehuaji jaijemoraroponi nahatoqquri tiquinani. Ohuapi Madija Bedi ojajaroa nidsa Jerosare bacco inadsapi dada toqquimade tamededeni, jodiodenicca marinaja maridedeni najarideni dsepedenidsa ojanitohui, onajaro. Ohuadsa: “Dsoqquena, dsoqquena” quinahitohui. Dsotodepi madija ohuaha jodio quejena-jarajaridenidsa ohua da quinanitohui, onajaro.

³⁴Najaridenina ohua jaja icanaquimanajaro, ohua ppito inaquimanajaro, ohua cossi inaquimanajaro nanitohui. Nadsapi ahua porimacossanidsa ohua inanadsoquemanadsa ohua ppa idsamananitohui. Naraha huada huatinimade tojari nadsa onahatoninitohui –nahi nade Jeso atti.

Satiaco, Huano tedseje Jesodsa huati toquinajari

Mateo 20.20-28; Roca 22.24-27

³⁵Nadsapa Sebedeo bedideni Satiaco, Huano tedsejapa Jesohuaji tohuajressimanadsa huati toquinajari: –Ia Maride, ¿tettidsa jehe taqui? Icca huatinajassa tinananijineji, inajaro –quinahi nade. ³⁶Manaco pohuadenidsa: –¿Nejeco imara tiadenidsa onananijine? –nahi nade Jeso. ³⁷Nadsapa pohuadenia: –Ticca cacahuehe bicanihuaji madija cacahuade tittari-dsapi tinoridsa ipahimariniijine ohuapi tinori nahatonihuaji ohuittari, ocotepa tinori ssamohuaji huittari inanijine ¿jehe taqui? –quinahi nade Jesodsa.

³⁸Naraha pohuadenidsa Jesoa: –Jehe, aji huati tiquinajaro imapi ssamomo tinani. Ohuapi ocasserani ohuabote nani. Ohuadsa najidsohue ssonarinitohui. Aji tiadenipi najidsohue tinahanamananijine ¿tipajiramanaqui? –nahi nade Jeso. ³⁹–Jehe, ia naqui ipajirani –quinahi nade. Nadsapa pohuadenidsa Jesoa: –Jehe, pajissa ocasserani tinahanamananitohui. Aji ohua najidsohue onahanadsapi tiadeni naqui nidsa dsotode najidsohue tinahanamananitohui. ⁴⁰Naraha memehuaji occa cacahueheda madija cacahuade ohuadsama pahimarihijinepa ohua dosse dosse onejerani. Abi Dio icattejidsabaquujiridenina ohuinoridsa pahimarihijine –nahi nade Jeso.

⁴¹Naraha Jeso huatinimade mota 10 quinajaridenipa najaro ima imahaha canahi mittamanadsapa Satiaco Huanodenidsa huadimanajari. ⁴²Nadsapa Jeso huahua inabaquidsa pohuadsa toqueriquidsapa pohuadenidsa huati tajari: –Tiadenipi madija ohuaha jodio quejena-jarajaridenicca madie nahatoqquri tiquinani. Poccadeni taminedenipa dossede dacoraqquri nadsa poccadeni madija dosse dosse quiquina najari. Deni toquejenajari ohuahadeni naco poccadeni madija dacoreheda ehcahuabaquimana najari. ⁴³Naraha aji ohuadsa tiquejenajaropi nema tiquinanijinepi bica tejerani.

Naraha titedsedeni ojariapa: “Ohuana deni ojana” nadsapa pohuana huapima bijideni acco icamaridsabaqquihijinena bica tani. ⁴⁴Diocca cacahuehedsa deni tijanijinepi titesse bijideni acco ticamaridsajo, pina poccadeni medse tijajarossa tanijine. ⁴⁵Ajina, ohuapi Madija Bedi ojararoa Diocca dosseniji ojaraha madija dosse dosse onanijine occajona-jerajaro. Madija acco ocamabaqquihijinena occajonajaro. Madija poccadeni imasiri manaconi pohuadenidsa ssonari-jeranijine poccadeni imasiri manaconipi ohuana ohua ohuaccoranitohui –nahi nade Jeso.

Jesopa Bartimeo nocco ssire inanajari

Mateo 20.29-34; Roca 18.35-43

⁴⁶Nadsapa Jeso pohua huatimadedeni tedseje odsa Jericodsa bacco toquinajari. Nahidsa toqqeéquimadsapa pohua huatimadedeni, madija ohuahadeni naco huapi taha pohuadsa jai tojajari. Nani jahui inididsapa nocco siri huihuitta najari. Pohuapa Timeo bedi, onipa Bartimeo. Pohua dsepe da nadsa: –Ohuadsa dsiniro da tiquinaji –tatacossa najari. ⁴⁷Najaria “Jeso Nasaretihuaajicca toqqeéquimahi” quinahi ima mittadsapa Jesodsa huahua najari: –¡Jeso, tiapi tamine Dabi potemahi tijani! ¡Ohuadsa teti huana taji! –najari.



⁴⁸Naraha madija motadenipa: –¡Poni! ¡Joma taji! –quinahi nade. Nama quinaraha denima paja huahua tarihi huahua tarihi najari: –¡Tamine Dabi potemahi! ¡Ohuadsa teti huana taji! –napomahi nade.

⁴⁹Nama nadsapa Jeso huaha tahi nadsa –Jari, huahua tajonamanajo. Ccajonana –nahi nade. Nadsapa nocco siridsa huahua quinajari: –¡Jehe, bica tani! Titehemaji, tiadsa huahua nahi –quinahi nade. ⁵⁰Nanaja pohua teteppe ssiti, totehemahi, Jesohuaji toqquessijari.

⁵¹Nadsapa Jesoa: –¿Nejecora tiadsa onananijine? –nahi nade. Nadsapa nocco siripa: –Ohua Maride, onocco ssire tinanaji, onajaro –nahi nade. ⁵²Nadsapa Jeso: –Epeje. Ticcaniji. Tibodi ohuadsa pajissa tadsapi tinomini –najari. Nadsapa Jesojine amadsati pohua nocco ssire tajari. Jerosarecca jahui Jeso denima toccadsapa Bartimeo naco pohuadsa toccajari.

Jesopa Jerosaredsa bacco todsimajari

Mateo 21.1-11; Roca 19.28-40; Huano 12.12-19

11 ¹Nadsapa Jeso, pocca dodosse tabaqqui, madija huapima tedsejedeni jai tojajari. Odsa panani Jerosarehuaji tohuajiramanadsapa ssono onini Oribodsa jai tojemorajari. Najaro ssonodsa odsa capamema nanicca pamajaro capahimajaro, oninidenipi Betapaque, Betania najaro. Najaro odsa pamehedsa bacco toquinabote nadsa Jeso pocca dodosse tabaqqui pamahadsa huati tajari: ²–Jari, ajicca odsa capamema nanihuaji ticadapoji. Nanihuajipi bojo namidsadsa napidsati ssoque dsanaha huahi. Najari bojopa idedsa madija huittari-jaraccahi. Najari dicca tiquinadsa teccanimanajo –nahi nade. ³–Naraha tiadenidsa madija attipa: “¿Nejecotohui bojo dicca tiquinajari?” nadsapa pohuadsa huati tiquinana: “Ia Medsede ajari bojo tohui nadsapaja. Nidsa eccanihitohui” tiquinana –nahi nade Jeso.

⁴Nadsapa tohuedanaja, jahuidsa bojopa ssoque dsanahi bacco quinajari, odsa huajira tanidsa. Nadsapa bojo dicca quinajari.

⁵Nanaja nahicca madija domodeni huajari attideni: –¿Nejecotohui bojo dicca tiquinajari? –quinahi nade. ⁶Naraha manaco pohuadeni cacomeramanajari: –Ia Medsede tohui nadsapaja –quinahi nade. Nadsapa jinede jehe nadsa eccanimanajari.



⁷Nadsapa bojo eccanimanjari... Jesohuaji bacco nanimanadsapa poccadeni etero huapicca motarajaro ssiti quinadsa bojo idedsa bina quinadsa nahidsa Jeso huittarijari. ⁸Nadsapa madija huapi taha Jesodsa huatidsemanadsa pohua tedsejema jahui bina idsanapomanajaro, pohuadsa: “Deni tijani” quinahijine. Nadsapa jahuidsapa pohuadeni tetepe namidsa hua idsanapomanani nade. Madija ohuahadenipa birijari eppe huamonicca ca ippimanadsa hua idsanapomanahi nade. Nadsapa Jeso jahui bina tani motta tocca-dsanapojari.

⁹Madija huapima pohua tedsejema jai tojaja, pohua natti-huaji jahijonaja dsanapomanajari. Pohuadsa huatidsemanadsa huahua huahua dsanapomanajari. Attidenipa: –¡Diopa deni tojahi, deni tojahi! ¡Ia Medsede onima ccajonajaridsa biquehera tojana, tojana! –dsanapomanajari. ¹⁰–¡Pohuapa icca idi tamine Dabi potemahi bicabote! ¡Ia Cacahuade tojahijine ccajonahi! ¡Bica tahi, bica tahi! ¡Memehuaji Diodsa madi-manajarideni pohuadsa: “¡Deni tijani!” quinana, quinana! –dsanapomanahi nade.

¹¹Nadsapa Jeso Jerosaredsa bacco todsimadsa Diodsa dada toqquimahuaji toccajari. Nahihuaji toqquedsimadsapa qqui naridsahissa tajari. Qqui naridsaha jicadsapa maji toccajari. Nadsapa Jeso pocca dodosse tabaqqui 12 quinajari tedseje Betaniahuaji jai tojanijari, bacco tanimanahi nade.

Jesopa pohua atti ocassera tadsa ahua iquiera bono-jarajaridsa huati tajari

Mateo 21.18-19

¹²Huada ssiaja nahi Betaniadsa Jeso toccapomadsapa pemi-jari. ¹³Nadsapa huaji tanidsa ahua iquiera eppe cajipomahi qqui tadsa: –Bono naco cajihitide –nahi nade. Naraha nahi bacco tadsapa eppe pohuara qqui tajari. Iquiera eppe cajidsapa bobono najariraha bono-jaraccahi. Pohua bonohuicca abadsico bacco tocana-jaraccajari. ¹⁴Nadsapa Jeso ahua iquieradsa huati tajari: –Jidapapi tibono madija jipamanapoma-jarahitohui –nahi nade. Nahidsa pohua huatimadedeni mittamanajari.

Diodsa dada toqquimacca odsadsa manaconitohui dadadedeni mohua ininebaqquijari

Mateo 21.12-17; Roca 19.45-48; Huano 2.13-22

¹⁵Nadsapa Jeso Jerosarehuaji tocanajoranipomadsa *Diodsa dada toqquimahuaji toqquedsimanipomajari. Najaro odsacca boronidsa madija *bani bedi Diodsa da tahijinecca dade toquejenahi qqui tajari. Manaconitohui dadadedeni qqui inabaqquidsapa huapima mohua ininebaqquijari. Mimittadedeni naco mohua ininebaqquijari. Dsiniro cacacajiqqui-meradedenicca huahuanari naqui hua inaridsajaro. Midsori dadadedenicca huihuittari naqui

hua inaridsajaro. ¹⁶Madija ohuahadeni naco najaro odsacca boroni motta todsepetaji dsojo dsojo ihiquimamana nejeranijine Jeso ecossajaro nade. ¹⁷Nadsapa Jeso huapima mari icanabaquijari: –Dio Atti dsodo nanidsa ajima najaro: “Occa odsapi ohuadsa huati huati toquinahijinecca odsa tocajanitohui. Dsama huapimacca madija ohuadsa huatide jajahidsima nahijine” naponi nade Dio Atti dsodo nanidsa. Naraha tiadenipi madija titicamaisa-baquimana nadsa tijinedenia pina bobotidedenicca quequeriqui odsassa ticanamanajaro –nahi nade Jeso.

¹⁸Naraha dada toqquimade taminedeni, jodiodenicca marinaja maridedeni tedseje najaro ima mittamanadsapa Jesodsa jiperaquiri najari. Madija huapimapa Jesocca marinajatohui disseraquiri nadsapa taminedeni, mamari-dedeni tedseje Jeso deni tojahi noppine cappinamanajari. –Jesopa deni tojadsa ajimani iquejenarana –quinadsa Jeso dsoqquehijine jara jara quinajari: –¿Nejecoma inanadsa Jeso inanadsoqquehijine? –quinajari nade. ¹⁹Naraha todsidsidsa Jesopa pocca dodosse tabaqqi tedseje Jerosaredsa jai tojenajari.

Ahua iquiera bono-jarajari Jeso attijine botejari

Mateo 21.20-22

²⁰Nadsapa huada ssiaja dsidsidsamassa ahua iquiera huahihuaji jai tojapomajari. Qqui toquinapomadsapa jaboma botejari. ²¹Nadsapa Pedro bodi huatomadsa Jesodsa huati tajari: –¡Ohua Maride, qqui tanaja! Maitta iquiera tettidsa tinajidsojaripa botehi –nahi nade.

²²Naraha Jeso pohuadenidsa huati tajari: –Tibodidenidsa: “Diopa occa huatinajassa inananijine pajirahi” tiquinaji. ²³Pajissehera tiadenidsa huati onajaro: Madijapa ajijaro ssonodsa huati tadsa: “Ssono, titehemadsa passo imenidsa jaro tidsanaji” nadsapa ssono nema nanitohui. Pohuapa jehe nahissa tadsa pohua bodi: “¿Pajissa tojapadseje? Nohueranitime” najaradsapa Diojine ssono jaro dsananitohui, onajaro. ²⁴Najaroa ohuattipi: Diodsa huati tiquinadsapi tibodidenidsa: “Jehe, Diopa nema inananijine pajirahi” tiquinadsapi ticcadeni huatinaja Diojine najarossa inananitohui, onajaro –nahi nade Jeso.

²⁵–Diodsa huatide tiquejenadsa naqui madija tiadenidsa ima inanapojarotohui tibodideni huatodsapi: “Najaro imadsa ohuati ajimana. Pohuadsa ohuadi-jerana” tiquinaji, onajaro. Nema tiquinadsana ticcadeni Abi Dio memehuaji madijaripa ticcadeni imasiridsa huati ajamahitohui. ²⁶ [Naraha tibodideni najaridsa epeje tiquinejeradsapi ticcadeni Abi Dio memehuaji madijaripa ticcadeni imasiri epeje inanejeranitohui, onajaro –nahi nade Jeso.]

–¿Nejecojaricca dacorehe ticajijaro? –quinajari Jesodsa

Mateo 21.23-27; Roca 20.1-8

²⁷Nahi dsotodepa Jerosarehuaji bacco tanimanapomajari. Nadsapa Diodsa dada toquimahuai Jeso toquedsimadsapa pohuadsa jiperaquiri najarideni aja dada toquimade taminedeni, jodiodenicca marinaja maridedeni, jodiodeni ime jocohuideni quinadsa Jesodsa tohuajiressimanajari. ²⁸Nadsapa pohuadsa huati toquinajari: –Iadsa ticca ima tecomeraji. ¿Nejecojaricca dacorehe ticajijaro? ¿Nejecojari attidsa dadadedeni mohua tininebaquijari? –quinahi nade.

²⁹Naraha manaco Jeso pohuadenidsa huati tajari: –Ohua naqui tecomeramanajine tiadenidsa huati onana. Ohuadsa tecomeramanadsapi ohua dossede oni, occa dacorehe tahimarini tiadenidsa huati onanijine. ³⁰Jari, Huanopa ¿nejecojari icadossedsa topa idsanabaquijaritta? ¿Diojine ttarana, madijajine ttarana? Jari, ohuadsa tecomeramanaji –nahi nade Jeso.

³¹Naraha taminedenipa pohuadenira huati tocanirere canajari: –Jaho, “Huanocca topanijipi Diocca dosseniji” inadsapi Jesopa: “¿Nejecotohui pohuadsa jehe tiquinejerarotte?” nahitohui iadsa –quinahi nade. ³²–Naraha “Huanocca topanijipi madijacca dosseniji” inadsapi madija iadsa huadimanarana. Aja madija huapima attidenipa: “Huanopa Dio icadossejari. Pajissa Dio Atti cacomerabote” quiquina nade –quinajari taminedeni, madijadeni noppine cappinamanadsa. ³³Nama quinajari Jesodsa: –Jaraneje, ssamomo inani –quinahi nade.

Nadsapa Jesoa: –Ohua naqui ohua dossede onipa ohuacomera-jaraha –nahi nade pohuadenidsa.

Huidsaja cacahuade tabaccoraquiri najaridenicca ima

Mateo 21.33-44; Roca 20.9-19

12 ¹Nadsapa Jeso pocca marinaja ajijaro namidsa imadinnicca ima tadsajani mari icanabaquijari: –Madijapa pocca huidsajadsa ppa nahi uva pohuara ppa inajari. Nadsapi huidsaja inidi siba hua inahuajanijaro. Uva bono ttai nadsa ppejene tojahijine naqui sibadsa odi inahatojaro. Huidsaja cacahuade huittarihijine siba hua tamaroni naqui hua inamarojaro. Najaro huapima jicadsapi huidsaja jinede pocca huidsaja ecahuamananijine madijatohui qqui naridsajari; nahi pocca huidsajadsa tarabadsa quinahijine, ppa nahi uva ecahuamanahijine. Uva bono jadadsapa motapa huidsaja jinededsa tojahijine. Motapa huidsaja cacahuadedeni pohuadenidsa tojahijine. Nadsapa pocca huidsaja ecahuamananijine madija qqui inabaquidsapa pocca huidsaja pohuadenidsa inebojaro. Nadsapa jinede dsama huaji tanihuaji toccajari. ²Uva bono jadahicca abadsico bacco tadsapa huidsaja jinede huaji tanidsa madiraha pocca dodosse ojaria pocca huidsajahuaji dosse inanijari, uva bonotohui huidsaja cacahuadedenidsa huati tahijine. ³Naraha pocca dodosse huidsajahuaji bacco nanidsapa huidsaja cacahuadedeni dama quinadsa idaquimanajari. Uva bono jiraha dosse inanimanajari. ⁴Nadsapa huidsaja jinede pocca dodosse ohuaha dosse inanijari. Huidsaja cacahuadedenihuaji bacco naniraha najari naco inajidsomanadsa tati biquerajari. Itamassomanadsa uva bono jiraha dosse inanimanajari. ⁵Nadsapa pocca dodosse ohuaha dosse inanijari. Naraha najaripa inanadsoquemanajari. Dsotode naco pocca dodosse tabaqqi dosse inanibaquihui huapi taraha motadenipa itabaromanajari. Motadenipa inanadsoqueridsamanajari. ⁶–Nadsapa pohuadsa ojaria madiccahi, najaripa huidsaja jinede pohua pocca ejedeni. Najaridsapa huati huana tajari. Pohua bodipa: “Occa ejedenidsana cappinamanahitohui” najari. Nadsapa pocca huidsaja cacahuadedenidsa pocca ejedeni dosse inanijari. ⁷Naraha huidsajahuaji bacco nanidsapa huidsaja cacahuadedeni pohuadenira huati tocanirejari: “Ajaripa huidsaja jinede bedi. Nidsaranibote imehi dsoqquedsa huidsajapi pohuadsa tojanitohui. Jari, inanadsoquena;

huidsajapi icca tojanijine” quinajari. ⁸Nama quinadsapa huidsaja jinede bedi dama quinadsa inanadsoquemanadsapa huidsaja idenihuaaji coro quinajari –nahi nade Jeso.

⁹Nadsapa Jeso pohuadsa queriqquijaridenidsa huati tajari: –Jari, tibodideni huatoji. Huidsaja jinede pohuadenidsa ¿nejecoma napadsaja? Puhuapa bacco nanidsa huidsaja cacahuadedeni inajicadsapa huidsajapi madija ohuahadenidsana da inanitohui –nahi nade Jeso.

¹⁰Nadsapa Jeso pohua tahimari pohuadenidsa ahuato tanijine Dio Atti dsodo nanicca huati tajari: –Tiadenipi Dio Atti dsodo nanicca hua hua titiquina naraha siba huahuattajo tojajaro tahimarini ¿tetideni ajimamanajaroqui? Imapi ajima najaro:

“Odsa sibadsa icanahatomananijinepi nanahatodedenipa siba ojariepi ettajomanani nade.

Naraha dsotodepi najaro sibana odsa daco cajiranijine tojajaro.

¹¹Aji siba huahuattajo tojajaropi ia Medsede Djoline deni tojajaro. Najaro imajine Diodsa etidsejaro”

nani Dio Atti dsodo nanicca

–nahi nade Jeso. ¹²Nadsapa dada toquimade taminedeni, jodiodenicca marinaja maridedeni quinadsa Jesocca marinaja mittamanadsapa bodideni nahatoquiquiri najari: “Jesopa icca ima huati huati tajari, iapi pohua ettajojarijine” quinahi nade. Nadsapa Jesodsa huadimanadsa: “Jeso todsepe inanana” quinaraha madija noppinedeni cappinamanadsapa apaja quinadsa jai tojanijari.

–¿Romanodenicca taminedsa icca dsiniro mota da inanijine bica taqui? –quinajari

Mateo 22.15-22; Roca 20.20-26

¹³Nadsapa jodiodenicca taminedenipa pariseo imadsa jehe quinajarideni pama, tamine Herodecca madija pama quinaha dosse inajonabaqqi-manajari, Jesocca ima inassamomanadsa, pohuadsa ima inassonarimananijine. ¹⁴Bacco najonamandadsapa huati toquinajari: –Mamaride, ticca ima iadsa ahuato tani. Pajissehera huati huati tinajaro. Madija attideni noppine ticappinejeradsapi ticca ima onihi toja-jerajaro. Madija deni tojajari, madija dsepe sse tajari, madija ajamani tojajari tedsejepa tiadsa najarissa caniquimeradsa pajissehera Diocca

marinaja madija madimanahissa tahijine mari mari titicana-baqqi najari –quinahi nade. –Nadsama iapi romanodenicca tamine deni tojahicca pocca dossenijidsa icca dsiniro mota pohuadsa da inanijine ¿bica taqui? ¿Bica tejerarane? Moisesicca marinajadsa ¿oppina taqui? ¿Oppinera tarane? ¿Tetti nejecoma tani? ¿Paca inanijinequi? ¿Paca inejeranijinerane? –quinahi nade. ¹⁵Jesodsa attideni bica tadsa huati huati toquinaraha poccadeni maidsehe pohuadsa ahuato tadsa pohuadenidsa huati tajari: –¿Nejecotohui occa ima tossamonijine ohuadsa huati tiquinajaro? Jari, ohuadsa ccarara dsojo ticanajonamanaji, qqui ocanana –nahi nade Jeso. ¹⁶Nadsapa dsojo icanajonamanadsapi Jeso attia: –Jari, ajijaro dsinirodsapa ¿nejecojari corime caji-jari? ¿Nejecojari oni dsodo nani cajijaro? –nahi nade Jeso.

Nadsapa pohuadsa ecomeramanajari: –Romanodenicca taminedija –quinahi nade. ¹⁷Nadsapa pohuadenidsa Jeso attipa: –Romanodenicca tamine pocca dsiniropi pohuadsa da tinanimanaji. Naraha Diocca tiquejenadsapi Pohua jipa tahi-ccara Pohuadsa da tiquinaji –nahi nade Jeso.

Nadsapa “Jesocca ima tossamona” quinajarideni jabojo-manadsa attidenipa: –A, icca ima ecomeranjine nahato tajaria –quinahi nade.

***Nidsa jicamanajarideni nahatonimanadsapa
caji caji cana-jarahitohui***

Mateo 22.23-33; Roca 20.27-40

¹⁸Nadsapa Isaraeri potemahi jodiodeni mota sadoseo imadsa jehe quinajarideni naco Jesohuaji bacco quinajari. Poccadeni marinajapi: “Idsoqquedsapi inahatoninijine nohuerani” quiquina najari. “Najaro imadsa Jeso atti ijine tossamodsa cobara tana” quinadsa Jesodsa najaro ima huati toquinajari: ¹⁹–Mamaride, Moisesicca marinajadsapi ajima nani: “Maqquidejepa amoneje cajiraha ejedeni jiraha dsoqquedsapa pocca amonejepi pohua imecotena icajina, nahi ejedeni cajidsapa pocca ato dsoqquejaricca ejedenissa nahijine” nade Dio Atti Moisesi dsodo inajaro. ²⁰Nadsama tiadsa ima ajima najaro huati inana. Aja pohuadeni imecote pohuadenira 7 quinaha madimanageri. Tahideccaha amoneje cajipojari, naraha bedi jiraha dsoqquejari. ²¹Dsotodecca naco pohua ohuaha bedimeni icajiraha ejedeni jiraha dsoqquejari. Dsotodecca naco najaro amoneje icajiraha najari

naco ejedeni jiraha dsoqquejari. ²²Najaro imapi nema dsanapojaro 7 quinaraha ejedeni jiraha jicajari. Najarideni jicadsapa poni naqui dsoqquejaro. ²³Nadsapi dsama jicadsa madija inahatonidsapi pohua imecote 7 quinajaripa ¿nejecojarina ponicca maqqi tojapadsaja? Huapimapa poni icajiquimanaporaha –quinahi nade.

²⁴Naraha Jeso attipa: –Ticcadeni marinajapi dsori tajaro. Dio Atti nahatoqqiri tiquinaraha pajissa tiquinanissa tejerajaro. Diopa Pocca dacorehema madija inahatonibacquihijine pajirahi naco ssamoqqiri tiquinajaro. ²⁵Jicamanajarideni nahatoni-manadsapa caji caji cana-jarahitohui. Diohuaji madimanadsapa pina Diocca dodosse tabaqqi memehuajiccassa quinahitohui. Aja pohuadenipa caji caji canajaradsa madimanajari.

²⁶–Nadsama Diojine madija nahatonimanahicca imapi Pohua Atti cacomerabote Moisesi dsodo inapojaro. Najaro Dio Atti dsodo nani hua hua titiquina naraha ¿najaro imapi tetideni ajimamanajaroqui? Aji ahua diji tanidsa Diopa Moisesidsa huati tajari: “Ohuapi Dio, ticca idideni Abarahao, pohua bedi Isahaca, pohua bedi Jacobo quinajaridenicca Dio ojani” nahi nade. ²⁷Aja Dio Atti nama nadsapa Abarahaodeni nahatonimanadsa madimana-dsanapohuicca ima ahuaato tajaro. Diopa paja dsoqquemanarihi najaridenicca Dio jarahi. Diopa camittaqqiri najaridenicca Dio. Puhuapa jidapana naco poccadeni Dio. Najaroadi ticcadeni marinajadsa: “Nahatonie nohuerani” titiquina najaropi dsori tajaro. Pajissa jerani –nahi nade Jeso.

Diocca marinaja deni tojanicca

Mateo 22.34-40; Roca 10.25-29

²⁸Jesopa sadoso imadsa jehe quinajarideni tedseje ahuaaji huati ahuaaji huati quinana jodiodenicca marinaja maride ojariaha Jeso pohuadenidsa ecomerani bica tani mittadsapa pohua naco Jesodsa huati tajari: –Jari, Diocca marinaja huapi taraha ¿nejecojaro marinajana Pocca marinaja huapimadsa deni tojajaro? –nahi nade. ²⁹Nadsapa pohuadsa Jeso huati tajari: –Aji marinaja deni tojaniccapi ajima najarona paji:

“Isaraeri potemahideni, titaharibobo canaji. Ia Medsede Diopa ojarijari. Dio ohuaha nohuerahi. ³⁰Tiadeni Medsede Diodsa tetideni huanaqqiri naji. Tibodideni huatonissa tadsa, dacoco tijiradsa Puhuadsara disseraqqiri tidsanapomanadsapi Puhuadsa tetideni huanaqqiri nanijine.”

³¹Diocca marinaja onihi pina tahideccassa najaro deni tojani-ccapi ajima najaro:

“Tinoridenicadsa naqui tetideni huanaquiri naji, pina aji tiadenidsa tetideni huanaquiri najarossa tiquinaji.”

Najaro Diocca marinaja pamehena deni toquejenajaro. Pocca marinaja onihipi najaro pamehessa nejerajaro –nahi nade Jeso.

³²Nadsapa Jesodsa jodiodenicca marinaja maride attia: –Jehe, Mamaride, tettipi pajissa. Ia Medsede Diopa ojarihi; ohuaha nohuerajari. ³³Nadsama Diodsara eti huanaquiri nanijine. Ibodi huatonissa tadsa dacoco ijradsa Pohuadsara disseraquiri idsanapodsapi Pohuadsa eti huanaquiri nanijine. Inoricadsa naqui eti huanaquiri nanijine pina aji iadsa eti huanaquiri najarossa inanijine. Najarona denima bica tajaro. Aji icca *bani bedi ono tojahijine Diodsa dada toqquimahuaji da da ihina najaro, icca daniji onihi naqui dada toqquimahuaji ihinebo najaro huapimapi Diodsa bica taraha aji tohuati huanehe pameheccadsa deni toquejena-jerani –nahi nade jodiodenicca marinaja maride atti.

³⁴Pocca cacomeraniji bica tanicca Jeso mittadsapa: –Jehe, Diocca cacahuehedsa tijanijine tipajirabote nani –nahi nade Jeso. Jesopa ecomeranissa dsanapodsapa ima onihi pohuadsa huati toquinahijine huapima cappinamanajari.

***–¿Cristo-Mesiapa nejecojari potemahi tiquinajaro?
–najari nade Jeso***

Mateo 22.41-46; Roca 20.41-44

³⁵Nanaja Diodsa dada toqquimahuaji Jeso mari icanabaqqi-dsapa madija ecomeramananijine huati tajari: –¿Nejecotohui jodiodenicca marinaja maridedeni attidenipa: “Diocca Cattaniji Cristo-Mesiapa tamine Dabi potemahi” quiquina najari? ³⁶Naraha tamine Dabipa maittaccadsama madidsa Dio Corimejine pohua tedsejemacca ima huati tadsapa pohua attipa:

“Ia Medsede Diopa ohua Medsede Mesiadsa huati tajari: ‘Ohuinori nahatonihuaji tittariji. Ohua tedsejepi tohuatti dacorajaro ticajiji’ najari. ‘Nidsaranibote tia huadidedenipa ajamani onanabaqquihitohui. Poccadeni dacorehepi onajicanitohui’ napohui nade Dio, Pocca Cattaniji Mesiadsa.”

³⁷Naraha madija attidenipa: “Cristo-Mesiapa tamine Dabi potemahi” quiquina nadsapa ¿nejecotohui Dabipa pohua potemahidsaraha: “Ohua Medsede” napojaritta? –nahi nade Jeso.

Nahidsa Jeso atti mittade madija huapi taha queriquijari. Pocca marinaja mittamanadsa huatidsemanajari.

–Paji, tiadenipi pina jodiodenicca marinaja maridedenicca madiessa tiquinejeraji –najari nade Jeso

Mateo 23.1-36; Roca 11.37-54; 20.45-47

³⁸Jesopa madija mari icanabaquidisa ima ajima najaro huati tajari: –¡Paji, tiadenipi! Pina jodiodenicca marinaja maridedenicca madiessa tiquinejeraji. Pihuadenipa etero dequera-jarodsa huedsaridsamanadsa attidenipa: “Tapi pina taminessa inani” quiquina najari. Aji dadahuajicca jahuidsa jahiridsadsa naco madija pihuadenidsa: “¿Nija? Bica tinani. Tiapi deni tijani ohuadsa” quinahijine najaro deni tojehe tohuini quiquina najari.

³⁹Dio Atti mamarihuaji jassi tarihijinepa deni toquejenajari-denicca huihuittari tohuini quiquina najari. Jipaquie imenidsa naqui deni toquejenajaridenicca huihuittaridsa jassi tarihijine tohuini quiquina najari. ⁴⁰Nadsama tabira tocajamanajarodeni ponideni madimananijineccaraha icamaidsabaqqi-manadsa pihuadenidsa totoja nadsapi ponidenicca odsa naqui pohuadenidsa totocajaridsa najaro. Naraha poccadeni tabaccorehe ahuatora tanijinepi Diodsa huati huati toquinadsapa poccadeni huatinaja dequerajaro, aja madija pihuadenidsa: “A, Diodsa disseraqqiri nahi” quinahijine. Pihuadenipa Dio Attima mamaidsamana nadsapa nidsa Diocca najidsohue denima oppina tanicca pihuadenidsa ssonarinitohui –nahi nade Jeso.

Amoneje tabira tocajani ponicca dsiniro Diodsa da inanicca ima

Roca 21.1-4

⁴¹Nadsapa Jeso Diodsa dada toqqimahuaji madicca-jari. Pihuapa nahi bodidsa madijacca da naqqinaja dsiniro cocoro todsa cahittarini tadsajanima huittarijari. Madija poccadeni dsiniro coro coro icadsamanani cattoma canajari. Dsiniro sseqqiri najarideni huemani coro icadsamanani qqui tajari. ⁴²Nadsapi nanidsa tabira tocajani tohuati nahana

tajaro ccajonajaro. Poni madinijinecca dsiniro bedeniraha ponicca danijijine capamehe cororo icadsajaro. ⁴³Nadsama najaro qqui tadsapa pohua huatimadedeni huahua inabaqqijari: –Pajissehera tiadenidsa huati onajaro: Ajijaro tabira tocajani cappiradsa tohuati nahana taraha ponicca danijj dsiniro bedeniraha deni tojani pina Diodsa denima da inajarossa najaro. Madija ohuahadenipa poccadeni danijj toqueriquini huapi taraha Diodsapi ajimani toजारossa najaro. ⁴⁴Pohuadenipa ssequiri nadsa poccadeni dsiniro mota arobeni da quinaraha ajijaro tabira tocajanipi cappiraraha nema nehe da inajaro. Tohuati nahana tani, poni madinijineccaraha da inehe jicajaro –nahi nade Jeso.



Rocapa Jesocristo tahimari dsodo inajaro

Lucas

Introducción: Rocapa doctoro, madija comaqquri najari totanamide. Pohnuapa Jesocca dodosse jararaha Jeso dsoquehi natti pohua tahimari dsodode dissera tajari. Jeso tahimari mittahissa tahijine Jesocca dodosse tabaqquidenidsa huati, pohua huatimade ohuahadenidsa huati, Jeso imeni Mariadsa huati tadsana pohua tahimari dsodo inajaro. Rocapa pohua tesse Teopiro Jeso tahimari nahato tahijine pohuadsa dsodo inajaro.

Rocacca dsodoniji onihi oninipi: Jesocca dodosse tabaqqi tahimarideni, inajaro. Najaro onini caricca: Hechos, quinajari. Rocapa Pablodsa ccaridsajari, Jesocristo tahimari icassiejeranijinecca maride.

Huano tossonahicca, Jeso tossonahicca ima

- 1.1-4 Rocapa Jeso tahimaritohui dissera tajari
- 1.5-25 Huano Baotista tossonahijine tahimari huati tapojari
- 1.26-38 Diocca dodosse Cabirie Mariadsa huati tajari
- 1.39-56 Mariapi Sabeo qquide toccajaro
- 1.57-80 Huano Baotista tossonahicca ima
- 2.1-40 Jeso tossonahicca ima
- 2.41-52 Jesopa Diodsa dada toqquimahuaji toqquedsimajari
- 3.1-20 Huano Baotista tahimari
- 3.21-22 Jeso totopa cajijari

Ajijaro namidsa imadinicca ima tadsajani Jeso mari icanabaqqujari

- 10.25-37 Samaritano tahimari
- 15.1-7 Edede amossi najari tahimari
- 15.8-10 Amoneje ponicca dsiniro amossi cananicca ima
- 15.11-32 Madija pohua bedi jano tojaraha bacco nanipomahicca ima
- 16.1-15 Madijapa pohua dossedecca dsiniro ecahuaraha pohuajine ponima jicajaro
- 18.1-8 Ima cacattemade amoneje tabira tocajajaro acco icamajarocca ima
- 19.1-10 Saqueo tahimari
- 19.11-27 Taminecca dsiniro inahapimananijinecca ima

Jeso dsoqqueraha, nahatonijaricca ima

- 22.1-6 Jeso todsepe tojahijine ima najoramanajari
 22.7-23 Ia Medsedecca jipaquie
 22.24-30 –¿Nejecojarina iadsa deni tojajari? –quinajari
 22.31-34 Pedro pohua namaidsahijine Jeso huati tapojari
 22.35-38 Ima oppina tanicca Jesodsa tojabote najaro
 22.39-46 Jesemanihuaji Jeso Diodsa huati huati tajari
 22.47-53 Jeso dama quinajari
 22.54-62 Pedropa Jesodsa: –Onocco jidsa tani –najari
 22.63-65 Jesodsa jidsa jidsa quinajari
 22.66-71 Jodiodenicca ima cacatemahuaji Jeso pohua
 cacomerajari
 23.1-7 Tamine Piratodsa Jeso iaccamanajari
 23.8-12 Tamine Herodedsa Jeso iaquedsimamanajari
 23.13-25 –Jeso dsoqqehi bica tahi –quinajari
 23.26-43 Jeso ahua porimacossanidsa coba idsanamanajari
 23.44-49 Jeso huatijari
 23.50-56 Jeso ppa idsamanajari
 24.1-12 Jeso nahatonijari
 24.13-35 Emao jahuidsa
 24.36-49 Jesopa pocca mamari tabaqquidsa ahuatomajari
 24.50-53 Jeso toccamacossanijari
-

Rocapa Jeso tahimaritohui dissera tajari

1 ¹¿Nija Teoppiro? Tiadsa Jeso tahimari dsodo onajaro. Aja tahide Jeso pohuadsa toquejenajarideni mota huapi taha pohua tahimari dsodo naridsamanapojaride. Pohua tossonapohui tahimaria aja nahatonidsa Imehidsa toccamacossanihi bacco tajaropaji. Pohua tahimari huapima pajiranissa tanijine quinadsa dsodode disseraqquri najaride. ²Aja pohua huatimade pohuadsa jajahiridsa najarideni pocca nahatonaja onihi, onihi nehe qqui najonamanajari naqui dsodo quinajari. Aja Jeso pohuadeni mari mari ihicanabaqqui najari naco dsodo quinajari. Pohuadenipa Jesocca marinaja ehecomeraridsamana najaro naqui icahatterajaro. ³Nadsapi ohua naqui Jeso tahimari dsodo ocadsanaponijine tohuini onadsa aji Jeso pohua tahimaritohui, pocca marinajatohui dissera onajarode. Aji poccadeni dsodoniji huapima naqui hua onaridsajarode. Aja madija Jeso qqui toquinajarideni, pocca

marinaja mittamanajarideni, najaridenicca ima naqui omittanissa tanijine onadsa occaridsajarode. Jeso pohua tahimari huapima dsodo quinajarocca onatassaquidsa ojine tahideccadsama pajissehera dsodo onajonajaroa ajjaropaji. Jehe, Teoppiro, Jeso tahimari huapima ticajinjine onadsa tiadsa dsodo onajaro. ⁴Aji Jeso tahimari tia maridedeni tia mari icanamanajaro huapimapi pajissa nahato tinanjine tiadsa dsodo onajaro.

***Diocca dodosse memehujiccapa Huano Baotista
tossolahijine tahimari huati tapojari***

⁵Nadsama Herodepa Isaraeri potemahi jodiodenicca dsama onini Jodea cacahuade tojadsa Sacaria naco madicajari. Pohuapa *Diodsa dada toqquimade tojajari. Nahihuaji dsependeni ihijimana najarideni mota onidenipa Abia potemahideni. Sacaria naco Abia potemahideni. Pohuadenipa Diodsa dada toqquimahuaji cacahuade toquejenadsapa Diodsa madijacca da naqqinaja dada ihiquimamana najaro. Nadsama pocca amoneje Sabeopi dada toqquimade potemani, aja Moisesi imecote Arao potemani. ⁶Sacaria pocca amoneje tadsajanipa poccadeni ima Diodsa bica tajaro. Ia Medsede Diocca marinaja naqui ecahuamananissa tajaro. ⁷Naraha Sabeopi ccaranije najaro. Maqqui tedseje ejedeni jiraha jadahi tocajamanajari.

⁸⁻⁹*Diodsa dada toqquimadedeni huapi taraha ojari ojari quinaha bodihuaji totoqquedsimamana najari nahatohui majo bicabote tohuesside. Tohuessidsapa essene majo bica taha jami-mi canadsapa Diodsa huati huati totoquina najari. Sacariacca madija Abiadeni Diodsa dada toqquima ecahuamanadsapi madija ojaria bodihuaji toqquedsimahijine qqui quinahijineccadsa Sacaria oni bacco quinajari. Nadsapa Sacariana majo bicabote iessihijine bodihuaji dosse idsimanajari. ¹⁰Toqquedsimadsapa majo bicabote iessidsa jami-mi canaja amossinihuaji madija huapima Diodsa huatide toquejenaja najari. ¹¹Sacariapa nahi bodihuaji madiccadsa Diocca dodosse memehujicca pohuadsa ahuatomajari. Majo bicabote tohuessidsa majo toccabaquihijinecca huahuanari inorini nahatonihuaji huajari. ¹²Nadsapa Sacaria Diocca dodosse qqui inadsapa cappinajari: –¿Nejecora ohuadsa tojapadseje? –najari. ¹³Naraha manaco Diocca dodosse attipa:

–Sacaria ticappina-jeraji, Diopa ticca huatinaja mittahi. Ticca amoneje Sabeopi ejedeni cajinitohui. Tossonadsapa onipa “Huano” tana –najari. ¹⁴–Ticca ejedeni tossonadsapa tetidsenitohui. Madija ohuahadeni naco huatidsemanahitohui. ¹⁵Nadsama najari ticca ejedenipa Diodsa bica taha tojahitohui. Puhuapa uva ppejene dse najarahitohui. Dsedse coma tanicca naco dse najarahitohui. Puhuapa tossona-jaraccadsama Dio Corime pahuadsa tojahitohui. ¹⁶Puhuapa ajama nahitohui: Nidsa Diocca ima ecomeraridsadsapi Isaraeri potemahi jodideni mota huapi taha ia Medsede Diodsa toquejenani-pomahitohui. Nama nahitohui puhuapa. ¹⁷Nadsama Huanopa Dio Corime inadacorahitohui pina maittaccadsama Dio Atti cacomerabote Eria Dio Corime inadacorajarissa nahitohui najari. Puhuapa ia Medsede tedsejema madija bodideni inanajorabaquipohuitohui. Nahi aja imehideni bodideni tobicamanadsapa pahuadeni bedidenidsa huatideni huanaquqiri nahijine. Aja Diodsa iboquqiri najarideni naco mittamanadsapa pajisseheccadsa tohuiboramanahijine. Nidsa pahuajine madijapa ia Medsedetohui najoramanahijine –najari Diocca dodosse memehuaajicca.

¹⁸Naraha Sacaria manaco huati tajari Diocca dodossedsa: –¿Nejecoma onadsa ticca ima pajissa tojani nahato onanijine? Ohuapi jadahibote ojani, occa amoneje naqui jadani tocajani –najari Sacaria atti.

¹⁹Naraha Diocca dodosse attipa:

–Ohuapi Cabirie Dio madihhuaajicca ojani. Dio acco acco ohocama najari. Dio ohua dosse naronajari tiadsa ima bicani huati onanijine. ²⁰Naraha aji huati onajarodsapa pajissa tejeradsapi tetti jirehe timadicanitohui. Nidsa ejedeni pohua tossonahicca abadsico bacco tadsapa tossonahitohui. Ticca ejedeni tossonadsana tetti ticajipomanijine. Nadsana aji pajissa huati onajaro nahato tinanitohui –najari Diocca dodosse Sacariadsa.

²¹Naraha Diodsa dada toquqima huapihuaajiccadsa Sacariatohui madimanajarideni attidenipa: –¿Nejecotohui Sacariapa bodihuaaji najojari? –quinajari. ²²Nanaja Sacaria

qquenadsapa huati tahitohuiraha atti maraha qquenajari. Naraha madija pohuadenidsa ima ahuato teje najaro: –A, Diodsa dada toquima bodihuaji Diojine pohuadsa ima ahuato tajaro nitide –quinajari. Nadsapa Sacaria madija nahatoto tahijinepa pohua dsepedsara dsopi dsopi najari, atti maradsapa.

²³ Sacariapa nahi Diodsa dada toqqumahuaji madicajari. Aja pocca madija Abiadeni dsepedeni jicahicca huada bacco tadsapa Sacaria toccanijari pocca odsahuaji. ²⁴ Nahidsa tomadinimanadsana Sacaria bedimeni Sabeopi jiajaro. Pina ponicca madijacca marinajassa najaro ejedeni idsonidsa huittidsadsapa abadsico 5 canaha ponicca odsahuaji qquena-jeraccani. ²⁵ Nani ponicca odsadsa madidsapi poni bodinidsa poni attinipi: –Jidapapi madija ohuadsa: “Ccarani” huahua quina-jarahitohui –najaro. –Jidapapi Diojine ejedeni ocajini. Ohuadsa ima bica tanicca tojani –najaro Sabeo poni bodinidsa.

Diocca dodosse Cabirie Jeso tahimari ecomerapojaro

²⁶ Nadsapi Sabeo jianicca abadsico 6 canaccadsa odsa onihuhuaji Dio pocca dodosse memehuaajicca onipa Cabirie dosse inaronapomajari. Najaro odsa oninipi Nasareti, dsama arobeni Carireahuajicca. ²⁷ Nani Nasaretidsa dsohuato madijaro poni oninipi Maria. Ponipi maqquideje caji-jeraccani, maqquideje ssamo taccani. Najaro dsohuatodsa Dio Cabirie dosse inaronajari, ponidsa huati tahijine.

Nadsama najaro dsohuatopi Dsodse icajinijine tahide imehidenipa jehe canirepojari. Dsodsepa maittaccadsamacca tamine Dabi jinodi potemahi. ²⁸ Nadsapa Diocca dodosse Cabirie ccaronadsapa Mariadsa ahuatodsa huati tajari: –Nija Maria, Dio tia catidsehi. Ia Medsede Diopa tiadsa madihi –najari.



²⁹ Naraha najaro ima Maria mittadsapi poni bodinidsa: –¿Nejecotohui pohua atti nama najari? ¿Nejecora ohuadsa tojapadsaja? –najaro. ³⁰ Nanaja Cabirie Mariadsa huati tapomajari:

–Maria ticappina-jeraji; Diodsa bica tinani. ³¹Jidapapa ejedeni tidsonedsa huittidsahitohui. Nadsama ejedeni tossonadsa onipa “Jeso” tana –najari Mariadsa. ³²–Pohuapa denima madija bicahi tojahitohui. Pohuadsa: “Dio memehuaaji madijaricca ejedeni” quiquina nahitohui. Ticca ejedenipa ia Medsede Diojine tamine deni tojahicca tojahitohui, pina pocca idi maittaccadsamacca tamine Dabissa nahitohui. ³³Pohuapa pocca madija Isaraeri potemahi ecahuabaqqi-dsanapohitohui. Pocca cacahuehe naqui jica-jeranitohui –najari Cabirie atti Mariadsa.

³⁴Naraha manaco Maria Cabiriedsa huati tajaro: –Ajijaro imapi ¿nejecoma najaro? Ohuapi maqquideje ocappiraccaha, maqquideje ssamo onaccani –najaro Diocca dodossedsa.

³⁵Naraha manaco Cabirie huati tajari: –Dio Corimepa tiadsa bacco naronahitohui. Dio memehuaaji madijaripa tiadsa pocca dacorehe inananitohui. Pina meme essen nahuini tiadsa huedsana najarossa nadsapi Diocca dacorehe tiadsa tojanijine. Najarojine ejedeni nahatojaripa imasiri cappira, bodi ssiaja tahitohui. Pohuadsa: “Dio Bedi” quiquina nahitohui.

³⁶Nadsama aji ticca madija Sabeo naqui jadaniraha ejedeni cajini. Abadsico 6 canaha poni idsonidsa huittidsahi paja naccahi. Madija huapima ponidsa: “Ccarani” quiquina naraha jiajaro. ³⁷Diopa ssamo tajarahi –najari Diocca dodosse Cabirie.

³⁸Nadsama Maria poni attinipi: –Jehe, Diocca medse ojani. Pohua Attidsa ibora onani. Aji huati tinajaropi Dio ohuadsa inanana, onajaro –najaro. Nadsapa Diocca dodosse Cabirie toccamacossanijari.

Mariapi Sabeo qquide toccajaro

³⁹Nadsapi Maria ponicca madija Sabeo qquide dsama arobeni Jodehuaji toccajaro. Paji toccarini dsanapodsapi ssonohuajicca odsa panani bacco tajaro. ⁴⁰Nanihuaji Maria bacco tadsapi Sacariacca odsadsa toqquedsimajaro. Sabeodsas: –¿Nija, bica tinaqui? –najaro. ⁴¹Maria “Nija” nani Sabeo mittadsa poni idsonicca ejedeni ttai ttai nadsapa Dio Corime Sabeo bodinidsa tojahissa tajari. Nadsapi Dio Corimejine bodini nahato tajaro. ⁴²Nadsapi Sabeo poni attini ahuato tehe Mariadsa huati huati tajaro: –Diojine tiadsa ima bicani tojani. Amoneje huapi taraha tiadsana Dio ima bicani denima inanjaro. Ticca ejedeni tidsonedsa huittidsajaridsa naco Dio ima bicani inananitohui

–najaro Sabeo. ⁴³–Nadsama ohuapi ajimani ojaraha ohua Medsedecca ami ohuadsa ticcajonajaro. ⁴⁴Ohuadsa “¿Nija?” tadsapi ohuidsonacca ejedeni huatidsejari; ttai ttai nahi. ⁴⁵Jehe, ia Medsede Dio tiadsa huati tapohuicca ima pajissa tojanijine pajissa tadsapi Dio tia nahatidsejari –najaro Sabeo Mariadsa.

⁴⁶Nadsapi Maria Diodsa huatidsedsa attinipi:

–Obodi ohuattima: Ohua Medsede deni tojajari, bica tahi, onajaro –najaro. ⁴⁷–Ohua obonoccorima Dio ohua Tonassiajadedsa ohuatidseri najaro. ⁴⁸Ohuapi Diocca medse ajimanicca ojaraha aji jidapanadsama madija attidenipa: “Diocca biquehe tiadsa tojani” dsadsanapomana nahitohui –najaro. ⁴⁹–Dio dacorajarijine ohuadsa ima denima bica tanicca inanajaro. Pohua oni imittadsapi pahuapa imasiri cappira, pohua bodi ssiaja tahi nahato inajaro. ⁵⁰Nadsama Diopa Pohuadsa madija cappinamanadsa, Pohuadsa huahuatidsemana nadsa naco pohuadenidsa huati cahanari canahitohui. Pohuadeni potemahidsa naco nama dsanapohuitohui. ⁵¹Dio pocca dacorehema dsepe ihiji najari. Aja madija pohuadeni bodi attideni: “Nahato onani, Dio jirehe bica onani” quiquina najaridenipa Dio pohuadeni inajaribaquihitohui. ⁵²Nadsama aja tamine dacorabotedeni naco Diopa poccadeni dossehapi inajicaridsanitohui. Nadsama aja ajamani toquejenjaridenina Diopa deni inanabaquihitohui. ⁵³Pemi madimanajaridenidsana huemahi da inahitohui. Naraha dsepedeni sseqquiri najaridenipa jiraha Dio pohuadeni dosse inanabaquihitohui. ⁵⁴Nadsama Isaraeri potemahideni ia Dio Attidsa iboraququiri inajaropi Dio pohua ia acco tocamabaquihitohui. Aji Isaraeri potemahideni iadsa Diopa huati ajamajarahitohui. Pocca tohuati huanehema iadsa huati cahanari cadsanapohuitohui. ⁵⁵Jehe, najaro imapi Dio icca ididenidsa huati taja najonapohui najari. Aja icca idi Abarahaodsas, pohua potemahideni huapimadsa huati cahanari canajonajaria aja iadsa huati huana tajaripaja –najaro Maria Diodsa huatidsedsa.

⁵⁶Naraha Mariapi abadsico 3 canaha Sabeodsas madiccani. Nadsapi ponicca odsahuaji toccanijaro.

Huano Baotista tossonahicca ima

⁵⁷Sabeocca ejedeni tossonahijinecca abadsico bacco tocanadsapa maqquideje bedi tossonajari. ⁵⁸Nadsa tossonadsapa poni inorinidsa madimanajarideni, ponicca madija quinadsa ponicca odsadsa queriqquijari. “Diopa ponidsa huati huana tadsa ejedeni cajijaro” quinahi ima mittamanadsapa ponidsa jahijonajari, poni tadsajani huatidsemanahijine. ⁵⁹Ejedeni huadari 8 nadsapa huissinaja cajihijine poccadeni madija huapima naco jahijonajari. Najaro *huissinaja pina Moisesicca marinajassa najaro cajihijinepa dsopori cotani eteroni mota huissi tojidsanijaro. Pohua oni naco imehi onidsa icanacani-manahijine: –Sacaria –quinahijineraha. ⁶⁰Imeni attinipi: –Apajana, pohua onipa Huano –najaro. ⁶¹Nadsapa attidenia: –Naraha ticca madija oni nama nahi nohuerahi –quinajari.

⁶²Nadsapa ejedeni imehidsa: –Ticca ejedeni oni ¿nejecoma nahi jipa tinani ticca ejedeni icanacanihijine? –quinadsa pohuadeni dsepedsa dsopi dsopi quinajari. ⁶³Naraha imehipa pohua bedi oni dsodo inahijine ahua ssapa tajarotohui pohua dsepedsa huahua najari. Nadsa dsodo inadsapi: –Pohua onipa: Huano –najari. Nadsapa huapima huajo canirejari. ⁶⁴Nanaja Sacariapa atti cajimanipomajari. Pohua atti cajimanipomadsapa: –¡Diopa bica tahi! ¡Pohuadsa ohuatidsejaro! –najari.

⁶⁵Nadsama najaro imajinepi Sacaria inoridsa madimanajarideni jabojo quinajari. Nadsapi najaro dsama arobeni Jodeacca ssono bedeni namidsa tanidsa madiridsamanajaridenidsa naqui ima ccaridsajaro. ⁶⁶Nadsapa aja huapima ima mittaridsamanajaridenipa pohuadeni bodipa: –¿Nejecoma napadsaja ajajari ejedenipa? –quinajari. Nadsapa Dio pocca dacorehema Huano ecahuahissa dsanapojari. Najaro ima huapimadsa ahuatotajaro.

Sacaria bodi huatidsejari

⁶⁷Nadsama ejedenicca abi Sacariapa Dio Corime pohua bodidsa tojahissa tadsa Dio Atti ecomerajaro:

⁶⁸–¡Diopa bica tahi! ¡Ia Isaraeri potemahideni Medsede deni tojahi! Iapi Dio pocca tocattabaquinaja iquejenajaro. Dio iadsa ccajonahitohui, ia todinibaqqihijine. Najarojine Pohuadsa ehetidse najaro.

- ⁶⁹ Ia Tonassiajade dacorabote iadsa dosse inaronajari.
 Pohuapa maittaccadsamacca tamine Dabi Diodsa iborabote potemahi.
- ⁷⁰ Diopa maittaccadsama Pohua Atti cacomeraqu岸ri
 najaridenidsa ia Tonassiajade ccajonahijine tahimari
 huati tapodsapa ehecomeramana najonajaro.
- ⁷¹ Ia Tonassiajadepa ia jaradedenicca jarehedsa ia
 tonassiajabaquihitohui. Iadsa jiperaqu岸ri najarideni
 naco huadidi taraha pohuajinena icassiejeranitohui.
- ⁷² Maittaccadsama Diopa icca ididenidsa huati huana
 tadsapa: “Tiadeni Tonassiajade ccajonahitohui” napohui
 nade. Pohua Atti nama napodsapa huati ajama-jarajari.
 Najaria jidapana pocca huatinaja iadsa tojabote nani.
- ⁷³ Najaropi maittaccadsama icca idi Abarahaodsa Dio
 pajissehera huati tapojari.
- ⁷⁴ Icca ididenidsa huadiqu岸ri najarideni jara jara
 ihinabaquimana naraha Diona inassiajabaqu岸ri.
 Jidapana naqui ia huadide noppine icappina-jeradsa
 Diodsara iboraqu岸ri idsanaponitohui.
- ⁷⁵ Ima jirehe Pohuadsara imadinissa dsanaponitohui.
 Icca madie naqui Diocca dossenijidsa pajiranissa
 dsanaponitohui –najari Sacaria atti.
- ⁷⁶ Nadsapa pohua bedidsa huati tajari:
 –Jehe Huano, tiapi occa ejedeni, nidsa tinapidsapi ia Medsede
 tedsejema madija bodideni tinanajorabaqu岸rijaripa pohua
 ccajonahitohui madimanahijine. Nema tadsapi tiadsa: “Dio
 memehuaji madijari Atti cacomerabote” quiquina nahitohui.
- ⁷⁷ Huano, tiapi icassiejeranijinecca ima ia Dio pocca madija
 iquejenajaro iadsa huati tinaridsanitohui. Dio icca
 imasiri epeje inanadsapi nidsa pocca najidsohue tojadsa
 dsori icanirenitohui.
- ⁷⁸⁻⁷⁹ Dio iadsa huati cahanari canadsa ia Tonassiajade
 iadsa dosse inaronabote nahi. Najaripa madija
 inassiajabaqu岸rihitohui. Dio tedseje icajoneranijinecca
 ima naqui ia tonahattabaqu岸rihitohui.
- Ia Tonassiajadepa pina dsidsidsamassa maji ccajonadsa
 ssire najonajarissa najari. Ssiajani dsati iadsa bacco
 najaro. Madija dsidsinidsa madiridsamanajaridenipa

dsoqqehe noppineni cappinamanaraha ssiajani dsati pohuadenidsa tossiajaridsadsapi memehuaajicca jahui ahuato inanajaro –najari Sacaria atti.

⁸⁰Nadsama Sacariacca ejedeni Huanopa Diocca dacorehema napidsanapojari. Diotohui dissera taja najari. Nadsama nahi dsotode denima napidsapa dsama huamoni ssono caji, siba caji tanihuaji madidsanapojari. Nadsapa Dio pohua jipa tahicca huada bacco tadsa Isaraeri potemahideni mari icanabaquihijine Huano dosse inajari.

Jeso tossonahicca ima

Mateo 1.18-25

2 ¹Jeso tossona-jaraccadsapa dsama huapimacca imapi ajima najaro: Tahidepa tamine deni tojahicca onipa Acosto pohua bodipa: “¿Nejecoma naha madija madimanahi occa cacahuehedsa?” nadsa madija onideni huapima dsodo naridsa-manahijine pocca dosseniji ccaridsajaro. Acostopa odsa panani deni tojanicca oninipi Romadsa madijari. Pohuadsa: “Sesaro” quiquina najari. (Ettidsapi: Tamine deni tojahicca, inajaro.) Pohuapa dsama onihi, onihi, onihi naridsajarocca taminereni deni tojajari. Isaraeri potemahidenicca dsama huapima naqui pocca tojadsapi Isaraeri potemahi jodiodeni ecahuabaquijari. ²Nadsapa Sesaro Acostojine dsama huapimacca madija onideni dsodode tahidecca dsodo quinajari. Najari huajanodsa pohua biji accode onipa Sirenio dsama Siriahuaji cacahuade tojajari. Najari Sireniopa Isaraeri potemahidenicca dsama cacahuade tojadsapa Isaraerideni naco ecahuabaquijari. ³Nadsama madija huapima dsama onihidsa, dsama onihidsa mamadimanageri naridsamanaraha birididenicca dsamadsa jai tojaniridsajari. Isaraeri potemahideni naco birididenicca dsamadsana pohuadeni oni dsodo quinahijine jai tojaniridsajari. ⁴Nadsapa Dsodse. Pohua naco dsama arobeni Carireahuajicca odsa panani onini Nasaretidsa madiraha biridi tamine Dabi madipohuicca odsa panani Berenehuajina toccanijari, pohua oni dsodo nahijine. Berenepi dsama arobeni Jodeacca. ⁵Nadsama Dsodsepa Maria tadsajani Berenehuaji tohuedajari. Mariapi Dsodse pohuadsa da quinaraha ponidsa huada huada najaracchi. Poni idsonidsa ejedeni huittidsaja najari. ⁶⁻⁷Nadsapa Berenehuaji

bacco toquinaraha odsa ijiridsajaro. Madija huapima tahide bacco toquinapoja najari. Odsa ijiridsadsapi Dsodse pocca amoneje tadsajanipa bohuicca huahuadadsa madimanajari. Nahidsa madimanadsana Mariacca ejedeni comajari. Poni bedi tahidecca tossonajari. Nadsapa etero dsojoranidsa teppe inadsa dsero huanarini tetepidsa ibari najari.

***Diocca dodosse memehujiccapa
edede cacahuadedenisa huati tajari***

⁸Nadsama odsa panani Berene huajira tanidsapa edede cacahuadedeni madimanajari. Pohuadenipa huamonidsa jassi jassi tajari. Dsomepa noccodeni bibissa najari edede cacahuade. ⁹Nanaja pohuadenidsa Diocca dodosse memehujiccapa ahuatojari. Dio pohua ssiejene tossiajabaquidsa cappinamanajari. ¹⁰Naraha Diocca dodosse memehujiccapa attipa: –Ticappinamana tejeraji. Tiadenidsa ima bicani huati onana –najari. –Huatidsehe imeni madija huapimadsa tojaridsanijine –najari. ¹¹–Jidapapa tiadeni



Tonassiajade tossonahi aja tamine Dabicca dsamabote Berenedsa. Pohuapa Diocca Cattaniji ia Idinide Cristo-Mesia najari. ¹²Nadsama aji occa huatinaja nahatoqquiri tiquinanijinepi ajima nani qqui tiqinanihohui. Ejedeni tossonedساتipa etero dsojoranidsa teppe naha dsero huanarinidsa pori canahitohui –najari Diocca dodosse memehuaajicca edede cacahuadedenidsa. ¹³Nadsapa ima huati taha jicadsapa Diocca dodosse tabaqqui memehuaajicca huapi taha amadsati ahuatomamanadsa Diodsa huatidsemanadsa jiri jiri quinajari:

¹⁴ –¡Dio memehuaaji madijaripa bica tahi, deni tojahi!

Namihuaji Pohuajine huatidsehe cajiridsani. Dio pocca cacatidse tabaqquidsa pocca jonehe tojaridsani –quinajari.

¹⁵Nadsapa Diocca dodosse tabaqqui jai tojamacossanidsapa aja edede cacahuade attidenipa: –¡Jina, Berenehuaji jaijanina! Ia Medsede iadsa huati tahi qqide jaijanina –quinajari.

¹⁶Nadsapa huassinaja jai tojanjaripa Maria Dsodse tedseje madimanahidsa bacco toquinajari. Nanaja ejedeni pori canajari dsero huanarinidsa. ¹⁷Nadsapa edede cacahuadedeni ejedeni qqui toquinadsapa aja Diocca dodosse attissa nehe qqui toquinajari. Nadsapa Diocca dodosse ejedeni tahimari pohuadenidsa huati tajaricca ima ecomeramanajaro nahicca madijadsa. ¹⁸Nadsapa madija mittamanadsa: –A, nema najaroraha... –quinajari. ¹⁹Naraha Mariapi ponicca ejedenicca ima Dio ponidsa huati tapojari poni bodinidsa huatini ajima nejerajaro; edede cacahuadedeni ponicca ejedeni tahimari huati toquinadsa naco najaro ima poni bodinidsa huatini ajima nejerajaro. ²⁰Nadsapa edede cacahuadedeni huamonihuaji jai tojanidsapa Diodsa tohuatidsenimanajari: –¡Abi Dio bica tinani! Tijine ia Idinide tahimari imittadsapi iadsa bica tani. Ia Idinide tossonahi qqui inadsa naco etidseni –tanimanajari. Imapi pina Diocca dodosse huati tapojarissa nehe tojadsapi tohuatidsenimanajari.

***Imehi, imeni tadsajani Diodsa dada
toqqimahuaji Jeso dsojo idsimamanajari***

²¹Ejedeni huadari 8 nadsapa dsopori cotani eteroni mota huissi tojidsanijaro. Najaro huissinajapi pina Moisesicca marinajassa najaro cajijari. Nadsapa pohua oni naco icanacanimanajari: “Jeso” quinajari. Najari onipa Maria jiajeraccadsa Diocca dodosse ponidsa huati tapojari.

²²⁻²⁴Nadsapa Jeso tossonahi natti huada 40 jicani nattinipi Dsodse Maria tadsajani aji Moisesicca marinajassa inana-mananijine Jerosarehuaji tohuedajari. Amoneje ejedeni toca-ssonadsa ama toccajarojine Diodsa bica tejerani, Moisesicca marinajadsa naqui *oppina tani, quiquina najari jodiodeni. Nadsapi ponicca ima Diodsa tobicanijinepi ajima nanina bica tajaro: –Ejedeni tossonahi natti huada 40 jicadsapi imenipi Diodsa dada toqqumahuaji toqquedsimadsa ponicca daniji Diodsa da inahijine –napohui nade Dio Atti dsodo nanidsa. Nadsama ponicca daniji Diodsa da inahijinepa ajima nana: –Jeojeode pamehe amoneje maqqi tedseje dada titiquina nana –napohui nade Dio. –Jeojeode nohueradsapi ococo napi-dsati pamehe naqui dada titiquina nana –napohui nade Dio Pocca dosseniji dsodo nanidsa.

Nadsapa poccadeni ejedeni naco iaccamanajari; –Diodsa da inahijine –quinadsa. Najaro ima naqui Moisesicca marinajadsa dsodo najaro: –Ejedeni maqquideje bedi tossonapojaripa Diocca tojana –napohui nade Dio Atti dsodo nanidsa. Nadsapa Dsodse, Maria poccadeni ejedeni Jerosarehuaji dsojo quina-jari, Diodsa dada toqqumadedeni qqui toquinadsa Diodsa huati toquinahijine.

²⁵Naraha Simeopa nahi Jerosarehuaji madijari. Puhuapa bica tajari. Diocca marinajassa inananiijine dissera tajari. Isaraeri potemahideni Idinide ccajonahitohui madijari. Dio Corimepa Simeodsa madijari. ²⁶Nadsapa pohua bodidsapi ima ahuato inanajaro. Najaro imapi: –Tidsoqqe-jeraccadsama ia Idinide Cristo-Mesia qqui tinahitohui. Diopa Mesia dosse inaronabote nahi –napojari Simeodsa. ²⁷Nadsapa Dio Corime pohua icadossedsapa Diodsa dada toqqumahuaji toqquedsimajari. Nahidsa madidsapa Jeso imeni imehi tedseje bacco dsimamanajari. Pohuadenipa pina Diocca dosseniji dsodo naniccassa nehe inanamananijine Jeso iaqquedsimamanajari. ²⁸Nadsapa Simeo Jeso qqui tadsapa ididsa, dsojo ijidsadsa Diodsa huatidsejari. Puhua attipa:

²⁹–Jehe, ohua Medsede Dio, jidapanana tetti ohuadsa pajiranissa tani –najari. –Jidapapa ajajari ejedeni qqui onahi, najaritohui obodi huahuatoma naccade. Jidapapa Isaraeri potemahideni icca ima tobicanitohui, onajaro.

Nadsama ohuapi jidapanana odsoqquenijine onajorani.
 Odsosquedsapi bica tani, onajaro –najari Simeo atti.

³⁰ –Jehe jidapapa ohua onocodsasapi qqui onahi ia Idinide.

³¹ Pohuapa tossiejehe jinede, madija huapimacca tojahitohui.

³² Pohuapa pina ssiajanissa najari. Pohua ssiejene

tossiajabaquidsapi Isaraeri potemahi quejena-
 jarajaridenidsa Djojine madija tocassiejerahijine tahimarini
 ahuato inananitohui. Jehe, Abi Dio, ticca madija ia Isaraeri
 potemahidenipi iadsa madija huapima attidenipa: “Ticcadeni
 dsamadisa ia Idinide tossonadsapa Djojine tiadenidsa ima
 bicani tojani” quiquina nahitohui –najari Simeo.

³³ Nadsapa Dsodse bedimeni tadsajani Simeo atti mitta-
 manadsapa jabojo quinajari. Nadsapa pohuadeni attipa:

–A, icca ejedeni tahimari nahato taha –quinajari bedimeni
 tadsajani. ³⁴ Naraha Simeopa pohuadenidsa denima huati huati
 tajari: –Dioca biquehe tiadenidsa tojadsanapona, onajaro
 –najari. Nadsama Maria ponidsa naco huati huati tajari Simeo:

–Diopa ajajari ejedeni dosse inaronajari, Isaraeri
 potemahideni huapi taha inassiajabaquihijine. Pohuadsa
 jipaquiri najaridenipa nidsa dsotodepa ima bicani
 cajimanahitohui, Diodsa madimanadsanapohuijine.
 Naraha Isaraerideni mota huapi taha pohuadsa jiperaquiri
 nadsa Dio pohuadeni ettajobaquidsapa ocasserani
 ahuamanahitohui. Jehe, ajajari ejedenipa Isaraerideni
 inassiajabaquihijine Dio dosse inaronaraha madija motapa
 pohuadsa jara jara quiquina nahitohui. Pocca marinajadsa
 naco huattajojo tahitohui. ³⁵ Nama quinadsapa madija
 bodideni huatohue ahuato tajaro. Madija mota attidenipa:
 “Diodsapi jipaquiri inajaro” quiquina naraha pohuadenipa
 Jesodsa jiperaquiri nadsapa pohuadeni atti pina
 maidsehessa nani. Diodsa jipaquiri najaripa pajissa jerani.
 Nadsama Maria, ticca ejedenicca imapi tiadsa ocassera
 tehe tojanitohui; pina huahuajinadsa tibonoccori pora
 tocaniquimajarossa nanitohui –najari Simeo atti.

³⁶ Naraha nani Diodsa dada toquimahuaji naqui amoneje
 jadani madijaro. Poni oninipi Ana. Ponipi Dio Atti ehecomera
 najaro. Imehi onipa Panohue. Najaripa idi Asero potemahi.
 Ponipi jadani tocajani. Dsohuatoponipi maqquideje cajiraha

huajano 7 nadsapa maqqui dsoqquejari. ³⁷Nahi maqqui dsoqquedsama tabira madijonajaroa huajanorini 84 bacco tajaripaja. Ponipi Diodsa dada toqqumahuaji madijaro, amossinihuaji totoquena nejerani. Ponipi ssijabote dsome naqui Diotohui nadsapi dissera tajaro. Jipehe naqui huajijiradsa nenebocossa najaro. Diodsa naqui huajijiradsa huati huati teteje najaro.

³⁸Nadsama Simeopa Mariadsa Dsodse dsada huati huati taja naraha Ana ccajonajaro. Ejedeni qqui tadsa huatidsejaro: –Jehe Abi Dio, jidapanana ticca dosseniji bica tahi qqui onajari, ia Idinide tojahijine –najaro Ana. Nadsapi madija huapimadsa pocca ima huati huati tajaro: –Jidapanana Jerosarecca madija aji ia Isaraeri potemahi iquejenajaro huapimadsa ia Idinide Cristo-Mesia bacco najonahi. Nidsa ia todinibaqquihitohui –najaro Ana attini.

Nasaretihuaji Jeso iaccanimanajari

³⁹Nadsapa Dsodse Maria tadsajani ejedeni tossonedssaticca ima aji Diocca dosseniji dsodo najarossa inanamanehe jicadsapi Carireahuaji jai tojanijari, nahi poccadeni odsa Nasaretidsa tomadinimanahijine. ⁴⁰Nasaretidsa tomadinimanadsapa Jeso napidsanapojari. Pohua bodi naco tohuattadsanapojari. Dio naco Jeso icatidseri najari.

Jesopa Diodsa dada toqqumahuaji mamaridedenicca ima ecomerajaro

⁴¹Nadsama jodiodenicca ejete imenibote bacco tajaro, oninipi *Pascoa (Ettidsapi: Dio tossoniqqumajari, inajaro.) Jeso imehi imeni tadsajanipa ejete tohuajiradsa totohuada najari Jerosarehuaji. Nama dsanapomanajari huajano huajijiradsa.

⁴²Nadsama Jeso pocca huajano 12 cajidsapa pohuadenidsa Jerosarehuaji toccajari; pina huajano huajijiradsa nama nama dsanapomanajari. ⁴³Odsa panani Jerosaredsa bacco toquinadsapa ejete qquide madimanaccajari. Ejete jicadsa Jeso imehideni huedaniraha Jesopa Jerosaredsa ibojari. Naraha Mariapi maqqui Dsodse tedseje bedidenitohui huatideni huatojarajari. ⁴⁴Pohuadeni attidenipa: –Madija siba tajaria; pohua tessedsa ccanihitide –quinajari. Naraha cahadijacossahidsa imehidenipa poccadeni ejedenitohui qquiqquihihi naridsajari. Aja madija pohuadsa noccodeni jidsera tajaridsa, pohua

imecotedenidsa naco huati naridsamanajari. ⁴⁵Naraha bacco quina-jaradsapa Jerosarehuaji Jesotohui tohuedanipomajari. ⁴⁶Nadsapa qquiqquihihi naridsajari. Huada huatinimade tojari nadsana Diodsa dada toqquimahihuaji Jeso bacco quinajari. Mamaridedenidsama pohua naco nahidsa huittari canajari. Jeso pohua naco mamaridedeni imahaha canahidsa taharibo canajari. Pohua naco pohuadenidsa huati huati tajari, pocca-deni huatinaja ecomerajaro. ⁴⁷Nadsapa huapima Jeso atti mittamanadsapa: –A, nahato tahi –quinajari. –Huati huati tahi imari bica tahi –quinajari. ⁴⁸Nadsa imehi imeni tadsajani qqui toquinadsapa jabojomansada: –A, ajadsana quejemajari-
 raha –quinajari. Naneje imeni attinipi: –Neppe, ¿nejecotohui iadsa huatirani tibojarotte? Iapi amossi tajaro nitidija inadsa icappinadsa titohui qquiqquihihi inaridsajaro –najaro. ⁴⁹Naraha pohua attipa: –¿Nejecotohui otohura ticadaridsajaro? Ohuadsa ssamomo tinaccajaro nitide. Ohuapi occa Abicca odsadsa odsepe ijijaro –najari Jeso. ⁵⁰Naraha huati tahi mittamanaraha Jeso pocca ima mittamana-jaraccajari.

⁵¹Nadsapa pohuadenidsa toccanijari, poccadeni odsa Nasareti bacco tanimanajari. Imehideni attidsa ibora tajari. Mariapi pocca dacorehe qqui qqui tadsapi poni bodini nahato tajaro, pohua tahimari huatini ajima nejerajaro. ⁵²Jesopa tohuattaja dsanapohui najari. Denima napi, napi, napi dsanapojari. Dio naco icatidseri icatidseri dsanapojari. Madija naco icatidsemaneri dsanapojari.

***Huano Baotistapa dsama huamonihuaji
 madija mari icanabaqquijari***

Mateo 3.1-12; Maraco 1.1-8; Huano 1.19-28

3 ¹Sacariacca ejedeni Huanopa Diocca dossenijidsa dsepe ijibote nadsa dsama cacahuadedeni ajama quinajari: odsa panani Romahuaji madimanajaridenicca tamine deni tojahicca onipa Tiberio. Pohuapa dsama huapima ecahuaridsajaro. Pocca cacahuehepi huajano 15 bacco tajari. Pocca dossenijidsapa madija ohuaha, madija ohuaha tamine toquejenaridsajari. Nadsama najaridenipa pocca dossenijidsa dsama cacahuade madiridsamanajari. Isaraeri potemahi jodiodeni madimanagerica dsama oninipi Jodea. Nahicca taminepa Ponsio Pirato.

Isaraeri potemahi mota madimanahicca dsama oninipi Carirea. Nahicca taminepa Herode. Herode pohua ohuaha Feripepa dsama onini Itorea ecahuajaro. Itorea inorinicca naqui ecahuajaro. Najaro dsama oninipi Taraconite. Itorea inorini onihi-huajicca dsama oninipi Abirinia. Nahicca taminepa Risania.

²Nadsama odsa panani Jerosarehuaji dada toququimadedenicca tamine deni toquejenahi pamaha madimanajari; onidenipa Anasa, Caipa quinajari.

Jehe, najarideni taminedeni toquejenaridsadsa najari huajanodsa Sacariacca ejedeni Huanopa dsama todidi tanidsa madijari. Nanihuajipi dsama huamoni ponira, ssono caji, siba caji tani. Nahihuaji madidsapa Dio pocca dossehe Huanodsa huati tajari. ³Nadsapa hueni Jordao inidicca dsama huapima ccaridsadsa madija maride tojajari. Pohua attipa: –¡Ticcadeni imasiri tineboridsamanaji! –nanaridsa najari. –Tibodideni ajima tiquinaji: “Occa imasiri onebona; jidapapi Diotohuira odsanapona” tiquinaji. Nadsana totopa ticajiridsamanaji. Nema tiquinadsapi Dio ticcadeni imasiridsa: “Epeje, ohuati ajimani” nahijine –najari Huano. Pohuadsa: Baotista, quiquina najari. (Ettidsapi: Totopade, inajaro.) ⁴Nadsama Huanocca imapi maittaccadsama Dio Atti cacomerabote Isahia dsodo inapojaro. Pohua atti ajama napojari:

“Nidsa dsama huamoni ssono caji, siba caji tanihuaji madijaripa atti mohui tadsa madija huahua huahua ihinajonabaquui nahitohui. Pohua attipa: ‘¡Ia Medsede ccajonabote nahi! ¡Tinajoramanaji! ¡Pohua tedsejema jahui tijinedeni tobicapoji! Najaroa aji tibodideni pohuatohui tinajoramanaji’ nanaja nahitohui” napohui nade Dio. ⁵“Pohua atti naco: ‘Nami totodohuedseri najaro tijinedeni ijrirdsaji, onajaro. Ssono quequehemeri najaro ponanissa tanijine hui tiquinapoji. Jahui johuidso tajaro naqui tijinedeni borocco tapoji. Jahui ccababa tajaro naqui tijinedeni huire tapoji. Aji tibodideni naqui pina najarossa tinanamanapoji; ia Medsedetohui tinajoramanaponijine ticcadeni ima tinanabicamanapoji, tibodideni tinahireridsamanaji. ⁶Jehe, ia Medsedetohui tinajoramanadsa pohua ccajonadsapa pohuajine madija huapimadsa Diocca daniji tossiejehecca ahuato tanijine’ nanaja nahitohui dsama huamonihuaji madijaripa”

napohui nade Dio Atti Isahiajine dsodo nanidsa.

⁷Nadsapa madija huapi taha totopatohui quinadsa Huano madihihuaji jahijonana canajari. Naraha Huanopa pohuadenidsa huati tajari: –¡Tiadenipi pina maccassa tiquinani, ticcadeni imapi tabaccora tajaro! Tiadenipi tibodideni cacajiquimera-jeraraha: “Huano ia topa todsanabaquidsapa Diocca najidsohuedsa dsori icanirenitohui” ¿tiquinajaroqui? Naraha tibodideni cacajiquimera-jeradsapi dsori ticanire-jeranitohui. ⁸Naraha tettideni ajima tiquinadsana bica tani: “Imasiripi onebona. Diotohuira obodi huahuatoma nanijine” tiquinadsapi tibodideni cacajiquimeranicca ima ahuato tanijine ima bicanira tinanamanaji, onajaro –najari Huano. –Naraha tibodidenidsa ajima tiquinanitide: “Icca idipa Abarahaoja najari, Diopa ia tohuattajobaquijarahitohui” titiquina naraha tiadeni ticamaidsanimanajaro. Diopa madijassa najarahi. Pohua jipa tadsapa aji siba huihwitteri naridsajarods naco Diopa Abarahao potemahissa naha inahatoridsahijine pajirajari. Paji tiadenipi: “Abarahao potemahi iquejenani” tiquinaraha Diodsa iboraquiqui tiquinejeradsapi tiadeni tohuattajobaquihitohui. ⁹Nadsapi Diodsa iboraquiqui tiquinejeradsa, ima bicani tinanamana-jeradsa naqui ticcadeni imapi pina ahua tabaccora tajaricca imassa najaro. Paji, najari ahua cacajine dsamipa najorahi. Ahua bono bica tajaradsapa ca tacaridsa tahi. Ca tacaridsadsapa bobottahuaji hua hua totodsima najari, diji tahijine –najari Huano.

¹⁰Nadsapa madija attidenia: –Nadsapi iaha, ¿nejecoma inanijine, ibodi cacajiquimeranicca ima ahuato tanijine? –quinajari Huanodsa. ¹¹Naraha Huanopa: –Jehe, tiadenipi etero tetepicca pamehe ticajimanadsapi aja madija etero tetepicca cappirajaridsa ojarie da tiquinaji. Nadsama dsamatapa ticajimanadsa naqui madija dsamatapa cappirajaridsa da tiquinajo –najari Huano atti.

¹²Naraha nahidsa naco madija jahijonajari, aja romanodenidsa dsiniro da tanijine nanaccadedeni. Pohuadenipa: –Huano ia topa todsanabaquina –quinadsa jahijonajari. Huanocca marinaja mittamanadsapa Huanodsa huati toquinajari: –Mamaride, ia naqui, ¿nejecoma inanijine, ibodi cacajiquimeranicca ima ahuato tanijine? –quinajari. ¹³Naraha Huanopa: –Jehe, tiadeni naqui aji dsiniro tinaccamanadsapi pina taminecca imassa nehera titinaccamana naji, onajaro. Denimapi poni –najari Huano.

¹⁴Naraha nahidsa soldadodeni naco totopatohui jahijonajari. Huanocca marinaja mittamanadsapa Huanodsa huati toquina-jari: –Iaha, ¿nejecoma inanijine, ibodi cacajiquimeranicca ima ahuato tanijine? –quinajari. Naraha Huanopa: –Tiadeni naqui madija pohuadeni dsepedenitajitohui, poccadeni dsinirotohui naqui jabojo tinanabaquimana-jarajo, onajaro –najari Huano soldadodenidsa. –Nadsama madija ima cappiraraha pocca dsinirotohui pohuadsa ima tinanamanajaro. Naraha tiadenipi nema tiquinejeraji. Ticcadeni cacahuehe manaconi dsiniro tamine tiadenidsa da inajarora epejena. “Najarodsara imadina” tiquinaji, onajaro –najari Huano soldadodenidsa.

¹⁵Isaraeri potemahidenipa Diocca Cattaniji ia Idinide Cristo-Mesiatohui madimanadsanaponaja Huanocca marinaja mitta-manadsapa pohuadeni bodidsa: –¿Huanopa Cristo-Mesiaco? –quinajari. ¹⁶Naraha Huanopa pohua cacomerajari: –Ohuapi passodsa tiadeni topa odsanabaquijaro. Naraha madija dacorajari ccajonabote nahi. Ohuapi tahide mari mari onaporaha aja dsotodecca mamaride ccajonajarina deni tojajari. Najarina Dio Corime tibodidenidsa madihijine tiadenidsa inanaridsahitohui. Puhuapa pohuadsa toquejena-jarajaridenipa poni ehuerani diji tehe nema dsanaponihuaaji hua idsimabaquihijine pajirajari. Ohuapi ajimani ojani. Ohuapi pocca dodossessa onejerani. Pocca dodossedsa naqui denima ajimani ojani –najari Huano. ¹⁷–Jehe, ccajonabote najaripa madija icattejidsabaquihijine. Pina madija aroso jidsadsa trigo huire tahijine qquero quissa, qquero quissa, qquero quissa inamacossajari. Nahi trigo etero, eppe, ede najaripa jojodedsa toccahijine. Nadsapa noccona ecahuajari pocca odsahuaji. Naraha trigo etero, eppe, ede najaripa diji tahijine bobottahuaji hua idsimahitohui. Najaria aja Diodsa iboraquiri najarajaridenipa poni ehuerani diji tehe nema dsanaponihuaaji hua idsimabaquihitohui. Najaro diji tanipi inahuinijine ssamo tani –najari Huano.

¹⁸Jehe, Huanopa madija Diotohui bodideni huatomanahissa tahijine mari icanabaquija najonapohui najari. Poccadeni imasiri nebomanahijine mari mari ihicanabaquui najari. Pohuadeni bodi acco acco ihicanabaquui najari. Pocca marinaja ajima najonajaro: –Ia Idinide ccajonabote nahi. Diocca cacahuehecca ima dsati tojabote nani –nanaridsa najari.

¹⁹Huanopa tamine Herode naco pocca imasiri nebohujine mari mari ihicana najari. Herodecca imapi tabaccora tajaro, pohua imecote Feripecca amoneje onini Herodia idijidsadsa pocca amoneje tojajaro. Nadsapa Herodecca ima bica tejeradsa Huanopa Herode mittahijine pohuadsa huati huati tataja naraha Herode pocca imadsa dissera tajari. ²⁰Pohuapa imasiri sse tapoja naraha ima denima tabaccora tanicca inanajaro. Najaria Huano toponi cocoro todsimadsa coro idsimajaripaja.

Jeso totopa cajjaricca ima

Mateo 3.13-17; Maraco 1.9-11

²¹Ajjaro imapi Huano coro todsima-jaraccadsa madija topa idsanaridsa-baquipodsapa Jeso naco topa idsanajari. Nahidsa Jeso Diodsa huatide tojadsapa meme naqui tohuaba najaro. ²²Nahidsapa Dio Corime ccaronajari. Ahuato taha pina midsorissa naha Jesohuaji ccaronajari. Bacco naronadsapa memehuaji atti mittaronajari: –Tiapi occa ejedeni. Tiadsa ohuati huana tajaro. Tiacca ima bica tajarojine ohuatidsejaro –najari Dio.



Diocca marinaja deni tojanicca*Mateo 22.34-40; Maraco 12.28-34*

10 ²⁵Jassi nahuajanidsa aja jodiodenicca marinaja maride pohua bodipa: “Jeso nattome onana” nadsa totehemadsa huati tajari: –Mamaride, ¿nejecoma onadsa camittehe imadidsanaponicca bacco onanijine? –najari.

²⁶Naraha pohuadsa Jeso huati tajari: –¿Nejeco ima hua hua tatte Diocca marinaja dsodo nanidsa? Hua tadsapi ¿nejeco imara tiadsa ahuato tatte? –najari Jeso.

²⁷Nanaja jodiodenicca marinaja maridepa Dio Atti ecomerajaro:

–“Tiadeni Medsede Diodsa tetideni huanacquiri naji. Tibodideni huatonissa tadsa, dacoco tijiradsa Pohuadsara disseraquiri tidsanapomanadsapi Pohuadsa tetideni huanacquiri nanijine. Tinorideniccadsa naqui tetideni huanacquiri naji, pina aji tiadenidsa tetideni huanacquiri najarossa tiquinaji”

nade Dio Atti dsodo nanidsapi –najari jodiodenicca marinaja maride atti.

²⁸Nadsapa pohuadsa Jeso huati tajari: –Huati tinani bica tani. Nema tidsanapodsapi Diodsa timadinitohui –najari.

²⁹Naraha jodiodenicca marinaja maride pohua bodi attipa: “¿Nejecojaridenina ohuitoricca? Najaro Moisesicca marinaja Dio Atti dsodo nanipi ohuacahuanissa tajaroqui?” najari. Nadsapa Jesodsa huati tajari: –Diocca marinaja najarossa onananijineraha ¿nejecojaridenina ohuitoricca? –najari jodiodenicca marinaja maride.

Samaritano tahimari

³⁰Jodiodenicca marinaja maride attipa: –¿Nejecojaridenina ohuitoricca pohuadsa ohuati huana tanijine? –nadsapa Jeso manaco pohuadsa ajijaro ima huati tajari: –Jodiodeni ojariapa odsa panani Jerosarecca jahui odsa Jericohuaji toccani-huaji toccajari. Toccaraha... bobotidedeni dama quinadsa idaquimanaha, huatiabote nadsa eterori ssiti quinehe jica nadsa jahui inorinidsa inebomanadsa jai tojanijari. ³¹Naraha

*Diodsa dada toqquimadepa huati ajama canaha jahui toccanaja madija biquerajari ponacossahi qqui taraha toccarihuajadsanapojari. ³²Nahi dsotode naco dada toqquimade bijideni accode *rehuitadeni quiquina najari ojaria najaro jahui toccajari. Najari naco madija biquerajari ponacossahi qqui taraha toccarihuaja-dsanapojari.

³³Nadsapa madija ohuaha dsama onini Samariacca madija naco najaro jahui toccajari. (Aja Samariacca madijadenidsa: *samaritano quiquina najari.

Pohuadenipa jodiodeni tedseje ahuaaji jipera ahuaaji jipera quinajari.) Nadsapa samaritano quiquina najari ojaria najaro jahui toccadsa madija biquerajari ponacossahi qqui



tadsapa pohuatohui huati huana tajari, pocca madija jararaha.

³⁴Nadsapa samaritano uva bono ppejene ahua oquini icanemadsa bobotidedenijine biquerajari ecanajijari. Pocca bejo jore inacossadsapa pocca bojodsa ibarijari. Nadsapa odsa onihihuaji iaccajari, nahidsa ecahuahijine. ³⁵Naraha huada ssiaja samaritano toccabote nadsa odsa jinededsa ccarara huatini ccara tanicca capamehe dahaha icanajaro. “Coma tajari tecahuana. Nidsa occanipomadsa tiadsa aja tecahuajari manaconi mota tojadsapi da onapomanijine” nahi nade samaritano attipa –najari Jeso jodiodenicca marinaja maridedsa.

³⁶Naraha Jeso pohuadsa denima huati huati taccajari: –Aja madija 3 quinajaripa dada toqquimade, Rehuita, samaritano quinajaridenipa ¿nejecojarina paja aja bobotidedenijine biquerajaridsa pina pohua inoriccassa najari? –najari Jeso.

³⁷Nadsapa jodiodenicca marinaja maride ecomerajaro: –Aja madija biquerajaridsa huati huana tajarina paja –najari. Nadsapa pohuadsa: –Jehe, ticcanidsapi nema tidsanapoji –najari Jeso.

Edede amossi najari tahimari*Mateo 18.12-14*

15 ¹Nadsapa aja romanodenidsa dsiniro da tanijine nanaccadeni, imasiri sseqquiri najarideni tedsejapa: “Jesocca marinaja imittana” quinadsa Jesohuaji jahijonajari. ²Naraha jodiodeni mota pariseo imadsa jehe quinajarideni, jodiodenicca marinaja maridedeni tedsejapa aja imasiri sseqquiri najaridenidsa Jeso quejemahi qqui toquinadsapa jiperaquiri najari. Nadsapa atti atti quinajari: –Ajana, ajajari madijapa imasiri sseqquiri najaridenidsa “nija” nahi taji. Pohuadeni tedseje naco jipajari. Naraha iapi pohuadeni tedseje ijipanjinepi *oppina tani, inajaro –quinajari.

³Naraha manaco Jeso pohuadenidsa ajijaro namidsa imadnicca ima tadsajani mari icanabaqqijari. ⁴Pohua attipa: –Jari, tiadenipi ticcadeni edede 100 naha ticajimanadsapa onideni hua tinabaqquimanaraha ojaría amossi nadsapa ¿pohuatohui qquide jai tija-jeraqui? Jehe, edede jinedepa pocca edede qquide toccahitohui. Pocca edede 100 naha cajiraha ojaría amossi nadsapa 99 tojajari. Pocca edede 99 naha huamonihuaji inebobaqquidsapa ojaría amossi najari qquide toccajari. Nadsapa qqui qqui naridsanaja pocca edede bacco inanijari. ⁵Bacco inanidsapa pohua mattodsa ibari nanijari. Nadsapa huatidsenijari. ⁶Nadsapa odsa bacco nanidsapa pohua tessetohui huahua najari: “¡Occa edede amossi najaripa bacco onanihi! ¡Occa odsahuaji jai tijajonaji, etidsenijine!” najari. ⁷Nadsama pajissehera tiadenidsa huati onajaro: Najarossa najaro madija imasiri sseqquiri najaridenipa pina edede jano tojadsa amossi najarissa quinajari. Naraha ojaría: “Diodsa ojanijine, occa ima onebona” nadsapa Diopa pocca dodosse tabaqqi memehujicca tedseje huatidsemana tahi. Aja madija tahide Diodsa toquejenapojaridenicca imadsa naco memehujiccapa huatidsemana tahi. Naraha aja madija Diodsa tojedsatidsapa denima huatidsemana tahi –najari Jeso.

Amoneje ponicca dsiniro amossi cananicca ima

⁸Nadsapa ima onihi naqui huati tajari: –Amonejepi dsiniro ccarara 10 nehe cajiraha ponicca dsiniro cajarie amossi canadsapi ¿qquide dissera tejeraqui? Dissera tajaro. Ponicca jojororo iquehessidsa ponicca dsinirotohui johue,

qqui, johue, qqui naridsadsapi bacco icananinitohuijaro.
⁹Bacco icananidsapi poni tassanitohui, poni inoriniccatohui
 huahua najaro: “¡Ohuadsa tetidsemanaji! Occa dsiniro amossi
 canaraha bacco ocananini” najaro –najari Jeso. ¹⁰–Nadsama
 ohuapi tiadenidsa huati onana: Najarossa najaroa madija
 imasiri sse tajaripa: “Diodsa ojanijine, occa ima onebona”
 nadsapa Dio pocca dodosse tabaqqi tedseje huatidsemana
 tahi –najari Jeso.

***Madija pohua bedi jano tojaraha
 bacco nanipomahicca ima***

¹¹Jesopa ajijaro namidsa imadinicca ima onihidsa huati
 huati najari: –Madijapa pohua bedi pamajari. ¹²Dsotodeccapa
 imehidsa huati tajari: “Abi, tidsepetaji, ticca dsiniro, ticca
 dsama huapima nidsa tidsoqqedsapi icca tojanijine tade.
 Nadsapi aji occapi tidsoqqe-jeraccadsama ohuadsa arobeni
 da taji” najari. Nadsapa imehi pohua bedi pamahadsa pohua
 dsepetaji, pocca dsama icanaroberidsadsa pohuadenidsa da
 inaridsajaro. ¹³Naraha huada onihidsapa pocca abicca daniji
 aji dsama cajidsati, pohua dsepetaji cajidsati naqui dsiniro-
 tohui da inaridsajaro. Nadsapa dsiniroma dsama huaji tani-
 huaji toccajari. Nadsapa dsama huaji tanicca odsa bacco
 tadsapa ejetetohui, dsodsobitohui, amonejetohui naridsajari.

¹⁴–Nadsapa pocca dsiniro nema nehe najicajaro. Naraha
 najari huajanodsa pemi naqui tojaridsajaro. Dsamatapa naco
 bonoridsa-jarajari. Nadsapa pemijari. ¹⁵Nadsapa tarabaidsa-
 tohui nahihuajicca madijadsa huati tajari. Nahihuajicca madija
 pohuadsa: “Occa poroco tecahuabaquijo” nadsa pocca poroco
 madimanahihuaji dosse inajari. (Naraha dsabissopa jodioja
 nadsa poroco cacahuade pohuadsa ocassera taraha nama naha
 poroco ecahuajari.) ¹⁶Pohuadsa dsamatapa da quina-jaradsa
 pemidsapa: “Poroco tapari ojipa naccaraho” nanaja naraha
 poroco tapari pina imissa najaro naqui da quinehe nejerani.

¹⁷–Nadsapa bodi huatomajari: “Occa abicca odsadsapa
 tatarabidsadedeni caji taraha pohuadenidsa dsamatapa mota
 totoja nade. Naraha ohuapi ajihuaji pemi, ohuatiabote nani” najari
 pohua bodi. ¹⁸Nadsapa pohua bodi huatodsapa: “A, occa abicca
 odsahuaji occanina. Bacco onanidsapi pohuadsa occa ima huati

onanjine: Abi, ojine ima tabaccora tani Diodsa. Tiadsa naqui ojine ima tabaccora tani, onanjine” najari pohua bodidsa. ¹⁹“Nadsama: Abi jidapapi ohuadsa: ‘Occa ejedeni’ tejeraji. Tiapi bica tinaraha ojinepi ima bica tejerani, onanitohui. Naraha jidapapi ticca dodosse ojanijine ¿jipa tinaqui? onanitohui” najari pohua bodidsa.

²⁰–Nadsapa pocca abihuaji toccanijari. Toccanijari... bacco tanibote nadsa pocca abipa huaji taraha pocca ejedeni ccanihi qqui tajari. Qqui tadsapa pocca ejedenidsa huati huana taja najari. Joppa tajari, dama, icahuajocossa, ebette mose inajari. ²¹Naraha bedi attipa: “Abi, ojine ima tabaccora tani Diodsa. Tiadsa naqui ojine ima tabaccora tani. Abi, jidapapi ohuadsa: ‘Occa ejedeni’ tejeraji. Tiapi bica tinaraha ojinepi ima bica tejerani” najari imehidsa.



²²–Naraha pocca abipa bedi atti mittaraha pina mitterahi najari. Pocca dodosse tabaqquidsana huati tajari: “¡Huassinaja occa ejedeni etero bicanidsa tinehedsamanajo! ¡Todsepecca naco dsepe tinahanamanajo, amoricca naco tineheda-manajo!” najari. ²³“Bohui napidsati oqui tajari naco dsoqquehijine qqui tiquinajo. Dsoqquedsa ijipaqquina; etidsenijine” najari. ²⁴“Etidsenijine bica tani. Occa ejedeni pina dsoqquejarissa naraha madinipomahi. Puhuapa pina jano tojajarissa naraha bacco nanipomahi” najari. Nadsapa pocca odsacca huapima huatidsemanajari.

²⁵–Naraha pohua bedi tahideccapa huidsajahuaji dsepe ijidsa ccaninaja odsa huajiranidsa mittajari. Tire tire camaja, tore tore camaja najari, pocca abicca odsadsa dsodsobi tojajaro. ²⁶Naraha pohuapa pocca abicca medsetohui huahua najari, ccajonadsapa pohuadsa huati tajari: “¿Nejecotohui icca odsadsa ejete tojajaro?” najari. ²⁷Naraha imehicca medsepa pohuadsa huati tajari: “Timecote bacco nanijari. Nomi, bica taha ccanidsa ticca abi bohui bedi oquibote inanadsoqquejari” najari.

²⁸–Naraha pohuapa jamijari. Odsahuaji toqquedsimanide jipera tadsapa pocca abina qquenajari. Qquenadsapa bedidsa huati huati tajari, toqquedsimanijine. ²⁹Naraha manaco imehidsa huati tajari: “Ohuapi tiadsa huajano huapi taha odsepe ijijaro. Ticca dosseniji aji jipa tinajarocca ohuadsa dosse dosse tajarossa onanaraha ohuadsa bani ette tojahi da taha najarahi, otessedeni tedseje ohua naqui ohuatidsenijine-
raha” najari imehidsa. “Bani huati ccarera tahicca pina edede jidsadsa cabra bedi naco ohuadsa da taha najarahi, otessedeni tedseje ijipaqquinijineraha. ³⁰Naraha ticca ejedeni aja ticca dsiniro ponima amoneje pehiqquri najarodenidsa inajicajaro pohuadsana bohui bedi oquibote tinanadsoqquejari” najari imehidsa.

³¹–Nadsapa manaco imehi pohuadsa huati tajari: “Ato, tiapi ohuadsa timadidsanapojaro. Odsepetaji, occa huidsaja, occa bani ette tojahi, occa odsa najari huapimapa ticca” najari. ³²“Naraha jidapapi ijipaqquidsa etidsenijine bica tani. Ticca eso dsoqquejarissa naraha jidapapa ima dsatidsa madinihi. Puhuapa jano tojaraha qqui imanihi” najari pohua bedidsa –najari Jeso.

***Madijapa pohua dossedecca dsiniro
ecahuaraha pohuajine ponima jicajaro***

16 ¹Nadsapa Jeso pocca mamari tabaqquidsa ajijaro namidsa imadinicca ima onihidsa huati tajari: –Jehe, madija dsepe ssebotepa pohua cajijaricca huapima pohua biji accode ojaria ecahuajaro. Naraha pohua biji accodepa pohua pohuajine pocca cacahuehe tossamojaro. Nadsapa madija ohuahadenia dsepe ssebotedsa huati toquinajari:

“Tibiji accodepa ticca dsiniro ponima inajicajaro” quinajari. ²Nadsapa dsepe ssebote pohua biji accodedsa huahua nadsa huati icanajari: “Nija, ticca ima ohuadsa huati toquinajari. Ponima occa dsiniro tinajicani quinahi ima omittani. ¿Ticca cacahuehe nejecoma tinanajaro? Ohuadsa ticca cacahuehecca dsodo nani huapima tinajoradsa ohuadsa da taniji, onajaro. Nadsama tiapi denima tecahuaji onejerani” najari pohuadsa.

³–Nadsapa aja pohua biji accodepa pohua ehuerahi bodi huatojari: “Jidapapi ¿nejecoma onapadseje? Ohua dossede ohuadsa jipera tadsapa odsepe ijiniijine nohueradsapi ocappiranitohui” najari. “Huidsaja ppa onanijinepi opajira-jerani. Madijadenicca dsiniro manaconi jirehe mita onanijine naqui cappina onani.

⁴Pina ajima onana. Ohua dossededsa debe quinajaridenicca debe ajimani onanaridsana” najari. “Nadsana ohuadsa huatidsemanadsa nidsa, tarabadsa ocappiradsapi aji ima onajorapojarojine ohuadsa: ‘Aji occa odsadsa timadiji’ quinahitohui” najari pohua bodidsa.

⁵–Nadsapa pohua dossededsa debe quinajaridenitohui huahua najari. Ojaria huahua ccajona, ojaria huahua ccajona najari.

Nadsapa tahide ccajonapojaridsa huati tajari: “Ohua dossededsa debe tani ¿nejecoma natte?” najari. ⁶Nadsapa huati tajari: “Ahua oribo bono oquine jorori imeni 100 nehe debe onajaridija” najari. Nadsapa dsepe ssebote biji accode attipa: “Aji, ticca cuenta tiadsa. Ajidsa huassinaja tittaridsa ticca cuenta 50’ra dsodo taji” najari.

⁷Nadsapa dsotodeccadsa naco huati tajari: “Tia naqui ¿ohua dossededsa nejecoma nehe debe tajaritta?” najari. Naraha pohua attipa: “Aroso jidsadsa trigo saco 100 naha debe onajaridija” najari. Nadsapa pohuadsa huati tajari: “Aji, ticca cuenta tiadsa. Ajidsa huassinaja tittaridsa 80’ra dsodo taji” najari. Nama nama najari debe quinajarideni huapimadsa.

⁸–Naraha dsepe ssebotepa pohua biji accodejine pohuadsa debe quinajaridenicca debe ajimani inandaridsani ima mittadsapa pohua attia: “Jehe, obiji accodepa pohua tedsejemacca ima maidsehedsa najorapohuijine bodi nahato tajari” najari. Jehe imapi nema najaro. Madijapa pohuadeni tessedenidsa maidsamanahijine bodideni nanajoramanapo najari. Naraha Diocca madijapa pohuadeni tessedenidsa maidsamanahijine najoramanapohuijine ssamoquiri nahi –najari Jeso.

⁹–Tiadenidsa huati onajaro: Ajijaro namicca ticajimanajaro-cadsa madija acco ticanabaquimanajo. Nema tiquinadsapi titessedeni tohuapihitohui. Nadsa nidsa dsotode Dio madihi-huaji timadimanadsapi ticcadeni accorehe manaconipi Dio pocca biquehena tiadenidsa inandaridsanitohui.

¹⁰–Madijapa cacahuaniji badsira tehe ecahuadsa maidsa-jaradsapa nidsa dsotode cacahuaniji deni tojanicca ecahuanijine “Bica tahi” quinahitohui. Naraha cacahuaniji badsira tehe ecahuadsa maidsadsapa cacahuaniji deni tojaniccadsa “Jehe pohua ecahuana” quina-jarahitohui. ¹¹Najarossa najaroa ajijaro namicca biquehe tecahuamanaraha maidsadsa tinadsa tijinedeni toccanissa tejeradsapi Diopa pocca biquehe pajissehecca tiadenidsa: “Tecahuamanaji” najarahitohui. ¹²Madija ohuahacca dsiniro tecahuamananissa tejeradsapi ticcadeni dsiniro naqui tecahuamananissa tejeranitohui. Nema nadsapi ticcadeni dsiniro tiadenidsa da quina-jeranitohui.

¹³–Nadsama tiadenipi tiadeni dossede pamahadsa tidsepedeni ijimananijinepi ssamo tani. Tiadeni dossede pamaha ticajimanadsapi ojariadsana tetideni huanaquiri najaro. Pohua attidsana iboraquiri tiquinanitohui. Ohuahadsapi ajimani tetideni huanaquiri nadsapi pina pohuadsa jiperaquiri tiquinajarossa nanitohui. Pohua attidsa ibobo tinanitohui.

–Diocca medse tiquejenadsapi dsinirodsas medse tiquejenanijine ssamo tani. Dsinirotohuira tetidsemanadsapi Diodsa tetidsemananijine ssamo tani. Ima pamehepi Diotohui, dsinirotohui, timadimananijinepi ssamo tani –najari Jeso.

¹⁴Jeso maride tojadsa pariseo imadsa jehe quinajarideni naco nahidsa taharibobo canajari. Pohuadenipa dsinirodsana huatideni huanaquiri najari. Naraha Jeso atti nama

nahi mittamanadsapa pohuadsa ssamoni huahua quinajari.
¹⁵Nadsapa Jeso manaco pohuadenidsa huati tajari: –Tiadenipi
 madija noccodenidsa bicaquqiri tiquinaraha Diopa tibodideni
 nahato tajari. Madija huapimapa tiadenidsa: “Bicaquqiri nahi”
 quinaraha pajissa jerani. Ticcadeni madiedsapa Dio jipera tahi
 –najari Jeso.

***Ima cacattemade amoneje tabira
 tocajajaro acco icamajarocca ima***

18 ¹Jesopa ajjaro namidsa imadinicca imadsa pocca
 mamari tabaqqui mari icanabaqqujari. Madija Diodsa
 huatide disseraqquri nahijine, “Diopa ohuatti mitta-jarahi”
 quina-jarahijine huati huati tajari. ²Nadsapa ima ajjima najaro
 huati tajari: –Odsa pananihuajipa ima cacattemade madijari.
 Puhuapa Dio noppine cappina-jarajari. Madijadsa naco cappina-
 jarajari. ³Najaro odsa pananidsa amoneje maqqui dsoqqe-
 jari madijaro. Ponipi huajijiradsa ima cacattemadedsa huatide
 totocca najaro: “Ohua acco ticamaji” naneje najaro. “Madijacca
 nacasserehe onahanadsanaponi” naneje najaro. ⁴Naraha
 pohuapa poni acco camade ibo ibo nanaja najari. Naraha
 dsotodena bodi huatodsa ajama najari: “Diodsa ocappinejera-
 raha madijadenidsa naqui ocappinejeraraha” najari. ⁵“Naraha
 aji amoneje tabira tocajajaro ohuadsa tonajo huati cajiradsapi
 poni acco ocamana. Acco ocama-jeradsapi poni attini ohuadsa
 tocasseraqqunitohui” najari ima cacattemade ibobote. Nadsapa
 poni acco camade tohuiborajari –najari Jeso.

⁶Nadsapa ia Medsede Jeso attipa: –Jehe, ima cacattemade
 bica tarajararipa atti nama najari. ⁷Pohua atti nama naraha
 Diopa nama najarajari. Puhuapa bica tajari. Pocca tocattejjidsa-
 baqquinaja attideni mittajari. Puhuadenipa Diodsa ssiaja huati,
 dsome huati totoquina najari. Nadsapa ¿Diopa pohuadeni acco
 icamabaqquihijinepa najopadsaja? Najo-jarahitohui. ⁸Najaroa
 tiadenidsa huati onajaropaji: Diopa najo-jaradsa tiadeni acco
 tocamabaqquihitohui, onajaro. Naraha ohuapi Madija Bedi
 ojajaroa nidsa occanipomadsapi occa madijapa ¿Dio pohuadsa
 huatide disseraqquri nahipaja napadsaja? Puhuadeni naco:
 “Jehe, Dio ohua acco camahi” ¿quiquina nahipaja napadsaja?
 onajaro –najari Jeso.

Saqueo tahimari

19 ¹Jesopa odsa panani Jerosarehuaji toccahijine tahidepa odsa panani Jericodsaha bacco tapojari. Nadsapa Jerico nocconi toqqeéquimahijine toqquedsimajari. ²Naraha nahidsapa maqquideje dsepe ssebote madijari, pohua onipa Saqueo. Pohuapa jodiodeniraha *romanodenidsa dsiniro da tanijine nanaccadenicca tamine tojajari. ³Nadsapa “Jeso ccajonahi” quinahi mittadsapa Saqueo bodipa: “Jeso qqui onana” najari. Naraha pohuapa tere tajarijine, madija huapi tadsapa Jeso qqui inajarajari. ⁴Nadsapa Saqueo madija jai tojequimahi qqui tadsapa tedsejemadenina joppa tajari: –Aji ahuadsa occamarods Jeso toqqeéquimahi qqui onana –nadsa ahuadsa toccamarojari. ⁵Naraha Jeso Saqueo huittarihihuaji toqqeéquimadsapa Saqueo ahuadsa huittarihi qqui inajari. Nadsapa Saqueodsa huahua najari: –¡Saqueo, huassinaja ticcaronaji! Ohuapi jidapana ticca odsahuaji omadiccana, onajaro –najari.

⁶Nadsapa Saqueo huassinaja ccaronadsa Jesodsa: –Jehe, occa odsadsa timadiccaji –najari. Saqueo pocca odsahuaji Jeso iaccanidsapa tohuatidsenijari. ⁷Naraha madija huapimapa Jeso Saqueooca odsadsa toqquedsimahi qqui toquinadsapa pohuadenira imahaha canajari: –A, Jesopa imasiri ssebotecca odsadsaraha toqquedsimaha. Jeso nama nadsapa iadsa bica tejerani –quinajari jodiodeni atti, aja romanodenidsa dsiniro da tanijine nanaccadedenidsa jiperaquiri nadsa.

⁸Nadsapa jipade toquejenanaja jicadsapa Saqueo totehemadsa ia Medsededsa huati tajari: –Jehe, ohua Medsede, jidapapi ajima onana: Aja cappiramanajaridenidsa odsepetaji arobeni ocanarobenissa taridsadsapi pohuadenidsa da onaridsana. Nadsama aja ocamaidsabaquijaridenidsa naqui pina aja ocamaidsabaquipojarissa nehe pohuadenidsa da omanina. Nadsapi pohuadenidsa najarossa nehe denima da, denima da, denima da omaniridsanijine –najari.

⁹Nadsapa Jeso madija huapima mittamanahijine huati tajari: –Jehe, jidapana ajajari maqquidejepa pocca imasiri inebodsa Diodsa pajissa nadsapa pina maittaccadsama pocca idi Abarahao Diodsa pajissa najarissa najari. Nadsapa pohua, pocca odsacca madijadsa naqui Diocca tossiejehe tojaridsani ahuato tani –najari Jeso atti. ¹⁰–Nadsama aji ohua *Madija Bedi ojararopi

madija jano toquejenarideni pina ajajari maqquidejessa quina-
jari qquide occajonajaro. Imasiridsa medse toquejenaraha odini-
baquihijine. Huapima ohuadsa pajissa quinadsapa camittehe
jiquejeranicca cajimanahijine –najari Jeso.

***Jesopa dsiniro inahapimananijinecca imadsa
mari icanabaquijari***

Mateo 25.14-30

¹¹ Jesopa Saqueodsa huati huati tadsa nahidsa madija
queriqquijarideni mittamanajari. Jeso Jerosarehuaji tohuajira-
jonadsa pohuadani bodi attidenipa: “Nidsa Jeso Jerosaredsa
bacco tadsapa amadsati Diocca cacahuehe tojanitohui” quina-
raha najaro ima tojanijine jerani. Nadsapa Jeso pohuadani
bodi huatomanahijinepa ajijaro namidsa imadinicca imadsa
mari icanabaquijari.

¹² Jeso attipa: –Dsama huapimacca tamine deni tojahicca
dsama onihicca deni toquejenarideni ojariadsa huahua
najari: “Tia ocattejidsajaro, ticca dsama arobeni cacahuade
tijanijine. Ohuadsa huatide ahuaji ticcajonaji” najari. Nadsapa
huaji taraha pohuahuaji huatide toccahijine najorajari. Pohua
bodipa: “Nidsa occanidsa ohuapi occa dsamacca tamine
ojanitohui” najari. ¹³Nadsapa toccabote nadsa pocca dodosse
tabaqqui mota 10 quinaha huahua inabaquijari. Nadsapi
dsiniro ccarara huatini ccara tanicca 10 najaro pohuadenidsa
ojari ojari nehe da inaridsajaro. Nadsapa pohuadenidsa huati
tajari: “Ajijaro dsinirodsa mitta, da, mitta, da taridsamanana,
dsiniro tohuapinijine. Nidsa occanidsapi ohuadsa nema nehe
da tanimananijine” najari. ¹⁴Aja tamine tojahijinepa tamine
deni tojahicca madihihuaji toccajari. Naraha toccahi nattipa
pocca dsamacca madijapa pohuadsa jiperaquiri nadsapa
madija dosse inabaquimanajari, tamine deni tojahiccadsa
huati toquinahijine. Bacco toquinadsa attidenipa: “Aja ticatte-
jidsajaripa icca tamine tojahijine jiperaquiri inani” quinajari,
dsama huapimacca tamedsa.

¹⁵–Naraha tamine deni tojahiccapa attidenidsa jehe
najaradsa pohua icattejidsajaripa tamine inanajari. Nadsapa
tamine tojadsapa pocca dsamadsa dosse dosse nahijine tocca-
nijari. Bacco nanidsapa pocca dodosse tabaqqui pohuadenidsa

dsiniro da inaridsajarodenidsa huahua najari; “¿Dsiniro nejecoma nehe tojani?” nahijine. ¹⁶Nadsapa tahide qquedsima-pojaría pohuadsa huati tajari: “Ohua dossede, ticca dsiniro ccarara cajariraha ojine deni tojadsapi 10 nehe tojani” najari. ¹⁷Nadsapa tamine tojedsati manaco pohuadsa huati tajari: “Jehe, tiapi occa dodosse bica tinani. Ohuattidsa ibora tinadsapi occa dosseniji ima bedeniraha tijine toccanissa tadsapi odsa panani 10 najarocca cacahuade tjanitohui” najari. ¹⁸Pocca dodosse ohuaha naco qquedsimadsa huati tajari: “Ohua dossede, ticca dsiniro ccarara cajariraha deni tojadsapi 5 nehe tojani” najari. ¹⁹Nadsapa tamine tojedsati manaco pohuadsa huati tajari: “Jehe, tiapi odsa panani 5 najarocca cacahuade tjanitohui” najari.

²⁰–Naraha pocca dodosse ohuaha qquedsimadsapa pohuadsa huati tajari: “Ohua dossede, ajjaropaji ticca dsiniro. Eterodsa jore onaquinissa tadsa ohuacahuajaro. ²¹Ohuapi tinoppine ocappinajaro. Tiapi madijadsa daco tijirajaro. Tiapi tarabaidsa tejeraraha ticca dodosse tabaqqijine titicaji najaro” najari. ²²Nadsapa manaco tamine tojedsati attipa: “¡Occa dodosse tabaccora tinani! Tia tettijine tiadsa ima ssonarijaro. Aji ohuattidsa ibo tinadsapi ohuadsa bica tejerani. Tettipi ohuadsa: ‘Madijadsa daco tijirajaro. Tarabaidsa tejeraraha ticca dodosse tabaqqijine titicaji najaro’ taha. Naraha occa ima nahato tinadsapi ²³ ¿nejecotohui occa dsiniro tohuapinjine dsiniro ehecahuamana nanihuaji da tidsimajerajaro? Nanissa occanidsapi aji occa dsiniro tohuapijarocca tadsajani ocajinitohuiraha” najari tamine atti. ²⁴Nadsapa aja pocca dodosse tabaqqi domodeni huaridsajaridsa huati tajari: “Jari, occa ccarara tidinimanadsa ccarara 10 cajjaridsana da tiquinaji” najari tamine atti. ²⁵Naraha pohuadeni attipa: “Ia dossede, najaripa ccarara 10 nehe cajiha” quinajari. ²⁶Naraha tamine attipa: “Epejena, ohuapi tiadenidsa huati onajaro: Madija occa dossenijidsa dissera tadsapa pohuadsa denima tojanitohui; naraha aja madija occa dossenijidsa dissera tajaradsapa cappirahissa tahitohui. Badsira tehe cajiraha najaro naqui todininitohui. ²⁷Nadsama aja ohuadsa huadiqqiri najarideni tamine ojanijine jiperaqqiri najarideni ohuahuaji teccajonabaqqimanadsa obacchohuaji domo huadsapa tinana-dsoqqebaqqihijine” najari tamine tojedsati atti –najari Jeso.

Jeso todsepe tojahijine ima najoramanajari

Mateo 26.1-5, 14-16; Maraco 14.1-2, 10-11; Huano 11.45-53

22 ¹Jodiodenicca ejete imeni tohuajirajonajaro, oninipi *Pan ssaja tajarahicca. Najaro ejete onini onihipi *Pascoa. (Ettidsapi: Dio tossoniqqumajari, inajaro.) Najaro ejete toja-
jeraccadsapi ajjaro ima tojajaro. ²Dada toqqumade taminedeni, jodiodenicca marinaja maridedeni quinajaridenipa Jesodsa jipera-
qquri nadsa attidenia: –¿Jeso nejecoma inanadsa dsoqquehijine?
–quinajari. Naraha pocca madija noppine cappinamanajari. –Jeso
dama inahi qqui toquinadsapa mohua mohua canarana –quinajari.

³Nadsapa Joda. Puhuapa Jesocca dodosse tabaqqui 12 quina-
jari ojaría. Puhua oni ohuahapa Iscariote. Puhua bodidsa imasiri
mamaride Satana toqquedsimadsapa puhua Jeso eccorahijine
bodi najorajari. ⁴Nadsapa dada toqqumade taminedeni, nahicca
odsa cacahuadedeni quinajaridenidsa Joda huatide toccajari. –Jeso
tidsepedenidsa onanahijine, onajaro –nadsa puhuadeni tedseje
Jeso dama quinahijine imahaha canajari. ⁵Nadsapa huatidse-
manadsa: –Jehe, nema tadsapi tiadsa dsiniro da inanitohui –quina-
jari. ⁶Nadsapa Joda jehe nadsa bodi najorajari. Toccanidsapa Jeso
puhuadenidsa eccorahijine inoccodsaridsajari. Puhua bodipa:
“Madija nohue quiradsa Jeso dama tiquinajo, onanijine” najari.

Ia Medsedecca jipaqueie

Mateo 26.17-29; Maraco 14.12-25; Huano 13.21-30;

1 Corintodenidsa 11.23-26

⁷*Pan ssaja tajarahicca ejete bacco tapojaropi huada 7 nehe
jicanijine. Najaro ejetecca huada tahideccadsa edede bedi
puhuadeni motta Diodsa da da quiquina najari. Edede bedi
inanadsoqqueமானadsa ibanamanadsapa jipamanajari. Najaro
ejete oninipi *Pascoa quinajari. ⁸Nadsa Jesopa Pedro Huano
tedseje dosse inabaqquijari: –Jidapana Pascoacca jipaqueie
tinajoramanapoji, dsome ijipanijine –najari. ⁹Naraha puhua-
deni attipa: –¿Nejecohuaji inajoranijine? –quinajari.

¹⁰⁻¹¹Naraha Jeso puhuadenidsa huati tajari: –Jerosarehuaji
ticadapoji. Nahidsa madija jojoridsa passo dsojo tanihi qqui tiqui-
nadsapa najari natti ticadamissadsa pocca odsa bacco tiquinana.
Nadsapi nahicca odsa jinededsa huati tiquinana: “Ia Maride attipa:

‘¿Nejecohuajicca coba canahuajaninidsa Pascoacca jipacquiedsa ojipanjine ohuatimadedeni tedseje?’ napaja” tiquinana. ¹²Nadsapa pocca odsa tetepicca coba canahuajanini imeni tiadenidsa nohue inanitohui. Nanidsapi huahuanari, huihuittari najoraponi. Nanidsana jijipa tinajoramanaponijine –najari Jeso. ¹³Nadsapa tohuedadsapa pina Jeso pohua huati tajarissa najaro odsa najorani qqui toquinajari. Nanidsa Pascoacca jipacquie dsome jipamanahijine najoramanajari.

¹⁴Jipamanahijinecca maji bacco tadsapa Jeso pocca mamari tabaqqi tedseje jipamanahijine huahuanaridsa jassi nahuajani-jari. ¹⁵Nadsapa Jeso pohuadenidsa huati tajari: –Obodipi: Ocasserani ohua-jeraccadsama occa mamari tabaqqi tedseje Pascoacca jipacquiedsa ijipacqui naccaraho, ohodsanapo najaro. ¹⁶Nadsama ajijaro ejetecca jipacquiepi ojipapomanijine huaji taccani. Nidsa Diocca cacahuehe tojadsana nanidsana tiadeni tedseje ijipacquipomanitohui –najari Jeso.

¹⁷Nadsapa Jeso dsedse equidi nadsa Diodsa huati tajari: –Jehe, Abi Dio ticca daniji iadsa bica tahi –najari. Nadsapa pohuadenidsa huati tajari: –Aja, tiadeni huapima dse tiquinajo. ¹⁸Ajijaropi tiadenidsa huati onajaro: Diocca cacahuehe tojanijinecca huada bacco tejeraccadsapi uva ppejene dse onapoma-jaraccahitohui –najari Jeso.



¹⁹Nahi dsotodepa pan pohua dsepedsa idi nadsa Diodsa huati tapomajari: –Jehe, Abi Dio ticca daniji iadsa bica tahi –najari. Nadsapa icanarobedsa dside jai da, dside jai da inaridsa-jari. Nadsapa Jeso huati tajari: –Ajijaropi ohuemecca ima. Ticassiejeranijinepi ohua ohuana ohua ohuaccoranijine. Nidsa ohua nohue ojiradsa naqui ohuadsa tetideni ajimamana nejera-nijine ajima titinanamana nana, onajaro. Aja pan ocanabobiridsadsa tiadenidsa da onaridsadsa tijipamanajaropi titiqueri-qquimana nadsa nema titidsanapomana nanijine, onajaro –najari.

²⁰Jipaquimanahi natti naco dsedse equidi nadsa huati tapomajari: –Ajajari dsedsecca imapi nidsa ohua odsoqquedsa ohuemene toccajaropi tiadeni huapimacca imasiri manaconi tojanijine. Najarojine aji ohuadsa pajissa tiquinadsapi ticassiejeranijine. Najaro ohuemenecca imapi Diocca marinaja dsati madijadsa tojanijine –najari Jeso.

²¹–Nadsa aji ijipaquidisa ohua ccaccorade naco ajaro huahuanaridsa ohuadsama jipade huittarihi. ²²Naraha ohuapi Madija Bedi ojajaroa nidsa odsoqquenitohui, pina Diojine maittaccadsama otedsejemacca ima najorapojarossa onanitohui. Naraha ohua ccaccoradedsa oppina tehe tojanitohui –najari Jeso.

²³Nadsapa pohuadenira huati tocanirere canadsa: –¿Nejecojarina Jeso dsoqquehijine madija dsepedenidsa inanahijine? –naridsamanajari Jeso huatimadedeni.

–¿Nejecojarina iadsa deni tojajari? –quinajari

Mateo 20.25-26; Maraco 10.42-43

²⁴Nanaja Jesocca mamari tabaqqi pohuadenira ahuaji huati ahuaji huati quinadsapa: –¿Nejecojarina iadsa deni tojajari? –quinajari. ²⁵Naraha Jeso pohuadenidsa huati tajari: –Madija ohuaha jodio quejena-jarajaridenicca tamine huapimapa dossede dacoraqquri nadsa poccadeni madija dosse dosse quiquina najari. Dodossede ohuahadeni naco deni toquejenadsapa attideni dacoradsa poccadeni madija dosse dosse nanaridsamana najari. Pohuadenidsa poccadeni madija attidenipa: “Ia acco camade tiquejenani. Iadsa bica taniccara tinanamanajaro” quinaraha maidsa maidsa quinajari. ²⁶Naraha aji ohuadsa tiquejenajaropi pina najari

taminedenissa tiquinejeraji. Aji tiadeni deni tijeje camajaropi pina dsabisso dossehdsa ibora tajarissa tadsana bica tani. Madija dossede tijadsa naqui: “Ohuana deni ojani” tejeraji. Ticca madija bijideni acco ticanabaquirdsahina bica tajaro. ²⁷Ajaro namicca madijapa “Ojipana” nadsapa pocca huihuittaridsa huittaridsa pocca medsena jijipa dsojo dsojo najari, pohua medsedecca huahuanaridsa hua inarihijine. Naraha tiadenidsa huati onajaro: ¿Nejecojarina deni tojajari? ¿Madija huihuittaridsa huittarijaripa deni tojajarico? ¿Pocca medsena deni tojajarirana? Aja huittarijarina deni tojajari. Pocca medsepa ajamani tojajari. Naraha ohuapi tiadeni Medsede ojaraha pina ticcadeni medse ojarossa najaro, tibijideni acco ocamabaquijaro. Tiadeni naqui nema tiquinana, onajaro –najari Jeso.

²⁸–Aji ohuapi ocasserani ohuadsa, madija ohuadsa ima oppina tanicca inanamanadsa naqui tiadenipi ohuadsa paji timadimanarini dsanapojaro. Ohuatimade disseraquiri tiquinajaro. ²⁹Nema najaroa aji ohua tiadenidsa onana-nijinepi pina aji occa Abi ohuadsa inanajarossa najaro. Ohuadsama tiadeni naqui madija dossede tiquejenanitohui, onajaropaji. Pina occa Abi ohuadsa huati tapojarissa najaro, ohua cadossejarissa najaro: “Nidsa madija dsama huapimacca dossede tijanitohui” napode. ³⁰Nidsa occa cacahuehe bacco tadsa huapimacca tamine ojadsa naqui tiadenipi occa huahuanari aji ohua ojipanihuaji tiadeni naqui ohuadsama tijipamanadsanaponitohui. Ticcadeni cacahuehe icca madija jodiodeni aja icca idi Isaraeri pohua bedi 12 quinajarideni potemahi tecahuabaqqi-manaridsadsapa poccadeni tamine tiquejenanitohui. Nadsama tiadenipi pohuadeni dossedecca huihuittari 12 quinajarodsa ima cattedmade jassi tinariridsa-nitohui –najari Jeso.

Pedro pohua namaidisahijine Jeso huati tapojari

Mateo 26.30-35; Maraco 14.26-31; Huano 13.36-38

³¹Jesopa Ssino Pedrodsa huati tajari: –Ssino, tibodi huatoji. Satanapa titohuideni tonacomabaqquihi. Puhuapa titohuideni Diodsa huati huati tajari, tiadeni nattome tabaqquihijine. Pina aroso jidsadsa trigo etero toccahijine

qquero huira, qquero huira quinajarissa najari ohua tinebo-mananijine tiadenidsa ocasserehe inananitohui. ³²Naraha Ssino, titohui Diodsa huati huati onajaro, ohua tinebo-geranijine. Ohuadsa epeje tanitohuiraha, otohura tapomadsapi timecotedeni aja ohuadsa jehe quinajaridenicca jeheniji todacoranjine pohuadeni acco ticanabaquijo, onajaro –najari Jeso.

³³Naraha Ssino attia: –Ohua Medsede, ohuapi nema onejeranitohui. Toponi cocorodsa tia coro idsimamanadsa naqui ohua naqui onajorani, tiadsama ohuedsanijine. Tiadsama odsoqqenijine naqui onajorani –najari.

³⁴Naraha manaco Jeso attia: –Pedro, tiadsa huati onana: Nidsa ajijaro dsome ssiajaricossanihuaji tacara huahua najara-cadsa tetti tinamaidsanitohui. Ohuadsa: “Onocco jidsa tani” tanitohui. Dsotode naqui: “Onocco jidsa tani” tapomanitohui. Dsotode naqui nema tapomanitohui –najari Jeso.

Ima oppina tanicca Jesodsa tojabote najaro

³⁵Nadsapa Jeso pocca mamari tabaqquidsa huati tajari: –Madija maride tiquejenaridsanjine tiadeni dosse onabaqqipodsa jai tijaridsade. “Ticcadeni sacco, ticcadeni dsiniro, ticcadeni sapato najari jirehe jai tijaridsaji” onadsapi ¿nejecora ticappiramanatte? –najari Jeso. Naraha pohuadeni cacomeramanajari: –Nohuerade. Icappira nehe jaijaridsa-gerade –quinajari.

³⁶Nadsapa Jeso pohuadenidsa huati tapomajari: –Naraha jidapapi occa dosseniji tahidessa nejerani. Jidapapi sacco, dsiniro ticajimanadsapi tiaccamanaji. Nadsama jadsirecca massito ticappiramanadsa naqui ticcadeni ssirini huehuedsa da tiquinadsa mitta tiquinaji. ³⁷Nadsapi otedsejemacca ima tiadenidsa huati onana: Dio Atti dsodo naponiccapi pajissa ohuadsa tojanitohui. Pohua Atti cacomerabote Isahia dsodo inaponipi ajima najaro: “Nidsa madija attidenipa: ‘Ajajaripa tabaccoraququiri najaridenidsama quejemajari’ quinahitohui” napohui nade Isahia. Najarossa najaropi ohuadsa madija attideni nama quinahitohui –najari Jeso.

³⁸Naraha pohuadeni attipa: –Ia Maride, ajidsapi jadsirecca massito capamehe icajini –quinanaja Jesopa: –Jehe, najarodsapi tipajiramanani –najari.

Jesemanihuaji Jeso Diodsa huati huati tajari

Mateo 26.36-46; Maraco 14.32-42

³⁹Nadsapa Jeso huati taha jicadsapa odsadsa toqquenadsa ssono Oribohuaji toqqemorajari. Aja pohua huajijiradsa totocca nahihuaji toccajari. Pocca mamari tabaqqi naco pohuadsa jai tojemorajari. ⁴⁰Aja pohuadeni quequeriquimana nahihuajicca ahua oribo ppa nahi dopehuaji bacco toquinadsapa pohuadenidsa huati tajari: –Jari, Diodsa huati huati tiquinaji, aji ticappinamanadsa ima tinanamana-jeranijine –najari Jeso.

⁴¹Jesopa pocca mamari tabaqqi jassi tahidsa toqqequimajari, cahuaijiquima nadsa pohua pitodsa huittadsa Diodsa huati huati tajari. ⁴²Ajama najari: –Abi, jipa tindsapi otedsejemacca ima oppina tanicca ohuadsa toja-jerana, onaraha. Madija huapimacca ima manaconi najidsohue ohuadsa tojadsapi ocasserani ohuanitohui, pina dsedse bidabote dse onanijinessa najaro. Najaro onahananijine jipera onaraha ohua jipa onanicca tohui onejerajaro. Tia jipa tinaniccana paji. Najarodsana ibora onajaro –najari Jeso.

⁴³Nanaja nahi Jeso pohua Diodsa huati huati tahihuaji Diocca dodosse memehujicca ahuatajari. Najaripa Jeso acco icamadsa inadacorajari. ⁴⁴Naraha Jeso pohua bodi ocassera canajari. Diodsa huatide todacorahi nadsapa taniccojari. Pohua taniccone toccadsa namidsa catojadsapi pina ama motarehe ssaboro ssaboro najarossa najaro.

⁴⁵Diodsa huati taha jicadsapa pocca mamari tabaqqihuaji ccanijari. Bacco nanidsapa cahadijahira qqui tajari. Bodideni oji quinajarijine tocamijireradsapa cahadijajari. ⁴⁶Naraha pohuadenidsa huati tajari: –¿Nejecotohui ticahadijajaro? Nocco tiquejenadsa Diodsa huati huati tiquinaji. Ima oppina tehe tojadsapi tijaparimanadsa ima tinanamana-jeranijine, onapa –najari Jeso.

Jeso dama quinajari

Mateo 26.47-56; Maraco 14.43-50; Huano 18.1-11

⁴⁷Jesopa huati huati naccaraha madija huapi taha bacco najonamanajari. Jodana tahidejonajari. Pahuapa Jeso pocca dodosse tabaqqi 12 quinajari ojariaraha pohuana Jesohuaji tohuajjressi, pano mose inajari. ⁴⁸Naraha Jeso attipa: –Joda,

ohuapi Madija Bedi ojajaroa ¿opano mose tajaropi aja ohuadsa huadiquiri najaridenidsa ohua teccorajaroqui? –najari.

⁴⁹Naraha aja Jeso pohua huatimadedeni attidenia: –Ia Medsede, ¿massitodsa itacaridsaco? –quinajari. ⁵⁰Nadsapa Jesocca madija ojariana dada toqquimadedenicca tamine deni tojajaricca medse huaribo nahatonihuajicca ca taneje tajo canajaro. ⁵¹Naraha Jeso attia: –¡Apajana, denima ca tejeraji! –najari. Nadsapa taminecca medse huaribo bara icanadsapa huaribo tocabiquemanijari.

⁵²Jesotohui jahijonajaridenipa aja dada toqquimade taminedeni, Diodsa dada toqquimahuajicca cacahuadedeni, ime jocohuideni quinajari. Najaridenidsa Jeso huati tajari: –¿Nejecotohui tiadenipi jadsirecca massitoma, huahuaccama jai tijajonajaro? Nema tiquina-dsapi pina bobotidetohui jai tijajonajarossa najaro. ⁵³Nadsa tiadeni-dsama huajjiradsa Diodsa dada toqquimahuaji ohoquejema naraha ohua dama tiquinehe nejerade. Naraha ohuadsa ima tinanamana-nijinepi dsidsinidsara jai tijajonajaro. Jidapapi tijinedeni Satanacca ima deni tojajaro –najari Jeso. Nadsapa Jeso dama quinajari.

Pedropa Jesodsa: –Onocco jidsa tani –najari

Mateo 26.57-58, 69-75; Maraco 14.53-54, 66-72;

Huano 18.12-18, 25-27

⁵⁴Nadsapa Jeso dama quinadsa dada toqquimadedenicca tamine deni tojajaricca odsahuaji iaccamanajari. Naraha Pedropa Jeso iaccamanahi nattideni huajima tohuanamissajari. ⁵⁵Odsadsa bacco toquinadsapa boronidsa dsippo inadsamanadsa jiade jassi nahuajanijari. Pedro naco pohuadeni-dsama huitta bacossajari. ⁵⁶Naraha najaro odsacca medse madijaroa Pedro dsippodsa huittahi qqui tadsa icattoma nadsa aja jassi nahuajanijaridenidsa huati tajaro: –Ajajaripa Jesodsa ccaccaridsa nade –najaro. ⁵⁷Naraha Pedropa pohua namaid-sajari: –Dsohuato, ohuapi pohuadsa onocco jidsa tani –najari.

⁵⁸Nahi dsotode madija ohuaha naco Pedro qqui tadsapa: –Tia naqui Jesocca madija tijani –najari. Naraha Pedropa pohua namaidsapomajari: –Ohuapi najaricca madija oja-jerani –najari.

⁵⁹Nahi dsotode maji ojaria tossoñquimadsa madija ohuaha attipa: –¡Pajissade! Ajajaripa Jeso huatimadedija. Pahuapa dsama arobeni Carireahuajicca madija jidsera tahi –najari. ⁶⁰Naraha

manaco Pedro pohuadenidsa huati tajari: –¿Nejecoma najaro imara huati huati tiquinajaro? Ohuapi najaro ima ssamo onani –najari. Pedropa najaro ima huati huati nanaja tacara huahua najari.

⁶¹Nanaja Jesopa cattahuajanihi nadsa Pedro icattoma najari. Nadsapa Pedro pohuadsa Jeso huati tapojaricca ima bodi huatomanijari: “Nidsa ajijaro dsome ssiajaricossanihuaji tacara huahua najaraccadsa tetti tinamaidsani 3 nanitohui.”

⁶²Najaro ima Pedro bodi huatomanidsapa toqqenajari. Pohua motta oji oji najari.

Jesodsa jidsa jidsa quinajari

Mateo 26.67-68; Maraco 14.65

⁶³Jeso cacahuadedenipa huadiedsa jidsa jidsa quinajari. Jeso huaccade jo narihi najari. ⁶⁴Nocco ssoque quinadsa naco pohuadsa huati toquinajari: –Jari, ¿nejecojari tia idajari? ¡Tecomerajo! –quinajari. ⁶⁵Tamassohuedsa naco tohuatti tabaccora tajarodsa itamassoquimanajari.

Jodiodenicca ima cacattemahuaji

Jeso pohua cacomerajari

Mateo 26.59-66; Maraco 14.55-64; Huano 18.19-24

⁶⁶Ssiajadsapi jodiodeni ime jocoहुuideni, dada toqqimade taminedeni, jodiodenicca marinaja maridedeni quinadsa queriqquimanajari. Nadsapa *jodiodenicca ima cacattemadedeni quequeriqquimana nahihuaji Jeso iaccamanajari. Nahihuaji huapima jai tojedsimadsa pohuadsa huati toquinajari: ⁶⁷–Cristo-Mesia tijadsapi iadsa tia tecomeraji: “Ohuapi Cristo-Mesia ojani” taji –quinajari.

Naraha Jesopa: –Tiadenidsa: “Ohuapi Cristo-Mesia ojani” onadsapi, ¿ohuadsa pajissa tiquinapadseje? Pajissa tiquinejerani nahato onaponi. ⁶⁸Manaco tecomeramananijine tiadenidsa huati onadsapi ¿tecomeramanapadseje? Tecomeramanajeranitohui –najari. ⁶⁹–Ohuapi Madija Bedi oजारoa nidsa dsotode Dio Dacorabote ohua deni tonanadsapa Pohua inori nahatonihuaji ohuittarinitohui. Nanihuaji ohuittaridsapi Abi pohua tedseje dosse dosse onanitohui –najari Jeso.

⁷⁰Naraha pohuadeni attia: –Nema tadsapi, ¿tiapi Dio Bedi tijaqui? –quinajari Jesodsa. Naraha Jeso pohua cacomerajari:

–Jehe, tiadeni ohuadsa nema tiquinajaropaji –najari. ⁷¹Nadsapa pohnadeni attia: –Jidapapi pocca ima huati toquinahijine madija ohuahatohui huahua inejerana. ¡Epeje! Pohua, pohua cacomeradsa pohua atti oppina tanicca imittanissa tani –quinajari. Nadsapa najaro imadsa dsoqquehijine najoramanajari.

Tamine Piratodsá Jeso iaccamanajari

Mateo 27.1-2, 11-14; Maraco 15.1-5; Huano 18.28-38

23 ¹Nadsapa jodiidenicca tamedeni nahidsa queriquimanajari huapimapa totehemamanadsa tamine Piratohuaji Jeso iaccamanajari. Tamine Piratopa romanodeni. Pohuapa jodiidenicca dsama cacahuade tojjari. ²Tamine Piratohuaji bacco toquinadsa pohnadsa poccadeni maidsehe huati toquinajari: –Jesojinepi ima bica tejerani, pocca ima ajima nani –quinajari. –Jeso madija inequeriquidsa mari icanabaquidsapa romanodenicca cacahuehedsa tojjperamanajari: “Iara ia ecahuana” quinajari. Pocca marinaja naqui: “Romanodenicca tamedesa ticcadeni dsiniro mota naqui paca tiquinejeraji” nanaja nahi. Nadsama pohua atti onih naqui: “Ohuapi Cristo-Mesia, ticcadeni tamine deni tojahicca ccajonahitohui quiquina najari ojani” nahi naco imittani –quinajari.



³Nadsapa Pirato Jesodsa huati tajari: –¿Tiapi jodiodenicca tamine tijaqui? –najari. –Jehe, tetti nema tajaropaji –najari Jeso.

⁴Naraha Piratopa dada toqquimade taminedenidsa, nahidsa madija queriquimanajarideni huapimadsa huati tajari: –Ajajaripa icca dsamacca marinaja inajidsoje cama-gerani. Ima oppina tanicca inana-gerani. Tettidenidsa onajidsohuijine pajira-gerani –najari Pirato. ⁵Naraha pohuadenipa denima jadsirema johua johua quinajari: –Ajajari madija mari mari naridsadsapa pohuajine mohuaniji tojaridsani. Dsama Carireahuaji mari mari napojari, nahi dsotode naco aji icca dsama Jodeahuaji mari mari naridsadsapa ajadsa bacco najonajari –quinajari.

⁶Madija attideni: “Dsama Carireahuaji mari mari napojari” quinahi mittadsapa Pirato attia: –¿Ajajaripa Carireaccaco? –najari. ⁷Nadsapa jehe quinahi mittadsapa tamine Herodehuaji Jeso iaccamanahijine dosse inajari. Herodepa Carireahuajicca cacahuaderaha Jerosaredsa huada pamehe madicajari. Nadsapa Herodehuaji Jeso iaccamanajari.

Tamine Herodedsa Jeso iaquedsimamanajari

⁸Tamine Herodehuaji Jeso iaquedsimamanajari. Aja Herodepa tahide Jeso tahimari mimitta napodsapa: “Jeso qqui onaccaraho” nanaja najari. Nadsapa pohuahuaji Jeso iaquedsimamanahi qqui tadsapa huatidsejari. “Jehe, jidapanana pohua canahatori canahi qqui onanitohuia” najari. ⁹Nadsapa Herode Jesocca ima mittahijine pohuadsa huati huati dsanaporaha Jesopa pohua cacoma najari. ¹⁰Naraha nahihuaji naco dada toqquimade taminedeni, jodiodenicca marinaja maridedeni tedsejepa dissassera tadsa ima onihi, ima onihi huati toquinadsapa: –¡Jesopa tabaccora tahi! ¡Tinajidsojo, tinajidsojo! –quinajari. ¹¹Nadsapa Herode pocca soldadodeni tedseje Jeso momohua inanamanajari. Jesodsa maidsamanadsapa etero bica taniccadsa inehedsamanajari. Pina taminessa inanamanadsa pohuadsa jidsa jidsa quinajari. Nadsapa Herodepa tamine Piratohuaji Jeso dosse inanipomajari. ¹²Tahidepa Herode Pirato tedseje ahuaji jipera ahuaji jipera quinapojari, naraha Jeso ahuaji dosse, ahuaji dosse quinadsapa najaro huadadsa cajonerajari.

–Jeso dsoqquehi bica tahi –quinajari

Mateo 27.15-26; Maraco 15.6-15; Huano 18.39-19.16

¹³Nadsapa tamine Piratopa dada toqquimade taminedeni, jodiodeni ime jocohuideni, madija ohuahadeni naco huahua inajonabaqquidsa queriqquijonajari. ¹⁴Nadsapa pohnadenidsa huati tajari: –Aja Jeso ohuadsa teccajonamanapodsapa tetti-denipi: “Pohuajine mohuaniji tojaridsani” tiquinaraha tiadeni tinocodenidsa pohnadsa huati onapa. Pocca ima omittadsapi pina tettidenissa nejerani. Pohnadsapi ima nohuerani –najari. ¹⁵–Tamine Herode naco pocca ima mittaraha pocca ima tabaccora tanicca nohueradsa ohuahhuaji dosse inanipomajari. Aja Jesopa ima tabaccora tanicca inana-jeradsapi pohnapa dsoqquehijine bica tejerani. ¹⁶Nama nadsapa pina ocadosse-baqquidsa cossi inaquimanaha jicadsapa dosse onanina, toccanihijine –najari tamine Pirato.

¹⁷⁻¹⁸Naraha Pirato: “Jeso toccanihijine” nahi mittamana-dsapa madija huapima johuahua johuahua canajari: –¡Najaripa dsoqquena! ¡Aja coro todsimapojarí Barabana tijine qqenajo! –quinajari. [Aja huajano huajjiradsa ejete Pascoa tojadsapi Piratojine toponi cocorodsa madija huedsamanajari ojaría qqe-qquena najari.] ¹⁹Naraha Baraba pohnajinena odsa panani Jerosaredsa madija inequeriqquidsa romanodenidsa mohua mohua quinadsa coro idsimamanajari. Pohnajine naco madija dsoqquejari.

²⁰Piratopa Jeso tappa inahijine tohuini nadsa madija huapimadsa huati tapomajari: –Jeso apaja onanana. Pohnadsapi ima nohuerani –najari. ²¹Naraha pohnadenipa jadsirema johuahua johuahua canapomajari: –¡Ahua porimacossanidsa dsoqquena, dsoqquena! –quinajari.

²²Naraha Pirato pohnadenidsa huati tapomajari: –¿Naraha nejecotohui dsoqquehijine? ¿Nejeco imara inanajaro? Jesocca ima omittadsapi imari tabaccora tanicca nohuerani. Pohna inanadsoqquehijinepa bica tajarahi. Jesopa pina ocadosse-baqquidsa cossi inaquimanadsapa apaja onanadsa toccanihijine, onajaro –najari Pirato.

²³Naraha madijadenipa Jeso ahua porimacossanidsa dsoqquehijine tohuini quinadsapa dissassera tadsa denima johuahua johuahua canapomajari. Nama dsanapomanadsapa

pohuadenina deni toquejenajari. ²⁴Nadsapa Piratopa pohuadeni attidsa jehe najari. ²⁵Madija Baraba qquenahijine jipacquiri nadsapa Piratojine qquenajari. Aja Barabapa madija inequeriqquidsa romanodenidsa mohua mohua naridsamanadsa coro todsimajari. Puhuapa madija ijine ahuahiraha ijinedeni qquenajari. Naraha Jesona dsoqquehijine pohuadenidsa eccorajari. Pina pohuadsa huati toquinapojarissa inananijine Jeso dsoqquehijine icadossebaquijari.


Jeso ahua porimacossanidsa coba idsanamanajari

Mateo 27.32-44; Maraco 15.21-32; Huano 19.17-27

²⁶Soldadodenipa Jeso iaccamananaja dsama Sirenecca madija Ssinopa huidsajahuaji ccanidsa bacco ijidsamanajari. Jeso ahua porimacossani dsojo inaraha ja tojadsa soldadodenipa Ssino dama ijidsamanadsa icadossemanajari: –Manaco tia ajararicca ahua porimacossani dsojo tinaji –quinajari. Nadsapa ahua porimacossani Ssino johuidsa ibarimanadsa Jeso natti dsojo inamissajaro.

²⁷Madija huapi taha Jeso natti jai tojajari. Amoneje naqui nani toquejemamanajarodeni Jesotohui oji oji dsanapomanajaro, jadsirema johua johua dsanapomanajaro. ²⁸Naraha Jesopa ponidenihuaji qqui nanidsa huati tajari: –Aji Jerosarecca amoneje tiadenipi otohui oji oji tiquinejeraji. Aji tiadeni titohuideni, aji ticcadeni ejedenitohuira oji oji tiquinana –najari.

²⁹–Aji otohui oji oji tiquinajaropi nidsaranibote aji Jerosaredsa ima oppina tanicca bacco nadsa nanidsana pina aji otohui oji oji tiquinajarossa tiquinanitohui. Najaro huada bacco tadsapi madijapa ajama quinahitohui: “Amoneje ccaranipi bicani ahuanani ojimana-jerani. Ejedeni cappiramanajarojine ojimana-jerajaro. Ponideni dsojorinidsa ejedeni tomide nohue quirajaro naqui ojimana-jerajaro” quiquina nahitohui. ³⁰Ima oppina tani bacco nadsa madijapa cappinamanadsa ajama quinahitohui: “Jaho, ssono imeni dequerajaro iahuaji cojo narona-ccaraho, bodi iquejenadsapi nani oppina tanicca qqui inejarianijine” quinahitohui. ³¹Aji ohuapi imasiri onana-jeraraha ohua inajidsomanajaro. Naraha aja Jerosarehuaji madimanajarideni imasiridsa disseraquiri nadsapa najidsohue pohuadenidsa denima oppina tanitohui –najari Jeso.



³² Madija pamaha naco Jesodsama topamajonahijine iaccabaqqi-manajari. Pohuadenipa botijideraja, madija inanadsoqquemana najarideni. ³³ Ssono “Totati Tonanissa nani” quiquina nahihuaji bacco tomoramanadsapa ahua porimacossanidsa que tahijine Jeso coba idsanamanajari. Coba idsanamanaha jicadsapa acca icanamacossamanajari. Aja botijideraja, madija inanadsoqquemana najarideni naco coba idsanamanaridsajari. Ahua porimacossani onihidsa, onihidsa naridsamanajari. Ohuahapa Jeso que tahi inori nahatoni-huaji, ohuahapa Jeso que tahi inori ssamohuaji quinajari.

³⁴ [Nadsapa Jeso Imehidsa huati tajari: –Abi, pohuadenipa ohuadsa ssamoqqiri nadsa ohua inanadsoqqueமானaraha epejena. Aji ocasserani ohujaro manaconipi pohuadenidsa tinana-jerana, onajaro –najari Jeso.]

Nadsapa soldadodeni Jesocca eterotohui siba bedenidsa coro coro quinajari; –¿Pocca etero nejecjaridsana tojanijine? –quinadsa. Najaro sibadsa ittomemanadsapa pocca etero pohuadenidsa ojari ojari naridsajaro. ³⁵ Madija huapima nahidsa cattade domo huajari. Taminedeni naco nahidsa cattade

domo huadsa attideni tabaccora tadsa Jesodsa jidsadsa jidsadsa canajari: –Ajana, madija ohuaha inassiajabacquiraha jidapanana pohua tonassiajana. Pajissa Diocca Cattaniji Cristo-Mesia tojadsapa nama nahi qqui inana. Nahato taranaja –quinajari.

³⁶Soldadodeni naco Jesodsa jidsadsa jidsadsa canajari.

Nadsapa jai tojessidsa uva ppejene ssicata, bidada najari Jeso dse nahijine da icanamacossamanajari, “Pohua comene ojidsama nanijine” quinadsa. ³⁷Attideni onihi naqui: –Tiapi jodiodenicca tamine tijadsapi tia tinassiajaji –quinajari.

³⁸Jeso tati tetepihuaji naqui dsodo nani coba idsanamanajaro. Najaro dsodo nanipi: “Ajajaripa Jodiodenicca Tamine” najaro.

³⁹Naraha botijidederaja, madija inanadsoquemanajari Jeso inoridsa cobaba dsanajari ojaría Jesodsa atti tabaccora tadsa jidsa jidsa najari: –Tiapi Cristo tijadsapi tia tinassiajaji. Ia naqui ia tinassiajabacquiji –najari. ⁴⁰Naraha aja coba dsanajari ohuaha attia: –¡Paji, nema tejeraji! ¿Diodsa ticappina-jerarorane? Tia naqui ahua porimacossanidsa coba dsanahi tijaraha ¿nejecotohui tetti nema tajaro? ⁴¹Aji iapi ponima ocasserani ejerani. Inajidsojarojine ocasserani ejaro. Naraha ajari maquidejepa najidso-jararaha ocasserani ahujari –najari. ⁴²Nadsapa Jesodsa huati tajari: –Jeso, ticca cacahuehuaji bacco tinadsa ohuadsa teti huato nana –najari. ⁴³Manaco Jeso pohuadsa huati tajari: –Aji jidapana ohuadsama occa Abi Dio madihihuaji timadinijine –najari.

Jeso huatiajari

Mateo 27.45-56; Maraco 15.33-41; Huano 19.28-30

⁴⁴Maji itetepi tojadsa dsama nema nehe todsidsini najaro. Dsidsi dsanapojaropi maji 3 bacco tajaro. ⁴⁵Maji todsidsidsapa Diodsa dada toquima odsa imeni bodihuajicca huahuacossa etero sibabotepi Djoline sseo naronajaro, carobe najaro. ⁴⁶Maji najarissa nadsa ssonohuaji Jesopa jadsirema huati tajari: –Abi, ticca cacahuehedsa ojapomanijine, onajaro –nadsapa Jeso huatiajari.

⁴⁷Nadsapa soldado tamine Jeso cacahuadepa dsama todsidsini nani qqui, Jeso huatiahi qqui tadsapa: –¡Dio bica tahi, deni tojahi! –najari. Pohua attipa: –Pajissa, ajajari maquidejepa bica tahi, ima cappirajari –najari.

⁴⁸Nadsapa madija huapima Jeso cattade domo huajari-denipa maji todsidsihi qqui, Jeso huatiahi qqui toquinadsapa

cappinamanadsa domo toccanijari. Pohnuadenni bacco huaccacca huaccacca tocananijari: –¡Jaho, icca dsamadsa ijine bica tejerani, bica tejerani! –tanimanajari. ⁴⁹Naraha aja Jesodsa huatidenni huanaquuri najaridenipa huaji tanidsa domo huajari. Jeso coba idsanamanahicca ima huapima qqui toquinajari. Amonejedenni naqui pohnuadenidsama qquide domoni huajaro. Najarodenipi Jeso Carireadsa ccaridsapodsa pohnuadsa jahiridsajaroa Jeso pohnuadsa Jerosarehuaji jai jonajaro.

Jeso ppa idsamanajari

Mateo 27.57-61; Maraco 15.42-47; Huano 19.38-42

⁵⁰⁻⁵¹Nahidsapa madija bicabote madijari. Pohnua onipa Dsodse, dsama Jodeacca odsa panani Arimateahuajicca madija. Pohnuapa Diocca dosseniji inapajiranissa, pocca ima toccanissa tajaro. Dsodsepa Diocca cacahuehetohui naco najoraha madijari. Pohnuapa jodiodenicca ima cacattemadedeni ojaria. Pohnua tesses ima cacattemadedeni: “Jeso dsoqquena” quinaraha pohnuapa jehe najarajari. Pohnua tessedeni Jeso inajidsomanadsa naco najidsode jipera tajari.

⁵²Dsodsepa Jeso assire ppa idsahijine tamine Piratohuaji huatide toccajari. Bacco tadsapa Piratodsa huati tajari: –Jeso assire ppa odsahijine ¿jehe taqui? –najari. ⁵³Nadsapa Pirato jehe nadsa Dsodse nahi Jeso coba dsanaha que tahihuaji tocanajoranijari, Jeso assire dicca inadsa etero dsojorani onini linodsa jore inaquijari. Jore inaquia jicadsapa tonoccobirihuaji dsojo inajari. Najaro tonoccobiripi sibadsa hui todsimajaro. Nahidsapa madija dsoqquehi podsa-jaraccahi. Najarodsa Jeso ibedsajari. ⁵⁴Najaro huada viernepi jodiodenipa poccadenni jassinajacca huada sabadotohui najoramana-jari. Najaro jassinajapi dsomeme nadsa bacco bacco tajaro.

⁵⁵Aji amoneje Jeso pohnuadsa Carireahuaji jahijonajarodenipi Jeso assire tonoccobirihuaji Dsodse dsojo inadsapa ponidenni naqui nani jai tojajaro. Jai tojamissadsapi tonoccobiridsa Jeso assire ibedsahi qqui toquinajaro. ⁵⁶Nadsapi odsahuaji jai tojanidsa majajo majoni bica tajaro, ahua majiconi majoni bica tajaro najoramana-jaro. Pina jodiodenni poccadenni madija dsoqquejari assiredsas inamaromanajari, huira inamaromanajarissa inamananijine najoramana-jaro. Nadsapi jassinajacca huada tojadsapi jassi quina-jaro, pina Moisesicca marinajassa inamanana-jaro.

Jeso nahatonijari

Mateo 28.1-10; Maraco 16.1-8; Huano 20.1-10

24 ¹Amonejedenipi sabadodsa jassi quinadsapi domingo dsidsidsamassana Jeso noccobirihuaji qquide jai tojanipomajaro. Ahua majiconi majoni bica tajaro najoramanapoje najaro iaccamanajaro. ²Bacco toquinadsapi qqi toquinaneje tonoccobiripi tohuabeje najaro. Siba imenipi pajimaranihuajina huitteje najaro. ³Nadsa jai tojedsimadsa qqi toquinaraha Jeso assirepa podsa najarajari. ⁴Nadsapi jabojo manadsa: –¿Nejecoma najari? –quinajaro. Nanaja madija pamaha eterorideni ssiaja tajaro ponideni inorinidsa ahuatomamanajari. ⁵Nadsapi cappinamananissa tadsa



ponideni pitonidsa jassi, tocattedsamana, namidsa assarini-
deni bacco tajaro. Najarideni pamaha ponidenidsa huati toqui-
najari: –¿Nejecotohui Jeso qquide ahuaji jai tijajonajaro? Paja
dsoqquemanarihi najaridenina pohuadeni noccobiridsa pods-
mana tahi. Naraha Jesopa camittemanidsa madihi –quinajari.
⁶–Tibodideni huatomaniji. Dsama arobeni Carireahuaji timadi-
manapods tiadenidsa pocca ima huati huati nanaja napode.
⁷Pohua attipa: “Ohuapi Madija Bedi ojajaroa nidsa dsotode
madija ojaria ohua ccaccoradsapa imasiri ssequiri najarideni
dsepedsa ojanitohui. Ahua porimacossanidsa ohua inana-
dsoqquemananitohui. Ohua ppa idsamanaraha huada 3 nadsa
onahatoninitohui” napode pohua atti –quinajari.

⁸Nadsapi Jeso atti bodinideni huatomamanajaro.
⁹Tonoccobirihuaji jahinidsa odsahuaji bacco nanimanadsapi
Jesocca dodosse tabaqqi 11 quinajaridenidsa ima huati toqui-
najaro. Jesocca madija motadenidsa naqui huati naridsamana-
jaro. ¹⁰Ponideni oninipi Maria Madarenahuajicca, Dsohuana,
Maria Satiaco imeni quinajaro. Amoneje onihideni naqui
ponidenidsama quejemamanajaro. ¹¹Naraha Jesocca dodosse
tabaqqi ima mittamanadsapa pohuadenidsa jidsa tajaro, pina
ponideni bodini tossamojarossa najaro. Ponideni attinidsa
pajissa quina-jarajari.

¹²Naraha Pedropa nama naha Jeso noccobirihuaji joppa
tajari. Bacco tadsapa tonoccobiri bodihuaji tocattedsima nanaja
Jeso assire jojore naqqi eteroa podseje nanira qqui tajari.
Nadsapa Pedro pocca odsahuaji bodi huatohua toccanijari.

Emao jahuidsa

Maraco 16.12-13

¹³Najaro ssiajadsa Jeso huatimadedeni pamaha odsa
capamema najaro onini Emaohuaji tohuedajari. Aji Jerosaredsa
maji 3'dsa ijoppemadsapi maji 6'dsa babacco Emaopi. ¹⁴Nadsapa
najarideni pamaha najaro jahui tohuedajaria Jeso tahimari
huahuatiti dsanapojari, aji ima huapima mittamanajari, aja
pohuadeni qqui toquinajaricca ima huahuatiti dsanapojari.

¹⁵Jahuidsa ahuaji huati, ahuaji huati dsanapomananaja
Jeso naco pohuadenidsa bacco tadsapa huapima jai tojajari.

¹⁶Najaripa Jeso pohuaraha pohuadsa noccodeni jidsa tajari.

¹⁷Nadsapa Jeso pohuadenidsa huati tajari: –¿Nejeco imara ahuaji huati, ahuaji huati tidsanapomanajaro jahui motta? –najari. Nadsapa ba nanaja panodeni todsahi najari.

¹⁸Najari madija pamajarideni ojaría onipa Cleopa pohuana Jesodsa huati tajari: –Tia naqui Jerosarehuaji Pascoacca ejetetohui timadiraha ¿ima dsati ssamo tinajaroqui? Aji Jerosarecca ima dsati huapima nahatoqquri inaraha ¿tiaha ssamo tinani ojari tajarorane? –najari.

¹⁹–Naraha imapi ¿nejecoma najaro? –najari Jeso. Naraha Cleopa pohua tesse tedseje huati toquinajari: –Jeso Nasarethiuhajicca pohuadsa ima inanamanajaro tahimarinipi ajima najaro. Pohuapa Dio Atti cacomerajiderabote. Diocca dacorehejine pocca marinaja bica tajaro. Diocca dacorehejine canahatori canaridsajari naco bica tajari. Madija huapimadsa, Diodsa naco pocca ima bica tade. ²⁰Naraha dada toqqumade taminedeni, ia jodiodeni icca taminedeni quinadsa Jeso dsoqquehijine romanodenidsa da quinajari. Pohuadenina idsahuamanahi dsotodepa ahua porimacossanidsa coba idsanamadsa inanadsoquemanajari. Nama inanamanade. ²¹Naraha Isaraeri potemahi jodiodeni iapi icca dsamadsa iara imadinijine aja Jeso pohuajinena icca cacahuehe tojapomanijine inajaro ibodidsa. Naraha pohua huatiahicca huadapi jidapapi huadari 3 nani. ²²Naraha iadsa amoneje queriqqui-manajarodenijine ijabojo najaro. Ponidenipi ssiajaricossadsa Jeso cahuahihuaji jai tojajaro. ²³Naraha pohua assire qqui quina-jarahi. Nadsama amonejedenipi jahinidsa huati nanimanajaro: “Diocca dodosse tabaqqi memehujicca qqui inabaqquipa. Iadsa attidenipa: ‘Jesopa nahatonihí’ quinapaja” quinajaro. ²⁴Nadsapa itesse pamaha tohuedajari, Jeso cahuahihuaji. Pohuadeni naco pina aji amoneje ponideni attinidenissa nehe qqui toquinaraha Jesopa qqui quina-jarahi –quinajari Cleopadeni.

²⁵Nadsapa Jeso huati tajari: –¡A, tiadenipi ssamomo tinajaro! Dio Atti cacomeraqquri najaridenicca marinaja dsodo quineje najonaponi najaro nema nehe Dio Atti dsodo nanidsa dsodo napojaro titimittamana naraha ¿nejeco-tohui pajissa tiquinanijine tibodideni najoqquri nani? ²⁶Dio Atti dsodo nanidsa ajijaro ima ahuaato tajaro: Najaroa aji madija Tonassiajade Cristo-Mesiatohui imadijaro ocasserani

ahuahitohui, madijacca tabaccorehe manaconi tojahijine. Ocasserani ahua-jaradsa dsoqqe-jaradsapa Diocca deni tojehe pohuadsa ahuato-jeranitohuiraha. Pajissa najidsohue imeni ocasserani ahuadsa dsoqqedsapa nahatonidsa Imehihuaji toccamacossanjari. Nadsapa pocca Abi Dio pocca deni tojehe pohuadsa inanajaro –najari Jeso.

²⁷Nadsapa Dio Atti dsodo naponicca pohuadeni bodi huatomamanahijine mari icanabaquijari Jeso. Tahidepa Moisesicca marinajadsa Cristo-Mesia tahimari dsodo nanidsa Jeso pohua tahimari pohuadeni mari icanabaquijari. Dio Atti cacomeraquuri najaridenijine pohua tahimari dsodo najona-manajaricca dsodoniji naqui mari icanabaquijari.

²⁸Odsa capamema najaro Emao bacco toquinadsa Cleopadenidsa Jeso attipa: –Jehe, ajidsa tibomanaji. Ohuapi denima occani –najari. Pohua atti nama nadsapa tosso-nqqumahitohuiraha ²⁹Cleopadenipa Jeso pohuatohui quinadsa pohuadsa huati toquinajari: –Iadsa tiboccaji. Maji tocchahi, dsomebote nani –quinajari.

Nadsapa pohuadenidsa ibojari Jeso. Pohuadenidsama odsadsa toqqedsimajari. ³⁰Nadsapa jipamanahijine jassi taridsa Jeso pan ididsa Diodsa huati tajari: –Jehe, Abi Dio, tiadsa etidsejaro. Ticca daniji iadsa bica tinanajari, injaro –najari. Icanarobedsa pohuadenidsa da inaridsajari. ³¹Nanaja noccodenidsa jidsera nadsana qqui toquinajari Jeso pohua. Naraha amadsati amossi najari. ³²Nadsapa pohuadenira huati tocanirejari: –¿Nejecotohui pohuapa jahuidsas qqui inajonaraha inocco jidsa tapa? Iadsa huati huati najonadsa Dio Atti dsodo nani ia mari tocanabaquidsa ibodi etidsepa –quinajari.

³³Nadsapa huassinaja totehemamanadsa tohuedanijari Jerosarehuaji. Bacco tanimanadsapa Jesocca dodosse tabaqqi 11 quinajarideni pohuadeni tesse tedseje queriqquimana-hihuaji tohuededsimajari. ³⁴Queriqquimanajaridenipa aja huededsimajaridenidsa huati toquinapojari: –¡Jesopa pajissa nahatonijari! Ssino attipa: “Qqui onahi” napa –quinajari.

³⁵Manaco Emaohuaji tohuedajarideni poccadeni ima huati nanimanajari. Aja jahuidsas Jeso pohuadenidsa huati huati dsanapojaricca ima huati, odsadsa Jeso pan icanarobedsa pohuadenidsa da inaridsadsa noccodeni jidsera najari naco huati toquinajari.

Jesopa pocca mamari tabaqqidsa ahuatomajari

Mateo 28.16-20; Maraco 16.14-18; Huano 20.19-23

³⁶Aja Jeso qqui toquinajaricca ima imahaha canaraha nahi nocconidsa Jeso ahuatomajari. Pohuadenidsa: –Nija, ticappinamana-jeraji. Diocca biquehera tiadenidsa tojana –najari Jeso.

³⁷Naraha jabojojanadsa bodidenipa: “¡Corime itidija!” quinadsa cappinamanajari. ³⁸Naraha Jeso pohuadenidsa huati tajari: –¿Nejecotohui ticappinamanajaro? ¿Nejecotohui tibodideni tossamojaro, pina ohuadsa pajissa tiquirani naha? –najari. ³⁹–Jari, ohuamori qqui, odsepe qqui tiquinaji. Ohuapi ohua. Ohueme bara tiquinaji; nadsana nahatoto tinanijine. Aji icorimepi ime cappira, tone cappira nahi naraha ohuapi ohueme ocaji, otone ocaji nani qqui tiquinani –najari Jeso.

⁴⁰Nadsapa pohua dsepe nohue, pohua amori nohue najari.

⁴¹Nadsapa huatidsemanaraha pohuadeni bodipa: “¿Pajissa, Jeso nahatonijarico?” quinajari. Nadsapa nahatoqqiri nahijine Jeso pohuadenidsa huati tajari: –¿Ajidsa ojipanijine ticajimanaqui? –najari.

⁴²⁻⁴³Nadsapa pohuadsa aba ibanahi bobi da quinadsa pohuadeni dsepecca ididsapa cattomama canaraha jipajari.

⁴⁴Nadsapa pohuadenidsa huati tajari: –Aji ima ohuadsa tojararopi pina tiadenidsa occaridsaponi huati onapojarossa najaro tojajaro. Najaropi Dio Atti dsodo naponiccassa najaro. Aji Moisesi otahimari dsodo inapojaropi najarossa najaro. Dio Atti cacomerarquiri najarideni naco otahimari dsodo quinapojari. Ajie jijiridedeni naco otahimari dsodo quinapojari. Najaro huapimapi maittaccadsama dsodo quinaja najonapohui najari. Najarossa najaro Djojine ohuadsa tojajaro –najari Jeso.

⁴⁵Nadsapa Dio Atti dsodo naponicca mittamanahissa tahijine bodideni acco icamabaquijari. ⁴⁶Pohua atti naco: –Jehe, Dio Atti dsodo naponiccadsapi otahimari anini. Najaroa aji Diocca Cattaniji madija Idinide Cristo-Mesia quiquina najari ccajonadsapa ocasserani imeni inahananitohui. Madija inanadsoquemanadsa ppa idsamanaraha huada 3 nadsa nahatonihitohui. ⁴⁷Najaro pohua tahimari ecomeraridsamanadsapi madija bodideni cacajiquimera-manahijine naco huati toquinahitohui. Nadsapa madija

pohuadeni bodi cacajiquimeramanadsa: “Occa imasiri onebona” quinadsapa Dio poccadeni imasiri epeje inana-nitohui. Najaro ima bicanipi madija huapima mittaridsa-manahijine Cristo-Mesiapa pocca dodosse tabaqqi mari naridsamanahijine dosse inaridsabaqquihitohui. Tahidepa Jerosaredsa mari icanabaqquimanahitohui, dsotodepa dsama huapimadsa maride jai tojaridsahitohui. Najari Cristo-Mesiapa ohua. Otahimari maridepa ohua occa madija dosse onabaqquihijine –najari Jeso. ⁴⁸–Nadsama tiadeni occa dodosse tabaqqi tiquejenaropi ohua Cristo-Mesia ojani nahatoqquri tiquinani. Odsosqueraha onahatonini pajjissa tinoccodenidsa qqui tiquinajaro. Nema nadsapi otahimari tecomeraridsamanaji. ⁴⁹Naraha tahidepi Jerosaredsa timadimanaccaji. Nidsa tiadenidsa occa Abi Dio huati tapojarissa najari dosse onaronahitohui. Najari Dio Corimena tiadenidsa tojaridsahitohui. Puhuapa Dio memehuaji madijaricca dacorehe tibodidenidsa inanaridsanitohui. Nadsana otahimari mari taridsamananijine –najari Jeso.

Jeso toccamacossanijari

Maraco 16.19-20; Tahimarideni 1.9-11

⁵⁰Nadsapa Jeso pohua huatimadedeni odsa pananidsa iaqquenabaqquijari. Odsa capamema najaro onini Betania tohuajiranidsa domo huajari. Nahidsa pohua huatimadedenitohui pocca Abi Diodsa huati tajari. Pohua dsepe memehuaji da tamacossadsa: –Jehe, Abi Dio, ajararideni tecahua-baqquijo. Ticca biquehe pohuadenidsa tinanaridsaji –najari. ⁵¹Diodsa huati huati tanaja toccamacossanijari. Pocca Abi Dio memehuaji iaccamacossanijari. ⁵²Nadsapa pohua huatimadedeni attidenipa: –¡A, Jesopa bica tahi! ¡Deni tojahi! –quina-jari. Nadsapa Jerosarehuaji huatidsemaneri tanimanajari. ⁵³Huajjiradsa Diodsa dada toqquimahuaji quequeriquimana dsanapojari. Diodsa huatidsemanadsa jiri jiri quinajari. Pohua Atti mimittamana najari, Pahuadsa huati huati dsadsanapomana najari.

Huanopa Jesocristo tahimari dsodo inajaro

Juan

Introducción: Huanopa Zebedeo bedi, Carireacca madija. Pohnuapa aba cocorode tojaporaha Jeso pohnuadsa huahua nadsapa pocca dodosse tojajari. Pohnuapa Huano Baotista jarahi.

Huano Jeso tahimari dsodo inajaropi madija Jesodsa: –Pajissa, Jesopa Dio Bedi –quinahijine. Pocca dsodonijipi: Jesopa Dio Atti, pohnua naco Dio, najaro. Jesopa pina edede cacahuadessa najari, pina jahuissa najari Diodsa bacco inanijine. Jesopa Dio Corime iadsa dosse inaronahitohui huati tajari dsodo inajaro.

Ajajari Huanopa dsotode Jesodsa jehe quinajaridenidsa ima teppe 3 nehe dsodo inajaro. Najaropi Huanocca ima teppe tahidecca, dsotodecca, dsotodemanicca inajaro (1, 2, 3 Juan).

Dsotode jadahi tocajadsa naco Dio Corimejine pohnuadsa ahuato inanajarocca ima dsodo inajaro. Najaropi Apocalipsis.

Huanopa Jeso tahimari dsodo inajaro

- 1.1-18 Jesopa Dio Attiraha madija tojajari
- 1.19-34 Jesopa pina Edede Bedissa najari
- 1.35-42 Jesocca mamari tabaqqi tahidecca
- 3.1-15 Nicodemopa dsome Jesodsa cahuajajari
- 3.16-21 Diopa madijadsa huati cahanari canajari
- 3.22-36 Huanopa Jesocca ima ecomerapomajaro
- 10.1-18 Jesopa edede cacahuade bicahi

Pascoacca jipaquiedsa Jeso huati huati tajari

- 13.1-17 Jeso pohnua huatimade amorideni ssahua inabaqqijari
- 14.1-11 Jesopa: –Jahui ojani. Ojineni Abidsa bacco bacco toquinahijine –najari
- 14.12-26 –Nohue ojiradsa naqui tiadenidsa ima bicani da da onanitohui –najari Jeso
- 14.27-31 –Occanibote nani, dacoco tijiraji –najari
- 15.1-8 Ppa nahi uva ede tahimari
- 15.9-17 Jeso pocca mamari tabaqqidsa: –Otededeni –najari
- 15.18-27 Madijapa Jesodsa huattajojo tajari
- 16.1-4 Jeso huatimadedeni tedsejemadenicca ima huati tapojari

- 16.5-15 –Dio Corime ccaronahitohui –najari
 16.16-24 Poccadeni ojiepi huatidsehe tojanitohui
 16.25-33 Jesopa ajijaro dsamacca imadsa deni tojajari
 17.1-5 Jeso pocca Abidsa huati tajari
 17.6-19 Jeso pohua huatimadedenitohui Diodsa huati tajari
 17.20-26 Pahuadsa pajissa quinajaridenitohui Diodsa huati tajari
-

Jesopa Dio Attiraha madija tojajari

1 ¹Jesopa tahide ajijaro nami nahato-jeraccadsama nadsama madipojari. Pahuapa Dio Atti. Pahuapa Diodsa madipojari. Pohua naco Dio. ²Nami nahato-jeraccadsama Jesopa Diodsa madiridsapojari. ³Nadsama aji huapima tojaridsajaropi Jesona inaridsajaro. Jeso nohueradsapa nahissa aja namicca huapima tojaridsa-jaranaja. ⁴Nadsama Jeso pahuapa camittehe jinede. Najaricca camittehena madijadsa ssiajani tojaridsajaro. ⁵Najaro ssiajanina dsidsinihuaji jororo canadsa tossiaja-baqquijaro. Nadsama dsidsinipi Jeso ssiejene inadidsinijinepi ssamo tani.

⁶⁻⁷Maquideje onipa Huano. Pahuadsa: Baotista, quiquina najari. (Ettidsapi: Totopade, inajaro.) Pahuana Dio icadossedsa: –Jesona ssiajani jinede –naridsahijine. Nama naridsadsa ssiajani jinede Jesodsa pajissa quinahijine. ⁸Huanopa ssiajani jinede jarahi. Pahuapa ssiajani jinedecca ima cacomerade madijari. ⁹Ssiajani pajissehepi aji namihuaji bacco naronajaro. Najaro ssiajanina madija huapimadsa tojaridsajaro.

¹⁰Ssiajani jinedea aja namidsa ccaronadsa madijaripaja. Aja huapima cajiridsajaripa pahuana inahatoridsajari. Naraha madijapa pahuadsa noccodeni jidsaquiri najari. ¹¹Pocca madijadsa bacco naraha pahuadsa jiperaquiri najari. ¹²Naraha madija Jesodsa pajissa nadsa: –Jeso ohuadsa tojana –nadsapa najaridsana Dio huati huati tajari: –Occa ejedeni tijajaro bica tani –nanaja najari. ¹³Madija Diocca ejedeni toquejenahijinecca imapi pina madija tossonajaricca imassa nejerani. Pina maquideje amoneje tohuini nadsa inajadsa ejedeni dsati tossonajaricca imassa nejerani. Naraha Djijine pocca ejedeni toquejenajaripa Dio pahuajinena bodideni dsati totoja najaro.

¹⁴Dio Attiraha assire tojadsapa Jeso iadsa madijaripaja. Pocca nahatonijipi bicabote deni tojani qqui inade. Nadsama pocca nahatohuepi ojariana nahato tajari. Abi Dio Bedina ojarihi. Puhuapa huati huana tadsa ia todini-baqquijari; pohuapa pajissehe jinede. ¹⁵Nadsama aja Huanopa Jeso tahimari ecomera-ridsajaropi: –Najari tahimaria huati onapojarode: Ohua mari mari onaporaha aja dsotode mari mari najarina deni tojajari. Puhuapa nadsama madipojari, ohona napode –nade Huano atti.

¹⁶Nadsama Pocca Biquehepi pohuajine iadsa huapi tehe tojeje-dsanaponi najaro. ¹⁷Nadsama maittaccadsama *Moisesipa Diocca marinaja huati huati tapojari, najaro marinaja huarijonania aji iadsa bacco najaropaji. Nadsama jidapapa Diocca Cattaniji Jesona Diocca tohuati huanehe, pocca pajissehe iadsa ahuato inanajaro-paji. ¹⁸Nadsama madija iapi Dio qqui taja cama-jarahi. Puhua Bedi ohojaridena Dio tahimari nahato tajari. Puhuapa Abi Dio pohua bonoccorija najari. Najarijinea Abi pohuadsa nahatoto inajaro.

Huano Baotista Jeso tahimari ecomerapojaro

¹⁹Nadsapa odsa panani Jerosarecca jodio tamedeni attidenipa: –¿Huanopa aja tohui imadijaro ia Idinide Cristo-Mesiaco? –quinadsa *Diodsa dada toqqumade, pohuadeni biji accode *rehuitadeni tedseje huahua inabaquimanajari. Nadsapa pohuadenidsa: –Huano madihihuaji jai tijaji, pohuadsa huati tiquinadsa: “Tiapi, ¿nejecojari tijani?” tiquinana –quinadsa dosse inabaquimanajari. ²⁰Nadsapa jai toja, bacco toquinadsapa poccadeni tamine attideni Huanodsa huati iqqumamanajaro. Naraha Huano pohua cacoma-jarajari; amadsati pohua cacomerade: –Ohuapi Cristo oja-gerani –nade.

²¹Naraha pohuadsa huati toquinapomade: –Nadsapi, ¿nejecojari tijani? ¿Maittaccadsamacca Dio Atti cacomerabote Eria tijaqui? –quinade. Naraha Huanopa: –Ohuapi Eria oja-gerani –nade.

Nadsapa: –¿Moisesicca dsodonajadsa aja Dio Atti cacomerabote dsotode ccajonahitohui quiquina najari tijaqui? –quinade. Naraha Huanopa: –Ohuapi najari oja-gerani –nade.

²²Naraha denima Huanodsa huati toquinapomade: –Nadsapi, ¿nejecojari tijani? –quinapomade. Pohuadeni attipa:

–Jari, iadsa ticca ima tecomeraji. Tetti imittadsapi ia dosse najonadedenidsa huati inaninijine –quinade Huanodsa.

²³Naraha Huanopa pohua cacomerade: –Ohuapi dsama huamoni ssono caji, siba caji tanihuaji ohuatti mohui tadsa madija huahua huahua ohonajonabaqqui najari. “¡Ia Medsede tedsejema jahui tijinedeni tobicapoji! Najaroa aji tibodi-deni pahuatohui tinajoramanaji” ohona najaro. Najaro imapi maittaccadsama Dio Atti cacomerabote Isahia huati tapojari –nade Huano atti.

²⁴Aja Huanodsa huati toquinajarideni dosse najonadenipa Isaraeri potemahi jodiodeni mota marinaja onini pariseodsa jehe quinajari. Nadsapa poccadeni dodosse tabaqqui Huanodsa huati toquinapomajari. ²⁵Pohuadeni attipa: –Tetti, “Cristo oja-jerani. Eria oja-jerani. Moisesijine dsodo nanicca Dio Atti cacomerabote quinajari ojajerani” tadsapi, ¿nejecotohui passodsa madija topa topa titidsana-baqqui najaritta? –quinade.

²⁶Naraha Huano pohua cacomerade: –Ohuapi passodsara topa topa ohodsanabaqqui najari. Naraha madija ohuaha tiadenidsa madiraha pohuadsa tinoccodeni jidsaqquri naccani. ²⁷Najarina deni tojajari. Ohuapi tahide mari mari onaporaha pohuapa dsotode mari mari najonahitohui. Ohuapi ajimani ojani. Ohuapi pocca dodossessa onejerani. Pocca dodossedsa naqui denima ajimani ojani –nade Huano atti.

²⁸Ajjaro imapi odsa capamema najaro onini Betaniadsa qqui inapode. Betaniapi hueni Jordao maji ccajonahihuaji tojajaro. Nahihuaji Huano Baotista madija topade tojadsana pohuadsa huatide jahijonajari.

Jesopa Diocca daniji pina Edede bedissa najari

²⁹Nani Betaniadsa imadiccsapi najaro huada ssiajadsa Huano Jeso ccajonahi qqui tadsa iadsa huati tajaride: –¡Qqui tiquinajo! ¡Ajaripa Diocca daniji madija huapimadsa! Pohuapa Diocca *Edede Bedi bicabote Diodsa da da inajarissa najari. Nidsa dsoqquedsapa pohuana madija huapimacca imasiri inanamossinitohui –nade. ³⁰–Nadsa pohua tahimaripi tiadenidsa huati huati onapode: Ohuapi tahide mari mari onaporaha aja madija dsotode mari mari najonajarina deni tojajari. Ohuapi

ajimani ojani. Pohnapa nadsama tahide madipojari, ohona nade.
³¹ Ohuapi pohuadsa ssamo onade. Naraha Isaraeri potemahideni tiadenipi pohuadsa nahatoquiri tiquinanijinepi Dio ohua cadossedsa madija passodsa topa topa onajaropaji –nade Huano.

³² Huanopa tahide Jeso topa idsanadsa Dio Corime Jesodsa ccaronahi qqui tadsa iadsa huati tajaride: –Ohuapi Dio Corime qqui onade. Pina midsorissa naha ccaronadsa Jesodsa be tahi qqui onade. ³³ Ohuapi pohuadsa nahato onapo-jerade. Naraha passodsa topa odsana-baqquihijinepa Dio ohua cadossedsa ohuadsa huati tapojaride: “Ocorime ccaronadsa madijadsa be tahi qqui tinahitohui. Najarina Ocorime madijadsa inanaridsa-hitohui” napode Dio ohuadsa. ³⁴ Jehe, najaripa pajissa ohua qqui onadsa huati onajaro: Ajaripa Dio Bedi, onajaro –nade Huano atti.

Jesocca mamari tabaqqi tahidecca

³⁵ Huada ssiadjadsa Huano Baotista huatimade ipamehe pohuadsa ibapomade.

³⁶ Nahidsana Jeso toqqe-qquimahi Huano qqui tadsa iadsa huati tajaride: –¡Qqui tiquinajo! ¡Ajaripa Diocca daniji madija huapimadsa! Pohnapa Diocca *Edede Bedi Diodsa da da inajarissa naraha icca imasiri manaconi tojahijine Dio iadsa eccorajari –nade Huano iadsa.



³⁷ Nadsapi Huano huatimade ipamehe ima imittadsapi Jesodsa icadamissade. ³⁸ Jeso natti icadamissaraha Jeso pohua natti qqui naninaja ipamehe icadajonani ia qqui tabaqqi-jaride. Nadsapa Jeso iadsa huati tade: –¿Nejecotohui ticadajonajaro? –nade iadsa. Naraha: –Ia Maride, ¿nejecohuaji timadijaro? –inade. ³⁹ Naraha Jeso: –Jina, qqui tiquinaji –nade iadsa. Nadsapi jaijajaro, maji toccadsana pohua madihidsa bacco inadsapi qqui inade. Nani pohuadsa jassi idsadsa icadsomede.

⁴⁰Jehe, Huano huati tahi imittadsapi Jesodsana ique-jenajarode. Otesse onipa Adiri. Pohua imecote onipa Ssino-Pedro. ⁴¹Jesocca odsahuaji icadenadsapi Adiri pohua imecote Ssinotohui toccajaride. Pohua imecote Ssinohuaji bacco tadsapa huati tajari: –¡Ssino, iapa aja tohui imadijaro Mesia bacco inahi! –najari. (Jodio attidenidsapa: Mesia, quinaraha dsama Cresiacca madija attidenidsapa: Cristo, quinajari. Madija ettidsapa: Diocca Cattaniji ia Idinide, inajaro.)

⁴²Nadsapa Adiri pohua imecote Jesohuaji eccanijari. Jeso Ssino qqui tadsapa pohuadsa huati tade: –Tiapi Huanocca ejedeni Ssino tijani. Ssino tijaraha jidapapi tia oni onihira hua onana –najari. Nadsapa pohua oni hua inadsapa: –Sepa –nade. (Jodio attidenidsapa: Sepa, quinaraha dsama Cresiacca madija attidenidsapa: Pedro, quinajari. Madija ettidsapa: Siba, inajaro.)

Nicodemopa dsome Jesodsa ccahuajajari

3 ¹Isaraeri potemahi jodiodeni dossede ojaria onipa Nicodemo. Pohuapa marinaja onini pariseodsa jehe najari. ²Najaripa dsomeraha Jesodsa huati tahijine ccajonajari.



Bacco najonadsapa: –Mamaride, iapi nahatoqquri inapode. Tiapi Diocca dosseniji ticcajonajaro madija maride. Nahatohue pina aji ticcassa najaropi madija Dio pohuadsa tojahissa tajarina cajijari. Pohuadsa Dio nohueradsapa caji-jarahi –nade Nicodemo. ³Naraha Jeso Nicodemodsa huati tajari: –Pajissehera tiadsa huati onana: Madija Diocca cacahuehedsa tojahijinepa tossonapoma-dsana Diodsa tojahitohui. Tossonapoma-jaradsapa Diocca cacahuehedsa toja-jarahitohui –nade Jeso Nicodemodsa.

⁴Naraha manaco Nicodemo huati tajari Jesodsa: –Madija jadahi ijaraha ¿nejecoma inadsa pina ejedeni inehe issona-pomanijine? ¿Icca ami dsahuanidsa ittidsapomadsapi issonapoma taqui? –nade Nicodemo. ⁵Naraha manaco Jeso Nicodemodsa huati tajari: –Pajissehera tiadsa huati onana: Madija bodidenicca imasiri tohuire-ridsadsapi madija Dio Corimecca nahatonajadsa toquejenadsapa Diocca cacahuehedsa toquejenahi. Naraha madija nama quina-jaradsapa Diocca cacahuehedsa toquejena-jarahi. ⁶Maqquideje ejedeni inahatojaripa madija tojajari. Naraha Dio Corimejine nahatojaripa Pohua Corime pohuadenidsa totoja najari. Dio Corime pohuadenidsa tojaridsadsapa pina tossonapomajarissa quina tahi –nade. ⁷–Nadsama tiadsa huati onana. Ohuattipi: Pina ejedeni tossonedsatissa tiquinapomaji onajarodsapi huajo tejeraji. ⁸Dio Corimejine madija bodi dsati tojadsapi pina jojodecca imassa najaro. Jojodepi qqui inejeraraha jojode ponijinena ahahuato najaro. Jojodepi poni jipa tanihuaji jojo dsanapo tani. Poni mohuini naqui imitta tani. “¿Nejecoma nanicca ccajonajaro?” taraha ssamo tinani. “¿Nejecoma nani toccajaro?” ina tani. Dio Corimejine madija bodi nahatodsati tojadsa naco qqui inajararaha pocca madie dsati tojani nahato inajaro –nade Jeso Nicodemodsa.

⁹Naraha manaco Nicodemo Jesodsa huati tapomajari: –¿Najaro imapi nejecoma najaro? –nade. ¹⁰Manaco Jeso pohua cacomerade: –Tiapi Isaraeri potemahi jodiodeni maride tijaraha ¿najaro ima ssamo tinajaroqui? ¹¹Pajissehera tiadsa huati onana: Iapi Djojine madija bodideni dsati toquejenahi nahatoto inajaro. Aji madijacca madie dsati tojani qqui inajaro naqui tiadenidsa huati huati ihinanaraha timittamana-jerajaro. ¹²Aji namicca

icca madieccama tiadeni mari ocanabaqquiraha pajissa tiquinejerani. Aji memehujicca Diocca ima ponira tiadenidsa huati onadsa naqui pajissa tiquinejerarorane –nade.

¹³–Nadsama aja namicca madija ojariapa memehujicca toccamacossaja cama-jarahi. Naraha aji *Madija Bedi ojajaronahuapi memehujicca occaronajaro. ¹⁴Nadsa maittaranibotedsama huamoni ssono caji, siba caji tanihuaji icca madija jahiridsapodsapa Moisesi macca corime *bronce inahatodsahuadsa que inanahi quinade. Madijapa maccajine jicahitohuiraha macca corime que tahihuaji qqui quinadsapa totocassiejera najari. Nadsama aji Madija Bedi ojajaroa ohua naqui ahuadsa ohua que inanamanadsapi nema onanitohui –nade.

¹⁵–Nadsama madija huapima ohuadsa pajissa quinajaridenipacamitteheri cajimana-dsanapohuijine –nade Jeso.

Diopa madijadsa huati cahanari canajari

¹⁶–Diopa madijadsa huati cahanari canahi. Pohua Bedi ojari naraha da inadsapa huapima pahuadsa pajissa quinajaridenipatocassiejerahijine; camitteheri naco cajimana-dsanapohuijine. ¹⁷Diopa Pohua Bedi madija dsahuade dosse inarona-jarajari. Madija tonassiajadera dosse inaronajari –nade.

¹⁸–Nadsama pahuadsa pajissa quinajaridenipa idsahuabaqquirarahitohui. Naraha aja pahuadsa pajissa quina-jarajaridenicca imapi Dio Pahuadsa ahuaato taridsaponi. Naraha Dio Attipa: “Occa ejedeni ohojaride. Pahuadsa pajissa tiquinejeradsapi ticcadeni imapi ohuadsa tabaccora tani. Nidsa ticcadeni ima nema tidsanapo-manadsapi najidsohue jiquejeranihuaji tiquejenanitohui” nahi Dio –nade Jeso. ¹⁹–Nadsama Dio Bedidsa pajissa quina-jarajaridenipa poccadeni tabaccorehepi ajima najaro. Ssiajani aji namidsa bacco naronaraha madija motapa dsidsinidsarahuatideni huanaququiri najari. Pahuadenipa ima tabaccora tannicca ihinanamana nadsapi ssiajanidsapa huatideni huaneraququiri najaripaja. ²⁰Madija motapa pohua pahuadeni tonatabaccoramansapa ssiajanidsa huattajoququiri najari. Pahuadenipa ssiajanidsa huajijira canaha najarahi, poccadeni ima huapimadsa ahuaato tajaro noppineni. ²¹Naraha madija pajissehedsa madimanadsapa ssiajanitohuira quinajari, pina Diocca dossenijissa inanamanadsapi pahuadeni dsepe ijiridsajarima ahuaato tanijine –nade Jeso.

Huanopa Jesocca ima ecomerapomajaro

²²Nani dsotodepi dsama arobeni Jodeahuaji Jeso tocca-dsapa pohua huatimadedeni iapi pohuadsa jaijade. Nanidsa imadidsana madija topa idsana-baqquijaride. ²³Naraha Huano naco odsa Enohuaji madija topa idsana-baqquija najari. Najaropi odsa Sarimadsa huajira tani. Enodsana passo dsaja tanicca caji tajaro. Nahidsana madija jajahijona najari, Huanocca topanijitohui. ²⁴Huanopa toponi cocorodsa coro idsimamana-jaraccadsama nahidsa madijari.

²⁵Nadsapa Huano huatimadedenipa jodio ojaría tedseje bodideni tohuire-manahijinecca ima ahuaji huati, ahuaji huati quinajari. ²⁶Nadsapa Huano huatimadedeni jai tojanidsapa Huanodsa huati toquinade: –Ia Maride, maitta hueni Jordao jippehuaji tiadsa bacco tajari pohua tahimari huati huati titi-nanajaripa madija topade tojahi. Huapima pohuahuaji jajahi toja nahi –quinade.

²⁷Naraha Huano pohuadenidsa huati tade: –Diopa madija dsepe ijihijine pohuadsa da inejeradsapi nama najarahi. Naraha Dio madija dsepe ijihijine pohuadsa da inadsapi dsepe ijie cajihi –nade. ²⁸–Nadsa ohuatti timittamanade: Ohuapi Cristo-Mesia oja-jerani ohona nade. Diopa Jeso tedsejema ohua cadossepojaride. ²⁹Ohuapi pina dsabisso amoneje caji-bote najari pohua tessesa onajaro. Dsabisso cacajirehijinecca ejete bacco tadsapa pohua tesse naco nahi pohuatohui madijari. Pohua tessapa aja cacajirejari atti mittadsapa huatidse tahi. Najaroa ohua naqui Jesodsa madija toquejenadsa omittadsapi ohuatidseri najaro. ³⁰Jeso deni tojaja-dsanapohui nadsapa bica tani. Ohua ajimani ojanini naqui bica tani, onajaro –nade Huano.

Jesopa memehuajicca ccaronajari


³¹Nadsapa Huano pohua huatimadedenidsa denima huati tajari: –Memehuaji ccaronajaripa aja namihuajicca madijassa najarahi. Pahuapa deni tojahi. Ajijaro namiccapa namicca. Ajijaro namicca imara huati huati totoquina najari. Memehuaji ccaronajaripa huapimadsa deni tojajari. ³²Pahuapa memehuajicca qqui tajari, mittajari naqui ecomera-ridsajaro. Naraha madija huapimapa

pocca huatinajadsa pajissaha quina-jarahi. ³³Naraha pohua atti-dsa pajissa quinajarina: “Jehe, Diopa pajissehe jinede” quinajari. ³⁴Pohuana Dio icadossejari, huati huati nanaridsa najari. Najarina Dio Atti huati tahissa tajari. Dio Pohua Corime pohuadsa da ineje najaro inapajiranissa tajaro. ³⁵Imehipa Bedidsa huati huana tajari. Pohua Bedidsa pocca nahatonaja huapima pohuadsa inanajaro. ³⁶Nadsapa Pohua Bedidsa pajissa quinajaridenina camitteheri cajimana-dsanapohuijine. Naraha pohuadsa iboqquri najari-denipa camitteheri cajimana-jarahitohui. Dio Pohuana najidsohwe jiquejeraniccadsa inana-baqquihitohui –nahi nade Huano Baotista.

Edede cacahuadecca ima

10 ¹Nadsapa Jeso huati tapomade: –Pajissehera tiadenidsa huati onajaro: Madijapa aja edede tadsaricca noccobijidsa toqquedsima-jaradsa noccobiji maranihuajina joppa todsimajaripa bobotide. ²Naraha aja madija edede tadsaricca noccobijidsa toqquedsimajaripa edede cacahuade pohua. ³Edede cacahuade edede tadsarihuaji bacco tadsapa pocca dodosse noccobiji icatabojidsa tani. Ededepa cacahuade atti mittamana tahi. Pocca edede onidenidsa huahua nadsapa iaqquenabaqqui tahi. ⁴Nadsa pohuajine edede jahininedsa cacahuadepa tahide toja tahi. Ededepa pohuadeni cacahuade atti nahatoqquri nadsapa pohua natti jai toja tahi. ⁵Naraha madija ohuaha nattipa jai tojera tahi. Atti jidsa tadsa, pohuadeni cacahuade attissa najaradsapa domo tocca tahi –nade Jeso.

⁶Jeso edede tahimari huati tajaripa pocca madija tahimari huati, pohua tahimari huati taraha nahidsa madija domo huajari mittamanaraha pohuadenidsa ssamo tajaro.



Jesopa edede cacahuade bicahi

⁷Nadsapa Jeso madija mittamanahijine huati tapomade: –Pajissehera tiadenidsa huati onana: Ohuapi edede tadsari-huajicca noccobiji ojani. Najaro noccobijidsapa edede jajahi tojedsima najari. ⁸Ohua occajona-jeraccadsapi bobotidedenina jahijonapojari. Naraha ededepa bobotidedenidsa huaribodeni sibaquiri najari –nade Jeso.

⁹–Ohuapi noccobiji ojani. Madija ohuadsa jajahidsima najaripa tossiejehe cajimanahitohui. Pohuadenipa pina occa ededessa quinajari. Dsomepa edede pohuadeni tadsaridsa jajahi tojedsimani nadsa cacahuadepa nahidsa ehечahua-baqqui najari. Ssiajapa cacahuade ehечquena-baqqui najari, dsero bicani jipamanahijine. Ohuapi occa madija ohuacahua-baqquihissa tajari –nade Jeso.

¹⁰–Naraha bobotidedepa botihijine, toponi nanadsoqqehijine, toponi tonatabaccorahijinera ccajona tahi. Naraha ohuapi toponi tonassiajadera occajonajaro, madija bodidenidsa madie bicanicca cajimanahissa tahijine. ¹¹Ohuapi edede cacahuade bicahi. Edede cacahuade bicahipa pocca edededsa tossiejehe da ina tani. Pocca edede tocassiejerahijinepa pohuana pohua ccaccora tahi. ¹²Naraha madija ohuahapa manaconi-tohuira edede ecahua-baqquidsa dsomaji ccajonahi qqui tadsapa edede inebobaqqui... joppa tahi caji tahi. Puhuapa edede jinede jarajari. Nadsapa edede inebobaqquidsap dsomaji edededsa ssonaridsapa motapa tojaribaqqui tahi. ¹³Naraha edede cacahuade manaconi-tohuira tarabaidsa najaripa edededsa huati huana tajaradsapa inebobaqqui tahi –nade.

¹⁴⁻¹⁵–Naraha ohuapi edede cacahuade bicahi ojani. Nema onajaropi madija ohuadsa toquejenaripa ohuacahuabaqquijari. Occa Abipa ohuadsa nocco jidsera tahi. Ohua naqui occa Abi pohuadsa onocco jidsera tani. Najarossa najaro ohuapi occa edededsa onocco jidsera tajaro. Manaco occa edede ohuadsa noccodeni jidseraqqiri najari. Nadsama ohuapi occa edede tocassiejerahijinepa ohuana ohua ohuaccoranijine.

¹⁶Edede ohuahadeni naco huapi taha ocajini, aja tadsaricca jarahi. Najarideni naco ohuaccani-baqquihijine. Puhuadenipa

ohuattidsa iboraquuri nahi. Nadsapa cacahuade ojariadsana queriqquihijine. Nadsapa ojariqqi-manahitohui –nade Jeso. (Pohua atti nama najaripa madija jodio quejena-jarajarideni naco pohuadsa toquejenahijine.)

Jeso pohua dsoqquehicca ima

¹⁷–Ohua ohuaccoradsa odsoqqueraha occa camittehe ohuadsa tojapomanitohui. Najaro ima onananijine ibora onadsapi occa Abipa ohua catidsejari –nade. ¹⁸–Aji odsoqqejaro naqui madija ohuahajine jerani; ohuana ohua ohuaccoradsa ohua inanadsoqqe-mananitohui. Occa camittehe ohuaccoranijine opajirani. Occa camitteheda bacco onanipomanijine naqui opajirani. Ajijaro dossenijipi occa Abijine –nade Jeso.

Jeso pohua huatimade amorideni ssahua inabaquijari

13 ¹*Pascoacca jipacque tojanijine huada ojarie dsori taccaraha Jesopa pohua tedsejemacca ima nahato tapojari: ajijaro namidsa madide nebohijinecca huada bacco tabote nani. Ajijaro nami inebodsa Imehihuaji tojanipomahijine. Jesopa pocca madija ajijaro namidsa madimanajaridenidsa huati huana taha nama najonajaria pohua dsoqquehi bacco tajaripajade.

²Dsome ijipanijine inajoraraha tahide imasiri mamaride Satanajine Simon Iscariote bedi Joda bodi najorajari, Jeso todsepe inahanijine. ³Jesopa Dio Pohuahuai ccaronahicca nahato, Diohuaji toccamacossani-hijinecca nahato, Pohua Imehicca deni tojehe cajihi naco nahato tajari. ⁴Najaro pocca deni tojehecca ima iattanijine ia mari tocanabaquijaride. Jipade iquejenanaja Jeso toتهمadsapa pocca etero huapiccapi ssiti inadsa tohuamori ssesera pohua dorodsa ssoque inade. ⁵Nadsapa tasao imehidsa passo sso idsadsa emori ssahua tabaquijaride. Nadsapa pohua dorocca etero ssoque nacossajarodsa emori sse tabaquijaride.

⁶Naraha Ssino-Pedro amori ssahua inahijineraha: –Ohua Medsede, ¿ohuamori ssahua tanijinequi? –nade. ⁷Naraha Jeso attia: –Aji jidapana temorideni ssahua onaridsajarocca imapi ssamomo tinaraha nidsa dsotodena aji tiadeni mari



ocanabaquijaro nahatoqqiri tiquinanitohui –nade. ⁸Naraha Pedro attipa: –¡Ohuapi ohuamori ssahua tejeraji, poni! –nade. Naraha Jeso attipa: –Temori ssahua onejeradsapi occa tija-jeranitohui –nade. ⁹Naraha Ssino-Pedropa: –¡Ohua Medsede ohuamoria ojari jerana, odsepe ssahua, otati ssahua taji! –nade. ¹⁰Naraha Jesopa pahuadsa huati tade: –Japi idsatipi huire inajaro, ia ssahua imanipoma-jerani. Naraha emorina ssahua ssahua ihimani nanijine –nade. –Tiadenipi tibodideni huireqqiri naraha huapima jerani –nade Jeso. ¹¹Jesopa pohua ccaccorade nahato tapoja najari, najaria aja: –Huapima huireqqiri tiquinejerani –najaripajade.

¹²Emori ssahua tabaquia jicadsapa pocca etero huedsa-pomadsa huahuanaridsa tohuittarinide. Nadsapa iadsa huati tade: –¿Aji temorideni ssahua onaridsajarocca imapi nahatoto tinaqui? ¹³Tiadenipi ohuadsa huahua titiquina nanipi: “¡Ia Maride, ia Medsede” titiquina najaropi pajissa. ¹⁴Nema onajaroa ohuapi tiadeni Medsede, tiadeni Maride ojaraha pina ticcadeni medsessa onadsa temorideni ssahua onaridsajaro. Najaropi tiadeni naqui temorideni ahuaji ssahua ahuaji ssahua tataridsamana nana. ¹⁵Ajijaro marinajapi tiadeni mari ocanabaquijaro, pina aji ojinessa tinanamanijine, onajaro.

¹⁶Jehe, pajissehera tiadenidsa huati onajaro: Madija pocca medseddenipa pohuadeni medsededsa deni toquejena-jarajari. Pohuadenipa ajamani toquejenajari. Madija pocca dodosse tabaqqui naco pohuadeni dossedsa deni toquejena-jarajari. Pohuadenipa ajamani toquejenajari. ¹⁷Nadsapi ajijaro ima timitta-mananissa tadsa nema tinana-manadsapi tetidsemananitohui, onajaro –nade Jeso.

***Jesopa: –Jahui ojani. Ojinena Abidsa
bacco bacco toquinahijine –najari***

14 ¹Nahi dsotodepa Jeso iadsa denima huati huati tade: –Tiadenipi ticappinamana tejeraji. Diodsara pajissa tiquinanissa taji; ohuadsa naqui pajissa tiquinanissa taji. ²Occa Abicca odsahuaji timadimananijinepi mamadi caji tani. Timadimananijine mamadi maradsapi nanissa tiadenidsa huati onaponeje onade. Nadsama ohuapi ticcadeni mamadi onanajoranijine Abihuaji occaninitohui. ³Abihuaji occanidsa ticcadeni mamadi onanajoradsapi occarona-pomanitohui; tiadeni ohuaccani-baqquinijine; ohua ohomadi nanidsa tiadeni naqui timadimananijine, onajaro. ⁴Tiadenipi aji occanihuaji ojahine nahatoqquri tiquinani –nade Jeso.

⁵Naraha Tomaisi attia: –Ia Maride, ¿nejecohuaji ticcanijine? Najaro imapi ssamoqquri inani. ¿Nejecoma nadsa najaro tijahine nahatoqquri inanijine? –nade. ⁶Naraha Jeso huati tade: –Ohuapi jahui ojani. Ojinena madija Abidsa bacco toquinahijine. Ohuapi pajissehe jinede ojani. Ohuapi tossiejehe jinede ojani. Nahissa ohua nohue ojiradsapi madijapa Abidsa bacco toquina-jaranaja. ⁷Ohuadsa tinoccodeni tojidseradsapi occa Abidsa naqui tinoccodeni tojidseranitohui. Aji jidapana ohua qqui tiquina-jaropi Abidsa tinoccodeni tojidserajonajaro –nade. ⁸Naraha Feripe attipa: –Ia Maride, jari, icca Abi ia qqui tinanabaqquiji; najari qqui inadsapi epejena, denima inejerani –nade.

⁹Naraha Jeso Feripedsa huati tade: –Feripe, ohua tiadenidsa maitta omadijonerade, naraha ¿ohuadsa tinocco tojidserajeracqui? Aja madija ohuadsa nocco tojidserajaripa occa Abidsa naco nocco tojidserajari, onajaropajia. Naraha ¿nejecotohuira ohuadsa: “Icca Abi ia qqui tinanabaqquiji” tajaro? ¹⁰Ohuapi Abidsa, Abipa ohuadsa, inajaropi Abi Dio Pohua

ojarihi ¿Naraha najarodsapi pajissa tejeraqui? Aji ohuatti huati huati ohona najaropi ojine jerani. Occa Abina ohuadsa madija najari Pohuana ohua totocanahato najari. ¹¹Nadsama ohuattipi: “Ohuapi Abidsa, Abipa ohuadsa” onajarodsa pajissa tiquinaji. Naraha najarodsa pajissa tiquinanijine ssamo tadsapi aji occa nahatohue qqui tajona-manapojarodsa: “Pajissa Jesopa Dio Bedia” tiquinaji –nade Jeso.

**–Nohue ojiradsa naqui tiadenidsa
ima bicani da da onanitohui –najari Jeso**

¹²–Ohuapi pajissehera tiadenidsa huati onana: Ohuadsa: “Pajissa ia tonassiaja-baqquihijine” tiquinadsapi pina aji ojinessa tinanamananitohui. Occa Abi madihhuaji occanini onattipi pina ojinessa tinanamanaraha denima bica tanicca tinanamananitohui. ¹³Diodsa huati tiquinadsa ohua onima huati huati titiquina nadsapi da da onanitohui. Nani Abi Diocca deni tojehe tiadenidsa ahuato onananijine. ¹⁴Jehe, ohuadsa huati huati tiquinadsapi ticcadeni huatinajassa onananitohui –nade.

¹⁵–Jehe, ohuadsa tetideni huanacquiri nadsapi occa dosse-nijissa tinanamanana. ¹⁶Nadsama ohuapi Abidsa huati onanitohui. Nahi tiadeni Acco Camade ohuaha dosse inaronahijine. Najaripa Pohua Corime Pajissehe Maride tiadenidsa madihipaja nahijine. ¹⁷Diodsa jehe quina-jarajari ajijaro dsamacca tohuini quina-jaridenidsapa Pohua Corime Pajissehe Maride pohuadenidsa toja-jarahitohui. Pohuadenipa Dio Corime qqui toquina-jarahi. Pohuadsa ssamoqqiri nahi. Naraha tiadenidsapa jidsera tahi. Najaripa tiadenidsa madihi; tiadenidsa madidsanapohuitohui.

¹⁸–Ohuapi tiadeni ohuaquibo-baqqunitohui. Naraha tiadenidsa omadipomanijine occanipomanitohui. ¹⁹Naraha nidsa denimapi ajijaro dsamacca madijapa ohua qqui tomanimana-jarahitohui. Naraha tiadenipi ohua qqui timani-mananitohui. Odsosqueraha onahatonidsapi omadinitohui. Nema onadsapi tiadeni naqui tinahatonimanadsa timadimana-pomanitohui. ²⁰Jehe, occanipomadsapi tibodideni huatoma-mananitohui: Ohuapi occa Abidsa. Tiadenipi ohuadsa. Ohua naqui tiadenidsa, onajaro. ²¹Occa marinaja tiadenidsa tojadsa nema tinanamana-dsapi ticcadeni ima ahuato tanijine: Pajissa ohuadsa tetideni huanacquiri nani. Ohuadsa tetideni huanacquiri nadsapi occa

Abi naco tiadenidsa huati huana tahitohui. Ohua naqui tiadenidsa ohuati huana tanitohui. Tiadenidsa ahuate onanitohui –nade Jeso.

²²Nadsapa Joda (ajaripa Joda Iscariote jarahi) najari huati tajari: –Ia Maride, ¿nejecotohui iadsara ahuate tinanijine naraha ajijaro dsamacca madijadsapi ahuate tinejeranijine? –nade.

²³Naraha Jeso huati tade: –Madija ohuadsa huatideni huanaqquri nadsapa ohuatti eahua-mananitohui. Nadsapa Abi naco pohuadenidsa huati huana tahitohui. Occa Abi tedseje pohuadenidsa imadinitohui. ²⁴Madija ohuadsa huatideni huaneraqquri nadsapa ohuatti eahuamana-jeranitohui. Aji ima timittamanajaropi ohuatti jerani, Abi Dio ohua Cadossede Atti.


²⁵–Aji tiadenidsa omadidsama huati huati onajaropaji. ²⁶Naraha nidsa nohue ojiradsapi Abi Dio tiadeni Acco Camade dosse inaronahitohui. Najaripa Dio Corime pina ojinessa inananitohui. Denima tiadeni mari tocanabaquihitohui. Aji huati huati onajarocca naqui pohuajine tibodideni huatomanissa tanitohui –nade.

–Occanibote nani, dacoco tijiraji –najari

²⁷–Nadsama ohuapi occanibote nani. Tibodideni bicaqquri nanijine tiadenidsa occa jonehe da onaridsani, pina ajijaro dsamacca madija pohuadeni tohui quinahiccassa nejearo. Nadsama occa daniji ticajimanadsapi tibodideni huatoto canejeraji. Occaninitohui onajaro noppineni naqui ticappinamana-jeraji, onajaro. ²⁸Ohuapi occanini, ocanajorani-pomanitohui onanipi timittamanade. Occa Abi Pohuana deni tojajari. Pajissehe ohuadsa tetideni huanaqquri nadsapi occa Abihuaji occanina onadsa tetidsemananijine bica taraha nema tiquinejerajaro.

²⁹–Jehe, aji itedsejemacca ima huati huati onajaro tojajeraccadsama tiadenidsa huati onajaro. Nidsa najaro ima tojadsapi ohuadsa: “Pajissa huati tajaria” tiquinanitohui. ³⁰Naraha ohuapi occa ima denima tiadenidsa huati odsanapo-jerana. Ajijaro dsamacca dodossede bacco nabote nahi. Naraha pocca dacorehepi ohuadsa deni toja-jerani. ³¹Nema nehe ohua ohuaccoradsapi odsoqquenitohui. Nema onajaropi madija huapima nahatoqquri nahijine; ohuapi occa Abidsa ohuati huana tajaro. Pohuapa ajijaro imatohui ohua cadossedsapa Pohua Attidsa ibora onajaro –nade Jeso.

Maride jicadsapi: –Jina, jaijana –nade iadsa.



Jesocca marinaja uva ede tahimari

15 ¹Nadsapa Jeso iadsa denima huati huati tade: –Ohuapi uva ede pajissehecca ojani. Occa Abipa huidsajacca uva cacahuadessa najari. ²Ohuapi huidsajacca uva edessa onadsapi madija ohuadsa toquejenajaridenipa pina uva ininessa quina-jari. Nadsama uva inine cabononora tajaripa uva cacahuade ca icajidsa tahi. Naraha uva inine ohuaha cacabono najarina denima cabono-dsanapohuijine uva cacahuadepa ininedsa moronine-dsatira ba ba ihippi najari. Eppe bote naco pore pore ihinana-jari. Nadsapa inine huire tadsapa bono cajidsanapohuijine. ³Aji tiadeni naqui najarossa tiquinajaro. Ohuatti tiadenidsa huati onajarojine huireququiri tiquinajaro. Nadsapi tibonomananijine tinajoramanajaro. ⁴Nadsama ohuadsa paji timadimanarini naridsaji. Ohuapi tiadenidsa paji omdirini nanitohui. Inine edeccana cacabono najari. Inine pohua mottapa cabononora tahi. Najarossa tiquinajaro tiadeni ohuadsa timadimananissa tejera-dsapi ima bicani tinanamananijine tipajiramana-jeranitohuiraha.

⁵–Nadsama ohuapi uva ede ojani. Tiadenipi uva inine tiquejenani. Ohuadsa timadimananissa tadsapi tiadenidsa omadinitohui. Nadsama tiadenipi pina uva inine cacabono-jiderajarissa tiquinajaro. Nanissa tiadenidsa omadi-jeradsapi ima bicani tinanamana-jeranitohuiraha. ⁶Ohuadsa madimana-hissa tajarajaripa huahuattajo toquejenahitohui pina uva inine ca toppidsa hua tajarissa quinahitohui. Uva inine dsequiri nadsa inaccamanadsapa botta botta tajarissa quinahitohui.

⁷–Naraha ohua tinebomana-jeradsa occa marinaja naqui tinebomana-jeradsapi tohui tiquinanicca tohui ohuadsa huati huati titiquina nana. Nadsapa ticcadeni huatinaja tiadenidsa tojahitohui, onajaro. ⁸Jehe, Dio Attissa tinanaridsa-manadsapi pina uva inine cacabono-jiderajarissa tiquinanijine. Nema tinanamanani madija qqui toquinadsapa occa Abidsa: “Jehe, Diopa bica tahi” quinahijine. Jehe, occa mamari tabaqqi nema tinanamanadsapi pajissa occa tiquejenani ahuato tanitohui –nade Jeso.

Jeso pocca mamari tabaqqidsa: –Otessedeni –najari

⁹–Ohuapi tiadenidsa ohuati huana tehe nema onajonajaro, pina Abi ohuadsa huati huana tajarissa onajaro. Occa tohuati huanehedsa tiajimana tejeraji. ¹⁰Occa dossenijidsa iboraqqi tiquinadsapi occa tohuati huanehedsa timadimanani paji nanijine. Aji pina ohua occa Abicca dossenijidsa ibora onadsa pocca tohuati huanehema omadiridsajarossa tiquinaji, onajaro.

¹¹–Aji huati onajaropi occa huatidsehe tiadenidsa onananijine. Occa huatidsehe tibodidenidsa pajiranissa tanijine, onajaro. ¹²Ajijaropi tiadenidsa occa dosseniji: Pina ticatidserara canaji. Pina aji ohua tiadenidsa catidse onajarossa tiquinaji. ¹³Tohuati huanehe deni tojajaropi ajima najarona paji: Madija pohua tesse tocassiejerahijinepa pohuana pohua ccaccorajarina paji. ¹⁴Nadsama occa dossenijissa tinanamanadsapi otesse tiquejenani. ¹⁵Jidapapi tiadenidsa: “Occa medsedeni” onejerani. Madija medse inana-baqqijaripa pocca medsedeni pocca ima ssamoqqi najari. Naraha ohuapi occa Abi ohuadsa huati huati tajari nema nehe tiadenidsa ohuacomerajaro. Najaroa aji tiadenidsa: “Otessedeni” onajaropaji.

¹⁶–Tiadenipi otohui tiquinapo-jeraraha ohuana tiadeni ocattejidsa-baqquijaro. Nani tiadenina ohuatti mari ticanabaqqui-ridсахijine. Nahi madija ohuadsa toquejena-hijine. Najaro imapi pina uva inine huajjiradsa cacabono najarissa tiquinanitohui. Najari bonopa madija Diodsa toquejena-dsanapojari. Nema nadsapi ohua onima huati huati titiquina nadsapi Abipa ticcadeni huatinaja tiadenidsa da da nanaja nahitohui. ¹⁷Nadsama ajjaropi tiadenidsa occa dosseniji: Ticatidserara canaji, onajaro –nade Jeso.

Ajjaro namicca imadsa madimanajaridenipa Jesodsa huattajojo, pohua huatimadedenidsa huattajojo tajari

¹⁸–Ajjaro namicca imadsa madimanajaridenipa tiadenidsa jiperaqquri nadsapa tibodideni huatomanaji: Pohnadenipa ohuadsa jiperaqquri napojari. ¹⁹Tiadenipi ajjaro namicca imadsa timadimanadsapi pohnadenipa tiadenidsa jipaqquiri nahitohuiraha nema tiquinejerajaro. Ajjaro namicca imadsa timadimanaporaha ohuapi tiadeni odini-baqquijaro, ajjaro namicca imatohui timadimana-jeranihijine. Jidapapi ajjaro namicca imatohui timadimana-jerajarojine tiadenidsa jiperaqquri najari. ²⁰Aji tiadenidsa huati onapojarocca tetideni huatoma-manana. Medsedenipa pohnadeni medsededsa deni toquejena-jarahi. Ohuadsa jara jara quinadsapa tiadenidsa naco jara jara quiquina nahitohui. Occa marinajadsa jehe quinadsapa ticcadeni marinajadsa naco jehe quinahitohui. ²¹Jehe occa tiquejenararojine jidacca huati onapojaro huapima tiadenidsa nama quinahitohui. Occa Abi ohua Cadossededsa noccodeni jidsaqquri nadsa nama quinajari.

²²–Nadsama pohnadenidsa huatide occajona-jeradsapi pohnadenipa ima cappiramana-hitohuiraha. Pohnadenidsa huati onaraha pajissa quina-jaradsapa ima cajimanajari. Pohnadenijnena poccadeni ima inatabaccora-manajaro. ²³Ohuadsa huattajojo tadsapa occa Abidsa naco huattajojo tajari. ²⁴Nadsama ojinepi pina madija ohuahajinessa nejerani. Occa nahatohue denima bica tanicca qqui toquina-jaradsapa ima cappiramana-hitohuiraha. Naraha occa nahatohue bica tani qqui qqui toquinaraha pajissa quina-jaradsapa ima cajimanajari. Nama quinadsapa ohuadsa huattajojo, Abidsa

naco huattajojo tajari. ²⁵Nadsama poccadeni imapi pina Dio Atti dsodo napojarossa najaro inanamanajaro: “Tabaccorehe onana-jeraraha pohuama ohuadsa huattajojo tajari” najaro Dio Atti dsodo nanidsa.

²⁶–Tiadeni Acco Camade tiadenidsa dosse onarona-hitohui. Pohuapa Abihuajicca, pohua oni ohuahapa Corime Pajissehecca. Nidsa najari ccaronadsana otahimari tiadenidsa ahuatoma ahuatoma nanitohui. ²⁷Tiadeni naqui otahimari tecomeraridsa-mananitohui. Aji, ohuadsa tiquejenapodsa ohua qqui tajona-manajarojine jidapana otahimari nahatoqquiri tiquinanissa tani –nade Jeso atti.

*Jeso huatimadedeni
tedsejemadenicca ima huati tapojari*

16 ¹–Aji tiadenidsa huati onajaropi ticcadeni jehe-niji tinebomana-jeranjine. ²Jodio poccadeni Dio Atti mamarihuaji jai tijedsimapoma-jeranjine tiadenidsa: “Ahuajipi jai tijedsima tejeraji” quiquina nahitohui. Nidsa ima onihi naqui tiadenidsa ssonarinitohui. Madija pohuadeni tocamaidsani-manadsa bodidenipa: “Ohuapi Diocca ima ohuacahuanissa tana” quinadsapa tiadeni inanadsoque-manaje camanitohui. ³Ajijaro imapi nema inanamananitohui, pohuadenipa Abidsa noccodeni jidsaqquri, ohuadsa naco noccodeni jidsaqquri najari. ⁴Nidsa aji huati huati onajaro tiadenidsa bacco tadsapi tibodideni huatoma-mananitohui: “Ja, Jeso atti nama napode” tiquinanitohui –nade Jeso.

–Dio Corime ccaronahitohui –nade

–Najaro imapi tiadenidsa huati onapo-jerade, tiadenidsa omadiridsaccani onadsa. ⁵Naraha jidapanana ohua Cadossedehuaji occanini onadsapi tiadenipi ohuadsa huati tineje cama-jerani. “¿Nejecohuaji ticcanejine?” tiquina-jerani. ⁶Naraha occanini onani timittamanadsapi oji tiquinabote nadsa tibodideni huanacossajaro. ⁷Pajissehera tiadenidsa huati onana: Ohua occanidsapi tiadenidsa ima bicani tojanijine. Occani-jeradsapi tiadeni Acco Camade nohuerahitohui. Naraha occanidsana tiadeni Acco Camade dosse onarona-hitohui –nade.

⁸–Nidsa tiadeni Acco Camade bacco naronadsapa ajijaro dsamacca madijadeni imasiri cajimanahi pohuadenidsa ahuato inananitohui. Ima onihi naqui: Imasiri cappiramana-jaridenina Diodsa toquejenahijine pajiramanahi ahuato inananitohui. Ima onihi naqui: Imasiri cajimanajaridenipa Dio ettajobaqqidsa nanajidso toquejenahijine ahuato inananitohui. ⁹Tiadeni Acco Camadepa madija ohuadsa pajissa quina-jaradsapa imasiri cajimanahi pohuadenidsa ahuato inananitohui. ¹⁰Ima onihipi imasiri cappiramanadsa Diodsa toquejenahijine pajiramanajaripa aji ohuapi imasiri jirehe omadidsa occa madie pajiranissa tajarojine. Nema onadsapi Diohuaji occaninitohui. Nadsapi ohua qqui tiquinapomajeranitohui. ¹¹Ima onihi: Dio huahuattajo inanabaqqidsa nanajidso toquejenahijine ahuato inananajaropi tahide ajijaro namicca dodossedede Satana Diojine huahuattajo tojapojaripaja –nade Jeso.

¹²–Denima tiadenidsa ima huati onanijine ima ocajiraha najaro huapima timittamananijine tipajiramanajeraccani. ¹³Naraha nidsa tiadeni Acco Camade Dio Corime Pajissehecca bacco naronadsana ima huapima pajisseheccara tiadenidsa inanadsanaponijine. Najaropi pohua mottacca ima jerani, Abi Dio huati tajari mittadsa tiadenidsa huati toquimahitohui. Itedsejemacca ima naqui tiadeni tonahatta-baqquihitohui. ¹⁴Pohuadsa occa ima ahuato onanadsa tiadenidsa ahuato inananitohui. Nadsapa pohuajine ohuadsa: “Jehe, Jesopa nahato tahi, deni tojahi” tiquinanitohui. ¹⁵Occa Abicca huapimapi ohua naqui occa. Najarojine ohuattipi: Dio Corimedsa ahuato onanadsapi tiadenidsa ahuato inananitohui, onajaro –nade Jeso.

Poccadeni ojiepi huatidsehe tojanitohui

¹⁶–Nidsa dsotodepi ohua qqui timanimana-jeranitohui, naraha denimapi ohua qqui timanimana-pomanitohui –nade Jeso. ¹⁷Nadsapi ia pohua huatimadedeni iara imahaha icanade: –¿Nejecotohui atti nama najari? –inade. –¿Nejecotohuira iadsa: “Nidsa dsotodepi ohua qqui timanimana-jeranitohui, naraha denimapi ohua qqui timanimana-pomanitohui” napa? ¿Nejecotohuira iadsa atti: “Ohuapi occa Abi madihuaji occaninijine” nanaja najarinaja? ¹⁸¿Nejecotohuira pohua attipa: “Nidsa dsotodepi” nanaja najarinaja? Pohua huati huati tajaripa ssamomo inani –inade pohua huatimadedeni iapi.

¹⁹Naraha Jesopa pohua bodi nahato tapoja najari; iapi pocca imatohui pohuadsa huati inanitohuiraha manacora iadsa huati tarjaride: –Nadsa tiadenidsa huati onapopa: Nidsa dsotodepi ohua qqui timanimana-jeranitohui, naraha denimapi ohua qqui timanimana-pomanitohui, onajaro-jinea aji tiadeni motta imahaha ticanajaropaji. ²⁰Nadsapi pajissehera tiadenidsa huati onana: Tiadenipi oji tiquinanitohui, tibodideni naqui ocassera tanitohui. Naraha madija ajijaro namicca imadsa madimanajarideni huapimapa huatidse-manahitohui. Tiadenipi tibodideni ocassera taraha ticcadeni ojiepi huatidsehe tojanitohui. ²¹Ajijaro imapi pina amoneje idsoni comajarossa najaro. Ejedeni comene nacassera taraha tossonahi nattipa comene huatini ajima najaro. Nadsapi ponicca ejedeni tossonajarijine ponipi huatidsejaro. ²²Tiadeni naqui nema tiquinanitohui. Ocasserani temanaraha dsotodepi tiadeni qqui omanibaqqi-pomanitohui. Nadsapi tibodidenidsa huatidsehera tojanitohui. Najaro huatidsehepi madija ohuaha-jine tossamo-jeranitohui, onajaro.

²³–Nidsa dsotodepi tohui tiquinaniccatohui ohuadsa huati tiquina-jeranitohui. Pajissehera tiadenidsa huati onana: tohui tiquinaniccatohui ohua onima Abidsana huati tiquinadsapi Abina tiadenidsa da da ihina nanitohui. ²⁴Tiadenipi ohua onima Abidsa huati huati titiquina nejeraccani. Nadsapi ohua onima Abidsa huati huati titiquina naji, ticajimananjine. Nani ticcadeni huatidsehe pajiranissa tanijine –nade Jeso.

Jesopa ajijaro dsamacca imadsa deni tojajari

²⁵–Occa marinaja ajijaro namidsa imadinicca ima tadsajani tiadenidsa mari mari ohona najaro. Naraha nidsa dsotodepi occa marinaja ajijaro namicca ima tadsajani tiadenidsa huati onapoma-jeranitohui. Abi tahimari ahuato tanijinena tiadenidsa huati onanitohui. ²⁶Najaro huada bacco tadsapi tiadenina ohua onidsa huati huati titiquina nani bica tani. Nadsama ohuapi ticcadeni huatinaja Abidsa huati oququma-jerani. Puhuapa tettideni mittahi. ²⁷Abipa tiadenidsa huati huana tahi. Ohuadsa tetideni huanana tadsa: “Pajissa Diohuaji ccaronajari” tiquinadsapi Abipa tiadenidsa huati huana tahi. ²⁸Ohuapi Abi madihihuaji omadiraha ajijaro namihuaji

occaronajarode. Jidapapi ajijaro dsama onebodsa Abihuaji occamacossaninitohui, onajaro –nade Jeso.

²⁹Nadsapi pohnadsa huati inade: –Jehe, jidapanana huati tinanissa tani. Ajijaro namicca ima jirehe huati tinadsapi imittani –inade. ³⁰–Tiapi ima huapima nahatojide tijirani nahatoto inajaro. Jidapapi tiadsa imatohui huati inejeradsa naqui, ibodicca icca huatinaja nahato tinani, inajaro. Najarojinea pajissa Diohuaji ticcaronani nahatoto inajaro –inade Jesodsa.

³¹Naraha Jeso iadsa huati tade: –¿Jidapanana pajissa tiquinanissa tajaroqui? ³²Jidapapi ohuadsa ima tojabote nani. Tiadenipi ticcadeni odsahuaji jai tijaniridsanitohui. Ohua tiaquiboni-mananitohui. Nadsapi ohua motta ojanitohui. Naraha ohuapi ohua motta jerani; Abipa ohuadsa madihi. ³³Aji ima huapima tiadenidsa huati onajaropi tibodideni huatoto cana-jeranijine. Ohuadsa tiquejenadsapi jonehe, huatidsehe pajissehecca ticajimananitohui. Ajijaro dsamadsa timadimana-ccadsapi ocasserani temanaraha dacoco tijiraji. “Epeje inana” tiquina-jerana. Ajijaro namicca dodossedepa ajamani tojahi. Ohuana pohnadsa deni ojani –nade Jeso.

Jeso pocca Abidsa huati tajari

17 ¹Najaro ima huati taha jicadsapa Jeso memehuaji qqui tamacossadsa Diodsa huati tade: –Abi, jidapanana onajorehe jicani. Memehuajicca deni tojehe ticca ejedenidsa da taji. Nahi ticca ejedenipa ticca nahatohue deni tojehecca ahuato inananiijine huapimadsa. ²Aji ohua ticca ejedenipi madija huapimadsa tijine tamine ojajaro. Aja ohuadsa tinana-baqquijaridenipa pohnadenidsa camittehe jiquejeranicca da onaridsaniijine. ³Najaro camittehe jiquejeranicca cajimana-hijinepa tiadsa noccodeni tojidserajari. Tiana Dio ojari tajaro. Tiana ia Cacahuade pajissehecca. Aji ohua Jesocristo ohua dosse taronajaropi ohuadsa naco noccodeni jidseraqquri nahi. Madija tiadsa, ohuadsa pajissa quinadsapa camittehe jiquejericca cajimanahitohui.

⁴–Nadsama ticca deni tojehepi ahuato onanajaro ajijaro dsamadsa. Aji ohua ticadossejaro huapimapi onajicanissa tani. ⁵Abi, dsama nahato-jeraccadsama tia tedseje deni tojehe icajijarode. Jidapapi najaro ohuadsa tinananiji, onajaro –nade Jeso.

Jeso pohua huatimadedenitohui Diodsa huati tajari

⁶–Jehe, madijapa ajijaro namicca imadsa madimanageraha tidini-baqquidsapa ohuadsa tinana-baqquijari. Najarideni onahatta-baqquidsapa ticca imadsa nahatoqquri nahi. Najaridenipa ticcaraha ohuadsa tinana-baqquijari. Tettidsa iboraqquri nadsa ticca marinaja eahua-mananissa tani. ⁷Jidapapa nahatoqquri nahi aji huapima ocajijaro naqui ticca daniji. ⁸Aji ohuadsa Tetti da tajaropi pohuadenidsa da onaridsani. Najaropi pohuadenidsa tojani. Pohuadenipa tiahuaji occajonanicca ima tocahatterara canahi. Pohuadenipa ohuadsa: “Pajissa Dio dosse inaronajari” quinahi.

⁹–Ohuapi najaridenitohui tiadsa huati onajaro. Ajijaro namicca imasiridsa madimanajarideni-tohuipi huati onejajaro. Aja ohuadsa tinana-baqquijarideni-tohuira tiadsa huati huati onajaro; pohuadenipa ticca. ¹⁰Aja occa huapimapa ticca. Ticca huapima naco occa, inajaro. Occa deni tojehepi pohuadenidsa ahuato tajaro.

¹¹–Jidapapi ajijaro namidsa omadidsanapo-jerani. Tiahuaji occaniraha aja pohuadenipa ajijaro namidsa madimanagerahitohui. Jehe, Abi bicabote tijani. Aja ohuadsa tinana-baqquijaridenipa ticca dacorehedsa tecahua-baqquijo, huapima ojariqquimanahijine pina tia ohua tedseje ijariqquijarossa quinahijine. ¹²Ajijaro namidsa pohuadenidsa omadiridsadsapi aji ticca dacorehe ohuadsa tinanajarodsapa ohuacahua-baqquihissa tajari. Pohuadenipa ojaría amossinaja camajararaha ojariana pohuama madiridsajaride. Pohuapa paja dsoqquerihitohui. Najaropi pina aji Tetti dsodo napojarossa nehe tojanitohui.

¹³–Jidapapi tiahuaji occanina. Naraha ajijaro namidsa omadiccadsama ajijaro ima tiadsa huati huati onajaro, nahi pohuadenipa pina aji occa huatidsehe ocajijarossa najarodsapa huatidsemaneri nahijine. ¹⁴Nadsama ticca marinajapi pohuadenidsa onanaridsaraha ajijaro namicca madijaha pohuadenidsa huattajojo tajari. Pohuadenipa ajijaro namicca imadsa toquejena-jaraha. Pina ohua ajijaro namicca oja-jerajarossa quinajari. ¹⁵Naraha tiadsa: “Pohuadeni tiaccamacossanibaqquijo” onejerani. Imasiri jinede Satanacca maidsehedsa

tojaparimana-jarahijine onadsa tiadsa: “Tecahuabaquijio” onajaro. ¹⁶Ohuapi ajijaro namicca oja-jerani. Pohnadeni naco pina aja ohuassa quinajari, ajijaro namicca quejena-jarahi. ¹⁷Ticca pajissehedsara tinana-baqqiio, onajaro, imasiri jirehe madimanahijine. Tetti pi pajissehe ponira. ¹⁸Ajijaro namidsa oadinijinepi tiana ohua ticadossejarode. Najarossa najaro ohuapi pohnadeni ocadosse-baqqijari; ajijaro namicca madija motadeni mari icanabaqqi-ridsahijine, onadsa. ¹⁹Occa madie nema nehe tiadsa accora onajaro. Aja occa mamari tabaqqi-deni naco pina ohuassa quinahijine poccadeni madie nema nehe tiadsa accoraqqiri nahijine dissera onajaro. Ticca pajissehedsara madimana-dsanapohuijine –nade Jeso.

***Pohnadsa pajissa quinajaridenitohui
Diodsa huati tajari***

²⁰–Ohuapi occa mamari tabaqqi bodideni acco ticama-baqqiio onadsa tiadsa huati huati onaraha dsotodedeni-ccatohui naqui tiadsa huati huati onajaro. Nidsa occa mamari tabaqqi otahimari eccoraridsa-manadsapi madija ohuaha dsotodedenicca naco ohuadsa pajissa quinahitohui. ²¹Najarideni naco ojariqqi-manahissa tahijine, Abi, pina ohua tia tedseje ijariqqijarossa quinahijine tiadsa huati onajaro. Pohnadeni naco iadsa ojariqqi-manahissa tahijine, onajaro. Nahi ajijaro dsamacca madijapa ohuadsa: “Dio dosse inaronajari” quinahijine. ²²Aji occa deni tojehe ohuadsa da tajaropi pohnadenidsa naqui da onaridsani. Nahi pohnadenipa ojariqqi-manahissa tahijine, pina ia ijariqqijarossa quina-hijine, onajaro. ²³Ohuapi pohnadenidsa; tiapi ohuadsa inajaro. Nahi pohnadenipa ojariqqi-manahissa tahijine. Nadsapa ajijaro dsamacca madija nahatoqqiri nahijine ticca dosseniji occajonajarode. Ajijaro ima naqui nahatoqqiri nahijine: Tiapi pajissa quinajaridenidsa teti huana tajaro, pina ohuadsa teti huana tajarossa najaro.

²⁴–Nadsama Abi, ohuadsa tinana-baqqijaripa occa-ridsanihuaji ohuadsa jahiridsahijine, ticca daniji occa deni tojehe qqii toquinahijine onadsa. Najaro deni tojehepi dsama inahato-jeraccadsama tiapi ohuadsa teti huana tadsa ohuadsa da tajarode. ²⁵Abi, ticca imapi pajiranissa tani.

Ajjaro namicca madija tiadsa noccodeni jidsaqqiri nahi. Naraha ohuapi tiadsa onocco jidsera tani. Aja ohuadsa toque-jenajaridenipa nahatoqqiri nahi; ohuadsa: “Ajaripa Diocca dosseniji” quiquina najari. ²⁶Nadsapa ojine tiadsa noccodeni jidseraqqiri nahi; naraha denima noccodeni tojidseradsanapohuijinepa nema odsanaponitohui. Aji ohuadsa tohuati huanehe ticajjaropi pohuadeni naco cajimanahijine. Ohua naqui pohuadenidsa omdiridsanijine –nade Jeso atti pocca Abidsa huati huati tadsa.

Jesocca dodosse tabaqqi tahimarideni

Los Hechos de los Apostoles

Introducción: Ajijaro imapi Roca dsodo inajaro. Rocapa doctoro. Puhuapa Jeso tahimari dsodo inapojaro. Najaro papeopi dsodode onidsa Roca, inajaro. Dsotodena Jesocca dodosse tabaqqi dsepedeni ijiridsajari tahimari dsodo inajaro. Jesodsa jehe quinajari-deni tohuapi-dsanapojari tahimarideni naqui dsodo inajaro.

Rocapa Jesodsa ccaridsa-jararaha Jesocca dodosse Pablodsa ccaridsa ccaridsa najari. Pablo tahimari, Jesocca dodosse tabaqqi ohuahadeni tahimarideni naqui dsodode dissera tajari. Pahuadenidsa huati tadsa pahuadeni tahimari mittajari. Nadsapa pohua tesse Teopirodsa dsodo inajaro, Jesocca dodosse tabaqqi tahimarideni nahato tahijine.

Dio Corime Jesodsa jehe quinajaridenidsa tojaridsajari

- 1.1-8 Dio Corime madijadsa tojahijine tahimari
- 1.9-11 Jeso Imehihuaji toccamacossanijari
- 2.1-13 Dio Corime madijadsa tojaridsapojari
- 2.14-42 Pedropa Jeso tahimari ecomerajaro
- 2.43-47 Jesodsa toquejenajaridenicca madie
- 3.1-10 Isso siri tobicahicca ima
- 3.11-26 Pedro Diodsa dada toqqimahuaji maride tojajari
- 4.1-22 Ima cattemadedenidsa Pedro Huano tedseje bajari
- 4.23-31 Dacorehe cajimanahijine Diodsa huati toquinajari
- 4.32-37 Huapima poccadeni ojariqqijari
- 5.1-11 Anania bedimeni tadsajani ima inanamanajaro
- 5.12-16 Jesocca dodosse tabaqqipa canahatorimanana canajari
- 5.17-42 Jesocca dodosse tabaqqipa najidsohue inahanamanajaro

Saoro tahimari

- 9.1-19 Saoropa Jesodsa tojajari
- 9.20-25 Saoropa Damascodsa Jeso tahimari maride tojajari
- 9.26-31 Saoropa Jerosaredsa madipomajari

Pablocca benehi dsotodecca (2'cca)

- 15.36-41 Pablo pocca benehi dsotodecca
- 16.1-5 Timoteopa Pablo Siladeni huatimade tojajari
- 16.6-10 Pablocca huadadsa Masedoniacca madija huati tajari
- 16.11-40 Pablo Sila tedsejepa Piripodsa madimanajari
- 17.1-9 Tesaronicahuaji mohuaniji tojajaro
- 17.10-15 Pablo Sila tedsejepa Bereahuaji
- 17.16-34 Pablopa Atenahuaji
- 18.1-17 Pablopa Corintohuaji
- 18.18-23 Pablo Atioquiahuaji toccanijari

Pablopa Romahuaji toccajari

- 27.1-12 Odsa panani Romahuaji Pablo dosse quinajari
 - 27.13-44 Jojode dacorehe ccajonajaro
 - 28.1-10 Maotadsa madimanajari
 - 28.11-31 Pablopa Romahuaji toccajari
-

***Dio Corime madijadsa tojaridsahijine
tahimari huati tapojari Jeso***

1¹⁻³ ¿Nija Teofiro? Ohuapi Roca. Tiadsa Jesocristo tahimari dsodo onapojaro. Aja pohua dsepe ihiji najaricca ima dsodo, aja pohua madija mari mari ihicanabaqqi najaricca ima dsodo onajonajaroa, pohua toccamacossanihi bacco tajaropaji. Jesopa dsoqquedsa ppa idsamanaraha nahatonidsapa memehuaji toccamacossani-jaraccadsa pocca dodosse tabaqquidsa aja pohua icattejidsa-baqqipojaridenidsa ahahuatoni najari. Pahuadenidsa madiridsapomaccajari. Jesodsana Dio Corime madidsa pocca dossenijicca ima pahuadenidsa huati huati tataja najari. Pocca bejo naqui pahuadenidsa nohue inadsapi: –Jehe, Jesopa pajissa assire madinipomajari –quinajari. Nadsapa huada 40 nehe pahuadenidsa madiridsapomadsa naco Diocca cacahuehecca ima mari mari ihicanabaqqi najari.

⁴Nadsama pocca dodosse tabaqquidsa madiridsapomadsa naco ajijaro ima pahuadenidsa huati tajari: –Jehe, aji odsa panani Jerosaredsa timadimanaccaji. Ajijaro imapi tiadenidsa huati onapode. Occa Abi Attipa: “Ocorime tiadenidsa da onaridsanitohui” napode. Najaro tohuini timadimanaccaji onajaro. ⁵Tahidedsama tibodideni cacajiquimeradsapi: “Occa imasiri onebona” tiquinadsapi Huanopa passodsa tiadeni topa

todsana-baqquiraha nidsa huada onihidsana Dio Pohua Corime tiadenidsa da inaridsadsapa tibodideni denima cacajiqquimeranitohui. Diopa tibodideni dsati inananitohui –najari Jeso.

⁶Huada onihidsa Jesodsa queriqquipomadsapa pocca dodosse tabaqqui pohuadsa huati toquinajari: –Ia Medsede, maittaccadsama icca idideni Isaraeridenicca cacahuehe jicaporaha ¿jidapana tijine tojapomanijinequi? –quinajari. ⁷Naraha Jeso pohuadenidsa huati tajari: –Tettidenipi: “¿Nejecoma nadsa ia Isaraeridenicca cacahuehe tojapomapadseje?” ¿tiquinajaroqui? Naraha najaro imapi ticcadeni jerani. Abi Dio Pohuana nahato tajari. Nidsa Pohua jipa tadsa ticcadeni cacahuehe tojapomanitohui. ⁸Naraha Dio Corime ccajonabote nahi. Tibodidenidsa tojaridsadsana pocca dacorehe ticajimananitohui. Nadsana otahimari maride tiquejenaridsanijine. Aji timadimananica odsa panani Jerosaredsa maride tiquejena, ticcadeni dsama Jodeadsa maride tiquejena, Jodea inorinicca dsama Samariadsa maride tiquejena naridsanijine onajaro. Aja dsama huaji tanicca madiridsa-manajarideni naco huapima otahimari



mittaridsa-manahijine otahimari teccoraridsa-manana. Aji ohuadsa jai tijaridsadsa qqui tiquinajarocca ima, aji occa marinaja timittamanajarocca ima naqui mari ticanabaqqui-ridsana onajaro –najari Jeso.

Jeso Imehihuaji toccamacossanijari


⁹Jeso pocca ima huati huati taha jicadsapa pohua huatimadedeni cattomama canaraha toccamacossanijari; meme essenidsa tohuatorajari. ¹⁰Nadsama Jeso pohua huatimadedeni memehuaji tocattamacossassa cananaja pohuadeni inoridsa maqquideje pamaha eterorideni nopoqquiri naha ahuatomanajari.

¹¹Pohuadeni attipa ajama quinajari: –Aji dsama Carireacca madija ajidsa timadimanajarodeni ¿nejecotohui memehuaji ticattamacossassa canajaro? Aja Jesopa tiadenidsa madiraha Dio idini-macossanijari memehuaji madipomahijine. Aja toccamacossanihi qqui tiquinajaripa ccanipomadsa naco najarissa nahitohui; meme essenima quejemaha namihuaji ccaronapomahitohui –quinajari.

Dio Corime madijadsa tojaridsapojari

2 ¹Nadsapi jodiodenicca ejete imenibote bacco tajaro, ejete oninipi *Pentecostes. Najaro huadadsa Jesodsa jehe quinajarideni queriquimanajari. ²Naraha amadsati memehuaji mohuini pina jojode dacorajarossa nehe mittarondsapi nani odsa bodihuaji queriquihidsa naqui jadsirema mohui tajaro. ³Nadsapi pohuadenidsa pina jororonissa nehe ahuatomaridsajaro. Tojari-baqquidsapi pohuadenidsa cajororori naridsajari. ⁴Nadsapa pohuadeni bodidsa Dio Corime tojaridsahissa tadsapa Diocca nahatohue cajimanajari. Nadsapa ojariapa *tohuatti onihidsa, ohuahapa tohuatti onihidsa, ohuahapa tohuatti onihidsa huati huati naridsamanajari. Dio Corimejine nama naridsamanajari huapima.

⁵Nadsapa jodiodeni Diocca dossenijidsa iboraqquiri najarideni dsama onihicca, dsama onihicca nahi Jerosaredda queriquimana-jari. ⁶Najarideni huapima mohuini oppina tani mittamanadsapa domo ccajonajari, amossinihuaji queriquijonamanajari. Nadsapa amossinihuaji queriquimanajarideni aja odsa bodicca huati huati toquinahi attideni mittamanajari. Tohuatti onihi, onihi cajiridsamanaraha poccadeni madija attideni jidsera neje camadsapa huajo



canirejari. ⁷⁻⁸Nadsapa aja odsa huapihuaji domo huajari attidenia: –A... ¿Nejecotohui? Pohuadenipa dsama Carireahuajiccaraha tohuatti onihidsa, tohuatti onihidsa, tohuatti onihidsa huati huati toquinajari. Etti imittaridsaha –quinajari. ⁹–Aji iqueriquinidsapa dsama huapimacca madija iquejemanipi: Partohuajicca madija, Medohuajicca madija, Eramihuajicca madija, Mesopotamiahujicca madija, Jodeahuajicca madija, Capadosiahujicca madija, Pontohuajicca madija, Asia arobenihuajicca madija, ¹⁰Pirijiahujicca madija, Pafiriahujicca madija, Ejitohuajicca madija, Ribiahujicca madija odsa panani Sirene huajira tanidsa madimanajarideni naco mittamanajari. Nadsapa odsa panani Romahuajicca madija, ¹¹Queretahuajicca madija, Arabiahujicca madija naco mitta-manajari. Motadenipa jodio madija pohuara, naraha motadenipa madija ohuaharaha jodiodenicca Diodsa toquejenajari. Iapi dsama huapimacca madija tedseje iquejemama canaraha ettidsa huati huati toquinajari: “Diopa bica tahi; canahatori canahi” quinajari. Diocca ima ettidsa huati huati toquinadsa imittapa –quinajari amossinidsa domo huajarideni attideni.

¹²Huapima jabojo quinadsapa imahaha canajari: –¿Nejecotohui nama quinajari? Iapi ¿nejecoma inapadseje? –quinajari. ¹³Naraha madija motapa jidsa jidsa quinadsa: –Coma tanicca dse quinadsa noccodeni janoqquri nadsapa mohua mohua camajari –quinajari.

Pedro jodiodenidsa huati tajari

¹⁴Nadsapa aja Jesocca dodosse tabaqqui 12 quinajari-denidsa: –Noccodeni janoqquri najari –quinahi ima mitta-manadsapa totehemamanadsa Pedrona jadsirema huati huati tajari: –Jehe, ohuemecotedeni, Isaraeri potemahi jodio iquejenajarodeni, aji dsama Jodeahuajicca, dsama huaji tanicca madija aji odsa panani Jerosaredsa ejete qquide jai tijajonajarodenima pina ohuatti titaharibobo canaji. ¹⁵Tettidenipi: “Noccodeni janoqquri najari” tiquinaraha iapi inocco janoraqquri nani. Maji huari dsatidsapa jodiodeni iapi inocco jano tohijine dsedse coma tanicca dse dse ihina najerani –najari Pedro atti. ¹⁶–Naraha aji timittamanajaropi maittaccadsama Dio Atti cacomerabote Johueo madipodsa dsodo inaponi nade; najaroa aji timittamanajaropaji. Najaroa aji qqui tiquinajaropaji. Diona Johueodsa huati tadsa dsodo inapojaro:

¹⁷“Nidsa dsama jicanicca huada tohuajiradsapi Ocorime naqui madijadsa onanaridsanitohui. Ticcadeni ejedeni dsabisso, dsohuato naqui Ohuatti ecomeraridsamananitohui. Dsabissodeni, jadahideni naco occa ima pajissehecca pohuadenidsa nohue onadsapi poccadeni huadassa nadsa qqui qqui toquinahitohui.

¹⁸Nema nadsapi aja ohuadsa iboraqquri najarideni maqquidejedeni, amonejedeni naqui pohuadenidsa Ocorime da onaridsadsana otahimari ecomeraridsamananitohui, Ohuatti naqui huati iqqimamananitohui.

¹⁹Nidsa memehuaji ocanahatori canani qqui tiquinadsa naqui tijabojomananitohui. Namihuaji occa dacorehe onanadsa naqui emenedeni toccaridsanitohui, diji tani jororoni naqui jororo canaridsadsapi essen dacorehema toccamacossadsapi meme todsidsini nanitohui.

²⁰Maji ohuihitohui; abadsico naco tocamacohua pina tohuemenessa canahitohui. Ohuapi tiadeni Medsede, occa huada deni tojanicca, denima bica tanicca bacco tejeraccadsapi najaro oppinehe huapima onanaridsaponitohui. Nadsana ohuadsa iboqquri najarideni onajidso-baqquihitohui. Ohuadsa iboraqquri najaridenina onassija-baqquihitohui.

²¹ Naraha aja madijapa: ‘Ohua Medsede, ohua naqui tiadsa ojanijine ohua tidiniji’ quinajaridenina tocassiejerahitohui,” Johueo dsodo inapodsa –najari Pedro.

²²⁻²³ Nadsapa denima huati huati tajari: –Jehe, ohuemecote Isaraeri potemahi jodio iquejenajarodeni, ohuatti titaharibobo canaji. Aja Nasaretihuajicca Jesopa Diojine pajissa canahatori canahi qqui tiquinade. “Pohuapa pajissa Dio dosse inaronajari” titiquina nanijineraha tinanadsoqquemanajari. Naraha Abi Diopa tahide nahato tapojari: “Ajima nanitohui” napojari: “Occa ejedeni tabaccoraqquri najarideni eccoramanadsa dama quinadsapa ahua porimacossanidsa inanadsoqquemanahitohui” napohui nade. Najaro imaha aji ia imadidsa qqui inajaropaji. Tijinedeni najarossa tinanamanajaropaji. ²⁴ Jesopa dsoqquehedsa tojaraha Dio idinijari. Dsoqquehecca ocasserehepi pohua mari idsanaraha Diojinena dsoqquehecca ocasserehe Jeso tappa inajari. *Dsoqquehepi Jesodsa mari dsananijinepi ssamo tani. ²⁵ Maittaccadsama tamine Dabi naco Jeso tahimari dsodo inapojaro. Pina Jeso attissa inanapodsa ima ajima najaro:

“Ohua Medsede Dio, otedsejema tia qqui qqui ohona najaro. Ohuadsa ticcaridsadsapi ticca dacorehe ocajidsapi ocappina-jerani. ²⁶ Nadsapi obodi huatidsedsa jiri jiri onajaro. Ohueme ohuassirema odsoqquenijine ocappina-jerani. Odsoqqueni onattipi ima bicani tojanitohui. Najarotohuira obodi huahuatoma najaro. ²⁷ Odsoqquedsa naqui ocorime dsoqquemanapojaridenihuaji tinebo-jeranitohui. Tijine ohueme naqui namidsa jadsijeranitohui. ‘Ajaripa occa ejedeni bica bote’ tanitohui. ²⁸ Aji tossiejehe imadidsanaponijinecca naqui ohua mari ticanajaro. Tiadsa omadidsapi ticca huatidsehe naqui ocajinitohui”

nahi nade Dabi dsodo inapodsa –najari Pedro.

²⁹ Nadsapa denima huati huati tajari: –Ohuemecotedeni, pajissehera tiadenidsa huati onana. Tamine Dabipa maittaccadsama dsoqquedsapa ppa idsamanajari. Pohua noccobiri naqui jidapana ecahuamanani paji naccani. ³⁰ Nadsama Dabipa Dio Atti cacomeraboteja najari nahato tapojari. Pohuadsa Dio huati tapodsapa: “Pajissehera tiadsa huati onajaro. Tipotemani ojariapa tamine deni tojahicca tojahitohui” napohui nade Dio. ³¹ Najarojine

Dabi pina Jeso nahatonihni qqui tapojarissa nadsa huati tapojari. Najaria aja Diocca Cattaniji Mesia quiquina najaripa “dsoqquedsa ppa idsamanaraha pohua ime jadsi-jeranitohui. Pohua corime naco dsoqqueமானapojaridenihuaji inebo-jarahitohui” napohui nade Dabi atti. ³²Najaria aja Jesocristo Djojine nahatonihni qqui inajaripaja. ³³Abi Dio Pohujinea toccamacossanijaripaja. Najaria Djojine Jesocristo deni inanadsapa pohua attidsa madija huapima iboraquuri nahijinepa Dio pohua inori nahatonihuaji inajaripaja. Diopa pina pohua huati tapojarissa najaro Pohua Corime Jesodsa da inajaropi manaco madijadsa da inaridsahijine. Nadsapa Jeso Dio Corime iahuaji dosse inaronajari. Najarijinena aji mohuini oppina tehe pina jojode dacorajarossa najaro timittamanajaro, pina jororonissa najaro naqui qqui tiquinajaropaji. Pohua Corimejinea aji tohuatti onihidsa huati huati inadsa timittamanajaropajipa. ³⁴⁻³⁵Naraha Dabipa memehuaji toccamacossa-jararaha ajaro ima dsodo inapojaro:

“Diopa Ohua Medsededsa huati tajari: ‘Ohuinori nahatonihuaji tittariji. Ohua tedsejepi tohuatti dacorajaro ticajiji. Nidsa tia huadidedenipa ajamani onana-baqquihitohui. Poccadeni dacorehe onajicanitohui. Nidsa ojinepa tiadsa attideni naco: Ohua Medsede, quinahitohui, onajaro’ ”

nahi nade Dio –najari Pedro.

³⁶–Jehe, Isaraerideni huapima, tiadenidsa pajissehera huati onajaro, tibodideni huatomaridsa-manaji. Jesopa tijinedeni dsoqqueraha Djojine nahatonidsapa aja ia Medsede tojararipaja. Cristopa Dio icattajari Ia Idinide tojarari –najari Pedro atti.

³⁷Najaro ima mittamanadsapa jadsirema bodideni ocassera tadsapa oji quinabote najari. Nadsapa Pedrodsa, Jesocca dodosse tabaqqi ohuahadenidsa naco huati toquinajari: –Jaho, imecotedeni, iana ¿nejecoma inapadseje? –quinajari.

³⁸Nadsapa Pedro pohuadenidsa huati tajari: –Ticcadeni imasiri tinebomanaji, Diodsa tiquejenanijine. Nadsana Dio ticcadeni imasiri epeje inanadsapi totopa ticajimanani bica tani. Jesocristo onidsa totopa ticajimanaji. Nadsana Dio Pohua Corime tibodidenidsa tojaridsahijine. ³⁹Pina Dio Pohua huati tapojarissa najaro: “Ocorime tiadenidsa da onaridsanijine” napohui nade. Nadsapa tiadenidsa, ticcadeni ejedenidsa, tipotemanidenidsa naco Pohua Corime da inaridsahitohui. Aja

dsama huaji tanicca madiridsa-manajaridenidsa naco Pohua Corime da inaridsahitohui. Ia Medsede Dio huahua inabaqqi-jaridenidsana Pohua Corime da inaridsahitohui –najari Pedro.

⁴⁰Nadsapa Pedro denima huati huati tajari. Pohua attidsa jehe quinahijine oji nabote nadsa huatide dissera tajari: –Nidsa Diocca huadie tojadsapi pohuadsa iboqquri najarideni dsori tocanire-jarahitohui. Jicahitohui. Najaridenidsa tiquejema-mana tejeraji. Tiajimanani naji –najari Pedro.

⁴¹Pedro atti mittamanadsapa denima Jesodsa toquejenahi 3 mil quinajari. Najaridenipa amadsati totopa cajimanahijine passohuaji jai tojedsippadsa topa idsanabaqqijari.

⁴²Nadsapa Jesocca dodosse tabaqqicca marinaja mitta-mana-dsanapojari. Nadsapa huapima cajonerara canadsapa pina catidserara canajari. Queriquidsa naco huapima jijipa-qquimana najari. Nadsama pohuadeni Medsede Jesodsa bodideni huatomahijine naco pan dside narihi jijipamana najari. Diodsa naco huati huati dsadsanapomana najari.

Jesodsa toquejenajaridenicca madie

⁴³Nadsapa Jesocca dodosse tabaqquidsa Diocca dacorehe bacco tadsapi nahatoqquri najari. Dio Pocca nahatohue pohuadenidsa tojaridsadsapi, aja madija comaqquiri najarideni naco ihinanomibaqqumana najari. Nadsapa madija huapima Diocca dacorehe qqui toquinadsapa: –A... ima bicani tojaridsani –quinajari. ⁴⁴Nadsama Jesodsa jehe quinajarideni bodideni pina ojariqquimanadsapa pohuadeni dsepetaji, pohuadeni tapari naco pohuadeni tessedsa ahuaji da ahuaji da quiquina najari. ⁴⁵Pohuadeni dsepetaji mota naqui manaconidsa da quinadsapi dsiniro cacajimana najari. Najaro dsiniropi pohuadeni tesse cappiramanajaridenidsa da da quiquina najari. ⁴⁶Diodsa dada toqquimahuaji naco jajaitojedsima najari. Poccadeni odsahuaji naco ahuaji jipa, manaco ahuaji jipa nanaridsamana nadsapa bodideni pajissehema huatidsemaneri nanaja najaripaja. ⁴⁷–Abi Diopa bica tahi –quiquina najari. Madija ohuahadeni naco, aja Jesodsa jehe quinajarideni qqui toquinadsapa: –Bicaqquri nahi –quiquina najari. Nadsapa ia Medsede Jeso pohuajine pohuadsa jehe quidsati denima tohuapija dsanapohui najari. Huada ssiaja madija ohuahadeni, huada ssiaja madija ohuahadeni dsanapomanajari: –Jesopa ohua tonassiajahi –quiquina najari.

Isso siri tobicahicca ima

3 ¹Nadsapa huada onihidsa Pedro Huano tedseje Diodsa dada toqquimahuaji maji tohuenajonajari pina 3'dsa tohuededsimajari. Najari majidsa jodiodeni Diodsa huatide jajaitojedsima najari. ²Naraha noccobiji onini Bicani quiquina nahidsapa maqquideje isso siri nama naha tossonahipa pocca madija huajijiradsa ihinequemana nadsa noccobiji inorinidsa ihinahittamana najari. Nahihuaji madija jajahitojeqquma nadsapa: –Ohuadsa da tiquinaji –tatacossa najari. ³Nadsama isso siripa Pedro Huano tedseje huedajonahi qqui inabaqquijari. Noccobiji bacco najonamanadsapa: –Jari, ohuadsa dsiniro da tiquinaji –najari Pedrodenidsa. ⁴Nadsapa Pedro Huano tedseje isso siri qqui toquinadsapa Pedro pohuadsa huati tajari: –Jari, iahuaji qqui taji –najari. ⁵Nadsapa pohuadenihuaji qqui nanaja pohua bodi: “Ohuadsa dsiniro da quinanjine nitide” najari. ⁶Naraha Pedro attipa: –Ohuapi dsiniro ocappirani. ¡Nohuerani! Naraha Abi Djojine nahatohue ocajidsapi tia acco ocamanijine. Nasaretihuajicca Jesocristo onima huati onajaro. ¡Titehemadsa ticcaridsaji! –najari. ⁷Nadsapa Pedro isso siri dsepe nahatonihuajiccadsa dama nadsa joca imadsapa tothemajari. Djojine pohua amori, amori cocorini naqui tobicajaro. ⁸Nadsapa isso siri ccaridsahi tobicadsapa joppa joppa naridsajari. Nadsapa Pedrodenidsama Diodsa dada toqquimahuaji toqquedsima-jari. Nadsapa huatidseri nadsa joppa joppa nadsa: –¡Diopa bica tahi! ¡Diopa deni tojahi! –naridsajari. ⁹Nadsapa Diodsa dada toqquma bodidsa ccaridsadsapa madija ohuahadeni qqui toqui-najari. Diodsa huatidsehi naco mittamanajari. ¹⁰Nadsapa: –A, ajaria Noccobiji Bicani quiquina nahidsa dsinirotohui huihuittacossa naccade –quinajari. Jabojo quinaraha huatidsemanajari.



***Pedro Pórtico de Salomón*dsa huati huati tajari**

¹¹Naraha isso siri tobicahipa Pedrodenidsa dissera tadsapa pohuadenidsa maridsanaja naridsajari aja Diodsa dada toqquima boroni inidi tetepini cajini oninipi Pórtico de Salomón quiquina nahidsa isso siri tobicahi qquide huapima queriqquijari: –A... ¿nejecoma najari? –naridsamanajari.

¹²Naraha Pedro madija queriqquihi qqui tadsapa pohuadenidsa huati tajari: –A, ohuemecote Isaraerideni aja isso siri tobicadsa ¿nejecotohui ia cattade tiqueriqquijaro? Tibodidenipi: “A, pohuadeni ehuerahi dacorehe cajimanajari. ¡Nahatoto tajari-
raha!” ¿tiquinajaroqui? “Aja pohuadenipa Diodsa bicaquiri nadsa isso siri inabicamanahi” ¿tiquinajarorane? Naraha ia ijine jarahi, Diojinena tobicajari –najari Pedro.

¹³–Icca Abi Diopa, icca idideni Abarahao, pohua bedi Isahaca, pohua bedi Jacobo quinajaridenicca Dio. Puhuapa isso siri inabicadsapa Pohua Bedi Jeso pocca Cattanijija najari deni inanajaripaja. Najari Jesoa tijinedeni todsepe tojajaride. Tamine Pirato attipa: “Jeso apaja onanadsa tappa onadsa toccanihijine” naraha tiadenipi tettajomanadsa: “¡Ahua porimacossanidsa dsoqquena dsoqquena!” tiquinadsa tijinedeni dsoqquejaride –najari Pedro. ¹⁴–Diocca Cattaniji, aja Mesiapa, pohua bodi ssiaja, pocca ima borocco taraha pohuadsa pajissa tiquinejeradsapi tamine Piratodsa huati tiquinajaro: “Barabana tappa tinajo” tiquinajaro, pohuapa toponi nanadsoqquede-
raha. ¹⁵Tiadenipi camittehe jinede tinanadsoqqueமானaraha Diojine nahatonidsa Dio pohuahuaaji toccamacossanijaride. Iapi pajissehe qqui inajaroa aji nahatoqquri inajaropaji.

¹⁶Najaria aja Dio Bedi Jesocristo pohujinena jidaccadsama isso siri tobicahi qqui tiquinajaripaja. Ia ettipi: “Jesopa pajissa canahatori canahi” inadsapi pohuana isso siri inabicahi qqui tiquinajaripaja –najari Pedro.

¹⁷–Jehe, occa madijadeni, tiadenidsa ohuattipi: “Tijinedeni Jeso dsoqquejari” onaraha tibodideni ssamoqquri napodsa tinanadsoqqueமானajari nahato onajaro. *Diodsa dada toqquimade taminedeni naco bodideni ssamoqquri nadsa Jeso inanadsoqqueமானaride. ¹⁸Naraha Diopa pocca Cattaniji Mesia ocasserani ahuadsa dsoqquehijine nahato tapojari.

Maittaccadsama Dio Pohua Atti cacomerabotedenidsa naco Mesia dsoqquehi tahimari huati tapodsa dsodo quinapojaro. Najaro imassa najaro tojajarode, pina aji Dio huati tapojarissa najaro tinanamanajaropaji.

¹⁹–Najarojinea tiadenidsa ohuattipi: Jidapapi tibodideni cacajiquimeraji, Diodsa tiquejenaji, onajaro. Nema tiquinadsapi Dio ticcadeni imasiri sse inanitohui. Nadsapa Dio tibodideni jassi tonana-baqquihijine. ²⁰Pohua Bedi Jeso icatta-pojaripa tiadenidsa dosse inaronapomahitohui. Najaria aja tiadeni Idinide tojajaripaja. ²¹Jidapapa Jesocristo memehuaij madiccahi, naraha nidsa Dio pohua jipa tadsa dosse inaronapomahitohui. Nadsana dsama huapima inabiquemanitohui. Najaro ima naqui maittaccadsama Dio Atti cacomerabotedeni dsodo quinapojaro. ²²Najaro imapi *Moisesi pocca madija Isaraeridenidsa dsodo inapojaro:

“Ia Medsede Djojine icca madija ojaría Pohua Atti cacomerabote tojahitohui, pina ohua cattajarissa inanahitohui. Najari Attidsapi ibobora tinaji.

²³Naraha Pohua Attidsa madija ibobo tajaripa Dio ettajobaqquihitohui. Pocca madija toquejenajarahitohui” napohui nade Moisesi.

²⁴Nadsama Moisesi dsoqquehi natti Dio Atti cacomerabote Samohue naco najaro imassa najaro dsodo inajaro. Aja Samohue dsoqquehi natti naco Dio Atti cacomeraquiriti najarideni huapima naco dsodo najonamanajari. ²⁵Nadsama tiadenipi najarideni potemahi tiquejenani. Poccadeni dsodoniji tiadenidsa tojajaro. Diopa icca ididenidsa naco huati tapojari: “Abarahaodsa huati onapojarossa najaro onananitohui” napojari. Najaropi tiadenidsa tojajaropaji. Aja Idi Abarahaodsa Dio Attipa:

“Tipotemani dsotodecca naco pohuajine ajijaro dsamacca madija huapimadsa ima bicani tojaridsanitohui” napohui nade Dio. ²⁶Najaria Dio Pohua Bedi tahide aji Isaraerideni tiadenidsa dosse inaronapodsa pina madijassa naha tossonajaripajade. ¿Nejecotohui Pohua Bedi aja nami-huaij dosse inaronajari? Pohua Bedijine tiadeni huapima ima bicanihuaij tiquejenanijine, aja pohuapa tiadeni huide inahuajani-baqquidsapi aji ticcadeni imasiri tinebomananijine –najari Pedro pohua imecote Isaraeridenidsa.

Ima cattemadedenidsa Pedro Huano tedseje bajari

4¹Nadsapa Pedro Huano tedseje ima huatide toquejena-dsanaporaha dada toqquimade tamine motadeni bacco najonamanajari. Dada toqquima cacahuadedeni taminema jahidsima, jodiodeni mota sadoso imadsa jehe quinajari-deni naco jahidsima najari. ²Najaridenina Pedrodenidsa huadimanajari. Pedro pohuadenipa Jesocristojine madija tocassiejerahijine tahimari maride toquejenajari. –Jesopa dsoqqueraha Diojine nahatonijaride. Pohuajinepa madija naco nahatonimanahitohui –quinahi mari icanabaqquiraha taminedenipa najaro imadsa jiperaquiri nadsa huadimanajari. ³Nadsapa Pedro dama, Huano dama quinadsa toponi cocorodsa cororo idsimamanajari. Nadsapa: –Maji toccahi, dsemassana imarideni icattemanijine –quinajari. ⁴Naraha motadenipa Pedrodenijine Dio Atti mittamanadsa pajissa quinajari. Najarideni aja jehe quinapojarideni tedsejepa huapi tajari. Maqquideje pohuarapa 5 mil quinajari. Amoneje ejedenimapa onideni hua quina-jarahi.

⁵Huada ssiajapa imahaha canahijine Jerosaredsa queriqquijari: taminedeni, ime jocohuideni, jodiodenicca marinaja maridedeni quinadsa queriqquijari. ⁶Anasa naco nahi pohuadenidsama quejemajari; pohuapa dada toqquimadedenicca tamine deni tojajari. Pohuapa taminedenicca tamine. Caipa naco nahidsa quejemajari; pohuapa Anasadsa: Coco, najari. Anasa pohua imecotedeni naco nahidsa quejemamanajari. Ojaria onipa Huano, ohuaha onipa Arejadro, denima huapi taha nahidsa quejemamanajari. ⁷Nadsapa: –Pedro Huano tedseje huedenadsa huedajonana –quinadsa tohuideni madija dosse quinajari. Nadsapa pohuadenihuaji huedajonadsa queriqquimanahi nocconidsa bajari. Nadsapa pohuadenidsa huati toquinajari: –Jari, toponi tonabicedepi ¿nejecohuajicca ticahatterajarotte? Ticcadeni nahatohue ¿nejecohuajicca ticajimanajarotte? Aja isso siri tinabicamanajaricca ima iadsa tecomeramanaji –quinajari taminedeni atti.

⁸Nadsapa Pedrodsa Dio Corime tojahissa tajarijine cappinera tadsa ecomerajaro: –Jehe, taminedeni, ime jocohuideni, tiadenidsa huati onana. Titaharibobo canaji.

⁹Tettidenipi: “¿Nejecoma tiquinadsa isso siri tinabicamana-jaritta?” tiquinajaro. Tettideni onihi naqui: “¿Nejecohuajicca dacoreheda toponi tonabicade ticahatterajarotte?” tiqinajaro. ¹⁰Jehe, nadsama najaro imapi tiadenidsa huati onana, icca madija Isaraerideni huapima naco bodideni nahatoqquri nahijine huati onana. Iapi: “Pajissa Nasaretihuajicca Jesocristo atti dacorani” inajaro. Pohua onima isso siridsa: “Titehemadsa ticcaridsaji” inadsapi Jesojine isso siri tonomijaripaja. Najaria aja tobicahi qqui tiquinajaripaja. Najari Jesopa tijinedeni ahua porimacossanidsa coba tidsanamanadsa dsoqqueraha Diojine nahatonijaripaja. Puhujinea aji nahatohue icajijaropaji.

¹¹Najari Jesopa tettajomanaraha Diojine madija huapimadsa deni tojajari. Jeso tettajomanahipa pina ajijaro imassa najaro. Najaro imapi Dio Attidsa dsodo nani ajima najaro:

“Odsa sibadsa icanahatomananijinepi nanahatodedenipa siba ojariepi ettajomanani nade.

Naraha dsotodepi najaro sibana odsa daco cajiranijine tojajaro.”

Jeso Attidsa teribodeni sibaqquri nadsapi najaro imassa tinanamanajaro. ¡Jesopa tettajomanaraha Diojine deni tojaripaja! ¹²Madija ohuahapa icca imasiri inatappanijine nohuerahi. Diocca daniji Jesona Ia Idinide ojarijari. Dsama huapimadsa madija ohuaha ia tonassaja-baqquihijine nohuerahi. Nidsaranibote Diocca huadie tojadsapi Jeso pohuana ia dsori tonana-baqquihijine ojarijari –najari Pedro.

¹³Nadsapa Pedro Huano tedseje pohuadeni cacomeramanadsa taminedenipa huajo caniredsa: –A, ¿iadsa cappinenera tajarico? –quinajari. Pedrodenicca madie tahide nahatoqquri nadsapa: –A..., pohuadenipa pohuama madimanaccade; *Moisesicca marinaja, Dio Atti cacomerabotedenicca dsodonajadsa ssamomo taccade.

Jeso huatimade toquejenadsapa tocahatterajari itidija –quinajari.

¹⁴Nadsapa taminedeni Pedro Huano tedseje idsahuabaqqui-manahitohuiraha nahi inoridenidsapa isso siri tobicahi huahi paja nadsapa apaja quinajari. ¹⁵Nadsapa Pedro, Huano, isso siri tobicahi quinadsa taminedeni dosse ininebaqquijari. Nadsapa jai tojenahi nattidenipa pohuadenira imahaha canajari: ¹⁶–¿Nejecoma inana-baqquihijine? Naraha pohuadenijine isso siri tobicaha: “Maidsehe” inejerana. Aja Jerosarecca madija huapima qqui toquinaja nahi

–quinajari. ¹⁷–Naraha Jeso tahimari tojaridsadsapi toppinara. Jari, ajima inana: “Paji, tipamajonarana” inana, Pedrodeni cappinamanahijine. Nadsana Jeso tahimari denima mari dsanapomana-jarahijine –quinajari taminedeni atti.

¹⁸Nadsapa Pedro, Huano, isso siri tobicahi quinajarideni-tohui huahua quinapomajari, jahidsimanipomadsa taminedeni pohuadenidsa huati toquinajari: –¡Epeje tiquinaji! Jesocristo tahimari mari maripi tinebomanaji –quinajari. ¹⁹Naraha manaco Pedro Huano tedseje pohuadenidsa huahuatiti tajari: –Diopa tettideni mittahi. “Ettidsara ibobora tana” ¿tiquinajaroqui? Nema tiquinadsapi “Dio Atti tinebomanaji” tiquinajaro nitide –quinajari. –Jari, najaro ima tibodideni huatomaji. Tettideni nema tiquinadsapi ¿Diodsa bica tapadseje? ²⁰Naraha iapi Dio Attidsara dissessera inanitohui. Dio Atti ecomanjinepi jipepera inani. Aji ia qqui inajaro, ia imittajaro maride inebo-jeranitohui –quinajari Pedrodeni.

²¹⁻²²Nadsapa taminedeni atti Pedrodenidsa: –Paji tipamajonarana –quinajari. Denima jara inabaqqui-manadsapa tappa inabaqqui-manajari. Taminedenipa Pedro Huano tedseje inajidsobaqqui-manahitohuiraha madijadeni noppine cappinamanajari. –Iadsa huadimananara –quinajari. Aja isso siri Diojine tobicahi huapima qqui toquinadsapa: –Diopa bica tahi –quinaja nadsa taminedeni cappinamanajari. Nadsama isso siripa huajano huapi taha tonomi-jararaha huajanori 40 denima cajidsana tobicajari.

Diocca dacorehe cajimanahijine Pohuadsa huati toquinajari

²³Nadsapa taminedeni Pedro Huano tappa inabaqqui-manadsapa tohuedanijari. Jesodsas jehe quinajaridenidsa baccotanimanadsapa tamine attideni huati, ime jocohui attideni huati tanimanajari. ²⁴Nadsapa najaro ima mittamanadsapa huapima Diodsa huatide toquejenajari. Poccadeni huatinajapi ojariqqui-jarossa nadsa Diodsa huati toquinajari: –Abi Dio nahatojide tijirani. Tiana meme tinahato, dsama tinahato, coridsa tinahato, huapima tinahatoridsajari –quinajari. ²⁵–Maittaccadsama naco icca ididenicca tamine Dabi aja ticca medse Ticorimejine bodi nahato tadsa ajijaro ima dsodo inapojaros:

“¿Nejecotohui madija ohuahadene huapima huadiquiri najari? ¿Nejecotohui icca madija Isaraeridene naco tabaccorehe inanamananijine bodidene huahuatomamana najaritta?” napohui nade. ²⁶“Aja dsama huapimacca tamedidene huadie inanamananijine toqueriqquidsa ia Medsede Diodsa jara jara quinajari. Dio Pocca Cattaniji Mesiadsa naco jara jara quinajari” napohui nade Dabi.

²⁷Najaro imassa najaro tojajarode. Aji Jerosaredsa queriqquimanadsa tamine Herode, tamine Ponsio-Pirato, dsama onihicca madija, icca madija Isaraeridene quinadsa naco ticca ejedene bicabote inanadsoquemanahijine jara jara quinajaride. Najaria aja Jesocristo tiadsa ibora tajari ticattapojari, Mesia ia Idinide tojahijineraha poadsa huadiquiri nade. ²⁸Abi Dio, aji tettipi Dabijine dsodo nani maittararaha tamidene najarossa inanamanajaro –quinajari.

²⁹–Jidapana naqui, ia Medsede Dio, ia qqui tinabaquiji. Iadsa huadiquiri najari. Iapi ticca dodosse tabaqqi iquenaraha iadsa jara jara quinahi. Nadsapi ticca dacorehera iadsa da taji, nani icappinejeradsa tetti ecomeraridsanijine. ³⁰Nadsama ticca dacorehe iadsa tinanaridsadsapi comaquiri najaridene naco titinanomi-baqqi najo. Ticca ejedene bicabote Jesocristo oni deni tojahijine naco ticanahatoriri canaji, inajaro –quinajari Diodsa huati toquinadsa.

³¹Naneje Diodsa huatide jicadsapi najaro odsapi jene jene canajaro. Nadsapa Dio Corime poadenidsa tojaridsahissa tajarijine cappinamana-jaradsa Dio Atti ecomeraridsa-manajaro.

Huapima poccadene ojariquijari

³²Nadsapa Jesodsa jehe quinajaridene huapima poccadene ima najarossa caniquimeradsapa jehe canirere canajari. Poadene dsepetaji naqui poadene attipa: –Ohua mottacca –quina-jarajari. Todsepetaji, dsamatapa naco huapima poccadene ojariquijari. Najarossa nadsa poadene dsepetaji dade accoraquiri najari. ³³Nadsama Jesocca dodosse tabaqqi poadenipa Jeso nahatonih qqui toquinajaricca ima huati huati dsanapomanajari. Diocca dacorehejine attidene dacoradsapa taharibobo canajaridene bodidenedsa huana tajaro.

Nadsapi Diocca huatidsehe, pocca tohuati huanehe naqui huapimadsa tojaridsajaro. ³⁴⁻³⁵Nadsapa huapima cappirama jarajaripaja. Poccadeni dsama, odsa naqui cacajimanageri najaria aji dsinirotohui da da quiquina najaripaja. Da quina-dsapi dsiniro cajimanadsapa Jesocca dodosse tabaqquidsa da da quiquina najaropaji. Nadsama Jesocca dodosse tabaqquipa cappiramanajaridenidsa da da ihiquimamana najaropaji.

³⁶Nadsapa madija ojaría onipa Dsodse najarossa najaro inanajaro. Puhuapa *rehuitadeni jinodi. Puhuapa dsama bedeni passo imenidsa huittidsacossani onini Sipredsa tossonajari. Puhuapa Jesocca dodosse tabaqqi pahuadsa: Bernabe, quinajari. Puhuadeni attidsapi: Toponi nanahatidsede, quinajari. ³⁷Najari naco pohua madihicca dsama mota da inajaro dsinirotohui. Nadsapi pocca dsiniro Jesocca dodosse tabaqquidsa da inajaro.

Ananiapa bedimeni tadsajani ima inanamanajaro

5 ¹Naraha madija ojaría onipa Anania, bedimeni Sapira tadsajani poccadeni dsama bedeni da quinajaro. ²Anania bedimeni tadsajanipa poccadeni dsama manaconi dsiniro motapi pahuadenidsa ecahuanamanajaro. Ananiapa pohua motta dsiniro motara Jesocca dodosse tabaqquidsa dsojo idsimadsa pahuadenidsa da inajaro. Pahuadenidsa: –Aja, icca dsama manaconi dsiniro nema nehe –najari Anania, naraha maidsajari.

³Naraha Pedro pahuadsa huati tajari: –Anania, ticca dsama manaconi motapi tinajimani. ¿Nejecotohui maidsehe jinede *Satana attidsara ibora tinadsa Dio Corimedsa timaidsajaro?

⁴¿Ticca dsamapi ticca jeraqui? Ticca dsama da tinadsa ¿manaconi naqui ticca dsiniro jeraqui? Najaro dsiniropi ticcaraha ¿nejecotohui tibodidsa maidsehe tohui tajaro? “Madija ocamaidsabaqquina” taraha Diodsana timaidsajaro –najari Pedro.

⁵Nadsapa Anania Pedro atti nama nahi mittadsapa huatiajari; edima... bohua najari. Nadsapa Anania huatiaticca ima huapima mittamanadsapa cappinaridsa-manajari. ⁶Nadsapa najaro odsacca dsabisso madimanajarideni toتهمamana, Anania assire jore inaquimanadsa dsojo ininemanajari ppa idsamanahijine.

⁷Nadsapa maji 3 tossoniqquimadsa Anania dsoqqueraha bedimeni ssamo tadsa ccjonajaro. ⁸Nadsapa Pedro ponidsa

huati tajari: –¿Ticcadeni dsama manaconipi dsiniro ajima nehe tiadenidsa da quinajaroqui? –najari.

Nadsapi Sapira attini: –Jehe, manaconi najarossa nehe da quinade –najaro.

⁹Naraha Pedropa: –Jaho, ¿nejecotohui Dio Corimedsa maidsadsa tinajaro? Tiadeni pamehe: “Dio Corime nattome inana, icca maidsehe qqui tajarahi” ¿tiquinajarorane? Jari, qqui taneje, ajacca jahinijaripa ticca maqqui ppade jahinijari. Nidsa tia naqui tia ppa idsamananijine tia dsojo quinanitohui –najari.

¹⁰Naneje Sapira naqui huatiadsa edima... bohua najaro. Dsabisso jainidsa qqui toquinaneje huatiani poneje najaro. Nadsapi poni naqui dsabisso dsojo ininemanajaro, maqqui inoridsa ppa idsamananijine. ¹¹Nadsapa Jesodsa toquejenajari-denidsa oppinehe imeni tojajaro. Madija huapima ima mitta-manadsapa Dio noppine cappinaridsa-manajari.

Jesocca dodosse tabaquipa canahatorimanana canajari

¹²Nadsama Jesocca dodosse tabaquipa Diocca dacorehe pohuadenidsa tojaridsadsapi nahatoqquri najari. Canahatorimanana canadropa Jerosarecca madija qqui toquinajari. Aja Jesodsa toquejenajaridenipa Diodsa dada toquima boroni inidi tetepini cajini Pórtico de Salomón quiquina naidsa quequeriqquimana najari. ¹³Naraha madija mota Jesodsa jehe quina-jarajaridenipa Jesocca madijadsa quejemamanahijine cappinaqquri naraha pohuadeni attipa: –Jesodsa jehe quina-jaridenipa bicaqquri nahi –quinajari. ¹⁴Naraha madija mota ia Medsede Jesodsa jehe quidsatipa maqquideje amoneje quinaha tohuapijari. ¹⁵Nadsapa madija comaqquri najarideni huapima taborodenidsa dsojo dsojo icanajonamanajaripaja. Jahui inididsa pohuadeni taborodsa poporiri naridsajari. Pedro tedsejema: –Nidsa Pedro aja toqqeqquimadsa majidsa pohua corime pohua nahuine iadsa bacco tadsapi icanomirenitohui –quina-jari. ¹⁶Madija Jerosare huajira tanidsa madimanajarideni, odsa capamema najaro onihicca, onihicca naco bacco najonamanajari; comaqquri najarideni eccajonabaqqi-manajari; madija bodidenidsa Satanacca dodosse tabaqqi madidsaridsa-manajarideni naco eccajonabaqqi-manajari. Nadsapa najarideni tocanomire-ridsajari; Satanacca dodosse tabaqqi naco jai tojenaridsajari.

***Jesocca dodosse tabaqqipa
najidsohue inahanamanajaro***

¹⁷Naraha aja dada toqquimadedenicca tamine deni tojajaripa pocca madija tedseje comaquiri najarideni tocanomi-rehi ima mittamanadsapa huadimanajari. Aja pohuadenipa sadoso imadsa jehe quinaja najari. ¹⁸Najari pohuadenina soldado icadossebaquidsa Jesocca dodosse tabaqqi itadamanadsapa toponi cocorodsa hua idsimamanajari. ¹⁹Naraha dsome nocconi tojadsa Diocca dodosse memehuajicca ahuatodsapa toponi cocorocca noccobiji icatabojidsadsa iaquena-baquidsapa dosse inanibaquijari: ²⁰–Jai tjaniji, Diodsa dada toqquimahuaji ima huati tinanimanaji. Madija huapima camittehe jiquejericca cajimanahijine ima mari ticanabaqqi-manana –najari Diocca dodosse tabaqqi memehuajicca. ²¹Nadsapa Jesocca dodosse tabaqqipa iboraquiri nadsapa dsidsidsamassa Diodsa dada toqquimahuaji jai tojedsimadsa mari icanabaquijari.

Naraha dada toqquimadedenicca tamine deni tojajaripa pohuadsa queriquimanajarideni naco ssamoquiri naja najari. Nadsapa *jodiodeni ima cacattemadedeni queriquimanahijine huahua inabaqqi-manajari. Nadsapa dada toqquimadedeni mota, ime jocohuideni mota naco, aja jodiodenicca marinaja maridedeni mota jahijonadsa queriquimanajari. Nadsapa poccadeni medsedeni dosse inabaqqi-manajari toponi cocorohuaji: –Jesocca dodosse tabaqqi teccanibaqqi-manajo –quinajari. ²²Nadsapa jai tojajari, toponi cocorohuaji bacco toquinadsa qqui toquinaraha Pedrodeni amossihuaja najari. Nadsapa domo ccanidsa ima huati nanimanajari: ²³–Noccobijipi pico cadsacossanissa tani, bodicca noccobiji cacahuadedeni naco huahueri naridsahi, icatabojidsadsa jajjedsimaraha Jesocca dodosse tabaqqipa nohue quirapa. Qqui inabaqqi-jarahi –nanimanajari. ²⁴Nadsapa dada toqquimade taminedeni, nahicca odsa cacahuadedenicca tamine tedseje najaro ima mittamanadsapa huajo canirejari. Imahaha canadsa: –Jaho, ¿nejecoma quinajari? ¿Nejeco ima tojapadseje? –quinajari. ²⁵Nanaja ojaría qquedsimadsa taminedenidsa huati tajari: –Maitta toponi cocorodsa hua todsimajaripa Diodsa dada toqquimahuajina madija maride

toquejenapa –najari. ²⁶Nanaja Diodsa dada toqquimacca odsa cacahuadedenicca tamine, pocca dodosse tabaqqui tedseje ima mittamanadsapa Jesocca dodosse tabaqquitohui jai tojajari. Bacco inabaqqui-manadsapa mohuaradsa jina inanibaqqui-manajari. Puhuadene iquinabaqquihi noppine cappinamandsapa Jesocca dodosse tabaqqui inajidsobaqqui-manajarajari. ²⁷Nadsapa jodiodene ima cacattemedene queriqquimana-hihuaji eccanibaqqui-manadsapa dada toqquimadedenicca tamine deni tojajari puhuadenidsa huati huati tajari: ²⁸–Madija mari mari tinebomanaji, inade. Naraha ¿nejecotohui mari mari tinebomana-jerajaro? Jidapapa aja Jerosarecca huapima ticcadene marinaja tocahatteraridsahi. Tijinedene iadsa ima ssonarini, tettidenipi: “Jodiodenijine Jesocristopa dsoqquejari” titiquina naraha ettipi: “Ijine jarahi” inajaro –najari tamine deni tojahicca atti.

²⁹Nadsapa Jesocca dodosse tabaqqui tamine atti ecomeramanajari. Pedrona huati tajari: –Ia huapima Diocca madija iquejenadsapi tahidepi pahuadsaha iboraqquri inanina bica tani, dsotodena madija attidsa iboraqquri inanijine. Naraha madijacca dossenijipi pina Diocca dossenijissa nejera-dsapi Diocca dossenijidsara iboraqquri inanina bica tani.

³⁰Abi Diopa icca ididenicca Dio; najarijinena Jeso nahatonijaripaja. Tijinedene ahua porimacossanidsa dsoqquedsa ppa tidsamanaraha nahatonijari. ³¹Diopa Pocca dacorehe Jesodsa inanadsapi deni inanajaripaja. Dio Pohua inori nahatonihuaji Jeso inahittaridsapa pahuajine madija huapimacca tamine tojajari. Dio pahuajine madija tonassiajade tojaripaja. Ia Isaraeridene Tonassiajade tojadsapa pahuajine ibodi cacajiqquimeradsapi Diodsa iquejenajaro. “Icca imasiri inebona” inadsapi pahuapa icca imasiridsa: “Ohuati ajimani” najari.

³²Iapi Jeso tahimari nahato inadsapi pajissehera huati inajaro. Aji innocodsa qqui inajaro, eribodsa imittajarora tiadenidsa ecomeraridsajaropaji. Dio Corime naco nahato taja najari pajissehera mari icanabaqquijari. Najaria aja Dio Pohua Attidsa iboraqquri najaridenidsa Pohua Corime da inaridsajari –najari Pedro, Jesocca dodosse tabaqqui tedseje.

³³Nadsapa taminedeni najaro ima mittamanadsapa nacasseraqquri nadsa huadimanajari. –jJari, jicana!

–quinajari. ³⁴Naraha jodiodeni ima cacattemade queriqui-manajari ojaria totehemadsa pohua tessedenidsa huati tajari. Pohuapa Moisesicca marinaja mamaride, marinaja onini pariseodsa naco dissera tajari. Huapima pohuadsa: –Bica tahi –quiquina najari. Pohua onipa Camarieo. Najari totehemadsa Jesocca dodosse tabaqqui amossinihuaji dosse imabaqqui-jari. ³⁵Nadsapa taminedenidsa huati tajari: –Paji, occa madija Isaraerideni. “¿Pohuadenidsa nejecoma inanijine?” tiquinadsapi mohuaradsa tibodideni huatoma-manaji. Ima tojarana. ³⁶Tibodideni huatoma-mananissa taji. Ajana, maittadsama onihima nadsa Teoda madipodsapa pohua atti: “Ohuapi nahato onani” nanaja nadsapa madija 400 quinaha pohuadsa toquejenajari. Naraha madijajine Teoda dsoqquedsapa pocca madija tojari-baqquidsapa pocca ima jicaqquijarode –najari Camarieo atti taminedenidsa. ³⁷–Nahi dsotode madija onideni dsodode toquejenadsa naco Carireahuajicca Joda ccajonajari. Romanodeni mohua inabaqqui-manahijine madija inaqueriqquiraha dsoqquedsapa tojari-baqquijari. ³⁸Nadsama tiadenidsa ohuattipi: Epejena, pohuadeni tinebobaqqui-manajo onajaro –najari Camarieo atti. –Poccadeni ima Diocca jeradsapi nidsa jicanitohui. ³⁹Naraha pohuadenipa Diocca dosseniji nitidija. Pajissa Diocca ima tojadsapi Diocca ima tinajicamananijine ssamo tani. ¡Paji! Diodsapi jaramana tiquinejeraji. ¡Poni! –najari Camarieo taminedenidsa huati huati tadsa.

⁴⁰Nadsapa Camarieo atti mittamanadsapa apaja quinadsa Jesocca dodosse tabaqquidsapa huahua quinajari, jahidsimanihijine. Nadsapa itacossimanadsapa ipodeni da inabaqqui-manajari. –Jidapapi Jesocristo tahimari mari maripi tinebomanaji –quinadsapa dosse inanibaqqui-manajari. ⁴¹Naraha Jesocca dodosse tabaqquija jodiodeni ima cacattemadedeni queriquimanahidsa jai tojenadsapa huatidsemaneri tomanijari. –Abi Diopa iadsa: “Occa ejedeni Jesodsa pajissa tiquinadsapi pohua onidsa cocossirideni tinahanamananijine tipajiramanani” najari itidija –quinajari. ⁴²Nadsapa huajjiradsa maride toquejena-dsanapojari. *Diodsa dada toqquimahuaji maride toquejena, poccadeni odsahuaji naco maride toquejena dsanapomanajari. –Ia Medsede Mesiatohui imadijaropi aja Jesocristo paja. Pohuadsa pajissa tiquinadsapi ticassiejeranijine –quinajari Jesocca dodosse tabaqqui attideni.

Saoro naco Jesodsa tojajari

9¹Nadsama Saoropa Jesodsa jehe quinajarideni jica-hijine jara jara dsanapojari. Nadsapa dada toqquimadedenicca tamine deni tojajaridsa huatide toccajari.

²Nadsapa najari tamedinsa Saoro huati tajari: –Nija, Tamine Caipa, ¿ohuattidsa jehe taqui? Aja Jesodsa jehe quinajarideni otadamahijine odsa panani Damascohuaji ohua dosse tinaji, onajaro. Ohua dosse tinanijine jipa tinadsapi ticca ima teppe dsodo tadsa Damascohuaji dsojo onanijine. Nahi Damascohuaji jodiodenicca Dio Atti mamari onihi onihicca tamedenedinsa nohue onaridsanijine. Nadsapa Jesodsa jehe quinajaridenira queriquimanadsa maquideje otadama, amoneje otadama nadsa bijideni jore onaridsadsa odsa panani Jerosarehuaji ohuaccani-baqquihijine –najari Saoro. ³Nadsapa tamine Caipa jehe nadsa pocca ima teppe Saorodsa da inadsa Damascohuaji dsojo inajaro. Naraha Damasco bacco tabote naraha memehujicca ssiajani dsibehi tehe pohnadsa bacco naronadsa ahuatojaro.

⁴Nadsapa memehujicca ssiajani dsibehi tehe ahuatojarojine Saoro tohuedimajari. Namidsa ponadsa atti mittajari: –Saoro, Saoro, ¿nejecotohui occa madija nanajidso taridsa-



jaro? Aja occa madija nanajidso taridsajaropi pina ohua nanajidso taridsajarossa najaro –najari. ⁵Nanaja Saoro huati tajari: –¿Tiapi nejecojari? –najari. Naraha: –Ohuapi Jeso ojani, tiapi ohua tinajidsojaro. ⁶Jidapapi titehemadsa, odsa panani Damascohuaji ticcaji. Nanidsana occa ima, aji ohuadsa tidsepe ijiniijinecca ima timittanijine –najari.

⁷Aja Saoro pohnadsa jai tojajarideni naco atti mohuini mittamanaraha assirepa qqui toquina-jarahi. Jaboyo quina-dsapa attideni jiraha domo huajari. ⁸Nadsapa Saoro namidsa

ponaraha totehema nocco ssirere naraha nocco siri tojaha totehemajari. Nocco maradsapa bijidsa dama quinadsa odsa panani Damascohuaaji iaccamanajari. ⁹Nahidsa huadari 3 naraha nocco tobica-jaraccahi. Dsamatapa jipa-jaraccahi, passo naco dse najaraccahi.

¹⁰Naraha nahi Damascodsapa maqquideje Jesodsapa jehe najari madijari, pohua onipa Anania. Ananiapa pina pocca huadassa nadsa pohua Medsede Jeso ahuatodsapa pohuadsa huahua najari: –¡Anania! –najari. –¿Ja? Ohuapi aji, ohua Medsede –najari.

¹¹Nadsapa Jeso pohuadsa huati tajari: –Anania, titehemaji; ajicca jahui onini Borocobote quiquina nahi-huaji ticcaji. Nahi Jodacca odsadsa bacco tinadsapi odsa panani Tarsocca madija qqui tinahitohui, pohua onipa Saoro. Puhuapa otohui nadsa ohuadsa huatide tojajari –najari.

¹²–Ohuapi pina pocca huadassa nadsa pohuadsa ima ahuato onanapa. Najaro imapi aja madija oni Anania ccajonadsa tinocco bara inadsa tinocco tobicapomanitohui, onapa Saorodsapa –najari Jeso Ananiadsa.

¹³Naraha Anania: –Jaho, ohua Medsede, najari maqquidejepa aja Jerosarecca tiadsa toquejenajarideni bica-qquiri naraha inajidso-baqquihi quinahi ima omittade –najari.

¹⁴–Nadsapa aja iahuaji ccajonadsa naco Jerosarecca dada toqquimade tamededeni jehe quinajaricca ima teppe ahuaji eccajonajaropi tiadsa jehe inajarodeni ia damade ccajonahitohui quinahi ima omittade –najari Anania.

¹⁵Naraha Jeso Anania dosse inajari: –Jari, nema nehe ticcaji, pina ohuattissa tinanaji. Saoropa occa cattaniji; pohuapa occa imadsa dsepe ijiridsahitohui. Dsama huapimacca madija, tamededenima mari icanabaqquihijine. Isaraeridenidsa naco otahimari mari icanabaqquihijine. Nadsapa otahimaridsa: “Jehe, Jesopa pajissa Dio Bedi” quina-hijine onajaro –najari Jeso. ¹⁶–Nadsama Saoropa otahimari maride tojaridsahijineraha ocasserehe oppina tanicca inahana naridsanitohui. Najaro ima naqui nidsa pohuadsa nohue onanitohui –najari Jeso Ananiadsa.

¹⁷Nadsapa Anania Jeso Attidsa ibora tadsapa toccajari, Jodacca odsahuaji bacco tadsapa toqquedsimadsa Saoro

pohuadsa bara nadsa huati tajari: –Ohuemecote Saoro, ia Medsede Jesocristopa jahui ticcajonaraha tiadsa ahuatode. Najari ohua dosse najonadsa occajonajaro, tinocco biquemani-nijine, Dio Corime tibodidsa tojahijine –najari Anania.

¹⁸Nadsapa Saoro noccodsa bara nadsa amadsati pina aba eterossa naha catojadsapa nocco biquemanipomajari. Saoro toتهمadsa passohuaji toqquedsippadsapa totopa cajijari.

¹⁹Nadsapa tonomidsa jipa jipa najari, todacorapomahijine. Nadsama Saoropa nahi Damascocca Jesodsa jehe quinajari-denidsa madicajari.

Saoropa Damascodsa Jeso tahimari maride tojajari

²⁰Nadsapa Saoro jodiodenicca Dio Atti mamarihuaji maride tojapojari. –Jesopa Dio Bedi –naridsajari pohuadenidsa.

²¹Nadsapa madija huapima Saorocca marinaja mittamandsapa: –A., ¿pohua bodi cacajiquimerajari ttarana? Nadsa najaripa Jerosarecca madija Jesodsa toquejenajari nanajidso naridsaccade. Ahuaji ccajonadsa naco Jesodsa jehe quinajari-deni itadamadsa dada toqquimade taminedenidsa iaccanibaquihitohuiraha, ¿najari madijaco? Nama nahitohuiraha najaro ima inebojaro –quinajari.

²²Naraha Saoropa Diocca dacorehe cajidsa pohua atti bica tadsa huati huati tajari: –Jesopa Diocca Cattaniji aja Mesiatohui imadijaropaji –naridsajaria aja Damascohuajicca jodiodeni pohuadsa atti atti quinaraha ajamani toquejenadsa tossamomanadsapa joma quinajaripaja.

²³Nadsama dsotode naco jodiodeni pohuadenira imahaha canadsa: –Jari, Saoro dsoquena –quinajari. ²⁴Naraha Saoro ima mittajari: –Jodiodeni tidsoqquenijine titohui cacassijamana nahi, odsa pananicca siba sse nahuajaninicca totoqqequimacca noccobijidsa tia inanadsoqquemananijine najoramanahi –quinahi nade. ²⁵Naraha Jesodsa jehe quinajaridenipa quiqui imenidsa Saoro inahittidsamanadsa odsa pananicca siba sse nahuajaninicca noccobiji bedenidsa mohuaradsa madodsa tappa icanaronamanajari dsome. Nama inanamandsapa Saoro inassijamanajari.

Saoro Jerosaredsa madipomajari

²⁶Nadsama Saoro odsa panani Jerosarehuaji toccanidsa bacco tanidsapa Jesodsa jehe quinajarideni inajone baquihitohuiraha pohua noppine cappinamanajari. Attidenipa: –A, Saoro attipa: “Jesocca ojani” naraha pajissa inejerani najaro imadsa –quina-jari. ²⁷Naraha Bernabepa Saorodsa pajissa nadsapa Bernabe Saoro Jesocca dodosse tabaqqidsa iaccajari. Pohnadenidsa Saoro tahimari huati huati tajari: –Ajajari Saoropa Damasco jahui toccaraha ia Medsede pohnadsa ahuatodsa atti mittajari. Nahi dsotodepa cappinera tadsa Damascohuaji Jeso tahimari maride tojajari –najari Bernabe. ²⁸Nadsapa pohua noppine tocappinera-manadsa Saoropa Jerosarehuajicca Jesodsa jehe quinajarideni tedseje cajoneraridserajari. Pohnadenidsa ccaridsajari, pohnadenidsa madijari. Nadsapa nahi Jerosaredsa naco Saoro cappinera tadsa ia Medsede Jesocriso tahimari mari icanabaquihissa tajari. ²⁹Naraha jodiodeni mota dsama Cresiaccia tohuatti nahatoqquri najarideni Jeso tahimaridsa jehe quina-jaradsa Saoro tedseje ahuaji huati, ahuaji huati quinajari. Huadimanadsapa: –¿Nejecoma inanadsa inanadsoqquehijine? –quiquina nadsapa dsoqquehijine tohui disseraqquri najari. ³⁰Naraha Jesodsa jehe quinajaridenipa Saorodsa huadimanajarideni pohua inanadsoqquehijinecca ima mittamanadsapa odsa panani Sesareahuaji pohua iaccamanajari. Nahi Sesareadsa bacco toquinadsapa Saoro dsamari odsa panani Tarsohuaji dosse inanimanajari.

³¹Nadsama Jesodsa jehe quinajaridenidsa madija ohuahadenicca najidsohue totappadsapi jonehedsa madiridsa-manajari. Aji dsama arobeni Jodeahuaji, dsama arobeni Carireahuaji, dsama arobeni Samariahuaji naqui najidsohue totappajaro. Nadsapa Dio Corimejine poccadeni jeheniji todacorani dsanapojaro. Jesodsa jehe quidsati naco tohuapija dsanapohui najari. Huapima ia Medsede tohuira bodideni huatomamana-dsanapodsapa madimanahissa tajari.

Pablo pocca benehi dsotodecca

15 ³⁶⁻³⁹Nadsapa nahi Atioquiadsa Pablo Bernabe tedseje madimana-dsanaporaha Pablopá Bernabedsa: –Jina, maitta Dio Atti mari icanabaquihuihuaji icadapomana. Aja imecotedeni Jesodsa jehe quinajarideni ¿nejecoma quinahi?

–najari Pablo. Nadsapa Bernabe Maraco tedseje canoa imenidsa tohuedajari, dsama bedeni passo imenidsa huittidsa-cossani onini Siprehuaji bacco toquinajari. ⁴⁰Naraha Pablo Sila tedseje tohuedahijine Jesodsa jehe quinajarideni Diodsa huati toquinajari: –Abi Dio, ajararideni tecahuabaqquihissa tana. Ticca tohuati huanehema huedaridsahissa tahijine –quinajari. Nadsapa tohuedajari. ⁴¹Tohuedadsapa dsama Siriadsa bacco toquinadsa maride toquejena., denimacca dsama Sirisiadsa bacco toquinadsa maride toquejena dsanapojari. Nahihuaajicca Jesodsa jehe quinajarideni inahatidsebaqquija dsanapohui najari.

Timoteopa Pablo Siladeni huatimade tojajari

16 ¹Nadsapa Pablo Sila tedseje odsa panani Derbedsa bacco toquinajari. Denima tohuedajaripa odsa panani Listaradsa bacco toquinajari. Nahidsapa Timoteo madijari, pohuapa Jesodsa jehe napojari. Pohua imeni naqui Jesodsa jehe napojaro. Ponipi jodio, naraha imehipa dsama Cresiaccia madija. ²Nadsapa aja Listaracca Jesodsa jehe quinajarideni attideni, odsa panani Iconiocca Jesodsa jehe quinajarideni attideni naco: –Timoteopa dsabisso bicahi –quiquina najari. ³Nadsapa Pablo attipa: –Timoteopa ia acco tocamabaqquihijine iadsa toccana –najari. Naraha Timoteo imehipa jodio jaraha dsama Cresiaccia madijaha nadsapa huapima pohuadsa nahatoqquri najari. Cresiaccia madijapa dsoporideni cotani eteroni mota huissiranija nadsapa Timoteo naco huissinaja cappiradsa Pablo attipa: –Timoteopa icca benehidsa toccadsapa jodiodeni iadsa huadiridsa-manarana –najari. –*Huissinaja cajidsana toccahi bica tahi –nadsapa Timoteo amadsati huissinaja cajijari. ⁴Nadsapa jai tojadsapa odsa panani onihidsa jai tojedsima, odsa panani onihidsa jai tojedsima-dsanapojari, aja Jesodsa jehe quinajarideni maride. Aja Jesocca dodosse tabaqqui Jerosarecca Jesodsa jehe quinajari cacahuadedeni quinadsa ima teppe dsodo quinajarocadsa mari icanabaqqui-ridsajari. ⁵Nama quinadsapa madija Jesodsa jehe quinajaridenipa poccadeni jeheniji todacorani najaro; madija ohuahadeni naco huada huajjiradsa Jesodsa toquejena toquejena dsanapodsapa Jesodsa tohuapijari.

Pablocca huadadsa Masedoniacca madija huati tajari

⁶Nadsapa dsama Asiahuaji jai tojahijineraha nahihuaji mari quinahijinepa Dio Corime jipera tadsa jai toja-jarajari. Nadsapa dsama Pirijiahuaji mari mari tossoniqquimamana, dsama Carasiahuaji mari mari tossoniqquimamana dsanapojari.

⁷Nadsapa dsama onihi Misia inorinidsa bacco toquinajari: –Dsama Bitiniahuaji issoniqquimana –quinaraha nahihuaji Jeso Corime ecossajaro. ⁸Nadsapa nahi Misiadsa tosso-niqquimamanadsapa passo imeni inidihuaji jai tojedsippadsa odsa panani Troadehuaji bacco toquinajari. ⁹Nahi Troadedsa cahadijadsana Pablopa pina pocca huadassa naha cajiari. Diojine dsama Masedoniahuajicca madija nahi Masedoniadsa ahuatodsa huaji qqui tajari. Pohnadsa huahua najari: –Jari, icca dsamahuaji ticcajonaji, ia acco ticamabaquiniijine –najari Masedoniacca madija. ¹⁰Pablo pocca huadassa nadsa madija pohnadsa huati tahi qqui tadsapa Masedoniahuaji jai tojahijine najoramanajari. Aji ohua Roca naqui pohnadenidsa occanijine onajorajaro. Diocca dosseniji ibodidsa ahuato tadsa pajissa nanihuaji Jeso tahimari icassiejeranijinecca mari icanabaqqui-hijinepa nahatoquiri inajarode.

Pablo Sila tedsejpa Piripodsa madimanajari

¹¹Nadsapi odsa panani Troadedsa ijoppemadsapi canoa imenidsa jaijajaro. Canoa imenicca etero ssoque caniqquimanidsa jappopponi ssonaridsapi passo imeni nocconihuaji iaccajaro. Ojari iaccarini nadsapi dsama huittidsacossani onini Samotrasiadsana huana icanade. Huada ssiaja iaccapomadsapi passo imeni inidicca odsa Neaporihuaji huana icanade.

¹²Nanidsa jaijemoradsa jaijajaropi odsa panani Piripodsa bacco inade. Najaro odsa pananipi Romacca *colonia tojajaro. Dsama Masedonia arobenihuajicca odsa panani deni tojanicca, bica tanicca. Nanidsa huada pamema nehe imadijaro.

¹³Nadsapi jassinajacca huada bacco tadsa Dio Atti mamari odsa nohueradsapi odsa panani amossinihuaji jaijenajaro, hueni inidihuajina jaijedsippade. Nahihuaji Diodsa huatide totoqueriqqui najari itide inadsa. Nanihuaji bacco inadsapi amoneje ponidenira queriqquimanani qqui inabaqquidsapi

ia naqui ponidenidsana nanidsa jassi inadsa Dio Atti mari icanabaquijarode. ¹⁴Ponideni tassani ojariepi odsa panani Tiatirahuajicca; poni oninipi Lidia. Ponipi etero dsojorani huatini ccara tanicca dadade. Najaro etero cocoro todsippapi pina amaidadassa najaro. Najaro amonejepi Dio Attidsa naqui ibora tajaro. Poni bodini ia Medsede Jeso acco icamadsapi Pablocca ima ponidsa bica tadsa mittanissa tajaro. ¹⁵Nadsapi Lidia Jesodsa pajissa nadsapi totopa cajijaro. Ponicca odsacca madija naco huapima totopa cajiridsa-manajari. Nadsapi poni attini iadsa: –Aji ohuadsa tibodideni: “Ia Medsededsa pajissa nani” tiquinadsapi, jina, occa odsahuaji timadimanaji –nade. Iadsa huatide dissera tadsapi ponicca odsadsa imadijarode.

¹⁶Nadsapi huada onihidsa aja Diodsa huati huati totoquina nahihuaji jajedsippanipomadsapi dsoshuato madija tedsejemadenicca ima nahato tajaro jahuidsa bacco ijidsade. Ponipi najaro odsa pananicca madijadenicca medse. Satanacca dodosse tabaqqi poni bodinidsa madidsapa poni ihicanahato najaro. Najaria aja poni medse tonanadedeni ihidossemana nadsapi madija tedsejemadenicca ima huati huati tadsapi medse tonanadedeni dsiniro cacajimana najari. ¹⁷Naraha dsoshuato ponipi inatti motta huahua cajamissaponi nade. Poni attinipi ajima nade: –¡Ajajaridenipa Dio memehuaji madijari Attidsa iboraququiri nahi, nahi! ¡Ajajaridenipa Dio tiadeni tonassiajabaquihijine tahimarini tiadeni mari tocanabaquimanahitohui, mari tocanabaquimanahitohui! –nanamissa najarode.

¹⁸Huajjiradsa inatti motta nema nema nanajona nadsapi poni attini mittade iadsa tocasserani nadsa Pablo pohua natti qqi tanidsa dsoshuato bodinidsa madidsajaridsa huati tade: –Jesocristopa poni bodinidsa timadidsanijine jipera tahi. Jeso pohua onima huati onana: ¡Tiquenaji! onajaro –nade Pablo. Pablo atti nama nanaja dsoshuato bodinidsa madidsajaripa amadsati qqenajaride.

¹⁹Nanaja aja dsoshuato poni medse tonanadedeni poni bodinicca nahatobote amossi nahi qqi toquinadsapa: –¡Jaho! Nema nadsapi ¿dsiniro icappirapadseje? Jidapapi poni bodinicca nahatobote cappirani –quinajari. Nadsapa Pablo dama, Sila dama quinadsa odsa panani nocconihuaji

iaccabaquui-manajari, ima cacattemadedenidsa huati toquinahijine. ²⁰Ima cacattemadedenihuaji bacco toquinadsapa huati toquinajari: –¡Qui, ajajari jodiodenipa icca odsa pananicca madijadsa mohua mohua naridsamanapaja! –quina-jari. ²¹–Poccadeni ididenicca madie tahimarini mari mari quinajari. Naraha iapi romanodeni iquejenadsapi poccadeni ididenicca madie tahimarinidsa jehe inejerani, iboraququiri inejerani. Iadsa oppina tani –quinajari.

²²Nadsapa madija huapima Pablodenidsa huadimanadsa itabaromanahijineraha ima cacattemadedenipa soldadodenina icadossebaquijari: –¡Jari, eterorideni ssiti taridsamanadsa titabaromanajo! –quinajari. ²³Nadsapa itabaromanajari, cacotabote nadsa toponi cocorodsa cororo idsimamanajari. Nadsapa toponi cocoro cacahuadedsa huati toquinajari: –Ajarideni tecahuabaquihissa tajo, dsaja tajarahijine –quinajari.

²⁴Nadsapa toponi cocoro cacahuadepa ima cacattemadedeni attideni mittadsapa bodiccadsana issodeni ahuadsa cabasso nadsa jore caniquimadsa pamidsadsa canajari.

²⁵Nadsapa Pablo Sila tedseje dsome nocconiraha Diodsa huahuatiti dsajari, Diodsa huatidsemanadsa jijiriri dsadsapa toponi cocorocca madija mittamanajari. ²⁶Naneje nami jadsirema dsadsa najaro. Toponi cocoro todsimacca odsapi sibadsa canahatonije najaro dacoraraha poni cahittanicca nami dsadsa nadsapi najaro odsa naqui dsadsa canajaro.

Nadsapi noccobiji naqui tohuabajaro, domo huedsajarideni issodenicca, bijidenicca cadena naco jeo huajaridsajari.

²⁷Nanaja toponi cocoro cacahuade nocco tojadsa qqui taneje noccobiji tohuabani qqui tadsapa: “¡Jaho domo tocchahi!” najari pohua bodi. Nadsapa toponi cocorodsa domo huedsajarideni domo tocchahi manaconipa pocca tamedeni pohua inanadsoquemanahi noppine cappinadsa pohua huajinahijine pocca toponi huahuajina equidi najaro. ²⁸Naraha Pablo pohuadsa huahua najari: –¡Paji! ¡Tia tejina tejeraji! Iapi huapima aji jassi idsani –najari.

²⁹Nadsapa toponi cocoro cacahuade jojororotohui huahua nadsa jojororo eccajonamanadsapa piri todsimamanajari. Nadsapa toponi cocoro cacahuade bodihuaji joppa todsimanaja jabojo najarijine tarara canajari. Pablo Sila

baccodenihuaji pohua pitodsa huitta najari. ³⁰Nadsapa toponi cocoro bodihuaji pamidsaraha eqquenabaquidsapa huapiccasana pohuadenidsa huati tajari: –Jaho, ohua naqui ossiajanijinepi ¿nejecoma onanijine? –najari.

³¹Naraha manaco pohuadsa huati toquinajari: –Ia Medsede Jesodsa pajissa tadsapi tissiajanitohui. Ticca madija naco Jesodsa pajissa quinadsapa tocassiejerahitohui –quinajari Pablo Sila tedseje.

³²Nadsapa toponi cocoro cacahuade pocca madija jahijonadsa Pablo Sila tedseje ia Medsede Jeso tahimari mari icanabaquidsapa huapima mittamanajari. ³³Nadsapa dsome nocconiraha toponi cocoro cacahuade passohuaji iaccabaquidsapa Pablocca bejo ssahua, Silacca bejo ssahua inaridsajaro. Nadsapa dsomeraha pocca madija huapima totopa cajimanajari. ³⁴Topade jicadsapa toponi cocoro cacahuadepa pocca odsahuaji Pablo Sila tedseje inajipabaquijari. Diodsa jehe nadsapa huatidseri najari. Pocca odsacca huapima naco Diodsa jehe quinadsapa huatidsemaneri najari.

³⁵Najaro ssiajadsapa ima cacattemededeni soldado pamaha toponi cocoro cacahuadedsa huatide dosse inabaquijari. –“Pablo Sila tedseje tappa tinabaquina quinapaja” tiquinana –quinajari. Tohuedadsapa toponi cocoro cacahuadedsa huati toquinajari. ³⁶Nadsapa toponi cocoro cacahuade Pablodsa huati tajari: –Jehe, ima cacattemededeni attidenipa: “Tappa tinabaquina” quinapaja. Jidapapi tiadenidsa ima nohuerani. Mohuaradsa ticadenaji –najari.

³⁷Naraha Pablopa soldadodenidsa huati tajari: –¡Icadena-jerani! Ajina, maittadsama ima cacattemedehuaji ia tohuacbaquiporaha etti mittamana-jarade. Iapi romanodeni iquejenaraha icca ima cattemerani ia huaccade soldadodsa ia tocadossebaquidsapa ia itabaromanajaro. Madija huapima naco ia qqui toquinade. Nadsapa ia itabaromanadsapa ecotabote nadsa toponi cocorohuaji ia cora todsimabaquijaride. Iapi romanodeni iquejenadsapi ia tonajidso-baquimanadsapi oppina tani. ¿Naraha jidapana naqui icca ima cattema-jeraraha najimehedsa ia dosse tomani-baquihijineco? ¡Poni, iapi najimehedsa icadena-jerani! “Ia cacattemededeni pohuadenira ia tappa tabaquihijine jahijonana quinapaja” tinanimanana –najari Pablo.

³⁸Nadsapa soldado pamaha ima cacattemadedenihuaji tohuedanidsa Pablocca ima huati tanimanajari: –Aja Pablo Sila tedsejapa: “Iapi romanodeni iquejenani” quinapaja –quinadsa ima cacattemadedeni mittamanadsapa jabojo quinajari.

³⁹Nadsapa ima cacattemadedeni cappinamanadsa toponi cocorohuaji jai tojajari, bacco toquinadsapa Pablodenidsa huati toquinajari: –¡Jaho! Tiadenidsa ijine ima totabaccorajarode. Jidapapi icca ima nanidsa epejena –quinajari. Nadsapa Pablo Sila tedseje eqquenabaquidsapa mohuaradsa pohuadenidsa huati toquinajari: –Jidapapi aji icca odsa pananidsapi timadimana tejerana. Ajicca odsa panani onihihuajina ticadana –quinajari. ⁴⁰Nadsapa toponi cocorohuaji huedenadsapa Lidia madinihuaji tohuedanijari. Nadsapa nahidsa Jesodsa jehe quinajarideni queriquimanajari bodideni acco icamabaquidsapa huatidsemaneri najari. Nadsapa denima tohuedajari.

Tesaronicahuaji mohuaniji tojajaro

17 ¹Nadsapa Pablo Sila tedseje tohuedajari..., odsa panani Apiporidsa tossoquimamana..., odsa onihi Aporoniadsa tossoquimamana dsanapojari. Nadsapa odsa panani Tesaronicadsa bacco toquinajari. Nanidsapi jodiodenicca Dio Atti mamari odsa cahittajaro. ²Nadsama Pablopa benehidsa ccaridsadsapa huajijiradsa jodiodenicca Dio Atti mamarihuaji toqquedsima toqquedsima naridsajari. Pablo nama nanaridsa nadsapa nahi Tesaronicadsa naco jodiodenicca Dio Atti mamarihuaji totoqquedsima najari. Semana 3 naha madiccadsapa jassinajacca huada 3 naha Dio Atti maride totoqquedsima najari. Nahidsa Pablo jodiodeni tedseje imahaha canajari. Pablopa Dio Atti maittaccadsama dsodo napojarocadsa mari icanabaquijari. ³Diocca Cattaniji Mesiacca ima pohuadenidsa ahuato inananijine mari icanabaquijari. Pohua attipa: –Jehe, Isaraerideni iapi Mesiatohui imadijaro. “Mesiapa ocasserani ahuadsa dsoqqueraha nahatonihitohui” quiquina napode. Pajissa pohuapa ocasserani ahuadsa dsoqqueraha dsotodepa nahatonijari. Aja Jeso tahimari tiadeni mari ocana-baquijaropi aja icca Mesiapaja –najari Pablo.

⁴Nadsapa jodiodeni mota Jesodsa jehe quinadsapa Pablodenidsa toquejenajari. Dsama Cresiaccas madija Diotohui

quinajarideni huapi taha Jesodsa jehe quinajari; nani Cresiahua jicca amonejedeni dsapanideni ssequiri najaro mota huapi tehe naqui Jesodsa jehe quinajaro. ⁵Naraha aja jodiodeni mota Jeso tahimaridsa jiperaquiri najaripa pocca-deni madija mota Jesocca imadsa toquejenajarideni accone huadimanajari. Nadsama aja Jeso tahimaridsa jiperaquiri najaridenipa odsa pananicca madija ibohuedsa tabaccorehedsa madiridsa-manajaridenidsa huahua quinajari. Nadsapa najarideni tedseje quejemamanadsa huapima domo ccaridsadsa mohua mohua naridsamanajari. Pohuadenijine odsa pananicca madija huapima domo qquenadsapa ahuaji johua ahuaji johua quinajari. Nadsapa domo ccaridsajari attidenipa: –Jasonacca odsadsa Pablo Sila tedseje madimanahitidija. Damama inadsa madija queriquimanahihuaaji iaccabaquina. Nahidsana inajidso-baqquihijine –quinajari. Nadsapa Jasonacca odsahuaji bacco toquinadsapa mohua todsimamanajari. ⁶Naraha Jasonacca odsadsa Pablo Sila tedseje nohue quiradsapa Jasona dama, pohua tesse Jesodsa jehe quinajari pamaha damama quinadsa odsa pananicca taminehuajina iaccabaquimanajari. Bacco toquinadsapa momohuadedenipa taminedenidsa poccadeni maidsehera huati toquinajari: –¡Icca dsamahuaji madija ohuaha bacco quinahi! ¡Pohuadenipa dsama onihidsa, dsama onihidsa ima inatabaccoraridsa-manadsa jidapapa aja idsamaridsa bacco quinajari! ⁷¡Aja Jasona joca idsimajaripa pocca odsadsa ecahuabaqquihi! –quinajari, johuahua johuahua canadsa. –Aja madija ohuaha jahijonajaripa icca dsama cacahuade deni tojahicca marinajadsa iboquiri nadsapa icca madija mota naco pohuadeni attijine tohuibomanahitohui. “Jidapapa dsama cacahuade ohuaha tojahi, pohua onipa Jeso” quinahi imittani –quinajari maidsamanadsa.

⁸Nadsapa najaro ima mittamanadsapa nahicca queriquimanajarideni taminedeni tedseje huadimanajari. ⁹Naraha Jasona pohua tesse tedseje poccadeni ima cattema-jeraccadsa taminedenipa pohuadenidsa huati toquinajari: –Dsaja tejeranijine iadsa ticcadeni dsiniro da tiquinaccaji –quinajari. –Nadsapi nidsa ticcadeni ima cattemehe jicadsana ticcadeni dsiniropi da inaninijine –quinajari. Nadsapa Jasona pohua tesse tedseje taminedenidsa dsiniro da quinadsapi tappa inabaquidsa jai tojanijari.

Pablo Sila tedsejepa Bereahuaji

¹⁰Naraha najaro dsomedsa Tesaronicacca Jesodsa jehe quina-jaridenipa huassinaja Pablo, Sila tedseje dossesse quinajari, odsa panani Bereahuaji tohuedahijine. Tohuedadsapa Bereadsa bacco toquinadsa nahidsa madimanajari. Nadsapa jodiodenicca Dio Atti mamarihuaji tohuededsima najari, Jeso tahimari maride. ¹¹Nahi Bereadsa madimanajaridenipa bicaquiquiri najari, pina aja Tesaronicacca huadiquiquiri najaridenissa quina-jarajari. Dio Atti mittamanedsatija najari tohuini quinajari. Nadsapa huajijiradsa Dio Atti maittaccadsama dsodo napojarocca huade toque-jenajari. Pohnuadeni bodipa: “¿Pablo attipa pajissaqui? ¿Pina aji ima dsodo napojarocassa naqui?” quinadsa. ¹²Nadsapa jodiodeni mota huapi taha pajissa quinajari, cresiadeni naco mota huapi taha pajissa quinajari. Aji Cresiacca madija amoneje dsapanideni ssequiri najarodeni huapi tehe, Cresiacca madija maququideje naco huapi taha pajissa quinajari. ¹³Naraha aja Tesaronicacca jodiodeni mota Jeso tahimaridsa jiperaquiquiri najaridenia ima mittamanajari: –Pablo Sila tedsejepa Bereacca madija naco Dio Atti mari icanabaquiquihi –quinahi mittamanadsapa huadimanapomajari. Nadsapa Bereahuaji jai tojjajari, bacco toquinadsa nahihuajicca madija Pablodenidsa huadimanahijine ima inanamanapomajaro. Nema inanamanadsapi Bereacca madija ssamoni ahuamanadsa: –¿Nejecojaricca imana pajissa? –quinajari. ¹⁴Naraha Jesodsa jehe quinajarideni ima mittamanadsapa Pablo huassinaja dsama onihihuaji dosse quinajari. Nahi Bereacca madija naco pohnuadsa jai tojjajari. Nadsapa Pablo Bereacca madija quinadsa passo imeni inidihuaji jai tojjedsippajari, poni huapi jai tojjabacossahijine. Naraha Sila, Timoteo tedsejepa nahi Bereadsa madimanaccajari. ¹⁵Nadsapa Bereacca madija Pablo iaccamanadsapa odsa panani Atenahuaji bacco toquinadsa nahidsana Pablo inebomanajari. Jahinidsapa Pablocca ima huati nanimanajari: –Pablo attipa: “Sila Timoteo tedseje huassinaja huedajonana” napaja –quinajari.

Pablota Atenahuaji

¹⁶⁻¹⁷Pablota Sila Timoteodeni tohui odsa panani Atenadsa madijari. Nahidsa madidsapa jassinajacca huadadsa Dio Atti

mamarihuaji totoquedsima najari, Jeso tahimari maride. Nahidsapa jodiideni, jodio quejena-jarajari Diodsa jipaquiri najarideni tedseje quequeriqui nadsa pohuadeni mari mari ihicanabaquui najari.

Naraha Pablo Atenadsa madidsapa siba nahatoni pohuadeni cacahuade huapi tani qqui taridsadsa bodi ojjari. Nama nadsapa huada huajijiradsa todsepetaji dadade madija caji tahihuaji aja nahidsa madija jahiridsajari-denima Jeso tahimaridsa imahaha canadsa ahuaji huati, ahuaji huati quinajari. ¹⁸Nadsapa madija ohuahadeni naco Epicoriodeni Estoicodenipa Pablo tedseje imahaha canajari. Aja imahaha canajari motapa maittaccadsama madija oni Epicorio madipodsa marinajari ecahuajonamanajaroa “Epicoriodeni” quiquina najari. Madija ohuahadeni naco maittaccadsama madija oni Seno madipodsa marinajari ecahuajonamanajaroa “Estoicodeni” quiquina najari. Nadsapa najarideni madija mota attidenia: –Ajajari atti jiderabotepa ¿nejeco imara iadsa huati huati tajarinaja? –quinajari. Madija ohuaha attideni naco: –¡Dsama onihicca Dio tahimari eccoraridsajaro raneje! –quinajari. Nama nama quiquina najari, aja Pablopa Jeso dsoqqeraha nahatonijari tahimari huati huati tajariraha mittamana-jarajari. ¹⁹Nadsapa Pablodsa: –Jina, ajicca ssono Areopacohuaji ticca ima huati tinanissa tanijine iadsa tiqqemoraji –quinadsapa iaqqemoramanajari. Nahidsana huada huajijiradsa nahatoququiri najarideni totoqueriqui najari, imahaha canahijine. Ssono bacco tomoramanadsapa pohuadsa huati toquinajari: –Jari, ticca ima imittana. ¿Nejeco imara huati huati tinajaroneje? –quinajari. ²⁰–Ticca marinaja imittapo-jerajaro; iadsa pina ima jidsa taniccassa najaro. Denima imittanijine jipapa inani –quinajari. ²¹Aja Atenacca madija, dsama onihicca nahidsa madimanajari-deni naco Pablodsa nama nama quiquina najari, aji ima dsati tohuinira quiquina najari.

²²Nadsapa nahi Areopacodsa Pabloa totehemadsa pocca ima huati tajari: –Jehe, Atenacca madija, tiadenidsa huati onana. Ticcadeni siba nahatoni jiquejerani qqui onaridsani. Siba hua tamaroni naqui ticcadeni daniji botta botta

tahijinecca qqui onaridsani. Tiadenipi tiadeni cacahuadedeni tohuideni tiquinadsapi tinahatidse-baqquimanahijine dissera-qquiri tiquinani qqui onani –najari. ²³–Jehe, ticcadeni odsadsa occaridsadsa ticcadeni nahatoniji tiadeni cacahuadedenidsa da tiquinahijinecca huahuanari qqui onaridsajaro. Huahuanari ojarie huapinidsa dsodo nanipi ajima najaro: “Toponi cacahuade ohuahapa oni ssamoqquiri inaccani” titiquina najaro dsodo nanidsa qqui onajaro. Jehe, tettidenipi bica tani. Aja toponi cacahuade ohuaha oni ssamoqquiri tiquinaccaripa pohuadsa tetetidsemana najaropaji. Najari pocca imaha tiadenidsa ohuacomerajaropaji –najari Pablo.

²⁴–Ajijaro dsamapi Dio inahatojaro. Aja huapima caji taridsajari naco Dio inahatoridsajari. Pohua inahatoridsajaripa Dio pohuana huapima ecahuajaro; meme ecahua, nami ecahua najaro. Diopa madijacca nahatonijidsa madiridsa-jarahi, pina odsadsa, siba nahatonidsa, Diopa nama nahidsa madiridsa-jarahi. ²⁵Diopa cappiraha madi-jarahi, pohua biji accode tohui najarajari. Pohua ehuerahi nahatojiderahi. Pohuana camittehe jinede. Pohuajinena jappopponi caji tadsapi jassi jassi ihina najaro. Pohuana icappira-jeranijine huapima iadsa da da ihinaridsa najaropaji –najari Pablo.

²⁶–Diopa madija ojaria inahatopojari. Najaria aja icca idi tahideccapaja Dio pohuajine madija huapimapa najari potemahi toquejenajaripaja. Najari pohua potemahia madija dsama onihidsa toquejena, dsama onihidsa toquejena, dsama onihidsa toquejena naridsajaria dsama huapimadsa madiridsa-manajaripaja. Diopa nahato tapodsas madija icattejidsa-baqquijari: “Ajajaridenipa ajijaro dsamadsa madimanahijine, dsama onihidsa madimana-jarana. Ajaccaridenina ajicajaro dsamadsa madimanahijine, dsama onihidsa madimana-jarana” naridsapojari. Diopa Pohua jipa tadsa dsama onihi deni inana tani; dsama onihi naqui ajimani inana tani. Nama naridsajari. ²⁷Dio madija inahatobaqquijaripa Dio Pohua tohui quinahijine. Dio Pohua tohui quinadsa qqui naridsamanajaridenipa Dio Pohuadsa bacco toquinahijine itide. Naraha Diopa madija huapimadsa huaji tajarahi; iadsa huajira tahi. Tiadenidsa huajira tahi, ohuadsa naco huajira tahi.

²⁸Abi Dio Pohuajinena aji imadjaropaji. Pohuajine jajai-jaridsa najaropaji. Pohuajine iquejenaridsajaropaji. Najaroa aji ticcadeni ajie nahatobotedeni jiri icanamana-podsapi: “Dio Pohua potemahi iquejenajaro” quinapojari-paja. ²⁹Nadsama aji iapi Dio ia tonahatobaquijari. Dio Pohua potemahi iquejenani. Nadsapa ibodidsa: “Diopa pina madijacca nahatonajassa nahi” inejerana. Diopa pina huatini ccara tanicca oro nahatonissa najarahi; pina dsibehi tanicca plata nahatonissa najarahi; pina ccara tanicca siba nahatonissa najarahi. Nema naniccapi madija pohua bodidsa: “Ohua cacahuade corime onahatonijine ajima onanana” nadsa ihinahato najaropaji. Najaria aja pocca nahatonajaraha “Ohua Cacahuade” nanaja najaripaja. ³⁰Madijapa Diodsa ssamoquiri napodsapa siba nahatonidsa “Ia Cacahuade” nanajonamana najari. Madijapa Dio Pohua madihicca ima ssamoquiri nadsa Dio pohuadeni inajidso-baquiija najonapohui najarajari. Dio Pohuana madija pocca-deni imasiri inahanajonaporaha jidapapi dsama huapimacca madijadsa Dio Attia: “Ticcadeni imasiridsa epeje tiquinaji, tibodideni tecajiquimeraridsamanaji” najaripaja Dio. ³¹Diopa madija huapimacca ima icattemanitohui. Nidsa Dio Pohua jipa tahicca huada bacco tadsapi dsama huapimacca madijadenicca ima pocca pajissehedsa nattome nanitohui. Madija huapimacca ima cattedepa Dio icattapojari; najaria aja Pohua Bedi dsoqqueraha nahatonijaripaja. Dio Pohuajine nahatonijari, madija huapima pohuadsa: “Pajissa, najaripa Diocca Cattaniji” quinahijine –najari Pablo atti. ³²Naraha Atenacca madija aja jicajarideni nahatonimanicca ima mittamanadsapa motapa jaja quinajari. Naraha madija motapa: –Huada onihidsa ticca ima imittapomana –quinajari Pablodsa. ³³Nadsapa Pablo madija quequeriquimana nahidsa apaja nadsapa toccanijari. ³⁴Naraha nahicca quequeriquimana najari motapa Pablocca imadsa pajissa quinadsa pohuadsa toquejenajari, denima ima mittamanahijine. Madija ojaria onipa: Dionisio; pohuapa nahato tajari, ssono Areopacohuaji quequeriqui najari. Amoneje ojarie oninipi Damarisa. Madija mota naco Pablocca imadsa pajissa quinajari.

Pabloa Corintohuaji

18 ¹Dsotodepa Atenadsa Pablo joppemadsapa odsa panani onihi Corintohuaji toccajari. ²Najaro odsa panani Corintohuaji Pablo bacco tadsapa jodio madija bacco inabaqqujari, onidenipa Aquira, bedimeni oninipi Prisira quinajari. Aquirapa dsama arobeni Pontohuajicca madijaraha dsama Itariadsa madipojari. Naraha dsama Itariacca tamine Claodio jodiodenidsa jipera tadsapa nanicca odsa panani deni tojanicca onini Romadsa madimana-jarahijine jodiodeni huapima dosse ininebaqqujari. Nadsapa Aquira bedimeni tadsajanipa Itariahuaji nebomanadsa Corintohuaji tohuededsati madimanageri. Nahidsa Aquira bedimeni tadsajani madimanadsana pohuadeni qquide Pablo toccajari. ³Nadsapa Pablo Aquiradenicca tarabaidsa nahato tadsapa pohuadenidsa madiccejari. Pohuadenipa bani cone nahatoni etero siba tanicca odsajine ssequide toquejenajari. Poccadeni ssequinajapi odsa tocajanijine da da quiquina najari. ⁴Nadsapa Pablo jassinajacca huadadsa jodiodenicca Dio Atti mamarihuaji jodiodeni jodio quejena-jarajarideni tedseje quequeriquimana nadsa: –Ohuattidsa jehe quinahijine itide –nadsa mari mari ihicanabaqqui najari.

⁵Nanaja Sila Timoteo tedsejepa dsama Masedoniahuaji huedajonadsa bacco najonamanajari. Nadsapa Pablo dsepe ijiraha nebodsa Dio Attira majidsama mari mari ihicanabaqqui najari. Pocca marinajapi: –Diocca Cattaniji madija Tonassiajade aja Mesia quiquina najaripa Jesopaja –najari Pablo jodiodeni mari icanabaqquids. ⁶Naraha jodiodeni Jeso tahimaridsa jiperaqqui nadsapa Pablo itamassoqquimanajari. Nadsapa Pablo pohuadenidsa apaja nahi ahuato tahijine pocca etero ppoto ppoto nadsa huati tajari: –¡Epeje! Nema tiquina-dsapi tijinedenina imasiri tiadenidsa tinassonarimanajaro. Dio tiadeni tonajidso-baqquidsapi ojine jerani. Jidapapa jodio quejena-jarajarira mari ocanabaqquina –najari Pablo.

⁷Nadsapa Pablo Dio Atti mamarihuaji qqenadsapa pohua tesse Tisio oni ohuahapa Justo pocca odsadsa toqquedsimajari. Tisio-Justo pohua naco Diodsa huatidse-dsanapojari, Dio Atti mamari inorinidsa madijari. ⁸Jodiodenicca Dio Atti mamarihuajicca tamine onipa Crispo pocca amoneje pocca

ejedeni huapima ia Medsede Jesodsa pajissa quinajari. Nahi Corintocca madija mota naco Pablocca marinaja mitta-manadsa Jesodsa pajissa quinadsapa totopa cajiridsa-manajari.

⁹Nadsapa najaro dsomedsa Pablopa pina pocca huadassa naha cajijari. Diojine ia Medsede Jeso pohuadsa ahuatodsapa huati tajari: –Pablo, ticappinejeraji. Ohuatti teccoraridsaji, ohuatti tecoma tejeraji –najari. ¹⁰–Ohuapi tia ohuacahuaridsa-nitohui. Ajijaro odsa pananidsapa ohuadsa toquejenajarideni huapi tahi. Nadsapii madija tia inajidsomana-jeranitohui, onajaropaji –najari Jeso. ¹¹Nadsapa Pablo Corintocca madija Dio Atti mittamanahijine mari mari ihicanabaqqui nadsapa huajano ojaría najica, dsadsajade najica, huajano ohuaha nocconidsa bacco tajari.

¹²Naraha tamine Carionapa dsama arobeni onini Acaia ecahuadsa Pablo odsa panani Corintodsa madiccadsapa jodioideni mota pohuadsa huadimanajari. Dama quinadsa tamine Carionadsa iaccamanajari, ima cacattemahuaji idsahua-manahijine. ¹³Nadsapa tamine Carionadsa huati toquinajari: –Ajajari madijapa icca madija mari icanabaqquidsapa: “Diodsa tiquejenaji” nanaridsa nadsapa icca madija mota pohua attidsa jehe quinahi. Naraha pocca marinajapi jidsa tani, pina icca marinajassa nejerani; pina romanodenicca marinajassa nejeradsa naqui oppina tani –quinajari Carionadsa. ¹⁴Nadsapa manaco Pablo pocca ima huati tabote naraha tamine Cariona pohuana jodioidenidsa huati tajari: –¡Epejena! Pina botiecca ima huatide, pina toponi nanajidsodecca ima huatide ohuadsa jai tijedsimadsapi ticcadeni ima mittade jipa onanitohuiraha ticcadeni imapi najarossa nejerani. ¹⁵Tiadenina ajararicca marinajadsa jiperaqquri tiquinajaro. “Icca marinajassa nejerani” tiquinadsapi tiadeni ehuerani ticattemamanaji. Occa cacahuehepi onihi; ticcadeni ima cattemade jipera onani –najari tamine Cariona jodioidenidsa. ¹⁶Nadsapa ima cacattemahuaji mohua ininebaqqujari.

¹⁷Nadsapa boronidsa jodioideni motapa poccadeni Dio Atti mamarihuajicca tamine dama quinadsa idaqquimanajari. Pohua onipa Sostene. Ima cacattemacca boronidsa idaqquimanaraha Carionapa qqui taraha najaro imadsa jipera tadsapa pina qqui torahi najari.

Pablo Atioquiahuaji toccanijari

¹⁸⁻²³Nadsapa odsa panani Corintodsa Pablo huada huapi tehe madi-dsanapojari. Dsotode naco odsa panani Atioquiahuaji toccanihijine: –Occanini –nadsa Jesodsa jehe quinajaridenipa: –Jehe ticcaniji –quinadsapa Pablo toccanijari. Nadsapa Atioquiadsa bacco tanijari.

Odsa panani Romahuaji Pablo dosse quinajari

27 ¹Nadsama: –Dsama Itariahuaji Pablo dosse inana, nahidsapa icca tamine deni tojahiccana pocca ima icattemanijine –quinadsapa romanodenicca soldado dossede onipa Jorio najaridsa huati toquinajari. Aja Jorio pocca dodosse tabaquipa 100 quinajari. Najaridenipa soldado 600 quinajari mota. Pohnadenidsa: “Icca tamine deni tojajari Acostocca soldadodeni” quiquina najari. Nadsapa najaridsa huati toquinajari: –Jari Jorio, toponi cocorodsa domo huedsajarideni, Pablo quinadsa Itariahuaji tiaccabaqqi-manajo –quinadsapa aji ohua Roca naqui pohnadenidsa occajarode. ²Itesse Aristaco naco iadsa toccade. Pohnuapa dsama Masedoniacca odsa panani Tesaronicahuajicca madija. Nadsama nani odsa panani Sesareacca jahuidsas ia huapima jaijedsippadsa odsa panani Adaramitiohuajicca canoa imeni etero ssoque caniquimani cajiniccadsa dsama Asia jippe-huaji tohuaccabote nani qqui icanade. Nadsapi najaro canoa imenidsa jaijedsadsa iaccajarode. ³Huada ssiajapi odsa panani Sidohuaji huana icanade. Nadsapa Pablo cacahuade Joriopa pohnuadsa huati huana tadsa: –Titedsedeni qquide tiqqemorani bica tani –nade. Nadsapa pohnu tessedenidsa Pablo toqqemoradsapa inajipamanade. Pohnu cappirahicca naco pohnuadsa da quinajari. ⁴Nadsapi huada ssiaja Sidodsa ijoppemapomade. Canoa imenipi etero imeni dsijere nadsa jojodejine totohuacca najaro. Naraha jojode dacorehe iahuaji jo najonadsapi paji tohuaccarini nanijinepi ssamo tade. Nadsapi dsama bedeni passo imenidsa huittidsacossani onini Sipre inidihuajina tohuaccajaro. Najaro dsama bedeni huittidsacossajarojine jojode ojidsama nadsapi canoa imeni tohuaccanissa tade. ⁵Nadsapi Sipredsa iaqqeqquimadsapi

passo imenihuajina iaqquejidsade. Dsama Sirisiadsa issoni-quuima, dsama arobeni Pafiriadsa issoniquuima, dsotodepi dsama Risiahuaji bacco inade. Nanicca odsa panani oninipi Mira nanidsana huana icanade.

⁶Nadsapa nahidsa romanodenicca soldado dossede canoa imeni onihitohui qqui naridsadsapa odsa panani Arejadriacca canoa imeni Itariahuaji tohuaccanijine qqui icanade. Pohnuapa najarodsa ia tohuaqqedsabaqquidsapa iaccapomade. ⁷Nadsapi canoa imeni tohuaccaraha jojode jadsirema iahuaji jo najonapomadsapi canoa imeni tohuaccaraha najo tocanajaro. Huada huapi tani inajo-dsanapodsapi odsa panani Quinido huajira tanidsa bacco inade. Nadsapi jojodejine denima paji tohuaccarini nanijine ssamo tani. Nadsapi dsama passo noccoidsa huittidsacossani onini Cretahuajina acca icanamanadsa jojode ia cco tocajidsabaqquide. Nadsapi nanicca odsa panani Saomonadsapi icassoniqqumade. ⁸Denima Creta inidihuaji iaccadsa naqui najo taraha iacca... iacca... canoa imeni huahuana tocana oninipi Boeno Poertohuaji bacco inajarode, aji odsa capamema najaro Rasea huajira tanidsa. (Boeno Poerto ettidsapi: Huahuana tocana bicani, inajaro.)

⁹Nadsapa huada huapi tani inajojonadsa dsadsajadecca abadsico bacco tocanade. –Dsadsajadedesapi passo imenidsa canoa imeni tohuaccani oppina tani –quinadsa Pablo canoa imeni ahaccadedenidsa huati tade: ¹⁰–Jehe otessedeni, denima jaijadsapi oppinabote bacco inanitohui –nade. –Icca canoa imenipi cobara tocananitohui. Nadsapi todsepetaji naco amossihuajahitohui; ia naqui ijicarana, onajaro –nade Pablo. ¹¹Naraha romanodenicca soldado dossede Pablo attidsa huaribo siba tajari; pohnuapa canoa imeni jinede atti, ahaccade attidenira mittajaride. ¹²Nani “huahuana tocana bicani” quiquina naraha: –Dsadsajadedesapi bica tejerani –quinade. Jojode passo, jojode passo dsanapojaro noppineni cappinamanadsa: –Jina jina –quinade. –Denima Creta inidihuaji iaccana, ajicca odsa Fenisedsa bacco inani ipajiranitide. Canoa imeni Fenisedsa huana tocanani bica tani. Nanihuajipi jojode dacorehe sssonari nejerani –quinade. –Nani Fenisedsa bacco inadsapi nanidsana imadiccana, dsadsajade jicadsana jaijapomanijine –quinade.

Jojode dacorehe ccajonajaro

¹³Nadsama jojode jadsirema iahuaji jo najonajaro cacaji-qquimeradsapi ojidsama inattihuaji ccajonajaro. Nadsapi: –Jehe, jidapapi bica tani –quinadsa ppejo ccanajabote idimoranimanadsapi icca canoa imeni tohuaccapomade. Nadsapi Creta inidima nani iaccapomade. ¹⁴Iaccaraha dsotodepi dsamahuajicca jojode dacorehe ccajonapomajaro.., canoa imenidsa ssonari ssonari nade. Najaro jojode oninipi: Norodeste, icanacanimanajaro. Canoa arobenihuaji ssonari-jaro. ¹⁵Jojodepi iadsa dacoradsa passo nocconihuajina iaccade, nanihuajipi jipepera inaraha. Nadsapi jojode poni ccajonanihuaji acca icanaraha jojode dacoradsapi epeje inade; nadsapi jojode poni toccanihuajina johuidso icadsanapode.

¹⁶Nadsapi dsama bedeni huittidsacossani onini Caoda icassoniqquimadsa jojodepi ojidsama nade; dsama huacosseje najaro. Nadsapi nanidsa canoa bedenipi canoa imeni inorinidsa ssoque cadsanani je tocanani noppineni cappinamanadsa: –Joca icanamacossanina –quinade. Passo ijijaroline najo taraha nema nehe joca icanamacossanimanade.

¹⁷Nadsapi canoa imeni tetepinidsa jore icadsanamanade. Canoa imeni cotanihuaji soca coro idsippamanadsa canoa dopanihuaji joca inajonamanadsapi nocconidsa ssoque idsanamanade; canoa imeni cabararini noppineni cappinamanadsa. Dsotodepa bodideni huatoma-manadsa: –¿Passo bodihuaji ssiqui quehemama canajaro onini Sirete bacco inapadseje? –quinade. –Nanihuaji bacco inadsapi icca canoa imeni ssiqui quehemama canajarodsa doi canadsa cabararirana –quinadsa ahua jore canani tappa icanamanade. Nani canoa nattinidsa ahua jore canani tabo tocanadsapi canoa imeni ojidsama tohuaccajaro. Nama quinadsapa jojodejine poni toccanihuaji canoa imeni tohuacca-dsanapojaro. ¹⁸Jojode dacorajaro nebo-jeradsapi icca canoa imeni jadsirema ahuaaji pati ahuaaji pati canade. Huada ssiajadsa naqui nema cadsanapodsapi todsepetaji mota, dsamatapa mota naco hua idsippamanade. Nadsapi: –Canoa imeni tocappahuani nana –quinaraha nema cadsanaponipaji nade. ¹⁹Ssiajapomadsa naqui nema cadsanaponipaji nadsapi canoa imeni tothuccarinnica mota

dicca quinadsapi hua idsippamanade. ²⁰Nadsapi huada huapi taraha maji qqui inajarade; dsome naqui abadsico bedi qqui inajarade. Tahidepi: –Icassiejeranitohui –inaporaha passo jojode dacorehema tabaccora dsanapodsapi: –Ajidsa ijica-nitohui –inade.

²¹Huada huapi taraha ijipa-gerade. Nadsapa Pablo toتهمادسا huati tade: –Jehe otessedeni, tahide Cretadsa tiadenidsa huati onapode: “Denima jaijadsapi oppinabote bacco inanitohui” onaporaha ohuattidsa jehe tiquinejeradsapi oppinabote bacco inani taji. Nahissa ohuattidsa jehe tiquina-dsapi tidsepedenitaji pohuama hua tidsippamana-jaranaja; nahissa tiadeni naqui ocasserani temana-geranitohuiraha.

²²Naraha jidapapi tiadenidsa huati onana: Ticappinamana-geraji. ¡Dacoco tijiraji! Icca canoa imeni cabararidsa amossi canaraha ijica-geranitohui; huapima icassiejeranitohui –nade Pablo. ²³–Aja Dio ohua dosse naridsajaripa ohua Medsede. Najaria aja dsome Pocca dodosse memehujicca ohuadsa dosse inaronadsa ahuatopa. ²⁴Ohuadsa huati tadsapa: “Pablo ticappina-geraji” napa. “Tiapi odsa panani Romahuaji bacco tinanitohui, tamine deni tojahicca baccouhaji tedsa: Ohuapi aji ohuani, tanitohui” napa ohuadsa. “Nema tadsapi Diojine aja tiadsa jahijonajarideni naco tocassiejerahitohui” napa –nade Pablo. ²⁵–Jehe otessedeni, tibodideni pina tetidsemanaji.

Ohuattipi: Diopa maidsera tahi, onajaro. Nadsama aja Pohua huati huati tahi omittajaropi Dio Pohujine nema nanitohui; Pocca dodosse tabaqqi memehujicca attissa inananitohui.

²⁶Naraha passo nocconidsa dsama bedeni huittidsacossanidsa cobara icananitohui –napode Pablo.

²⁷Nadsapi passo imeni onini Adriatico nocconihuaji jojodejine ahuaji iacca, ahuaji iacca nadsapi icca huada 14 nadsa dsome nocconiraha canoa imeni ahaccadedeni attipa: –A, dsama tohuajirajonanitide –quinade. ²⁸Nadsapa: –Todsejerajonanitide –quinadsa ssiquitohui nattome quinade. Siba socadsa ssoque dsanani tappa idsippamanade. Nadsapi passo 36 metro cajide. Denima nattome quinapomadsapi ajimani tojajaro: 27 metro tojajonade. ²⁹Nadsapa canoa imeni passo bodicca sibadsa huacca canani noppineni cappinamanadsa ahaccadedeni canoa imeni dsotohuaji ppejo 4 nehe

hua idsippamanade. Ppejopi soca imenidsa ssoque toppidsa passodsas hua idsippamanadsa poni inoni ssiquidsa jaro nadsapi canoa imeni ahuaji tohuacca, ahuaji tohuacca nejera-nijine. Nadsapa: –Jaho, ssiaja naccaraho –quinadsa maji-tohui madimana-dsanapode. ³⁰Naraha ssiaja jeraccadsama canoa imeni ahaccadedeni attidenia: –Ppejo onihi canoa imeni cotanihuaji hua idsippana –quinaraha pohuadenipa maidsamanade. Pohuadenipa: –Idomo toccana –quinadsapa canoa bedenira tappa icanaronamanade. ³¹Naraha Pablo qqui tadsapa pohua cacahuade romanodenicca soldado dossededsa, aja pocca soldadodenidsa naco huati tajari: –Jaho, canoa imeni ahaccadedeni ajadsa madimana-jaradsapa tiadeni ehueranipi ticassiejera-jeranitohui –nade Pablo. ³²Nadsapa canoa ahaccadedeni domo tocca-jarahijine soldadodenia canoa bedeni madoni ca ippimanade. Canoa bedeni passodsas cassonippadsapi tocatabode.

³³Nadsapi ssiajabote nadsa jipamanahijine Pablo huati inabaqquide: –Jehe, jidapana huada 14 nehe tossoqquimara-ha oppina tadsapi ticattomama canajarojine tijipamananissa tejerani. ³⁴Jari, ¡jidapapi tijipamanaji! Tidacoramanani nadsapi ticassiejeranitohui. Jehe, ticappinamana-jeraji; tibejoje cama-jeranitohui ¡nohuerani! Bacco tiquinanissa tanitohui –nade Pablo. ³⁵Nadsama atti jicadsapa pan bobi idi nadsa huapima mittamanahijine Diodsa: –Jehe, epejeni bica tani –nade. Nadsapa pan dside, jai, apa nade. ³⁶Pablo nama nahi qqui toquinadsapa bodideni badsira tehe tobicahi nadsa pohuadeni naco jipamanade. ³⁷Ia huapima canoa imeni bodinidsa imadinipi 276 inade. ³⁸Nadsapa ajarideni jicadsapa dsamatapa mota, aroso jidsadsa trigo sacocca hua idsippamanade: –Canoa imeni tocappahuani nana –quinadsa.

³⁹Ssiajaponi ahaccadedenipa dsama qqui toquinaraha noccodeni jidsa tajari. Naraha ahuaji qqui, ahuaji qqui quina-dsapa toqquidohujanicca ssiqui bicani qqui toquinadsa: –Jina, nanihuaji iaquedsimadsa huana icanana –quinade. ⁴⁰Nadsapi ppejo madoni ca ippimanadsapi passo bodidsa inebomanade. Canoa imeni dsotoni huahuacossa naqui acca acca quinapomahijine ssoque dsanani dicca quinade. Cotanihuajicca ahuadsa etero imeni ssoque dsanani dicca



quinadsa joca inamacossanimanadsapi jojodejine tohuacca-pomade. Nadsapi toqquidohuajanihuaji iaquedsimade.

⁴¹Naraha passo bodicca quequehemeri najarodsa cassonari cassonari dsanapode. Denimacca ssiquidsapi canoa imeni cobara canade. Canoa cotanihuajipi toquehemora nade; naraha dsotohuajipi passo jibabani dacorajaro ssonari ssonari nadsapi canoa imeni huacca canadsa cabararijarode.

⁴²Nadsapa soldadodeni: –Toponi cocorodsa hua todsimarideni cona cona toquinadsapi domo toccarana –quinadsa; –Jari, tojicana –quinade. ⁴³Naraha romanodenicca soldado dossedepa Pablo dsoqquehijine jipera tadsapa jehe najarade. Nadsapa dicca inabaquidsa dosse inabaquide: –Jari, conade nahatoqquri tiquinadsapi tahide passodsa joppa tidsippamanapoji, ssiquihuaji cona cona tiquinanijine –nade.

⁴⁴–Naraha conade ssamoquuri tiquinanipi ahua qqui tiquinaji. Najarodsa, aji canoa imeni arobenidsa naqui titiporimameri nadsa tibijidenidsa cona cona tiquinaji, ssiquihuaji bacco tiquinanijine –nade romanodenicca soldado dossede atti. Nema inadsapi ia huapima dsama bacco inadsa icassiejerade.

Maotadsa madimanajari

28 ¹Passo imenidsa huapima icassiejeradsapi aji ssiqui-huaji bacco bacco inajaro. Ssiquihuaji bacco bacco inanicca dsama oninipi Maota. ²Nahihuajicca madija madimanajaridenipa iadsa huatideni huanaquiquiri nade. Nanidsa bacco idsatiraha passo cca, ssirini toja nadsapi dsippo imeni inadsamanadsa iadsa huahua quinade: –¡Nija! Aji dsippodsa jia tiquinaji –quinade. ³Nadsapa Pablo ahua tabi eccani-qquidsa hua idsanade. Naraha maccapa dsippo ppoconi noppineni qqenadsa Pablo dsepedsa cca todsadsapa dsepedsa que tade. ⁴Naraha nahidsa madija madimanajarideni Pablo dsepedsa macca que tahi qqui toquinadsapa pohuadenira imahaha canade: –A, pohuapa madija inanadsoquuedsa itide. Passodsapa je tajararaha jidapapa ia cacahuade onini Dique (ettidsapi: imasiri manaconi totonanade) ponijine dsoqqe-hitohui –quinade. ⁵Naraha Pabloa pohua dsepe dissa nadsapa macca dsippodsa ssonidsanade. Naraha Pabloa macca comene ahua najarade. ⁶Pohuadeni bodidenidsa attidenipa: “Jite tojahitide, amadsati huatiadsa tohuedimahijinerana” quinajari. Naraha Pablo cattade madimana, madimana naraha Pablo huatia-jaradsapa bodideni cacajiquimera-manade. Pohuadenipa poccadeni dio aja ia cacahuade quiquina najari huapi tahi cajimanadsapa Pablodsa: –A, ajaripa dio ohuaha itide –naridsamanade.

⁷Nadsama aji dsippo jia inani huajira tanidsapa najaro dsamacca tamine madijari. Pohua onipa Poblío. Nadsapa iadsa: –Jina, occa odsahuaji jaijana –nade. Nadsapi huada 3 nehe pohuadsa imadide. Pohuapa iadsa accora tade, bica tade. ⁸Naraha Poblío imehipa coma taha porijari. Huapi ppororaja, miji miji taja najaride. Nadsapa Pablo qquide toqquedsimadsapa Diodsa huati tajari. Pohua dsepedsa bara inadsapa tonomide. ⁹Nama nahi mittamanadsapa najaro dsamacca comaquiquiri najarideni huapima jahijonadsa Diojine tocanomireridsade. ¹⁰Nadsama iadsa bicaquiquiri nadsapa poccadeni daniji huapi tehe iadsa da inaquimanade. Dsotode benehidsa jajapomanijine naqui icappira nejeranijine huema nehe iadsa da quinapomade.

Pablopa Romahuaji toccajari

¹¹Nani dsama bedeni onini Maotadsa abadsico 3 canaha imadidsapi ijoppemapomanijine odsa panani Arejadriacca canoa imeni etero ssoque caniquimani cajiniccadsa jajedsade. Canoa imeni jinededeni naco dsadsajade jicanijine nahi Maotadsa najomanaccade. Poccadeni canoa imeni cotanidsapa pohuadeni cacahuade corime pamaha barijari, onideni Casto, Poro quina-jari. Canoa ahaccadedeni attidenipa: “Ia cacahuade papamade” quinajari. Najaro canoa imenidsa jajedsadsapi iaccapomade. ¹²Nadsapi Maotadsa ijoppemadsapi dsama passodsas huittidsa-cossani onihicca odsa panani Siracosadsa bacco inade. Nanidsa icca huada 3 nade. ¹³Nadsapi najaro dsamadsa denima issoni-qquimadsapi passo imeni inidima nani iaccabacossade. Dsama Itariacca odsa panani Rejio bacco inade. Huada ssiajapi inatti-huaji jojode ccajonadsapi iaccapomade. Dsome ssiajapomadsapi najaro jojodejine huassinaja odsa panani Poteori bacco inade. Nanidsapi canoa icanebodsas jajemorade. ¹⁴Nadsapi najaro odsa pananidsa Jesodsas jehe quinajarideni bacco inabaqquide. Pohuadeni attipa: –Jari, iadsa semana ojarie timadimanaccaji –quinadsa pohuadenidsa huada 7 nehe imadide. Dsotodepi odsa panani Roma jaini jajapomade. ¹⁵Jaijaraha aja Romahuajicca Jesodsas jehe quinajarideni ima mittamanadsa itohui jajona-jari, bacco ijidsabaqquihijine. Motadenipa odsa capamema najaro onini Foro de Apiodsas bacco ijidsabaqquide. Motadeni ohuahapa odsa capamema najaro onini Tres Taberna quina-hidsas bacco ijidsabaqquide. Nadsapa Pablo qqui inabaqqui-dsapa bodi huatidsede. Diodsas naco: –Jehe Abi Dio, epejeni; Tiapi bica tinani –nade. ¹⁶Nadsapi odsa panani Romahuaji bacco idsimadsas madija hua todsimabaqqui-pojaridenipa toponi cocorodsas hua idsimabaqqui-manapomade. Naraha Pablopa odsa onihidsa pohua motta madihijine jehe quinadsapas Pablo pohua cacahuade soldado ojaria tedseje madimanade.

Pablopa Romahuaji

¹⁷Nadsapa nahidsa Pablo huada 3 nehe madidsapa jodio tamededeni madimanajari huahua inabaqquide. Queriquimanadsapa pohuadenidsa huati tajari: –Jehe

ohuemecotedeni, ohuapi jodiodeni ohonajidso-baqqi najarade. Icca ididenicca madie tahimarinidsa naqui nanacassera onejerade. Nohue ojiraraha odsa panani Jerosaredsa jodiodeni occa madijaraha ohuadsa huadiqquri nadsa ohua dama quinadsapi romanodenidsa todsepe ojajarode. ¹⁸Nadsapa nahi Jerosaredsa romanodeni ohua huati icanamanade. Ohuadsa huati toquinaha jicadsa attidenipa ajama quinade: “Pohuapa ima cappirahi, madija nanajidso najarahi. ¿Nejecotohui dsoqquehijine?” quinade. Attideni nama quinadsapa “Pablo tappa inana” quinade. ¹⁹Naraha jodiodeni ohuadsa huadiqquri nadsapa romanodeni: “Pablopa ima cappirahi” quinahi ima mittamandsapa pajissa quina-jarajari. Nadsapa romanodenicca dsama cacahuade tedseje jehe canire-jarajarijine romanodenicca tamine deni tojahiccana occa ima icattemanijine onadsa huati onajarode. Aja, occa madija jodiodenidsa naqui occa huadie nohuereje najaro. ²⁰Najaro timittamananijine onadsa titohuideni huahua onajarode, “Jaho, pohuadeni qqui onabaqquidsapa pohuadenidsa huati onanijine” onade. Aji tiadenipi jidapanana cadenadsa ohua jore quinani qqui tiquinajaro. Ia Isaraeridenipi Ia Idinide tohui inajorani. Najaridsa jehe onadsapi ohua dama quinajarode –nade Pablo.

²¹Nadsapa Pablodsa pohuadeni atti cacomeramanade: –Naraha Jerosarecca madijapa titahimari ima teppe naqui iadsa dosse inajonamana-jerade. Imecote jodiodeni ahuaji bacco najonamanajarideni naco “Pablocca ima tabaccora tani” quina-jarade. ²²Naraha aji ima dsati mari mari tajaropi dsama huapimadsa: “Bica tejerani” nanaridsamana nahi ihimitta najaro. Nama quinadsapa: Ticca ima imittaccaraho, ihina najarode –quinajari jodio tamedeni.

²³Nadsapa huada onini huati toquinade. Najaro huada bacco tadsa dsidsidsamassa Pablocca odsahuaji huapima queriqqimanade. Nadsapa Pablo Diocca cacahuehe tahimarini, Jeso tahimari naco mari icanabaqquijari. Jeso tahimaridsa pajissa quinahijine dissera tajari. Moisesicca marinajadsa, Dio Atti cacomeraqquri najaridenicca dsodonijidsa naqui mari icanabaqquijari. Aji: –Maittaccadsama dsodo quinapojaridenicca imadsa Jeso tahimaripi ahuatato tapojaro. Najari Jesoa aja Ia

Idinide Mesiapaja –nade. Najaro maridepi majidsamaraha dsome-
dsana apaja quinade. ²⁴Nadsama jodiodeni mota Pablo attidsa
huatidsemanadsa pajissa quinade; naraha motapa pajissa quina-
jarade. ²⁵Nadsama huapima jehe canire-jaradsa motapa: –Jina
jaijanina –quinaraha Pablo pohua atti jicanicca pohuadenidsa
ajama nade: –Jehe, tiadenipi pina ticcadeni ididenissa tiqui-
najaro. Maittaccadsama Dio Pohua Corime Pohua Atti cacomera-
bote Isahiadsa huati tadsa dsodo inaponipi pajissa tojade:

²⁶ Dio Attipa: “Occa medse, Isahia, Isaraeridenidsa
ohuatti tecomeraridsaji. Ohuatti pohuadenidsa ajima
onajaro: Teribodeni ticajimanaraha timittamananissa
tejeranitohui. Tinoccodeni ticajimanaraha qqui
tiquinanissa tejeranitohui. Najaro ima pohuadenidsa
huati tinana, onajaro” nahi nade.

²⁷ “Pohuadenipa mittamanaraha bodideni iboqquri najari.
Huaribodeni sibaqquri nadsapa mittamanahijine
jiperaqquri najari. Noccodeni ehueraqquiri nadsapa pina
noccodeni cappiramanajarissa najari. Nama quinadsapa
qqui toquinahijine ssamoqquri, mittamanahijine
ssamoqquri, bodideni tocahatterahijine ssamoqquri
nadsapa bodideni cacajiquimera-manahijine ssamoqquri
nahi. Nahissa bodideni cacajiquimera-manadsa ohuadsa
toquejenadsapa onabica-baqquihitohuiraha”

nahi nade Dio Atti Isahiadsa –nade Pablo.

²⁸ –Jehe occa madijadeni, nahatoqquri tiquina-
nijine tiadenidsa huati onajaro. Jidapapa jodio quejena-
jarajaridenidsana Dio ia tonassiaja-baqquihijinecca ima toja-
ridsanitohui. Najaridenina mittamanahissa tahitohui –nade
Pablo. [²⁹Nadsapa Pablo atti jicadsa jodiodenipa pohuadenira
ahuaji atti, ahuaji atti quinadsapa jai tojanide.]

³⁰ Nadsapa huajano pamaha tossoniquimaraha Pablo
odsa panani Romadsa madihipaja naccade. Pablo pocca odsa
manaconi naqui jinededsa da da dsadsanapo nahipaja naccade.
Pohua qquide jajahijona nadsa naco madija ihicatidsebaqqui
nade. ³¹ Pablo pohua qquide jajahijona nadsa naco Diocca
cacahuehe tahimarini, ia Medsede Jesocristo tahimari naco mari
mari ihicanabaqqui nade. Pabloppa cappina-jaradsa pohua attidsa
naco ssonacossade maradsa mari mari ihicanabaqqui najaride.

Pablo Romanodenidsa ima teppe dosse inajaro

Romanos

Introducción: Pabloa Romahuaji madimanajari Jesodsa toquejenajari-denidsa ima teppe dsodo inajaro. Pohnuapa nahihuaji tocca-jaraccadsa pohuadenidsa dsodo inapojaro. Pohnuadenni qquide, pohuadenni maride tohuini naraha dsotodena pohuadenihuaji toccajari. Dsotodena pocca benehicca imapi Roca dsodo inajaro (Tahimaridenni 27-28).

Romahuajicca madija mota huapi taha jodio quejena-jarajaridenni. Poccadenni odsa panani deni tojanicca, bica taniccapi Roma. Najaro odsa pananicca madijapa jodiodenicca dsama cacahuade toquejenaridsajari.

Romacca madija motapa Jeso tahimari mittamanadsa pajissa quinajari. Nadsapa Dio jipa tahiccassa inanamananjine, poccadenni ima Diodsa bica tanijine Pablo pohuadenidsa dsodo inajaro.

Romanodenidsa Pablo attipa: –Moisesicca marinajadsa iboraqquri tiquinadsapi ticassiejera-jeranitohui. Najarodsa timadimanadsapi ticcadenni ima Diodsa pajiranissa tanijine ssamo tani. Jesocristodsa pajissa tiquinadsana Dio tiadenni tonassiajabaqqi-hitohui –najari Pablo pocca ima teppedsa.

- 3.21-26 Icassiejeranijinepi Jesocristodsa pajissa inajaro
- 5.1-11 Jesojine Dio tedseje icajonerajaro
- 6.1-14 Cristodsa ijariqquijarocca ima
- 6.15-23 Medse toquejenajaridenicca ima tadsajani mari icanabaqquijari
- 7.1-6 Cajicajicca imadsa mari icanabaqquijari
- 7.7-25 Imasiripi iadsa madini
- 8.1-17 Icca madie dsatipi Dio Corime ia mari tocanabaqquijari
- 8.18-27 Diocca deni tojehe Pohua dsibehinema qqui inanitohui
- 8.28-39 Diocca deni tojehe icajinitohui

Icassiejeranijinepi Jesocristodsa pajissa inajaro

3²¹ Jidapapi Dio iadsa ajiaro ima ahuato inanajaro: *Moisesicca marinaja jirehe icca ima Dio Pohuadsa tobicanijine pajirani. Najaro imapi Moisesicca dsodoniji nema nehedsa nema napojaro. Dio Atti cacomerabote ohuahadeni naco huati toquinapojaripaja. ²² Madija Jesocristodsa pajissa quinajarideni huapimadsana Dio ajama najari: –Tiadenidsapi ima nohuerani. Ohuadsa bicaquiri tiquinani –najari. Diodsapa jodiodeni, jodio quejena-jarajaridenicca imapi najarossa caniquimera-jaro. ²³ Madija huapimapi imasiri icajiridseje najaro. Diocca deni tojehedsa ipajiranissa tejerajaropaji. ²⁴ Aji icca imasiri manaconi najidsohue icajinitohuiraha Jesocristo pohuajinena Dio ia tappa tabaquijari. Dio iadsa huati huana tadsa manaconi jirehe iadsa: –Tiadenidsapi ima nohuerani. Ohuadsa bicaquiri tiquinani –najari. ²⁵ Diopa Pohua Bedi Jesocristo dsoqquehijine eccoradsapa madija huapimadsa nohue inajaro: Pohuapa imasiridsa huadi tajari. Ahua primacossanidsa Jeso emene toccajaropi icca imasiri manaconi da inajaro. Itohui Jeso dsoqquejari tahimaridsa pajissa inadsapi Dio iadsa: –Jidapapi ticcadeni imasiridsa ohuati ajimani –najari. Diopa nama najaria iadsa nohue inajaro: Pohuajine pajiranissa tani. Aja tahide Jesocristo dsoqque-jaraccadsama Diopa madijacca imasiri qqui taraha pina qqui torahi najari. ²⁶ Pohuapa nama najaria –Amadsati onajidso-baqquina –najarajari. Mohuaradsa poccadeni imasiri inahana-jonajaro. Jidapapi ima pamehe Dio Pohuajine iadsa ahuato tajaro: Jidapapi Dio Pohuajine pajiranissa tajaro. Jesocristodsa pajissa quinajaridenidsa: –Tiadenidsapi ima nohuerani –nadsa naco Pohuajine pajiranissa tajaro.

Jesojine Dio tedseje icajonerajaro

5¹ Ia Medsede Jesocristo itohui dsoqquejaricca imadsa pajissa inadsapi Diopa: –Tiadenidsa ima nohuerani –najari. Najaroa aji Dio tedseje icajonerajaropaji. ² Cristodsa pajissa inadsapi pohuajine Dio iadsa catidse tahi. Najaroa aji Dio Pohuadsa disseraquiri inajaropaji. –Nidsa Dio dsamarihuajipi pocca deni tojehe iadsa tojanitohui –inadsa ehetidse najaro. ³ Naraha itedsejemacca ima bicanidsaha etidseni ojari-jerani.

Aji ocasserani ejarodsa naqui etidsenijine. Ajijaro ima nahatoto inani: Ocasserani ejaropi denima idacocorani nanijine, ocasserehe tonahanade iattanijine. ⁴Idacocorani nadsapi Diopa: –Tijinedeni bica tani –najari. Nadsapi ijine Diodsa bica tani nahatoto inadsapi itedsejemacca ima bicani iadsa tojanijine naqui ibodidsa ahuato tajaropaji. ⁵Aji itedsejemacca ima bicani tohuini imadijaropi maidsehe toja-jeranitohui. Dio Pohua Corime iadsa da inajaripa ibodidsa pocca tohuati huanehe inananissa tajaro.

⁶Iapi ijine icassiejeranijine ipajira-jeradsapi tohuati nahanaqquri inapode. Naraha Dio ima inanjara-pojarocca huada bacco tadsa Cristo dsoqquejaripa madija imasiri sseqquri najaridenicca imasiri manaconi dsoqquejari. ⁷Madijapa pohua tessedsa ima oppina tehe tojadsa pohnadsa: –Dsoqquena –quinadsa pohua tesses tossiajahijine: –Ohuara odsoqquena –nahijinepa cappina tahi. Pohua ccaccoraja, pohua ccaccora-jaraja nahitide. Naraha pohua tesses madieri bica taraha pohnadsa: –Dsoqquena –quina-dsapa najari tossiajahijine madija ojari ojari naha pohua ccaccora tahi. ⁸Naraha Dio iadsa huati cahanari canahi nahatoqquri inanijinepi imasiri sseqquri inaraha Cristopa itohui pohua ccaccorajari. ⁹Cristo icca imasiri manaconi dsoqquejarijinena Dio iadsa: –Jidapapi ticcadeni ima ohuadsa tobiani –najari. Nidsa pocca najidsohuecca huada bacco tadsapi ima bicani denima icajinitohui. Pocca najidsohue iadsa ssonari-jeranitohui. ¹⁰Tahide imasiri icajie imadipodsapi Dio tedseje icahadirehe imadipocade. Nema inadsa imadiporaha Dio Pohua Bedi icca imasiri manaconi dsoqquedsana Dio Pohua tedseje icajonera-jaropaji. Jidapapa Cristo nahatonia camitta taha madidsapa ia tonassiajabaquihitohui, inajaro. ¹¹Najaro ima bicania iadsa ojari-jerani. Diodsa naqui huatidsehe imeni icajini. Ia Medsede Jesocristojinena Dio tedseje icajonerajaro.

Cristodsa ijariqquijarocca ima

6 ¹Aji ima imittajaropi madija imasiri denima inananaraha Diocca tohuati huanehena madijadsa denima dacorajaro. Nadsama ¿iapi nejecoma inanijine? Diocca tohuati huanehetohui inadsapi ¿imasiri inananijinequi? ²¡Poni! ¡Imasiri inana-jerana! Pina aja madija dsoqquedsa imasiri ssamo tajarissa inajaro. Nema inadsapi ¿imasiri

inana-dsanaponijinequi? Nohuerani. ³¿Totopacca imapi nahatoqqiri tiquinejerajaroqui? Totopa icajidsapi Jesocristo pohuadsa ijariqqijaro. Pina pohua tedseje ecotajarossa najaro. ⁴Passodsa ia topa idsanamanadsapi pina Cristo tedseje ia ppa idsamanajarossa najaro. Aja Cristo ppa idsamanaraha Abi Dio pocca deni tojehe bicabotema Cristo inahatonijari. Ia naqui Cristo pohua tedseje ecotaraha pohua tedseje inahatonijarossa najaro. Najaroa aji madie dsati icajijaropaji.

⁵Cristodsa ijariqqijaropi pina pohua huatijarissa inajaro. Cristo nahatonidsa naco pina pohua tedseje inahatonijarossa inajaro. ⁶Ajijaro ima nahatoqqiri inajaro: Icca madie jadani naqui pina Cristo ahua porimacossanidsa huatijarissa najaro. Najaro jicadsapi ia tohuini inanicca tabaccorehe naqui jicajaro. Iadsa ajimani tojadsapi pina ia dossedessa napoma-jerani. Nema nadsapi imasiridsa imadi-dsanapo-jeranitohui. ⁷Pina madija dsoqquedsa imasiri denima inananiijine ssamo tajarissa inajaro. ⁸Cristo pohua tedseje ecotajaropi pajissa pohua tedseje imadinitohui, inajaro. ⁹Iapi nahatoqqiri inani: Cristo huatiaraha nahatonijaripa huatipoma-jarahitohui, inajaro. Ehetia najarocca imapi dacorara Cristodsa dacora-jerani. ¹⁰Cristopa dsoqquehi ojari naraha najarodsa imasiricca dacorehe pohuadsa jicanissa tani. Nadsapa camittemanidsa Diocca deni tojehe ahuato tanijine madijari. ¹¹Nadsama iapi ibodidsa ajima inana: Pina ecotajarossa nadsana imasiricca dacorehe iadsa jicani. Jidapapi Jesocristodsa ijariqquidsapi Dio Pohua tohui nahiccara inananijinena imadijaro.

¹²Aji imasiripi tessiredeni dsoqqequeque taniccadsa dossede dacorajaro. Tabaccorehe tinanamanajine tiadeni dosse dosse najarossa najaro. Najarodsa: –¡Poni! –tiquinaji, timedenidsa tohuini tiquinanicca tinanamana-jeraniijine. ¹³Tessiredeni ima tabaccora taniccadsa teccoramana tejeraji. Tessiredeni Diodsara teccoramana. Tiadenipi pina madija dsoqque-
raha nahatonidsa madijarissa tiquinajaro. Nadsapi tessiredeni ima bicanidsana teccoramana. ¹⁴Nema tiquinadsapi imasiri tiadenidsa dacora-jeranitohui. Jidapapi Moisesicca marinajadsa timadimana-jerani. Diocca tohuati huanehedsana timadimanajaro.

***Dodosse tabaqqui toquejenajaridenicca ima
tadsajani mari icanabaqqujari***

¹⁵Jidapanapi Moisesicca marinajadsa imadi-gerani. Diocca tohuati huanehedsa imadijaro. Nema inaraha ¿imasiri inanani bica taqui? Bica tejerani. ¡Poni! Nema inejerana. ¹⁶Tiadenipi nahatoqquri tiquinajaro. Madijacca dodosse tabaqqui tiquejenadsapi pina tiadeni dodossedede attissa tinanamananijine poadsa tiadeni teccoramanajaro. Tiadeni dodossedede attidsa iboraqquri tiquinadsapi pocca dodosse tiquejenajaro. Najaro imassa najaroa tabaccorehe tinanamananijine iboraqquri tiquinadsapi pina imasiricca dodosse tabaqqui tiquejenajarossa najaro. Nema tiquinadsapi paji tijicarinitohui. Naraha Diodsara iboraqquri tiquinadsapi Poadsa ima bicani tinanamana-dsanaponitohui. ¹⁷Ima bicani ticattejidsamanadsapi Diodsa ohuatidseda: –Jehe, Abi Dio, tijine bica tani –onajaro. Tahidepi pina imasiricca dodosse tabaqquissa tiquinaporaha jidapapi Jesocristo tahimari tiadeni mari tocanabaqqui-manadsana ticcadeni huatidsehema iboraqquri tiquinajaro. ¹⁸Nadsapi imasiricca dodosse tabaqquissa tiquinejeranijine Dio tiadeni todinibaqquidsapa ima bicanidsara tidsepedeni ijimanajaro. ¹⁹Aji huati huati onajaropi timittamananijine najo tani onadsa ajijaro namicca ima tadsajani tiadeni mari ocanabaqqujaro. Tahidepi tessiredeni huananehedsa teccoramanapojaro. Ima onihi tabaccora tajarodsa naqui tessiredeni teccoramanadsapi pina imasiricca dodosse tabaqquissa tiquinapode. Naraha jidapapi Jesocristojine ticcadeni ima cacajiquimerani. Tessiredeni ima bicanidsara teccoramanaji. Nani bicaqquri tiquinadsa Diotohuira timadimana-dsanapodsapi pocca dosse-nijidsara iboraqquri tiquinanijine.

²⁰Pina imasiricca dodosse tabaqquissa tiquinapodsapi ima bicanidsa tidsepedeni ijimana-geraccade. ²¹Naraha imasiri tinanamanadsapi ¿nejecora bica tanicca titicajimana najarotte? Nohuerani. Jidapapi aji imasiri tinanamanapjarodsapi ticappinamanani. Najaro imasiridsapi dsoqqehe jiquejeranihuaji najidsohuedsa timadimana-dsanaponitohuiraha. ²²Jidapapi pina imasiricca dodosse

tabaqqussa tiquinejerani. Diodsara tidsepedeni ijimanani. Najaro imana deni tojanicca ticajimanajaro. Jehe, Diodsara tidsepedeni ijimana-dsanapodsapi bicaququiri tiquinadsa Pohuatohuira timadimana-dsanaponijine. Nani camittehe jiquejeranicca naqui ticajimana-dsanaponijine. ²³Icca imasiri manaconipi paji *idsoqqueri tani. Naraha Diocca danijipi camittehe jicaquera tanicca. Ia Medsede Jesocristodsa iquejenadsapi Diocca daniji icajini.

Cajicajicca imadsa mari icanabaquijari

7 ¹Ohuemecotedeni, tiadenipi Moisesicca marinaja nahatoqquri tiquinani: Madija madicadsapa Moisesicca marinaja pahuadsa dacoraccani. ²Najaro ima ahuaato tanijinepi cajicajicca imadsa tiadeni mari ocanabaquina, onajaro. Moisesicca marinajadsapi ajima najaro: Amoneje maqquideje cajidsapi ponicca maqqi madicadsapa pahuadsara madicani bica tani. Najaro cajicajicca marinaja ponidsa dacoraccani. Naraha ponicca maqqi dsoqqedsapa cajicajicca marinaja ponidsa nohuerani, jicani. ³Aja ponicca maqqi madicadsapa maqquideje ohuaha inajadsapi ponicca maqqidsa imasiri inanajaro. Cajicajicca marinaja dsori inanajaro. Naraha ponicca maqqi dsoqqedsana cajicajicca marinaja ponidsa jicani. Maqquideje ohuaha cajinijine oppinera tani.

⁴Ohuemecotedeni, tiadeni naqui pina Cristo tedseje ecotajarossa nadsapi Moisesicca marinaja iadsa dosse dosse napojaropi jicani. Jidapapi ia dossede marinaja onihi icajinijine bica tani. Nadsapi aja Cristo dsoqqueraha nahatonijaricca medse iquejenani. Nema nadsapi Diodsa idsepe ijiridsanijine bica tani. ⁵Icca ima tabaccora tajaroma imadipodsa Moisesicca marinaja ia mari tocanabaquidsa imittaraha najarojine imecca imasiri denima tohuatodsapi denima tohui ibodi huahuato naccade. Najaro imasirima imadidsapi dsoqqeche jiquejeranicca najidsohuedsa imadi-dsanaponijineraha.

⁶Naraha jidapapi Moisesicca marinaja iadsa dacora-jerani. Ia dosse dosse naporaha jicani. Moisesicca marinajadsapi ecotajaro. Jidapapi Moisesicca dsodoniji-botedsa Diodsa idsepe iji-jerani. Dio Corimecca daniji icca madie dsatidsana Diodsa idsepe ijidsanapojaro.

Imasiripi iadsa madini

⁷Jari, aji Moisesicca marinaja imittadsa ibodicca imasiri tohuatojaro onajaropi ¿Moisesicca marinajapi imasiri onajaroqui? ¡Nema onejerani! Moisesicca marinaja dsodo nanidsapi imasiri onananicca ima ohuattajaro. Moisesicca marinaja omitta-jeradsapi imasiricca ima nahato onejera-neje. Imapi pina ajjarossa najaro: Madija ohuaha dsepetaji acconi ojamidsapi obodi: –Imasiri jerani –onanitohuiraha Moisesicca marinajadsapi: –Madija ohuaha dsepetaji acconi jamimana tiquinejeraji –nani omittadsapi nahato onajaro. ⁸Najaro marinaja nohueradsapi imasiricca dacorehe ahuatoma-geranitohuiraha. Najaro marinaja omittadsapi occa imasiri ahuatomajaro. Obodidsa tabaccorehe tohuini onaniccagine onocodsa qqui onajaro huapimatohui jami jami ohona najaro. ⁹Tahide Moisesicca marinaja omitta-jeradsapi pina bica onadsa omadjarossa najaro. Naraha dsotode Moisesicca marinaja omittadsapi imasiri onanaridsani ohuadsa ahuato tajaro. Paji odsoqquerinjine naqui ohuadsa ahuato tajaro. ¹⁰Moisesicca marinajajinepi camittehe jiquejeranicca ohuadsa tojanijineraha najaro dsori onanadsapi dsoqqehe jiquejeranicca imana ohuadsa tojajaro. ¹¹Imasiripi mamajadsa najaro. Moisesicca marinajadsa ohua camajadsa. Omadisanaponijinecca ima tohuini onaraha imasiripi dsoqqehe jiquejeranicca imahuaji ohua tonanajaro.

¹²Nadsama Moisesicca marinajapi bica tani, imasiri cappirani. Diocca dosseniji huapima Pahuajine pajiranissa tajaro, bica tani. ¹³Naraha aji Moisesicca marinaja bicanjine ¿dsoqqehe jiquejeranihuaji occanjinequi? Nohuerani. Imapi nema nejerani. Moisesicca marinaja dsori onanadsa imasiri onanajarojinena dsoqqehe jiquejeranihuaji occanjine. Moisesicca marinaja bica tajarojinapi imasiricca ima ohuadsa ahuato tajaro: Imasiripi oppina tani, tabaccora tajaro.

¹⁴Diocca marinaja Moisesidsa da inajaropi bica tani nahato-qquiri inajaro. Naraha ohuapi ohueme ocajie omadidsapi imasiri ohuadsa dacorajaro. Pina ohua dodossedessa najaro. Poni tohuini naniccara onananijine ohua cacadosse najaro. ¹⁵Najaro obodi huatodsapi: –¿Nejecotohui obodicca ima jidsa

tajaro? –onajaro. Ohua jipa onanicca bica taniccara onanajerajaro. Tohuajari nads taniccara onanajaro. ¹⁶Ohua jipera onanicca onanadsapi ima ohuadsa ahuato tani: Moisesicca marinajapi bica tani. ¹⁷Naraha aji ohua jipera onanicca onanajaropi ohua motta ojine jerani. Imasiri obodidsa madidsajarojine ohua ocadossenijaro. ¹⁸Ohuapi ohuadsa ima bicani nohuerajaro nahato onani. Ohueme ocajie omadije najaro imasiri sse onani. Ima bicani onananijine tohuini onaraha nema onana-jerani. ¹⁹–Ima bicani onanana –onaraha ima bicani onana-jerani. Ohuapi ima tabaccora tajaro tohuini onejeraraha tabaccorehe ohonana najaro. ²⁰Nadsapi obodi huatojaro: Ohua jipera onanicca onanajaropi ohua motta ojine jerani. Imasiri obodidsa madidsajarojine ohua ocadossenidsa nema onanajaro.

²¹Obodi huatomadsapi ajijaro ima ocajijaro ohuadsa ahuato tani: –Ima bicani onanana –onaraha ima tabaccora taniccara onanajaro. ²²Obodipi Diocca marinaja tohuini onani. ²³Naraha ohuemepi ima onihi cajijaro. Ohuemedsa imasiri dacorajarojine obodicca ima bicani tadsajani pina cahadirejarossa najaro. Imasiri deni tojadsapi pina poni dsapanidsa ojararossa najaro. Ohua jore naqquijaro. ²⁴¡Jaho, tohuati nahana onaponi! Dsoqqehe jiquejeranihuaji oqqejeranijine ¿nejecorjarina ohua dicca nahijine pajirahi? ²⁵Ia Medsede Jesocristona ohua dicca nadsapa Diodsa ohuatidsedsa: –Jehe, tijine bica tani –onajaro. Nadsama occa imapi ajima nani: Obodipi Diocca marinajadsa ibora tajaro. Naraha ohuemena imasiri onananijine ibora tajaro.

ICCA MADIE DSATIPÍ DIO CORIME IA MARI TOCANABAQQUIJARI

8 ¹Nadsama Jesocristodsa iquejenajaropi Dio icca imasiri manaconi iadsa inassonari-jeranitohui. ²Jesocristodsa iquejenajaropi Dio Corimena ia dosse dosse najari. Camittehe jiquejeranicca iadsa inanadsapi imasiridsa imadi-jerajaro. Dsoqqehe jiquejeranicca ima naqui iadsa nohuerani. ³Najaro ima bicani Diojinena iadsa tojajaro. Moisesicca marinajajine jerani. Moisesicca marinajapi ecahuanissa tanijine ipajira-jerani. Madija iapi ibodidsa tabaccorehe tohuini inehe

imadijaro. Najarodsa Diopa: –Tabaccora tani. Najarojine najidsohue ticajimananitoahui –nanaja najari. Naraha najaro imasiri tomossinijinepi Dio Pohua Bedi dosse inaronajari. Pina madija essire icajijarossa naha cajidsapa pohua assiredsana icca imasiri manaconi Diojine ssonarijaro. ⁴Dio nama nadsapa pocca marinaja bicabote inapajiranissa tehe imadinijine. Nema inanijinepi ibodicca tabaccorehe tohuini inejeradsa imadijaro. Dio Corimecca dossenijidsana ibora inadsa imadijaro.

⁵Naraha Jesocristodsa toquejena-jarajaridenipa bodidenidsa tabaccorehe tohuini quinaha madimanajari. Najaria aja najaro tabaccorehe tohuira bodideni huahuatomamana najaripaja. Naraha aja Jesocristodsa toquejenajaridenipa Dio Corime pohuadenidsa madijaria aja Dio Pohua jipa tahicca ima tohuira bodideni huahuatomamana najaripaja. ⁶Naraha aja pohuadeni bodicca tabaccorehe tohui bodideni huahuatomamana najaripa paja dsoqquemanarihicca najidsohue pohuadenidsa tojanitohui. Naraha Dio Corimejine Dio Pohua jipa tahicca tohui bodideni huahuatomamana najaripa madimana-dsanapohuijinecca ima cajimanajari. Jonehema madimanagerihissa tajari. ⁷Aja pohuadeni bodicca tabaccorehe tohui bodideni huahuatomamana najaripa Dio ihicahadimana najari. Pocca marinajadsa iboraqquri nahijinepa ssamoqquri nahi. ⁸Madija pohuadeni bodicca tabaccorehedsa iboraqquri najaridenipa Dio inahatidsemanaha najarahi.

⁹Naraha tiadenipi tibodidenicca tabaccorehe tohuini tiquinehe timadimana-gerani. Pajissa Dio Corime tiadenidsa madidsapa Pohuajine Dio jipa tahicca imatohuira timadimanani. Naraha madija Cristo Corime cappirajaripa Cristocca jarahi. ¹⁰Tessiredenipi imasirijine tidsoqquemanaraha ticorimedena madimana-dsanaponitohui. Cristo tibodidenidsa madijarijine Diopa: –Tiadenipi ohuadsa bicaqquri tiquinani –najari. ¹¹Diopa Jeso inahatonijaria Pohua Corime tibodidenidsa madijari. Nadsapa Pohua Corime tiadenidsa madijarijine Cristo Nahatonide Puhua tessiredenidsa camittehe jiquejeranicca da inaridsanitohui.

¹²Ohuemecotedeni, ia dossede icajini. Najaripa Dio Corime. Nema nadsapi ibodicca tabaccorehedsa ibora inejerana. Najaropi icca ima jerani. ¹³Tabaccorehe tohuini

tiquinaniccadsa iboraquuri tiquinadsapi dsoqqehe jiquejera-nihuaji timadimana-dsanaponitohui. Naraha Dio Corimecca dossenijidsana iboraquuri tiquinadsapi tabaccorehe tohuini tiquinajarocca tinajicamanajaro. Nadsapi camittehe jiquejera-nihuaji timadimana-dsanaponitohui.

¹⁴Huapima Dio Corimecca dossenijidsa iboraquuri tiquinadsapi Diocca ejedeni tiquejenani. ¹⁵Dio Pohua Corimeccadenidsa inanajaripa bica tajari. Pahuajinepa Diocca huadie noppineni ticappinamananjine jarahi. Pina medse toquejenajarideni pohuadeni dossedecca huadie noppineni cappinamanajarissa tiquinanijine jerani. Dio Corimejinea Diocca ejedeni iquejenajaropaji. Pahuajine naqui Diodsa: –Abi –inajaro. ¹⁶Dio Corimejinena ibodidsa ima ahuateo tajaro: Pajissa Diocca ejedeni iquejenajaro. ¹⁷Nadsama Diocca ejedeni iquejenadsapi pocca daniji bicani iadsa tojanitohui. Huapima Djojine pocca ejedeni Jesocristodsa tojajaropi iadsa naqui tojanitohui. Pajissa Cristo pohua tedseje ocasserani edsapi nidsa dsotode pocca cacahuehedsa bacco inadsa pohua tedseje pocca deni tojehedsa ia naqui imadinitohui.

Diocca deni tojehe Pohua dsibehinema qqui inanitohui

¹⁸Ohua obodi huatodsapi ajijaro namidsa imadidsa ocasserani eraha najaropi jicaca tani. Nidsa memehuajina Diocca deni tojehe Pohua dsibehinema qqui inahitohui. Pocca deni tojehe iadsa tojanitohui. Najarona iadsa denima bica tajaro. ¹⁹Dio inahatoridsajari huapimadsa Diocca ejedeni iquejenajaro ahuateoquuri inanijine ia qquidepa najoramanahi. Pocca nahatonaja huapimapa najaro qquide tohui inacomamanajari. ²⁰Aja Dio inahatoridsajari huapimapa poccadeni biquehe onihi onihi cajiridsamanaporaha poccadeni ima totabaccorajaropi pohuadenijine jerani. Aja Dio Pohua inahatoridsajari huapimapa Pohuana inajidsoridsajari. Pohuadenidsa najidsohue ssonari, comehe ssonari, dsoqqehe ssonari najaropaji. Naraha poccadeni ima tobicanijine tohuini madimanajari. ²¹Nidsa Dio pocca ejedenidenidsa pocca deni tojehe inanaridsadsapi dsoqqehecce dacorehepi jicanitohui. Najaro deni tojehe Pohua inahatoridsajaridenidsa naqui inaridsadsapi dsoqqehe tappa inabaquihitohui. ²²Nahatoquuri

inani: Dio inahatoridsajari huapimapa pina amoneje ejedeni comene johua johua najarossa quinaha ocasserani ahuaiona-manajaria jidapana ajijaro paji. ²³Iapi Dio Corime icajiraha ajijaro namidsa nahatoridsajarideni tedseje ocasserani eccani. Aji Dio Pohua Corime iadsa da inajaropi nidsa dsotode ima bicani icajinijine nahatoqqiri inani. Naraha najaro ima bicani tohui imadidsapi icca ojiema imadiccajaro. Nidsa dsotode najaro ima bicani iadsa tojadsapi Dio Puhujine pocca ejedeni iquejenajaropi huapimadsa ahuaato tanitohui. Puhujine naco essire cacajiquimeradsapi dsati tojanitohui. ²⁴Jesocristodsa pajissa inajaropi tossiejehe icajini. Nadsapi itedsejemacca ima bicani tohuini imadijaro. Najaro qqui inadsapi denima tohuini inejeranitohui. ²⁵Naraha aji tohuini imadijaro qqui inejeraccadsapi mohuaradsa najaro tohui imadijaro.

²⁶Jehe, ima bicani tohuini imadidsapi ia acco camajaro. Najarossa najaro ocasserani edsa icca jeheniji tojaparidsapi Dio Corime ia acco cama tahi. Diodsa huatide inassamoqquidsa naqui Dio Corime pohua ssa tocanacossadsa Diodsa atti jiraha icca ima huati toquima tahi. ²⁷Diopa ibodi qqui taridsahi. Pohua Corimecca huatinaja nahato tajari. Pohua Corimepa Dio Pohua jipa tahicca nahato tadsa pocca ejedeni iquejenajaro icca ima Puhuadsa huati tahissa tataja najari.

Diocca deni tojehe icajinitohui

²⁸Icca madiedsapi ima onihi onihi naridsajaro. Ima ocassera tanicca naqui iadsa bacco bacco najaro. Naraha Dio Puhujine ima huapima iadsa tojajarocca tassaqqidsapi iadsa ima bicani tojanijine nahatoqqiri inajaro. Aja Puhuadsa huatideni huanaqqiri najarideni huapimadsa nema inananitohui. Najaridenidsa huahua najari, pina Pohua bodi: –Ajima onanana –napojarissa inanjaro. ²⁹Diopa najaridenidsa tahide nahato tapojari: –Pohuadenipa pina occa ejedenissa onanabaqquihitohui –napojari. Najaria aja Dio Pohua Bedipa imecotedeni huapimacca ato tojaripaja. ³⁰Dio Attipa: –Occa ejedenissa onanabaqquihitohui –napojaria aja pohuadenidsa huahua najaripaja. Dio huahua inabaqquijari Jesocristodsa pajissa quinadsapa Dio Attipa: –Poccadeni imasiripi jicaridsani –najaripaja. Poccadeni imasiri jicaridsajaridenidsa pocca deni tojehe inananidsajaro.

³¹ Ajijaro ima imittadsapi: –Jehe, ima bicani icajini –inajaro. Dio iadsa jipa tadsapa aja madija iadsa jipera-qquiri najaridenicca imapi ponima tojajaro. ³² Diopa pocca ejedeni Jeso iadsa eccocco-jarajari. Icassiejeranijine eccoradsa dsoqqejari. Pocca ejedeni iadsa da inadsapa ¿pocca biquehe onihi onihi iadsa eccocco-padseje? Nohuerani. Huapima iadsa da inaridsanitohui.

³³ ¿Nejecojarina Dio icattejidsa-baqquijaridenidsa: –Ticcadeni ima bica tejerani –nahijine pajirajari? Ssamo tahi. Dio Attipa: –Jesocristodsa pajissa quinajaridenicca imapi ohuadsa pajiranissa tani –najari.

³⁴ ¿Nejecojarina Dio icattejidsa-baqquijaridenidsa: –Najidsohuehuaji ocasserani ahuamanahitohui –nahijine pajirajari? Ssamo tahi. Jesocristopa itohui pajissa dsoqqejari. Najarina pajissa nahatonijari. Toccamacossanidsapa Imehi Dio inori nahatonihuaji huittarijari. Nahihuaji huittaridsa Imehidsa huati huati nanaja najari, ia tohuacahuabaqquihijine.

³⁵ ¿Nejecojarina Cristocca tohuati huanehe iadsa inahuajinijine pajirajari? Nohuerahi. Cristo iadsa huati huana tadsapa iadsa apaja najarahitohui. Ocasserani edsa naqui Cristopa itohui huati cahanari cadsanapojari. Ima najo taniccadsa naco Cristopa itohui huati cahanari cadsanapojari. Nanajidso iquejenadsa, pemi imadidsa, iccoroje imadidsa, oppinehema imadidsa naqui Cristopa itohui huati cahanari cadsanapojari. Idsoqquedsa naqui Cristopa iadsa nama dsanapojari. ³⁶ Dio Atti dsodo nanidsapi ajima najaro:

–Dio, ticca imatohui disseraqquri inadsapi madija huajijiradsa ia jara jara quiquina nahi, ijicanijine. Iapi pohuadenijine pina edede bani tojahijine dsodsoqqe nahihuaji iaccamanajarissa inajaro –nani nade Dio Atti dsodo nanidsa.

³⁷ Najaro ocasserehe onihi onihi naridsajaro huapima iadsa ssonariraha Cristo iadsa huati cahanari canadsapa iana deni iquejenajaro.

³⁸ Ajijaro imapi obodidsa nahato onani: Dio iadsa huati cahanari canadsapa ima onihi onihi najarojine Diocca tohuati huanehe iadsa inahuajinijine ssamo tani. Idsoqquedsa naqui ¿Diocca tohuati huanehe iadsa amossi napadseje? Diopa iadsa

huati huana-dsanapo tahi. Aji imadidsa naqui ¿Diocca tohuati huanehe iadsa amossi napadseje? Diopa iadsa huati huana-dsanapo tahi. Aja Diocca dodosse tabaqquideni naco ¿Diocca tohuati huanehe iadsa inahuajimananijine pajiramanaco? Ssamoqquri nahi. Ajijaro dsamacca dacoraqquri najarideni naco ssamoqquri nahi. Satana naco pocca dodosse tabaqquidenima ssamoqquri nahi. Jidapanacca ima naqui ssamo tani. Itedsejemacca ima naqui ssamo tani. ³⁹Memehuari madimanagerideni naco ssamoqquri nahi. Odi bodi huaji tanihuajicca naco ssamoqquri nahi. Dio inahatoridsajari ohuaha ohuaha quinajarideni naco Diocca tohuati huanehe iadsa inahuajimananijine nohuerahissa tahi. Ia Medsede Jesocristo itohui dsoqquejarijine Dio iadsa huati cahanari canahi ahuato inanajaropaji.

Pablotenipa Corintodenidsa ima teppe tahidecca dosse quinajaro

1 Corintios

Introducción: Corintopi dsama Acaiacca odsa panani imeni. Passo imeni huajira tanidsa odsa panani tojajaro. Nadsapa dsama onihi, onihicca madija nahihuaji qquide jajahi toja najari. Nanidsa naqui canoa imeni huapi tani huana huana totoquina najaro. Todsepetaji huemani naqui eheccajonamana najaro. Corintocca madijapa dsepedeni sseqquiri najari. Madija huapi taha naco huana-nehe tohuira disseraqqiri najari. Dio pajissehecca ssamoqqiri nahi. Pohuadeni cacahuade pohuamaccadsa disseraqqiri najari.

Pabloa nahihuaji toccadsa Jesocristo tahimari icassiejera-nijinecca mari icanabaqqipojari. Huajano pamaha nahidsa madijari. Nadsapa Corintocca madija motapa Jesodsa jehe quinajari. Poccadeni quequeriqqui cajimanajari.

Dsotodepa Pablo dsama onihihuaji toccajari. Nahihuaji madi-dsa ajijaro ima teppe Corintodenidsa dosse inanijaro. Tahidepa Corintocca madija Jesodsa toquejenajarideni poccadeni ima teppe Pablosa dsodo quinapojaro. Nadsapa poccadeni dsodoniji ecomerani-jine Pablo pohuadenidsa dsodo inajaro. Poccadeni ima bica tejerani quinahi mittadsa naco poccadeni ima icattemanijine dsodo inajaro.

- 1.1-3 Pablo, Sostenes tedsje: –¿Nija? –quinajari
- 11.23-34 Ia Medsedecca jipaquie tahimari
- 12.1-31 Dio Pohua Corimecca nahatohue da inaridsajaro
- 13.1-13 Tohuati huanehecca ima
- 15.1-11 Cristo nahatonijaricca ima

Pablo, Sostenes tedseje: –¿Nija? –quinajari

1 ¹ ¿Nija imecotedeni? Ohuapi Pablo. Dio jipa tadsa Jesocristocca dodosse ojanijine ohuadsa huahua najaride. Ohua, imecote Sostenes tedseje tiadenidsa: –¿Nija, bicaqqiri tiquinaqui? –inajaro. ²Odsa panani Corintohuajicca Diodsa

tiquejenajaro titiqueriqqui nanihuaji tiadenidsa ajijaro ima dosse inajaro. Huapima Jesocristodsa pajissa tiquinadsapi pohuajine tibodideni tohuireridsajaro. Najaroa aji Jesocristo pohuajine Diocca tiquejenajaropaji. Dio tiadenidsa huahua najaripa: –Ohuadsara tibodideni huatoni ojari naji –najari. Dsama huapimadsa madiridsamanajari Jesocristodsa pajissa quinajaridenidsa naco: –Ohuadsara tibodideni huatoni ojari naji –nanaja najari. Jesocristopa pohuadeni Medsede. Najari ojarihi ia Medsede. ³Abi Dio, Pohua Bedi ia Medsede Jesocristo tedseje tiadeni tocatidsebaqqi-manajaripa poccadeni biquehe tiadenidsa tojanijine. Poccadeni jonehe naqui tiadenidsa tojaji, onajaro.

Ia Medsedecca jipaqueie

Mateo 26.26-29; Maraco 14.22-25; Roca 22.17-20

11 ²³⁻²⁴ Ohuemecotedeni, ia Medsedecca jipaqueiecca ima timittamananissa tanijine tiadenidsa huati omani-pomajaro. Aji tiadeni mari ocanabaqquijaropi ia Medsede Jeso pocca mamari tabaqqi mari icanabaqquijari ohuattajarode. Aja ia Medsede Jeso Joda pohua eccorahicca dsomedsa jipade toquejenadsa pan idi nadsapa Diodsa huati tajari: –Jehe, Abi



Dio, ticca daniji iadsa bica tahi –napodsana pan icanarobedsa pocca mamari tabaqquidsa huati tajari: –Ajaropi ohueme. Titohuideni ohua ohuaccoradsa odsoqquenijine. Nidsa ohua nohue ojiradsa naqui ohuadsa tetideni ajimamana nejera-nijine nema titidsanapomana nana, onajaro –najari Jeso. ²⁵Nadsa ajarideni jicadsapa dse naridsamanahijine dsedse bodi cajihi equidi nadsa pohuadenidsa huati tapomajari: –Ajajari dsedsepa ohuemenecca ima. Nidsa ohua odsoqquedsa ohuemene toccajaropi Diocca marinaja dsati madijadsa toja-nijine. Nadsama aja dsedse tiadenidsa da ocanajaripa nidsa ohua nohue ojiradsa tiadenira naqui dse dse titidsanapomana nana, nani otohui tetideni ajimamana nejeranijine –najari Jeso. ²⁶Nadsama aja ia Medsede Jesocristo dsoqquehicca ima eti ajima-geranijinepi pan apa apa ihina najari, dsedse naco dse dse ihina najaripaja. Nema inanadsapi pohua dsoqquehicca ima ahuato inanadsanapojaroa pohua ccanihi bacco inanijine, onajaro.

***Ajima inanadsana Jesocristocca
jipaqque ijipani bica tani***

²⁷Nadsama ia Medsede dsoqquehicca ima eti ajima-geranijinecca pan pohuama ijipadsapa Jeso pohua assiredsa imasiri inanajaro. Dsedse naco pohuama dse inadsapa Jeso pohua emenedsa imasiri inanajaro. ²⁸Nema inejeranijinepi ia Medsedecca jipaqquedsa ijipa-geraccadsama dse inejeraccadsama tahide ibodidsa icca ima nattome inapodsana bica tajaro. ²⁹Nadsama ia Medsedecca jipaqquedsa naqui pohua assire pohua ccacorajaricca imadsa eti huatopodsapa ijipadsapi bica tani. Najaro ima ibodi huato-geradsa apa inajari, dse inajari nadsapa Dio ia najidso tahi. ³⁰Aja titessedeni motapa pohuama jipamanajari, dse quinajari najarojinea comaqquri naja, ocasseraqquri naja, dsodsoqquri naja camajaripaja. ³¹Naraha iapi ijipa-geraccadsama tahide ibodidsa icca ima nattome inapodsana bica tajaro. Nadsama ima icajidsapi Dio icattemanijine Pohuadsa ecomerapodsapa ijipadsana bica tani. Nema inanadsapi ia Medsedecca najidsohue iadsa nohueranijine. ³²Naraha icca ima bica tejeradsa ia Medsede ia najidsojaripa icahatteranijine. Nidsa dsotode Diocca najidsohue bacco tadsa naqui dsori

icanirenijine. Ajijaro dsamacca madija Jesocristodsa jehe quina-jarajaridenipa najidsohue jiquejeranihuaji toquejenahitohui. Naraha iapi pohuadenidsa iquejema-jeranitohui.

³³ Jehe, ohuemecotedeni, ima onihi naqui. Aji ia Medsedecca jipacquiedsa tijipamananijine tiqueriququidsapi: –Ohuaha ojipapona –tiquinejeraji. Timecotedenitohui timadi-manaccana, nani huapima paji tijipamanarini nanijine, onajaro. ³⁴ Nadsama madija pemidsapa pocca odsahuaji jipapona, onajaro. Tijinedeni ia Medsedecca jipacquie bica tadsapi Dio tiadeni tonajidsobaqqi-jarahitohui.

Nadsama nidsa nanihuaji tiadeni qquide occadsana tiadeni tedseje ima onihi ocattemanitohui, onajaro.

***Dio Pohua Corimecca nahatohue
da inaridsajaropi onihi onihi naridsajaro***

12 ¹ Ohuemecotedeni, aji ima onihi ohuadsa dsodo tiquinajaro jidapana tiadenidsa ohuacomeranijine.

Jesocristodsa tiquejenajarodenidsa Dio Pohua Corimecca nahatohue onihi onihi nehe da inaridsajaro. Najaro ima timittamananissa tanijine onadsa tiadenidsa dsodo onajaro.

² Ticcadeni ima tahidecca nahatoqqiri tiquinani: Jesocristocca tiquejena-jeraccadsapi siba nahatoni onihi onihi naridsajarodsa tetetidsemana naccade. Najaro siba nahatonipi attini cappiraraha tohuini disseraqqiri tiquinapojarode. ³ Nema najaro jidapanana ajijaro ima timittamananissa tanijine tohuini onajaro. Aja madija Dio Corimecca dacorehe cajijaripa: –Jesopa tabaccora tahi –najarahi. Madija ohuaha Dio Corimecca dacorehe cappiradsapa: –Jesopa ia Medsede –nahijine ssamo tahi.

⁴ Dio Pohua Corimecca nahatohue onihi onihi nehe iadsa da inaridsajaropi huapi taraha Dio Corimepa ojarihi. ⁵ Ia Medsededsa idsepe ijinijinipi onihi onihi nehe iadsa da inaridsaraha ia Medsedepa ojarihi. Pohuadsara idsepe ijijaro. ⁶ Dio pocca dacorehe onihi onihi nehe iadsa da inaridsajaro naqui huapi taraha Diopa ojarihi. ⁷ Pohuapa Jesocristodsa iquejenajaro ojari ojari inajarodsa Pohua Corimecca nahatohue onihi onihi nehe da inaridsajaro. Aji iadsa tojaridsajarodsa Jesocristodsa ihiqueriququi najaro huapima acco acco icananijine, onajaro.

⁸Dio Corimecca nahatohue da inaridsajaro ojariepi Jesocristodsa toquejenajarideni mota Pohuajine bodideni nahatoqquri najari. Diocca ima madija mittamanahissa tahijine huatide pajiramanahissa tajari.

Nahatohue onihi ohuahadenidsa da inaridsajaropi Pohuajine bodidenidsa ima ahuato tadsa huati huati toquinajari.

⁹Nahatohue onihi motadenidsa da inaridsajaropi jehenijirideni denima daco torani najaro.

Nahatohue onihi ohuahadenidsa da inaridsajaropi madija inanomibaqqi-ridsamanajari.

¹⁰Nahatohue onihi motadenidsa da inaridsajaropi Diocca dacorehema canahatorimana canajari.

Nahatohue onihi motadenidsa da inaridsajaropi Dio pohuadenidsa huati tadsapa Pohua Atti ecomeraridsa-manajaro.

Nahatohue onihi motadenidsa da inaridsajaropi Pohuajine bodidenidsa ima pajissehecca, maidsehecca nahatoqquri najari. (Pina madija canahatori canahi qqui toquinadsa nahatoqquri nadsapa: –Najaropi Dio Corimejine jerani –quina tahi. Madija ohuahacca nahatohue qqui toquinadsa naco bodideni nahatoqquri nadsapa: –Najaropi Dio Corimecca dossenijia –quina tahi.)

Nahatohue onihi motadenidsa da inaridsajaropi Dio Corimejine *tohuatti jidsa tajarodsa huati huati totoquina najari. Ohuahadeni naco tohuatti jidsa tajaro mittamanadsa Dio Corimejine poccadeni madija attidenidsa huati huati ihiquimamana najari.

¹¹Ajjaro nahatohue huapimapi Dio Corime jipa tadsa Jesocristodsa toquejenajari motadenidsa da da ihinaridsa najaro. Dio Corimepa ojariraha Pohuana madija huapimadsa inanaridsajaro.

Jesocristodsa ijariqqijaropi pina essirecca imassa najaro

¹²Nadsama essiredsa huanaridsanipi huapi tani. (Pina inocco, eribo, itone, itati najaro.) Huapima essiredsa ojariqquidsapi ojarie tojajaro. Aji Cristodsa ijariqqijarocca ima naqui najarossa najaro. Huapi inaraha Cristo pohua assire ojariassa inajaro. ¹³Nadsama aji ijariqqijaro jodiodeni, jodio jarajarideni, medsedeni, medse jarajarideni ia huapima Jesocristodsa iquejenapodsapi Dio Pohua

Corime iadsa tojaridsajaripaja. Dio Corimejine huapima Cristodsa ijariquijaropi pina Cristo pohua assire ojariassa inajaropaji.

¹⁴Essirepi poni motta jerani. Mota huanaridsani huapi tajaro. ¹⁵Emori attini cajidsapi ajima naneje: –Ohuapi todsepe oja-jerajarojine tohuassirecca oja-jerani –nanitohuiraha. Naraha emorina essire tohuaccade. Essire nebonijine ssamo tani.

¹⁶Nadsama eribo naqui attini cajidsapi ajima naneje: –Ohuapi tonocco oja-jerajarojine tohuassirecca oja-jerani –nanitohuiraha. Naraha eribona ima mimitta. Essire nebonijine ssamo tani. ¹⁷Essire nema nehe inoccora ojaridsapi tohuatti imitta-jeranitohuiraha. Essire nema nehe eribora ojaridsa naqui majo tahicca jissi inarahitohuiraha. ¹⁸Aji essiredsa huapima huanaridsajaroccapì Dio madija inahatopodsama Pohua jipa tahihuaji inahanaridsapojaro. ¹⁹Aji essiredsa huanaridsajarora ojaridsapi essirepi nohueranitohuiraha. ²⁰Ajjaro imapi pajissa: Essiredsa huanaridsajaropi huapi taraha essirepi ojarijaro.

²¹Nadsama inocco attini cajidsapi idsepedsa: –Tiapi poni. Ohuana tohuassire ohuacahuajaro –nanijine ssamo tani. Aji itati naqui attini cajidsapi emoridsa: –Tiapi poni. Totati ohuana bica onajaro –nanijine ssamo tani. ²²Ajima najarona pajissa: essire mota onihidsa: –Japari tani –inaraha najaro icajidsapi imadinissa tajaro. ²³Essire mota onihidsa naqui: –Ajimani tojanicca –inaraha najaropi ia inabicanijine. Naraha aji essirecca mota onihi qquidepi oppina tani. Najaro ecahuanissa tanijine etero edsadsa ia qquide oppinera tani. ²⁴Nadsama aji essire mota qquide oppinera tajaropi inajima-jerani. Essirecca imapi Diojinena nema najaro. Aji essire ajimani tojajaro motapi Dio Pohuana inanabicajaro. ²⁵Jehe, essire motapi ponira ponira naridsa-jerani. Huapima ponideni cacahuamanani. Essire mota naqui ponidenira acco acco cana tani. ²⁶Aji essire mota naqui ocasserani ahuadsapi essire huapima ocasserani ahua tani. Essire mota ojarie inanabicadsa naqui essire nema nehe huapima huatidse tani.

²⁷Nadsama tiadeni huapima Cristodsa tijariquimana-dsapi: –Cristo pohua assire tiquejenani –inajaro. Aji ojari ojari taridsamanajaropi Cristo assire mota tiquejenajaro. ²⁸Aja Jesocristodsa quequeriqui najaridenicca ima bica tanijine dsepedeni ijimanahijinepa Diona pohuadenidsa inanaridsajaro.

Tahidecca motadenipa Jesocristocca dodosse tabaqqi
toquejenahijine inanabaqqi,
dsotodecca ohuahadenipa Dio Atti ehecomeraridsamana
nahijine inanabaqqi,
dsotode ohuahadeni naco Dio Atti maride toquejenahijine
inanabaqqi najari.

Ohuahadenipa canahatorimana canaridsahijine inanabaqqi,
comaqqiri najarideni inanomibaqqi-manahijine inanabaqqi,
madija bijideni acco camade toquejenahijine naco
inanabaqqi najari.

Jesocristodsa quequeriqquimana najarideni dossede
toquejenahijine naco inanabaqqi,
tohuatti onihi jidsa taniccadsa huati huati totoquina
nahijine naco inanabaqqi najari.

²⁹ ¿Naraha huapimapa Jesocristocca dodosse tabaqqi toque-
jenahijineco? Nohuerahi. ¿Huapima Dio Atti cacomerade
toquejenahijineco? Nohuerahi. Huapima Dio Atti maride toque-
jena-jarahi. Huapima canahatorimana cana-jarahi. ³⁰ Huapima
madija tonanomide nahatohue cajimana-jarahi. Tohuatti onihi
jidsa tanicca huatide huapima pajiramana-jarahi. Tohuatti
onihi jidsa tanicca huati toqqumade naco huapima nahato-
qquri najarahi. Aji ia huapima Jesocristodsa iquejenajaropi
Diojine idsepe ijiniijine Pohua Corimecca nahatohue onihi onihi
da da ihinaridsa najaro. ³¹ Tiadenipi Dio Corimecca nahatohue
denima bica taniccatohui disseraqquri tiquinaji, onajaro.

Jidapapi ima denima bica taniccara tiadeni mari ocana-
baqqina, onajaro.

Tohuati huanehecca imana denima bica tajaro

13 ¹ Tohuatti onihi huapima huatide nahato onadsa, Diocca
dodosse tabaqqi memehujicca attideni huatide naqui
nahato onadsapi occa ima Diodsa bica tanijineraha madijadsa
ohuati huanera tadsapi occa ima Diodsa bica tejerani. Ohuattipi
ponima tojanitohui, pina beobeo tocatabaccoradsa mohuini
jidsa tehe imittajarossa najaro. ² Aji Jesocristo tahimari
ohuacomera-ridsajaro naqui nema nehe nahato onadsapi,
otedsejemacca ima huapima nahato, tohuattehe huapima
nahato onadsapi occa ima Diodsa bica tanijineraha madijadsa

ohuati huanera tadsapi ponima nahatohue ocajijaro. Occa ima Diodsa bica tejerani. Occa jeheniji Diodsa dacoradsa ssono pajimaranihuaji toccanijine naqui huati onadsa toccanijine opajiradsapi occa jeheniji bica tanijineraha madijadsa ohuati huanera tadsapi occa ima Diodsa bica tejerani. ³Aji odsepetaji huapima ocajijarocca naqui tohuati nahanaquqiri najaridenidsa da onehe jicadsapi occa ima Diodsa bica tanijineraha madijadsa ohuati huanera tadsapi occa ima Diodsa bica tejerani. Jesocristo tahimaridsa dissera onajarojine madija ohua inanadsoqqe-mananijine naqui ohua ohuaccoradsapi occa ima Diodsa bica tanijineraha madijadsa ohuati huanera tadsapi occa ima Diodsa bica tejerani.

⁴Nadsama tohuati huanehepi ajima najarona paji: Ima iadsa ssonaridsa edijeradsa mohuaradsa inahanajaro. Madija tohuattattera tadsa naco huadie jirehe mari icanajari, mari icanapomajari, mari icamanipomajari najari. Huapimadsa bicaquqiri inajaro. Amoneje acconi, todsepetaji acconi, tarabadsa acconi naqui itessedenidsa edijerajaro. Ia ettidisa ia deni inana-jerajaro. Ijine bica tadsapi: –Ohua motta nahato onani ojari onana –inejerajaro. ⁵Tohuati huanehe icajidsapi tohuatti tabaccora tanicca, jidsehe tabaccora tanicca huatira inajaro. Acco inadsa: –Ohua mottacca –inejerajaro. Tohuati huanehe icajidsapi huadi inejerajaro. Madija iadsa ima inamanadsa naqui poccadeni ima ibodi huahuatomacca nejera-jaro. ⁶Ima pajiranissa tejeraniccadsa, ima tabaccora tani-ccadsa etidse-jerajaro. Ima pajisseheccadsana ehetidse najaro. ⁷Tohuati huanehe icajidsapi ima ocassera tanicca huapima tonahanade ipajirajaro. Ima ponimacca imittadsapi: –Ima nema nejeranitide. Nidsa, ima omittanissa taccana –inajaro. Madijacca madie bica tejerani qqui inadsa naqui: –Nidsa pocca madie tobicanitohui –inajaro. Imajine ocasserani eraha mohuaradsa inahananijine ipajirajaro.

⁸Tohuati huanehepi nema dsanaponitohui. Nidsa aji Diojine madijadsa ahuatoto tadsa huati huati totoquina najaripa nebo-manahitohui. Aja madija tohuatti jidsa tanicca huati huati totoquina najari naco jicanitohui. Dio Corimejine tohuattehe cajimanaraha najaro naqui amossi nanitohui. ⁹Dio Corimejine nahatohue onihi onihi naridsajaro motara icajijaro. Nahato

inanissa tejerani. Dio Atti cacomeradedeni naco itedsejemacca ima nema nehe nahatoquiri najarahi. Diojine mota pohua-denidsa ahuato tajarora ehecomeraridsamana najaro. ¹⁰Najaro nahatohue icajipojaro huapimapi nidsa Diojine pajirahissa tahicca ccajonadsapa jicaridsanitohui.

¹¹Nadsama ejedeni ojaponipi ejedenicca imara huati huati ohona naccade. Obodi naqui ejedeni bodi huatojarissa onaccade. Ejedeni ijaponicca imara ohocattejidsa naccade. Naraha onapidsa obiji ccaradsapi ejedeni ojaponicca imapi onattihuaji onanaridsehe jicajarode. Ajijaro namidsa imadi-ccadsapi Diocca ima nema nehe icahatteranissa tejeraccani pina ejedeni ijaponicca imassa inajaro. ¹²Jidapanapi Diocca ima nema nehe imittanissa tejeraccani, pina pipiridsa icorime qqui inajarossa najaro. Dsidsi tadsapi pipiridsa icorime qqui inaraha qqui inanissa tejerani. Naraha nidsa dsotodena Diocca ima nema nehe qqui inanissa tanitohui. Cristo pohua pano, assirema qqui inahitohui. Jidapapi Diocca ima motara nahato onajaro. Opajiranissa tejerani. Nidsa dsotodena pocca ima huapima nahato onanissa tanitohui. Pina Pohua ohuadsa nocco jidsera tajarissa nanitohui.

¹³Ima bicani jicaquera taniccapi 3 najaro. Ojariepi icca jehe-niji. Diodsa pajissa idsanaponitohui. Ima onihipi itedsejemacca ima bicani tohuini imadi-dsanaponitohui. Ima onihi naqui tohuati huanehe nema dsanaponitohui. Aji ima 3 najaropi bica-quiri naraha tohuati huanehena denima bica tajaro.

Cristo nahatonijaricca ima

15 ¹Ohuemecotedeni, tetideni ajima-jeranijine tiadenidsa huati omanijaro. Jesocristo tahimari bicani icassiejera-nijinecca tiadenidsa ohuaccorapojarode. Najaro imadsa jehe tiquinadsapi tinebomana nejerajaroa ajijaro paji. ²Aji icassiejera-nijinecca imadsa dissesera tinadsapi ticassiejerajaropaji. Naraha dissesera tinejeradsapi ponima jehe taridsamanajaro.

³Aji Jesocristo tahimari ohuattapojarocca tiadeni mari ocanabaquijaropi denima bica tanicca. Najaropi ajima najaro: Cristopa icca imasiri manaconi dsoqquejari, pina Dio Atti dsodo quinapojarossa najaro. ⁴Cristo huatiadsa ppa idsa-manaraha huada 3 nadsapa nahatonijaride. Najaro naqui Dio

Atti dsodo quinapojarodsa nema napojaro. ⁵Nahatonidsapa Pedrosaha ahuatonipojari. Nahi dsotodepa pohua huatimadedeni 12 quinajaridenidsa ahuatonipomajari. ⁶Nahi dsotode naco pohuadsa jehe quinajari 500 quinajari, naraha denima itidija, najarideni huapima queriquimanahidsa ahuatonipomajari. Najarideni motapa ajijaro ima teppe dsodode ojadsa madimanahipaja naccahi. Naraha mota pamadema nahapa jicaridsapohui. ⁷Nahi dsotode Satiacodsa naco ahuatonipomajari. Nahi dsotode naco pocca dodosse tabaqqi huapimadsa ahuatonipomajari.

⁸Nahi dsotode jicarihiccapa ohuadsa ahuatonijaride. Ohuapi pina ejedeni pohua tossonahicca huada bacco tajaraccaraha tossonapjarissa onajaro. Ohuapi Jesocristodsa jehe onapo-jeraraha ohuadsa ahuatodsana pocca ojajarode. ⁹Nadsama Jesocristocca dodosse tabaqqi tahideccapa bicaqqiri naraha ohuapi ajimani ojajarode. Tahidepi Jesocristodsa toquejenajarideni Dio Attidsa totoqueriqui najarideni ohonajidsobaqqi naccade. Jesocristocca dodosse tabaqqi ojanijine bica onejeraraha Jeso pohuajinena pocca dodosse ojajarode. ¹⁰Naraha Diopa ohuadsa bica tajari. Occa najidsohue epeje inanajarode. Ohua catidsedsapa pocca dodosse ojajaro. Pocca biquehe naqui ponima ohuadsa toja-jerani. Najarojinena Pohuadsa odsepe ijinissa tajaro. Nadsama motadenipa ajamani dsepedeni ijimanajari. Naraha ohuana denima odsepe ijijaro. Aji odsepe ijijaropi ojine jerani. Dio ohua acco camadsa odsepe ijiridsajaro. ¹¹Naraha: –¿Nejecojarina denima dsepe ijijari? –inejerana. Aji tiadeni mari ocanabaqqijaroa aja Jesocristocca dodosse tabaqquideni naco occa marinajassa najaro tiadenidsa mari mari quinajari-paja. Najaroa aji tiadenipi najarodsa pajissa tiquinajaropaji.

Pablotenipa Corintodenidsa ima teppe dsotodecca dosse quinajaro

2 Corintios

Introducción: Pablopa tahide odsa panani Corintohuaji toccapohuipa nahidsa huajano pamaha madijari. Dsotode naco nahihuaji Jesocristodsa toquejenarideni qquide toccapomajari. Pohuadenidsa ima teppe dsodode naco dissera tajari, Dio Pohua jipa tahicca tocahatterahijine.

Ajijaro ima teppepi Pablo pohuadsa tojiperamanajari quinahi mittadsa pohuadenidsa dsodo inapomajaro. Aja pohuadeni quequeri-qquimana nahihuaji maidsehe mamaridedeni jai tojedsimajari. –Pablopa Diocca dosseniji jarahi, pocca marinaja timittamana-jeraji –quinadsapa Pablodsa tojiperamanajari.

Nadsapa Pablo pohuadsa Dio pajissa huahua najaricca ima, Jesocristo tahimari mari mari najarijine ocasserani ahuaridsajaricca ima dsodo inajaro. Pohuadenidsa huati huana tadsa pocca marinaja bicani onihi onihi dsodo inajaro.

- | | |
|---------|--|
| 1.1-2 | Pablo, Timoteo tedseje: –¿Nija? –quinajari |
| 1.3-11 | Dio ibodi acco camajari |
| 5.1-10 | Essire dsati icajinijinecca ima |
| 5.11-21 | Diopa icca imadsa tojonehijinecca marinaja |
-

Pablo, Timoteo tedseje: –¿Nija? –quinajari

1 ¹¿Nija, imecotedeni? Occa ima tidenidsa dsodo onajaro. Ohuapi Pablo. Dio jipa tadsa Jesocristocca dodosse ojajaro. Ohuemecote Timoteo tedseje tiadenidsa: –¿Nija, bicaqquri tiquinaqui? –inajaro. Ajijaro imapi nani dsama arobeni Acaiacca odsa panani Corintohuajicca Dio Attidsa titiqueri-qquimana najarodenidsa dsodo inajaro. Najaro ticcadeni dsama arobenidsa Jesocristodsa jehe quina-jari madiridsa-manajaridenidsa naqui dsodo inajaro. ²Icca Abi Dio, Pohua Bedi ia Medsede Jesocristo tedseje tiadeni tocatidsebaqqi-manadsapa tiadenidsa ima bicani inanamana-dsanapona, inajaro. Poccadeni jonehe naqui tibodidenidsa tojadsanapona, inajaro.

Dio ibodi acco camajari

³Ia Medsede Jesocristocca Abi Diodsa etidsena. Puhuapa icca Abi iadsa huati cahanari canahi. Huajijiradsa ia acco acco totocamabaqqui najari. ⁴Ocasserehe onihi, onihi iadsa ssonaridsapi Dio ibodi acco camajari. Nadsapi imecotedeni ocasserani ahuamanadsa naco acco icamabaqquihijine ipajirani. Pina Dio ia acco tocamabaqquijarissa najaro imecotedeni acco icamabaqquijari. ⁵Jesocristopa ocasserehe huapi tehe inahanajaro. Nadsapi ia naqui pina Cristo pohua ocasserani ahujajarissa inajaro. Ocasserehe inahanani huapi taraha Jesocristocca iquejenajarojine Diocca acco camehe iadsa jiquejerani. ⁶Aji ia ocasserehe inahanajaropi ponima jerani. Tibodideni acco icamabaqquinijine, tossiejehe ticajimananijine ocasserehe inahanajarode. Dio ibodi acco tocamabaqquidsapa manaco ia naqui tibodideni acco icamabaqquijaro. Nema nadsapi ocasserehe pina iadsa ssonaridarossa najaro tiadenidsa ssonaridsapi mohuaradsa tinahanamananijine tipajiramananitohui. ⁷Aji ocasserehe iadsa ssonaridsapi tiadeni naqui iadsama ocasserani temananitohui. Dio ia acco tocamabaqquidsapa tiadeni naqui iadsama Dio tiadeni acco tocamabaqquihitohui. Najaro pajissa tojanijine nahatoto inajaro.

⁸Imecotedeni, dsama Asiahuaji jajjadsa ocasserani imeni ejarocca ima nahatoqquri tiquinanijine tiadenidsa dsodo onajaro. Najidsohue oppinabote iadsa ssonaridsapi ipamajonabote nade. Iadsa tocasserani nadsa: –Nidsa ajijaro najidsohue jicadsapi imadipomanitohui –inejerade. ⁹Ibodidsa: –Pajissa ipamajonanitohui –inade. Naraha ipamajonanijine Dio ecossadsapi imadicajaro. Nadsapi najaro oppinehejine iadsa ahuatoto tajaro: Madija iapi ia inassajananijine ipajira-jerani. Diona nahato tahi ojari najari. Puhuapa huatiajarideni nahatonide. ¹⁰Puhuapa dsoqquehe oppinabotedsa ia dsori tonana-baqquijari. Pihuadsa pajissa inadsapi nidsa dsotode naco paji idsoqqueriniccadsa ia dsori tonana-baqquihitohui. Ettipi: –Jehe, ia dsori tonana-baqquihissa tahitohui –ihinanajaro. ¹¹Tiadeni naqui itohui Diodsa huati huati tiquinaji, ia tohuacahuabaqquihijine. Diodsa huatide huapi tadsapa Pihuadsa huatidsemanahi naco huapi tahitohui. Diopa ima bicani iadsa inananicca ima imecotedeni mittamanadsapa Pihuadsa: –Jehe, epejeni. Tijine bica tani –quinahitohui.

Essire dsati icajinjinecca ima

5¹ Ajjaro namidsa imadidsapi essire jicaca taniccadsa imadijaro. Pina ajjaro namicca odsa icanahatojarossa inadsa imadijaro. Pina benehijinecca odsa jicaca taniccassa inajaro. Naraha nahatoqquri inani: Icca odsa namicca tocatabaccoradsapi memehuajina odsa dsati icajinitohui. Najaropi madijajine canahatojarossa nejerani. (Najaropi essire dsati jicaquera tanicca icajinjine Djojine iadsa najorapojarocca ima.)² Naraha ajjaro namicca essire jicaca taniccapi ocassera tajaroline ojiema imadijaro. Essire memehuajiccana tohuini inajaro.³ Najaro essire dsati icajinjinepi pina etero edsajarossa nanitohui. Edsadsapi iccoroje jeranitohui. (Najaropi memehuaji icorime toccadsapi poni motta jerani; essire dsati cajinjinecca ima.)⁴ Pajissa ajjaro namidsa imadiccadsapi essire jicaca taniccadsa imadijarojine oji oji idsanapojaro. Ocasserehepi iadsa ccanaja tajarossa najaro. Naraha essire jirehe imadinijine tohuini inejerani. Essire dsatina tohuini inajaro. Najaro icajidsapi jicaca tanicca inebonitohui. Camittehe jiquejeraniccadsana imadidsanaponitohui.⁵ Najaro ima bicani nema nehe icajinjine Diopa ia tonanajora-baqqujari. Puhuapa pajissa najarossa inananitohui nahatoqquri inajaropi Pohua Corime iadsa da inaridsapojaropaji.

⁶ Nema nadsapi ibodi icappina-jeradsa Djojine etidse-dsanapojaro. Nahatoqquri inani: Essire imadiccadsapi ia Medsede madihhuaji huaji inaccani.⁷ Aji memehuaji imadidsanaponijinecca iadsa najorajaro innocodsa qqui inejercaraha ibodidsa nahato inadsapi pajissa inehe imadijaro.⁸ Najarotohui etidsedsapi icappina-jerajaro. Ajjaro essire inebonijine tohuini inani, ia Medsedehuaji iccanijine. Ia Medsedehuaji imadi-dsanaponijinena iadsa denima bica tajaro.⁹ Nadsapi essirema imadiccadsa ia Medsede inahatidse-dsanapohujine dissessera inana. Essire inebodsa memehuaji imadidsa naqui nema idsanapona, onajaro.¹⁰ Nidsa dsotode Cristo pohua baccohuaji huapima idomo huadsapi icca ima cattermade tojahitohui. Nadsana ia essirema imadidsa ima inanajarocca huapima Cristo nattome inanitohui. Ima bicani inanajaro manaconi, tabaccorehe inanajaro manaconi naqui huapima iadsa inananitohui, onajaro.

Diopa icca imadsa tojonehijinecca marinaja

¹¹Dio noppine icappinanijinepi bica tani. Pahuadsa ibora-qquiri inanijine naqui bica tani. Najaro nahatoto inadsapi madija huapima Pahuadsa jehe quinahijine dissessera inajaro. Diopa ohua, Timoteo tedseje ibodi qqui tahissa tahi. Maidseraqquri inani nahato tahi. Tiadeni naqui maidseraqquri inani nahatoqquri tiquinanijine tohuini inani. ¹²–Icca ima bicani, pajiranissa tani –inajaropi ia ipamehe iadsa etidse-nijine jerani. Tiadenina iadsa tetidsemananijinena tohuini inani. Icca ima nahatoqquri tiquinadsapi aja ia ajamani tona-nabaqqujari attidenidsa tecomeramananijine tipajiramana-nitohui. Najaridenipa: –Iana deni iquejenani, nahatoqquri inani –quinaraha madija panodenira qqui toquinajari. Madija bodidenicca ima ssamoqquri najari.

¹³Nadsama madija attideni iadsa: –Bodideni tossamomanajari –quinadsapa japaja, pahuadeni nama quinana! Aji idsepe ijjaropi Diona deni tojahijine. Madija ohuaha attideni naco iadsa: –Nahatoto tahi –quinadsapa tiadenidsa naqui bica tani.

¹⁴Cristopa itohui dsoqqejari, ia naqui pina pohua dsoqqe-jarissa inajaro. Najaro nahatoqquri inadsapi Cristocca tohuati huanehepi ia dosse dosse najarossa najaro. Najarodsa idsepe ijjonajaro ajijaro paji. ¹⁵Cristopa huapima itohui dsoqqejari. Nadsapa pohuajine madie dsati cajimanajaridenipa pahuadeni tohuini quinahicca tohui madimana-jarahi. Cristo pohua tohuini nahicca tohuira madimanajari. Pahuapa pahuadeni-tohui dsoqqe, nahatoni najari.

¹⁶Jidapapi Cristocca tohuati huanehe nahatoto inadsapi madijadenicca ima ajijaro namicca deni tojehedsa nattome inejerajaro. (Pina: –Najaripa ajamani, ajarina deni tojahi –inejerani.) Tahide Cristodsa ssamoqquri inaccadsapi pahuadsa nema inade. –Pahuapa Dio Bedi, deni tojahi –inejerade. Naraha jidapapi pahuadsa nema inejerani. ¹⁷Nadsama madija Cristocca tojajaripa Diojine dsati tojajari. Pocca madie naqui cacajiquimerajaro. Pocca imabotedsa tojani-jarahi. Jidapapa madie dsati cajijari.

¹⁸Najaro madie dsatipi Diocca. Pahuapa iadsa huadi taporaha Cristo itohui dsoqqedsapa Pohua tedseje icajonerajaropaji. Dio

iadsa huahua najaripa Pohuadsa idsepe ijiniijine, madija mari icanabaquidsa Pohua tedseje cajonerara canahijine. ¹⁹Cristo ahua porimacossanidsa dsoqqejariijine Diopa madijacca imasiri manaconi pohuadenidsa inana-jerani. –Ticcadeni imasiri ohuati ajimani –najari. Nama nadsapa pohuadeni tedseje cajonerara canajari. Najaro ima bicani ecomeraridsanijine ia tocadossebaquijari. ²⁰Nadsama iapi Cristo tahimari totohuaccade iquejenani. Tiadenidsa huati inajaropi pina Dio tiadenidsa huati tajarissa najaro. Cristo onima tiadenidsa etti bica tadsa huati huati inajaro: –Dio tedseje ticajonerara canaji –ihinanajaro. ²¹Cristopa imasiri inana-jeraraha icca imasirijinena Cristopa imasiri ponissa nadsa Diocca huadie pohuadsa ssonarijaro. Dio nama najaria ia Cristodsa ijariquijaro icca ima Pohuadsa pajiranissa taniijine.

Pablopa Carasiadenidsa ima teppe dosse inajaro

Gálatas

Introducción: Jesocca dodosse Pablopa tahide dsama Carasiahua-
jicca odsa panani onihi onihi naridsajarodsa, odsa capamema najaro
onihi onihi naridsajarodsa ccaridsadsapa Jeso tahimari icassiejera-
nijinecca mari mari naridsajari. Dsotode Pablo dsama onihihuaji toccahi
nattipa jodio madija Moisesicca marinajabote nebomana-jarajarideni
Carasiahuaji maride toquejenaridsajari. Najaridenicca marinaja inapama-
manajaro. Attidenipa: –Jesodsa jehe inajaro Moisesicca marinajadsa
iboraquuri inadsapi icassiejeranijine. Todsopori cotani eteroni mota
huissi nani icajini naqui bica tani –quiquina najari.

Najaro marinaja tahimarini Pablo mittadsapa ajijaro ima teppe
dsodo inajaro. Pohua attipa: –Icassiejeranijinepi Jesocristodsa
pajissa inani ojari nadsana icassiejeranitohui. Moisesicca marinajapi
ia tonassiajanijine pajira-jerani –najari pocca dsodonijidsa.

Pocca dsodoniji denima naqui: Jesodsa jehe inadsapi Dio Pohua
Corime iadsa da inajari. Pohua Corimecca dossenijidsa ibora
inadsapi ia acco tocamabaquujari, Diodsa imadinissa tanijine.

- | | |
|---------|---|
| 1.1-5 | –¿Nija? –najari Pablo |
| 1.6-9 | Jesocristo ia tonassiajabaquujaricca imapi ojarijaro |
| 3.1-9 | ¿Diocca marinaja Moisesi dsodo inajarodsa
iboraquuri inanijinequi? |
| 5.13-26 | Dio Corime ibodidsa madidsapa icca madie bica tanijine |
| 6.1-10 | Imecotedeni tedseje acco acco icananijine |

–¿Nija? –najari Pablo

1 ¹ ¿Nija ohuemecotedeni? Tiadenidsa occa ima dsodo
onajaro. Ohuapi Pablo, Jesocristocca dodosse ojani.
Madija atti tohuaccade oja-jerani. Madijapa ohua dosse
naridsade nohuerahi. Ohua dossedepa Jesocristo, pohua
nahatonide Abi Dio tedseje. ² Ohua, ohuemecotedeni ohuadsa



madimanajarideni tedseje tiadenidsa dsodo inajaro. Nani dsama arobeni Carasiahuaji titiqueriquiridsa najaro huapimadsa: –¿Nija, bica-qquiri tiquinaqui? –inajaro. ³Aja icca Abi Dio, ia Medsede Jesocristo pohuadeni pamaha tiadeni tocatidsebaqquidsapa tiadenidsa ima bicani inandsanapona, inajaro. Poccadeni jonehe naqui tiadenidsa tojadsanapona, inajaro.

⁴Jesocristopa icca imasiri

manaconi dsoqquehijine pohua ccaccorajari. Nama najaripa ajijaro dsamacca ima tabaccora taniccadsa iquejenadsanapojeranijine. Icca Abi Dio ia todinibaqquihijine tohuini napodsas: –Occa ejedeni Jesopa madijacca imasiri manaconi dsoqquehitohui –napode. ⁵Abi Dio nama nadsapa Pohuadsa: –¡Bica tinani, deni tijani! –ihidsanapo nana, onajaro. Epejeni.

Jesocristo ia tonassiajabaqquijaricca imapi ojarijaro

⁶Diopa huati cahanari canadsa titohuideni huahua najari. Aja ia Medsede Jesocristo itohui huati huana tadsa ia tonassiajabaqquihijinecca imadsa iboraqquri tiquinaporaha amadsati pohua tahimari tinebomanajaro. Icassiejeranijinecca ima onihidsara tiquejenadsapi ojabojo najaro. ⁷Icassiejeranijinecca ima onihi nohuerajaro. Naraha ticcadeni jeheniji mohua mohua quinajari caji tahi. Najaridenijinena ticcadeni ima tossamojaro. Pohuadenipa Jesocristo tahimari tojidsanijine tohuini quinajari. ⁸Jesocristo tahimari icassiejeranijinecca tiadeni mari icanabaqqui-pojaropi pajissehecca. Marinaja najarossa nejeranicca maride ccajonadsa tiadeni mari tocanabaqquidsapa timittamanajerana. Madija ohuaha itide, ohua nitide, Diocca dodosse memehujicca ccaronajari itide icassiejeranijinecca ima onihi tiadeni mari tocanabaqquidsapa najaridsa Diocca najidsohue ssonarina, onajaro. ⁹Pina tiadenidsa huati onapojarossa najaro

tiadenidsa dsodo onapomajaropi: Tiadeni mari icanabaquipo-niccassa nejerajaro tiadeni mari tocanabaquidsapa najaridsa Diocca najidsohue ssonarina, onajaro.

***¿Diocca marinaja Moisesi dsodo
inajarodsa iboraquiri inanijinequi?***

3¹ ¡Jaho! Tiadeni Carasiahuaji timadiridsa-manajarodenipi tibodideni huatoma-mananijine ssamoquiri tiquinajaro. ¿Nejecojari attijine tibodideni tossamojaro? Nani tiadenihuaji Jesocristo ahua porimacossanidsa dsoqquejari tahimari ohuacomera-ridsapodsapi pina qqui tiquinajarissa najaride. Naraha jidapapi ima onihidsana tiquejenajaro. ²Jari, ajijaro ohuatti ojarie tecomeramananijine tohuini onajaro. Aja Dio Pohua Corime tiadenidsa inanaridsajaripa ¿*Moisesicca marinajadsa iboraquiri tiquinajarojinequi? ¡Nohuerani! Jesocristo tahimari timittamanadsa pajissa tiquinadsana Dio Pohua Corime tiadenidsa inanaridsajaride. ³ ¿Nejecotohui timittamananissa tejerajaro? Aja, Jesocristodsa jehe tiquinapodsama Dio Corime tiadeni acco tocamabaquijari, Jesocristo tahimaridsa timadimananijine. Naraha ¿nejecotohui jidapapi ticcadeni ima tojidsajaro? Aji tettidenipi: –Icca ima Diodsa pajiranissa tanijine Moisesicca marinajassa inanana –tiquinaraha. Nema tiquinanipi bica tejerani, onajaro. ⁴Ajina, ¿Jesocristo tahimaridsa jehe tiquinadsapi Dio tiadenidsa ima bicani inanajaropi ponimaqui? ¡Ponima jerani! ⁵Jari, tibodideni huatomamanaji: Diopa tiadenidsa Pohua Corime inanaridsajari, aja tiadenihuaji naco canahatori canaridsajari. Naraha ¿nejecotohui nama najaritta? ¿Moisesicca marinajadsa iboraquiri tiquinajarojinequi? ¡Nohuerani! Jesocristo tahimari timittamanadsa jehe tiquinajarojinena nama najari.

⁶Jari, Abarahao tahimaridsa tibodideni huatoma-manaji. Abarahaopa Diodsa pajissa najarijine Dio Attipa: –Abarahaocca imapi ohuadsa bica tani –najari. ⁷Nadsama madija Diodsa pajissa quinajaridenipa pina Abarahao pajissa najarissa quinajari. Najaridenidsa: –Pajissa Abarahao potemahideni –ihina najaro. ⁸Maittaccadsama Dio Atti Abarahaodsa: –Tipotemani dsotodeccajine ajijaro dsamacca

madija huapimadsa ima bicani tojaridsanitohui –napojari. Pohua Atti nama najaripa jodio quejena-jarajaridenidsa naqui ima bicani tojanijine Abarahaodsa ahuato inanapojaro. Najaro imapi Dio Atti dsodo nanidsa dsodo napojaro. ⁹Nadsama Abarahaodsa ima bicani tojajaropi Diodsa pajissa najarijine. Najarossa najaroa madija huapima Diodsa pajissa quinajari-denidsa ima bicani tojaridsanitohui.

***Dio Corime ibodidsa madidsapa
icca madie bica tanijine***

5 ¹³Ohuemecotedeni, Dio titohuideni huahua nadsapa Moisesicca marinajadsa tiadeni tappa tabaqqijari. Jidapapi Moisesicca marinaja pina tiadeni dodossedessa nejerani. Naraha tibodideni tohuini tiquinanicca tinanaridsamana tejeraji. Ajima tinanamanadsana bica tani: Dio pocca tohuati huanehedsara timecotedeni tedseje acco acco ticanaridserara canana, onajaro. ¹⁴Diocca marinaja nema nehe huati timanimananiijinepi huapi taraha tassaqquinicca ojariepi: –Tinorideniccadsa tetideni huanaququiri naji, pina tiadenidsa tetideni huanaququiri najarossa naji –nahi nade. ¹⁵Aji timecotedeni tedseje tatamasso ticanaridseradsa pina cca cca ticanaridserajarossa nadsapi paji, tijinedeni Jesocristodsa titiqueriqui najaropi tossamorana, onajaro.

¹⁶Ohuemecotedeni, ohuattipi: Dio Corime tibodidenidsa madidsapa pocca dossenijidsa iboraququiri tiquinaji. Nema tiquinadsapi tibodidenicca tabaccorehe tohuini tiquinejere-nijine, onajaro. ¹⁷Ibodicca tabaccorehepi Dio Corimedsa huadijaro. Manaco Dio Corimepa ibodicca tabaccorehedsa huadijari. Najaro ima pamehepi ibodidsa cacahadire najaro. Nadsapi Dio Corime tibodidenidsa madijarijine tohuini tiquinanicca tinanamananijineraha ecossa tani. ¹⁸Dio Corimepa timadimananissa tanijine tiadeni dosse dosse nahitohui. Pocca dossenijidsa iboraququiri tiquinadsapi Moisesicca marinajadsa timadimana-gerani.

¹⁹Ia huapima nahatoququiri inani: Madija pohuadeni bodidsa tabaccorehe tohuini quinadsapa Dio jipera tahicca inanamana tani: pina pocca amoneje jeraraha tohuini dissera tajari, pina ponicca maqqi jararaha tohui dissera tajaro, pina pohua tesse tedseje, poni tassani tadsajani

huananehe oppina tanicca inanamanajaro, pina ima oppina tanicca tonanade, ima tabaccora tanicca tonanade dissera tajari. Najaro ima huapimadsa Dio jipera tajari. ²⁰Pina siba nahatonidsa, dsoppinejedenidsa naco: –Ia cacahuade –quinajari. Pina ttemode, tomade, caribajade tohuini disseraqquri najari. Denimapi nacasserehe, tamassohue, pohua tessecaraha tohuini najari. Amadsati cahadirejari, ahuaji jipera ahuaji jipera naridsamanajari, pohuadeni-jine madija caroberidsamanajari. Najaro ima huapimadsa Dio jipera tajari. ²¹Denimapi dsepe sse tajaricca acconi huadijari, nocco jano tajari, dsira taha ccaridsajari. Nema nanicca ima huapimapi tabaccora tajaro Diodsa. Naraha tiadenidsa paji, onajaro. Nanihuaji omadidsa tiadeni mari ocanabaquipojarossa najaro tiadenidsa dsodo onapomajaro: Dio jipera tahicca tabaccorehe inanamanajarodenipanidsa Jesocristo ccanipomadsa Diocca cacahuehehuaji toquejena-jarahitohui.

²²Naraha Jesocristodsa iquejenadsapi icca ima pina ahua bicahi bono jiderajarissa najaro. Dio Corimejine ibono icajijaropi pina tohuati huanehe, huatidsehe, jonehe najaro. Jehe, Dio Corime ibodidsa madijarijinea iapi huapimadsa eti huanaqquri najaro. Diocca huatidsehema imadijaro. Joneqquri inadsa imadijaro, amadsati edi-jerajaro, etti bica tadsa huati huati inajaro. Ima bicanira inanajaro, Diodsara jehe idsanapojaro. ²³–Iana deni iquejenani –inejerajaro. Imasiri inajeranijine ia ecahuajaro. Najaro ima bicani huapimapi Dio Corimejine icajijaro. Najaro ima huapimadsa Dio naco, madija naco: –Tabaccora tani, oppina tani –quina-jarahi. ²⁴Nadsama Jesocristodsa iquejenajaropi pohua tedseje ahua porimacossanidsa ibodidsa tabaccorehe tohuini inanicca jicajaro. Imedsa tohuini inanicca, ibodi huatohue tabaccora tanicca huapima jicajaro. ²⁵Nadsapi Dio Corimejine icca madie cacajiquimera dsapi pocca dossenijidsa iboraqquri inana, onajaro. ²⁶Nadsapi etti: –Iana nahatoqquri inani, deni iquejenani –inejerana. Itessedsa edi-jerana. Ettipi: –¿Tiapi ohuassa taqui? –inejerana. Itesse nahato tadsa pohua cajidsa naco pocca tohui ijami-jerana, onajaro.

Imecotedeni tedseje acco acco icananijine

6¹Jehe, ohuemecotedeni, Dio Corimecca dosse-nijidsa iboraqquri tiquinajarodenipi timecote ojaría imasiridsa tohuedimadsapa acco ticamamanajo, onajaro. Diocca tohuati huanehema mohuaradsa timecote pina tinatehemani-manapomajo. Tiadeni naqui tiadeni tecahuamanaji. Tibodidenidsa: –Ia naqui tabaccora tanicca inanarana –tiquinana, onajaro. ²Timecote ocasserani ahuadsapa acco ticamanana. Manaco ocasserani temanadsa tiadeni acco tocambaqquihijine bica tani. Timecotedeni tedseje ahuaji acco, ahuaji acco titicanaridsera nadsapi Jesocristocca marinajassa tinanamananijine, onajaro.

³Madijapa pohua bodidsa: –Nahato onani –naraha ssamo tadsapa pohua pohua tocamaidساني tahi. ⁴Jari, ia huapima icca madiera nattome inana, onajaro. Ijine pajissa bica tadsapi najarodsa etidseni bica tani. Imecotedenicca madie nattome inejerana. Imecotedenijine qqui inadsa: –Ijinena denima bica tani –inejerana. Nema inanipi pina: –Iana nahatoqquri inani –inajarossa narana. ⁵Ia ojari inehecca imapi ijine. Bica tadsa, bica tejeradsa naqui icca ima manaconi iadsa tojanitohui.

⁶Jehe, tiadeni maridejine Dio Atti ticahatteradsapi tiadeni maridedsa accoraqquri tiquinana, onajaro. Ticajimananicca huapima pohuadsa accoraqquri tiquinanijinepi bica tani, onajaro.

⁷Paji, tiadeni ticamaidساني-manarana. Madija iapi Dio icamaidسahijine ipajira-jerani. –Dio qqui tajarahi, icamaidسana –tiquinejerana, onajaro. Ppa nahi nocco ppa tiquinadsapa najari ppa nahi bonora pore tijidsamanahitohui. Aji ticcadeni imapi nocco ppadecca imassa najaro. ⁸Tabaccorehe tinanamanadsapi dsoqqehe jiquejeranicca najidsohuehuaji tiquejenanitohui. Naraha Dio Corime jipa tahiccara tinanamanadsapi camittehe jiquejeranicca ticajimana-dsanaponitohui. ⁹Nadsapi ima bicani inana-dsanaponijine ja iquejena-jerana. Ijapari-jeradsapi nidsa dsotode bono bicahi pore ijidsahitohui. Najari bonopa Dio pocca biquehe iadsa inananitohui. ¹⁰Nadsapi ima bicani inananijine ipajiradsapi nema inanana, onajaro. Tahidepa imecotedeni Jesocristodsa jehe quinajarideni inanabicabaqquipona, dsotodena madija huapima inanabicabaqquina, onajaro.

Pablopa Epesodenidsa ima teppe dosse inajaro

Efesios

Introducción: Epesopi dsama Asiahuajicca odsa panani. Pablopa nahidsa huajano 3 naha madijari. Nahidsa madidsa Jesocristo tahimari maride tojadsapa madija huapi taha Jesodsa toquejenajari. Najaro imapi Roca dsodo inajaro Jesocca dodosse tabaqqi tahimari 19'dsa, 20'dsa qqui inajaro.

Dsotode Pablo dsama onihihuaji madidsapa Epesocca madijadsa ajijaro ima dsodo inajaro. Dio pohuadenidsa huati cahanari canahicca ima denima tocahatterahijine, Dio jipa tahiccara inamanadsa madimanahijine naqui dsodo inajaro.

Jesocristodsa iquejenadsapi icca madie dsati tojajaro. Imadinissa tanijinecca ima naqui Pablo dsodo inajaro.

Tabaccorehe jinede Satanapa iadsa dissera tajari, imasiri inanajine. Pablocca dsodonijipi ia mari tocanabaqqujaro, dacoco ijiranijine, imasiridsa iedimajeranijine.

- 1.1-14 Jesocristodsa iquejenarajine ima bicani iadsa anijaro
 - 2.1-10 Diopa iadsa huati cahanari canadsa ia tonassijabaqqujari
 - 4.20-32 Jesocristojine madie dsati icajijaro
 - 5.1-7 Diocca madija madimanahissa tahijinecca ima
 - 5.8-20 Ssijanidsa imadijaro
 - 5.21-33 Maququidejepa bedimeni tadsajani madimanahissa tahijinecca ima
 - 6.1-4 Imehideni bedideni tedseje madimanahissa tahijinecca ima
 - 6.5-9 Tarabajdsajine medse toquejenajarideni pohuadeni dossede tedseje madimanahissa tahijinecca ima
 - 6.10-20 Diocca dacorehe icajidsapi imasiri iadsa deni tojajeranijinecca ima
-

–¿Nija? –najari Pablo

1 ¹¿Nija ohuemecotedeni? Tiadenidsa occa ima teppe dsodo onajaro. Ohuapi Pablo. Dio ohuadsa jipa tadsa Jesocristocca dodosse ojanijine otohui huahua najari. Jehe, nani odsa panani Epesodsa timadimanajaropi Diocca madija bicaquiri tiquinani, Jesocristodsa disseraquiri tiquinajarodenidsa dsodo onajaro. ²Icca Abi Dio, Pohua Bedi ia Medsede Jesocristo tedseje tiadeni tocatidsebaqqui-manadsapa tiadenidsa ima bicani inanamana-dsanapona, onajaro. Poccadeni jonehe naqui tibodidenidsa tojadsanapona, onajaro.

Jesocristodsa iquejenajarojine ima bicani iadsa anijaro

³Diodsa etti ajima inana: –Jehe Abi Dio, bica tinani, deni tijani. Iadsa ima bicani tinanajaro –ihidsanapo nana. Diopa pajissa ia Medsede Jesocristocca Abi. Jesocristodsa iquejenajarojine ima bicani memehuaji anijaro huapima iadsa da inajaro. Pohua Corimepa ibodidsa najaro ima bicani inanaridsajaro. ⁴Diopa dsama inahatopo-jeradsama itohui napojari. Pocca madija iquejenanijine ia tocattejidsabaquijari. Nama najaria Pohua Bedi Jesocristodsa pajissa inajarodeni ibodi ssiajaquiri nadsa Dio Pohuatohuira imadinissa dsanaponijine. Ia qqui tabaqquidsapa imasiri icappirani ia qqui tabaqquihitohui. Diopa iadsa huati huana tajari. ⁵Diopa maittaccadsama: –Madija medse onanabaquina, pina occa ejedenidenissa quinahijine –napojari nade. Nadsapi Pohua Bedi Jesocristodsa iquejenadsa Dio pocca madija iquejenajaro. Najaro imapi Diodsa bica tani. Pohua tohuini nadsa nema inanajaro. ⁶Nadsama iapi: –¡Jehe, Abi Dio, bica tinani, bica tinani! Iapi bicaquiri inejeraraha iadsa ima bicani tinanajaro. ¡Ticca tohuati huanehepi deni tojani! –ihina najaro. Abi Diopa Pohua Bedi Jesocristodsa huati huana tajari. Najaridsa pajissa inadsapi iadsa ima bicani inanajaro. ⁷Iapi imasiricca medse iquejenaraha Dio itohui huati cahanari canadsa ia tappa tabaqquihijine pocca ejedeni eccorajari. Pohua emene toccajaropi icca imasiri manaconi tojajaro. Nadsapa Dio iadsa: –Ticcadeni imasiridsa epeje onani –najari. ⁸Diopa nema inanajaropi iadsa pocca tohuati huanehe ahuato inanajaro. Memehuajicca nahatohue, tohuattehe huapima naqui iadsa inanaridsajaro. ⁹Diopa iadsa ima bicani inananiijine

ecahuapjaropi tahide ahuatora taporaha jidapana iadsa ahuato inanajaro. Najaro imapi Pohua tohuini napodsas: –Occa ejedenidsa ajima onananitohui –napode. ¹⁰Najaroa nidsa dsotode Pohua tohuini nahicca huada bacco tadsa pocca tonahatobaqquinaja huapima aja memehuajicca, namihuajicca naco huapima inatassaqquihitohui. Nadsapa Pohua Bedi Jesocristo huapimadsa deni inanadsapa pohuana huapima ecahuabaqquihitohui.

¹¹Diopa Pohua jipa tahicca inananijine tohuini nadsa najarossa inanajaro. Tahide madija iquejena-jeraccadsama Diopa: –Madija ocattejidsabaqquihitohui, occa madija toquejenadsa pohuadenidsa occa daniji bicani da onabaqquinijine –napohui nade. Nadsapi Jesocristodsas pajissas inadsa Diocca madija iquejenajaro. Nadsapi Dio pocca daniji bicani huati tapojaricca iadsa inanaridsanitohui. ¹²Dio Pohua tohuini nadsa tahide ia jodiodenina Jesocristodsas pajissas inapojaro. Diodsas etidsedsas Pohuadsas: –Jehe, Abi Dio, bica tinani, deni tijani –ihinananijine Dio ia tocatejidsas-baqquijojari. ¹³Tiadenipi jodio tiquejena-jeraraha Jesocristo tahimari icassiejeranijinecca timittamandsasapi pajissas tiquinajaro. Nadsapi tiadeni naqui Jesocristoccas tiquejenajaro. Nadsana Dio pocca madija tiquejenajaro ahuato tanijine Pohua Corime dosse inaronajari, pina tahide huati tapojarissas najari: –Nidsas Ocorime tiadenidsas onanaridsanitohui –napohui nade. ¹⁴Pohua Corime iadsas inanaridsajaripas pocca daniji bicani huati tapojaricca pajissas iadsas tojanitohui nahatoto inanijine. Najaro daniji bicanipi nidsas dsotode imasiriccas medse toquejenajarideni tappa inabaqquias jicadsas pocca madija idinibaqquidsas pocca daniji bicani huapimadsas da inaridsanitohui. Dio nama najarias madija Pohuadsas huatidsemanadsas: –¡Jehe, Abi Dio, bica tinani, deni tijani! –quiquina nahijine.

Diopa iadsa huati cahanari canadsa ia tonassiajabaqquijari

2 ¹Tahidepi ticcadeni tabaccorehe, ticcadeni imasirijine Diodsapi pina tecotajarossas najarode. ²Ticcadeni madie pina Diodsas toquejena-jarajaridenissas tiquinajarode. Ajijaro namiccas imatohui disseraqquias tiquinadsasapi Diocca huadi Satana attidsanas iboraqquias tiquinajarode. Najaripas aja qqui inabaqqui-jarajarideni dossede tojararipaja. Puhuapa Diodsas iboqquias najaridenidsas naco dosse

dosse najari. ³Ia huapimapi tahide nema inapojaro. Diodsa iboqquri inajarode, ibodidsa tabaccorehe tohuini inaniccara ihinana najarode. Ime tohuini inanicca tabaccora taniccdadsa disseraqquri inajarode. Imasirima issonajarojine Dio ia tonajidso-baqquidsapa pina madija huapima inajidso-baqquijarissa inanitohuiraha.

⁴Diopa tohuati huanehe sse tajari. Itohui huati cahanari canajari. ⁵Imasiri sseqquri inajarojinepi pina ecotajarossa inaccade. Naraha Jesocristocca madija iquejenadsapi Diopa iadsa camittehe dsati da inajaro. Pocca tohuati huanehe bica tani, deni tojani. Najaroma tiadenidsa huati cahanari canadsa tiadeni tonassiajabaqquijari. ⁶Madija ia huapima pina ecotajarossa inaraha Diopa Jesocristo inahatonidsa ia naqui pohua tedseje ia tonahatoni-baqquijari. Nadsapi memehuaji Dio Pohuajine Cristo tedseje jassi inarinitohui. ⁷Dio nama najaria nidsa dsotode pocca tohuati huanehe bicani iadsa inanani madija huapimadsa ahuato tanitohui. Aji icca ima Diodsa tobicajaropi Jesocristo pohuajine. Nadsapa Dio iadsa huati cahanari canahi madija qqui toquinahitohui, najaro ima naqui mitta-manahitohui. ⁸Abi Diopa titohuideni huati cahanari canajaria tiadeni tonassiajabaqquijari. –Jesocristo pajissa itohui dsoqqe-jari –tiquinadsapi tiadenidsa tossiejehe inanajaro. Tijinedeni jerani; Abi Dio tohuini nadsa manaconi jirehe tiadenidsa inanajaro. ⁹Pajissa, Dio tiadeni tonassiajabaqquijaripa bicaqquri tiquinajarojine jerani, ima bicani tinanamanajarojine jerani. Najarojine madijapa: –Bica onajarojine Dio ohua tonassiajajari –najarahitohui. ¹⁰Diopa tahide nahato tapojari: –Occa tonahato-baqquinaja ima bicanira inanamananitohui. Ohuattidsa madi-manahissa tahitohui –nadsapa Pohua Bedi Jesocristo dosse inaronajari, pohuajine inahatomanidsati iquejenanijine.

Jesocristojine madie dsati icajijaro

4 ²⁰Naraha tiadenipi nema nanicca tabaccorehe Jesocristocca marinajadsa ticahattera-jerani. ²¹Pocca marinaja pajissehecca timittamanadsapi timadimananissa tanijinena ticahatterajaro. ²²Nadsapi najaro Jesocristocca marinaja ticahatteradsapi ticcadeni madie jadani aji tiadeni tohuini tiquinapojaro ccapi tinebomanaji. Tabaccorehe tohuini tiquinajaropi tiadeni tocamaidساباqquijaro. Najaro tabaccorehepi tiadeni tonatabaccorajaro. ²³Tibodideni

tecajiquimera-manaji. Diodsa: –Occa ima jadani tohuini onejera-nijine obodi dsati tinanaji –tiquinaji. ²⁴Nadsapi Dio tibodideni dsati inanadsapi ticcadeni madie naqui dsati tojanitohui. Diopa pina pocca imassa nehe timadimananijine tiadeni acco tocamabaqqui-hitohui. Diocca imapi pajiranissa tajaro. Imasiri cappirajari. Pocca pajisseheda timadimanadsapi pina Pohuassa tiquinanitohui.

²⁵Jidapana dsati tiquejenadsapi denima timaidsamana tejeraji. Timecotedenidsa ima pajissehera huati huati tiquinaji. Ia huapima Jesocristocca iquejenajaropi pina essire ojariqquijarossa inajaro.

²⁶Tedimanadsapi imasiri tinanamana-jeraji. Tedimanaraha najaro huadadsa tetideni ssonani bica tani. ²⁷Ticcadeni huadie tinebomana-jeradsapi imasiri totonanade tiadeni tocadosse-baqquihijine najorajarossa tiquinajaro. Paji, denima tabacco-rehe tinana-manarana, onajaro.

²⁸Madija boti tajaripa pocca botie nebona. Tarabaidsa bica taniccadsa dsepe ijidsapa cappira-jarahitohui. Cappira-manajaridenidsa da inahijine naco pajirahitohui.

²⁹Tohuatti tabaccora taniccapi huati huati tiquinejeraji. Tohuatti bica taniccara huati huati tiquinaji. Nema tiquinadsapi timecotedeni bodideni acco ticamabaqquidsa jehenijirideni todacorani nanijine. Tettideni bica taniccara mittamanadsapa bodideni huatidsemanahijine. ³⁰Dio Corime oji tinanamana-jarahijine timadimananissa taji. Jesocristodsa jehe tiquinapodsama Dio Corimepa tiadenidsa anijonahi. Nadsapa nidsa dsotode Dio pocca madija inassijabaqquihijinecca huada bacco tadsapi Pohua Corime anijaridenidsa: –Occa –nahitohui. Nadsapa najaridenina inassijabaqquihijine.

³¹Ocasserani temanadsapi oji tidsanapomana tejeraji. Ticcadeni huadie denima dacoranicca naqui tinebomanaji. Huadie ajimanicca naqui tecahua-manadsanapo-jeraji. Amossinidsa atti atti tiquinajaro, tatamasso tiquinajaro naqui tinebomanaji. Tabaccorehe onihi onihi naqui tiadenidsa nohueranijine tinebomanaji, onajaro.

³²Tetideni cahanerara canadsa timecotedeni pina acco acco titi-camabaqquimana najo. Timecote tiadenidsa ima bica tejernicca inanadsa naqui pohuadsa: –Epeje, ohuadi-jerani –tiquinaji. Tiadeni naqui ima bica tejeranicca tinanamansapi timecotedeni tiadenidsa: –Epeje, ohuadi-jerani –quinahijine bica tani. Pina Diopa Pohua Bedi Jesocristodsa tiquejenadsapi tiadenidsa: –Epeje, ticcadeni imasiri ohuati ajimani –najarissa tiquinaji, onajaro.

Diocca madija madimanahissa tahijinecca ima

5 ¹Jehe, tiadenipi Diocca ejedeni tiquejenajaro. Puhuapa titohuideni huati cahanari canajari. Pocca ejedeni tiquejenadsapi Puhujinessa tinanamanana, onajaro. ²Pocca tohuati huanehema huapima tohuideni tetideni cahanariri canaji. Jesocristo itohui huati huana tadsapa pohua ccaccoradsa dsoqqejari. Najaro pocca *danijipi Diodsa bica tajari, pina bani bedi Diodsa da tahi botta tadsa majo ocassa tajarissa najaro.

³Tiadeni Diodsa tiquejenajaropi huananehe huapima tinanamana tejeraji. Tettidenidsa naqui huananehecca huatide nohuerana. Tabaccorehe oppina tanicca onihi onihi Diocca madijadsa nohuerajaro. Madijacca tarabajadsa acconi, todsepetaji acconi naqui tedimana tejeraji. Dsiniro, todsepetaji huemani tohuini tiquinejeraji. Diocca madija tiquejenadsa timadimananissa tanijinepi nema nanicca ima huapima huati tiquina tejeraji. ⁴Ima ponima tabaccora tajaropi huati tiquina tejeraji. Tohuatti ponimacca, jidsehe tabaccora tanicca naqui huati tiquina tejeraji. Nema nanicca tohuatti tabaccora tajaropi Diocca madijadsa nohuerajaro. Tettideni bica taniccadsara Diodsa tetidsemanana. –Jehe, Abi Dio bica tinani –titidsanapomanana nanina bica tani. ⁵Ajijaro ima nahatoqqiri tiquinani: Huananehe inanamanajarodeni, tabaccorehe oppina tanicca inanamanajarodeni huapimapa Cristo, Imehi Dio tedseje poccadeni cacahueheda bacco toquina-jarahitohui. Denima tohuini quinajarideni naco pina dsiniro tohuini, pina todsepetaji tohuini quinajari, najarideni huapimapa Cristo, Imehi Dio tedseje poccadeni cacahueheda bacco toquina-jarahitohui. Nama quinajaridenipa pina siba nahatonidsa huatidsemanajarissa quinajari. Nanicca tohuinira huatideni huanaqqiri najari. Diodsa huatideni huanaqqiri najarajari. ⁶¡Paji, madija tiadeni tocamajadsabaqqi-manarana! Tohuatti ponimacca huati huati toquinadsapa pina: –Tabaccorehe tinanamanani oppina tejerani. Dio tiadeni tonajidsabaqqi-jarahitohui –quina tahi. Naraha najarideni attidenidsa pajissa tiquinejeraji. Dio Attidsa iboqqiri najarideni huapimadsa Diocca najidsohue oppina tanicca ssonarinitohui. ⁷Nama quinajaridenidsa tiquejemamana tejeraji. Puhudenidsa tijimanani nanina bica tani.

Ssijanidsa imadijaro

⁸Jehe, tabaccorehedsa timadimanapodsapi Dio jirehe timadimanajarode. Pina dsidsinidsa timadimanajarossa naraha Jesocristodsa tiquejenadsapi Dio tiadenidsa tojidserajari. Jidapapi ssijanidsa timadimanadsapi pina Dio ssiejenedsa madimanajaridenissa tiquinana. ⁹Nema tiquinadsapi Dio Pohua ssiejene tibodidenidsa tossiajabaqquihitohui. Najaripa Pohua Corimejine biquehe tinanamanajaro, ticcadeni ima pajiranissa tajaro, pajissehedsara timadimanajaro. ¹⁰Dio Pohua jipa tahicca ticahatteraji. Pihuadsa bica tanicca nahatoto tinadsapi najarora tinanaridsamananijine. ¹¹Aja dsidsinidsa madimanajaridenipa ima bicani tonanade ssamoquiri najari. Pihuadenipa ima ponimacca, tabaccora tanicca inanamanaraha tiadenipi pohuadenidsa tiquejemamana tejeraji. Pihuadenijine tabaccora tajaropi ahuato tinanamananina bica tani. Pina ssijanihuaji joca tininebaqqui-manajarissa tiquinana. ¹²Pihuadenipa ahuatorehedsa tabaccorehe inanamanajaro. Poccadeni tabaccorehecca ima ecomeranjinepi iadsa oppina tani. ¹³Naraha tabaccorehe inanamanajarodsa Dio ssiejene ssonariridsadsapa poccadeni tabaccorehe nema nehe ahuato tanitohui. ¹⁴Dio ssiejenejine huapima tohuatonissa tajaro. Najarojine maittaccadsama ajama quiquina najari:

–¡Tedajaro nocco tijaji!

¡Tetiaraha ticamitemaniji!

Diocca Cattaniji Mesia pohua ssiejene tibodidsa

ssijaridsanitohui –quiquina najari, jiri jiri quinadsa.

¹⁵Nadsama timadimananissa tanijine tibodideni huatonissa dsanapona. Pina ssamomo botedenicca madiessa tiquinejerana; nahatoto botedenissa tiquinana. ¹⁶Jidapapi tabaccorehe caji taridsanidsa timadimanaccajaro. Naraha tiadenipi ima bicanira tinanamananijine tinajoramanehe timadimanaji. ¹⁷Pina ssamomo botedenissa tiquinejeraji. Ia Medsede tohui nahiccara timittamananissa tanijine dissessera tinaji. ¹⁸Tinoccodeni jano tanijine coma tanicca dsemana tejerana. Dse tiquinadsapi ticcadeni madie totabaccoranitohui. Ajima tiquinanina bica tani: Dio Pohua Corime tiadenidsa tojahijine Pihuadsa: –Ticorime ohuadsa tinanajo –tiquinana. Nema tiquinadsana ima bicanira tinanamananijine Dio

Corime tiadeni dosse dosse nahitohui. ¹⁹Nama nadsapa timecotedeni tinahatidse-baqquimanahijine jiri jiri tiquinaji. Aji Dabicca jijiricca bica tani, aji Dio Atti dsodo nanicca jijiri naqui bica tani. Dio Corime tibodideni tonahatta-baqquidsa naqui jiri jiri tiquinani bica tani. Tettideni, tibodideni nema nehema ia Medsede Jesocristodsa jiri jiri tiquinadsa naqui pohnadsa: –¡Bica tinani, deni tijani! –titidsanapomana naji. ²⁰Huajijiradsa ia Medsede Jesocristo onima Abi Diodsa: –Jehe, epejeni. Tijine bica tani –titidsanapomana nana. Nadsapi imadinicca huapima icajidsa, icappiradsa naqui Diodsa: –Jehe, epejeni –inani bica tani. Ima bica tanicca iadsa anidsa, ima ocassera tanicca anidsa naqui nema nehe Diodsa: –Jehe, epejeni –inani bica tani.

***Maqquidejepa bedimeni tadsajani
madimanahissa tahijinecca ima***

²¹Jesocristodsa tetideni huanaqquri nadsapi pina Jesocristo pohua ajamani tonanajarissa tiquinaji. Timecotedeni tedseje tettidenidsa ahuaji ibora, ahuaji ibora tiquinaji.

²²Amoneje maqquideje ticajimanajarodeni naqui ticcadeni maqqi attidsa ibobora tinana. Pina ia Medsede Jesocristo attidsa ibobora tinajarossa tiquinana. ²³Amoneje cajjaripa pocca amoneje dossede tojajari, pina Jesocristo pohnadsa toquejenajarideni dossede tojararissa najari. Pohnadsa toquejenajarideni pina Jesocristo assiressa quinajari. Pohna naco pina pohnadeni tatissa najari. Pohna naco pohnadsa toquejenajarideni Tonassijade.

²⁴Maqquideje cajimanajarodeni ponidenicca maqqi atti nema nehedsa iboraqquri nana, pina Jesocristodsa toquejenajarideni pohnadsa iboraqquri najarissa quinanjine, onajaro.

²⁵Maqquideje amoneje ticajimanajarodeni naqui ticcadeni amonejedsa tetideni huanaqquri naji. Pina Jesocristo pohnadsa iquejenajaro itohui huati huana tajarissa tiquinaji. Pohnapa itohui huati huana tadsa dsoqqejari. ²⁶Nama najaripa pocca madija ibicaridsanjine. Pohna attidsa ibodi inahirejaro. Tabaccorehe inebojaro ahuato tanijine naqui passodsa totopa icajijaro. ²⁷ICca ima huire, ibodi ssiaja tadsa icca ima pajiranissa tanijine. Pina etero bicabote obero tajarossa, casinaqqi-jerajarossa inanjine. Nidsa pohua ccanipomadsa pohua pocca iquejenajaro bicaqquri inadsa ia tohuaccamacossani-baqquihijine.

²⁸Nadsama maqquideje amoneje cajijaripa pocca amoneje-dsara huati huana tana, pina pohua pohuadsa huati huana tajarissa nana. Pocca amonejedsa huati huana tajaripa pohua pohuadsa naco huati huana tajari. ²⁹Madijapa pohua assiredsa nacassera-jarajari. Pohua assiredsa huati huana tadsapa jijipa najari, pohua assire cacacahua najari. Jehe, najaro imapi pina Jesocristopa pohuadsa toquejenajarideni ecahuabaqqujarissa najaro. ³⁰Ia huapima pohuadsa iquejenajaropi pina pohua assire nama nahassa inajaro.

³¹Ima najarossa najaropi maittaccadsama Dio huati tajari: –Maqquideje pohua bedimenidsa tojadsapa imehi imenidenidsa nebo, pohuadenira madimanajari. Nadsapa pamaraha pina ojarijarissa quinajari –nahi nade Dio. ³²Najaro imapi assiredeni pamaraha pina assire ojarijarissa naha toquejenajari. Najaro cajicajicca imapi imittaporaha ahuatora taccade. Naraha jidapanana omittadsapi Jesocristodsa ijariqqujarocca imapi pina cajicajicca imassa najarona paji, onajaro. Najaro imapi ohuadsa bica tajaro. ³³Nadsama tiadenidsa huati omanipomajaro: –Maqquideje amoneje cajimanajaridenipa poccadeni amonejedsara huatideni huanaqquri nana, pina pohua pohuadenidsa huatideni huanaqquri najarissa nana. Amoneje maqquideje cajimanajarodeni naqui ponidenicca maqquidsara iboraqquri nana, onajaro.

Imehideni bedideni tedseje madimanahissa tahijinecca ima

6 ¹Ejedenideni, tiadenipi ia Medsede tohuini nahiccara tinanamanani bica tanijinepi ticcadeni abi, ami attidenidsa iboraqquri tiquinaji. Najarona ima pajiranissa tajaro. ²Dio Atti dsodo nanidsa ajima najaro: –Ticcadeni abi, amidenidsa tetideni huanaqquri naji –nahi nade Dio Atti. Najaro marinajapi Dio pocca marinaja 10 nehe Moisesidsa da inajarodsa anijaro. Najaro marinaja ojarie ima bicani tadsajani da inajaro. Nadsapi najaro marinaja ecahuadsapi ima bicani iadsa tojanitohui. ³Najaroa aji Pohua Atti: –Tiadeni onamadi-baqquinissa dsanaponijine. Ajijaro namidsa timadimanadsapi jadahi tiquejenanissa tanitohui –nahi nade Dio Atti.

⁴Jehe, imehideni tiadeni naqui ticcadeni ejedeni tijinedeni huadimana-jarana. Madie bicani tocahatterahijine tedimana-jeradsa

tinahattabaquimanajo. Ticcadeni ejedeni Dio Pohua tohuini nahicca tocahatterahijinera mari mari titicanabaquimana nana.

***Tarabidsajine medse toquejenajarideni pohuadeni
dossedede tedseje madimanahissa tahijinecca ima***

⁵Nadsapi medse tiquejenajaro, tiadeni naqui ajijaro namicca tiadeni dossede attidsa iboraquiqui tiquinaji. Pohua noppine ticappinamanadsa pohuadsa bicaquiqui tiquinaji. Maidseraquiqui tiquinadsa tidsepedeni ijimananissa taji. Pina Jesocristodsa tidsepedeni ijimanajarossa tiquinana. ⁶Tiadeni dossede qqui tajaradsa naco tidsepedeni ijimananissa tana, pina tiadeni qqui tadsassa tiquinaji. Jesocristocca medse tiquejenajarojine Dio jipa tahicca titinanamana najaro. Najarossa tiquinaji. Tiadeni dossede attidsa naqui iboraquiqui tiquinana. Tibodideni bicaquiqui nadsa: –Jehe, ohua dossede attidsa ibora onana –tiquinana.

⁷Nadsapi huatidsehema tibodideni bicaquiqui nadsa tidsepedeni ijimanana. Nema tiquinadsapi toponi dossededsa tidsepedeni ijimanaraha pina ia Medsededsa tidsepedeni ijimanajarossa tiquinajaro. ⁸Ajijaro ima nahatoquiqui tiquinajaro: Nidsa ia Medsede Jesocristo ccanidsapa ima bicani tinanamanajaro manaconi tiadeni huapimadsa da inabaquinitohui. Nama nahitohui medse tiquejenajarodenidsa, medse tiquejena-jerajarodenidsa naqui.

⁹Nadsama toponi dossededeni. Tiadeni naqui ticcadeni dodosse tabaquidsa bicaquiqui tiquinaji, pina Jesocristodsa bicaquiqui tiquinajarossa tiquinaji. Ticamaidsabaquimana tajarajo. Jara tinabaquimana tajarajo. Tibodideni huatoma-manaji: ticcadeni dodosse tabaqqi pohuadeni Medsedepa tiadeni Medsede Jesocristo ojarihi. Pohuapa tiadeni Cacahuade memehuaji madijari. Pohua attipa: –Ajajaripa dossede, ajajaripa medse –najarajari. Qqui inabaquidsapa huapima najarissa canirejari.

***Diocca dacorehe icajidsapi imasiri
iadsa deni toja-jeranjine***

¹⁰Ohuemecotedeni, jidapapi occa marinaja jicanicca tiadenidsa dsodo onajaro. Ia Medsedepa dacorajari. Pocca dacorehepi deni tojanicca. Najaro pocca dacorehema dacoco tijiraji. ¹¹Pina soldadossa tiquinaji. Soldadopa biquerahi noppine pohua cacahuahijine jadsirecca huedsajari. Tiadeni

tecahuamananijinepi Diocca dacorehe ticajimanaji. Nema tiquinadsapi *Satanacca maidsehedsa tiedimamana-jeranitohui. Dacoraquuri tiquinadsa tidomodeni huanitohui. ¹²Imasiri deni toja-jeranijinepi jadsire inanajarossa najaro. Naraha icahadirenijinepi madija assire cajimana, tone cajimana najarideni tedseje jerani. Pohuadeni assire cappiramanajari qqui inabaquui-jarajarideni tedsejena icahadirejaro. Najaridenipa tabaccorehe jinede Satanacca dodosse tabaquui memehuaui jahiridsamanajari. Memehuaui madimanageraha ajiaro namidsa dacorehe cajimanajari. Pohuadenipa dsidsinidsa madimanajarideni ihicadosse-baquumana najari, tabaccorehe inanamananijine. ¹³Nadsama Satanacca dodosse tabaquidsa jadsire tinamananijinepi Diocca dacorehe nema nehe ticajimanana. Nadsana tabaccorehe ahuatodsa tiedimanagera-jeranitohui. Imasiri tadsajani ticahadiredsapi dacoco tijirdsa tidomodeni huanitohui.

¹⁴Nadsama tiadenipi dacoraquuri tiquinaji, pina soldadossa tiquinaji. Soldadopa etero jadsirejinecca huedsajari. Naraha tiadenipi Diocca pajissehe, pocca biquehe tedsamanaji. Najaro ima pamehe ticajimanadsapi imasiri tadsajani ticahadiredsa tidomo huanissa tanitohui. ¹⁵Jesojine Dio tedseje icajonerajarrocca ima bicani maride dissessera tinaji. Najaro ima tecomeraridsa-mananijine tinajoramanehe timadimanaji.

¹⁶Imasiri tadsajani ticahadire-nijinepi ticcadeni jeheniji dacorajaro pina soldadocca camatassa najaro. Soldadopa bobadsa biquerahi noppine ssapa, ccara tajari pohua tedsejema da inajari. Tiadeni naqui jehe tiquinanissa tadsapi tabaccorehe jinedecca boba jororone cajihicadsa tibiqueramanajeranitohui. Pocca maidsehe iadsa ssonarijaropi pina ia ssite najarissa najari. ¹⁷Jeso tahimari icassiejeranijinecca



ia tohuacahuabaquijaropi pina soldado pohua tati cacahua-hijine ccara tajari ettarijarissa najaro. Tabaccorehe tadsajani ticahadirenijine naqui Dio Pohua Corime Bicabote tibodi-denidsa Pohua Atti inanajaro. Najaropi pina jadsirecca massito jadsira tocanajarossa najaro.

¹⁸Huajjiradsa Diodsa huati huati titiquina naji. Pohuadsa huatide tinebomana tejeraji. Dio Corime tibodideni acco tocamabaquihitohui. Tetideni huatodsa tinoccodeni panehe timadimanaji, pina soldado pocca huadi noppinedeni nocco panajarissa tiquinana. Tiadenidsa ima bica tadsa, ocassera tadsa naqui Diodsa huatide dissessera tinaji. Diodsa toquejena-jarideni huapimatohui Diodsa huati huati titiquina naji.

¹⁹Otohui naqui Diodsa huati huati titiquina naji. Nani ocappina-jeradsa Jesocristo tahimari icassiejeranijinecca maride ojadsa tohuatti pajiranissa taniccadsa madija mari ocanabaqqi-ridsahijine. Najaro ima bicanipi tahide Diojine ahuatora taporaha jidapana Pohuajine tohuatojaro. ²⁰Najaro pohua tahimari mari onaridsanijine ohua Medsedepa ohua cadossejaride. Najarojine jidapapi todsepe ojararo. Dio Pohuadsa huati huati tiquinaji, cappinehe ohuadsa nohuera-dsapi pocca dossehe onapajiranissa tanijine.

Pablodenipa Piripodenidsa ima teppe dosse quinajaro

Filipenses

Introducción: Piripopi dsama Masedoniacca odsa panani deni tojanicca. Pablopa nahihuaji Jesocristo tahimari maride tojapojari, pohua tesse Sila tedseje. Madija mota Jesodsa jehe quinaraha motapa Pablodenidsa jiperaquiqui najari. Pablo Sila tedseje damama quinadsapa inajidsobaquiqui-manajari. Toponi cocorohuaji cororo idsimamanajari. Najaro imapi dsotodena Roca dsodo inajaro, Jesocca dodosse tabaquiqui tahimari 16'dsa qquiqui inajaro.

Nadsapa Piripocca toponi cocorohuaji huedenadsapa dsama onihihuaji huedaridsajari, Dio Atti maride. Dsotode Pablo pohua motta Romahuajicca toponi cocorodsa huedsadsapa Piripohuaji madimanajaridenidsa ajijaro ima teppe dsodo inajaro. Toponi cocorodsa ocasserani ahuaraha Diodsa huatidse-dsanapojari. Pocca dsodonijipi: Ocasserani eraha huajijiradsa Diodsara ehetidse najaro bica tani. Nanajidso iquejenaraha Jesocristodsa dissesera inanijine.

Pablo pohua Diodsa dissera tajari pohua tahimari dsodo inajaro. Dio jipa tahiccara inananijine tohuini najari. Najaro ima naquiqui Piripodenidsa dsodo inajaro, pohuadenu naco Dio jipa tahicca tocahatterahijine.

- 1.1-11 Pablopa Jesocristodsa jehe quinajaridenitohui
Diodsa huati huati najari
- 2.1-11 Jesocristo ajamani tojaraha deni tojajari
- 2.12-18 Jesocristodsa toquejenaridenipa ajijaro dsamacca
dsidsinidsa pina jojororo ssiaja tajarissa quinajari
- 3.7-14 Diocca madietohui idissesserani dsanapona
- 4.4-9 Bica tanicca tohuira tibodidenu huatomaji

Pablo, Timoteo tedseje: –¿Nija? –quinajari

1 ¹ Ohuapi Pablo. Otesse Timoteo tedseje Jesocristocca medse iquejenani. Tiadenidsa: –Nija ¿bicaquiqui tiquinaquiqui –inajaro. Aji odsa panani Piripocca Diodsa tiquejenarodenu

Jesocristodsa tijariquimanajaro tiadenidsa ima dsodo onajaro. Titiqueriqui nanicca tiadeni maridedeni, tibijideni accodedeni huapimadsa naqui dsodo onajaro. ²Aja icca Abi Dio tiadeni tocatidsebaquijaria tiadenidsa ima bicani inananijine, inajaro. Tiadenidsa icca Abi Diocca jonehe, ia Medsede Jesocristocca jonehe naqui tiadenidsa tojanijine, inajaro.

***Pablopa Jesocristodsa jehe quinajaridenitohui
Diodsa huati huati najari***

³Aji Piripodsa timadimanajaro tiadenidsa obodi huatodsa Diodsa ohuattipi: –Jehe, pohuadenipa bicaquiri nadsapa ohuatidseni –ohona najaro. ⁴Diodsa huati huati onadsa naqui Diopa tiadeni tohuacahuabaquihitohui ohona nadsapi ohuatidsejaro. ⁵Aji Jesocristo tahimari timittamanapodsama pohua tahimari deni tojanijine idsepe ijjaropaji. ⁶Tiadenipi Jesocristodsa jehe tiquinapodsama Diojine tibodideni dsati tojajaro. Nadsama obodi nahato onajaropi Dio tiadeni acco tocamabaquijonajaria Jesocristodsa paji jai tijarini dsanapodsapi nidsa Pohua ccani-pomahicca huada bacco tiquinanitohui, onajaro.

⁷Tiadenidsa ohuati huana tadsa ajijaro ima obodi huatodsa huati onajaropi bica tani, onajaro. Najaroa aji todsepe ojadsa tiadenipi Diojine dacoco tijiradsa ohua acco ticamamanajaro-paji. Nadsama dsama cacahuadedeni otohui huahua quinadsa occa ima: –Tabaccora tani –quinadsa naco occa ima mitta-manahijine pohuadenidsa ohuacomerajarode: –Diocca ima Jesocristo tahimari tabaccora tejerani. Ima bicani icassiejera-nijinecca –onade pohuadenidsa. Tahide todsepe ojajeraccadsama naqui tiadeni tedseje nema inaridsapode. Diocca dacorehe iadsa anidsanapojaro. ⁸Diopa obodi nahato tajaria Jesocristocca tohuati huanehema tiadenidsa ohuati huana tajaropaji. ⁹Ohuapi titohuideni Diodsa huati huati ohona najaro, tibodidenidsa Jesocristocca tohuati huanehe deni tojadsanaponijine. Nani imecote Jesocristodsa pajissa quinajarideni tedseje tetideni cahanerara canadsapi ticcadeni tohuati huanehe madija huapimadsa tojaribaquiniijine. Nani Diojine tibodideni tohuattajaroma tetideni huanaquiri nanijine. Nadsapi Diocca marinaja tadsajani tibodideni huatonissa tadsa ima bicani ticattejidsa-mananijine. Najaro ima tadsajani

madijadsa tetidene huanacquiri nanijine, ohona najaro Diodsa. ¹⁰Nani ima bicani tocattejidside nahatoacquiri tiquinanjine. Bica taniccatohui jipacquiri tiquinadsapi tibodidene tossijani nanijine. Ima bicani tinanamanadsapi nidsa Jesocristo ccarona-pomadsa: –Ticcadene ima tabaccora tani –najarahijine, onajaro. ¹¹Ticcadene madiesa pohuajine ima bicani huapi tehe ahuato tadsapi madija qqui toquinadsapa: –Jehe, Diopa nahato tahi, deni tojahi –quiquina nahijine, ohona najaro Diodsa.

Jesocristo ajamani tojaraha deni tojajari

2 ¹Aji Jesocristodsa tiquejenajaropi tiadene tonahatidse-bacquiri. Pocca tohuati huanehe ticajiridsamanadsapi tibodidene ocassera taraha pohuajine tetidene ssonani nahatoacquiri tiquinajaropaji. Dio Corime tibodidenidsa tojadsa naco pohuadsa tijariquimanajaro. Najaroa madija catidsede ticahattera, tohuati huanehe ticahattera najaropaji. Najaro ima huapima tiadenidsa tojadsapi ohuatidseni. ²Denima ohua tinahatidsemananjinepi ajima tiquinaji: Aji Jesocristodsa tiquejenajaro huapima ticajonerara canadsa timadimanadsapi ohuatidsenitohui. Pocca tohuati huanehema tetidene cahanerara canadsapi ohuatidsenitohui. Huapima jehe ticanirere canadsa: –Jesocristo tahimari ahuato inanana –tiquinadsapi ohuatidsenitohui. ³Naraha tibodidene: –Ohuana ima bicani onanadsa deni ojana –tiquinejeraji. Ima bicani tinanamananjinepi: –Diocca deni tojehera ahuato dsanaponijinena bica tani –tiquinaji. Tettidene naqui: –Ohua motta Dio Attissa onananijine opajirani –tiquinejeraji. Tettidenipi: –Dio ohua acco camadsana opajirani –tiquinanina bica tani. –Ohuana denima nahato onajaro –tiquinejeraji. Timecotedene naco tohuattehe cajiridsamanahi. –Pohuadene naco deni tojehecca cajimanahijine bica tani –tiquinaji. ⁴Tiadene tiadenira tinanabica-mananjine ojari jerana. Timecotedene naco pohuadene tonabica-manahijine acco ticamabaquimanajo. ⁵–Ohuapi ajimani ojani bica tani –tiquinadsapi tibodidene pina Jesocristo bodi huatomajarissa tiquinajaro. Nema tiquinani bica tani. ⁶Jesocristopa Diossa najari. Imehidsa madipodsama Imehicca deni tojehessa najaro cajijari. Naraha pohuapa: –Ohuapi Abi Diossa onani. Deni ojani –najarajari. –Occa mamadi bicani onebo-jerana –najarajari. ⁷Nadsapa pocca deni

tojehe inebocossa, pohua madihicca bicani inebocossa nadsa pina aja iassa naha amonejedsa tossonajaripaja. Nadsapa pina medse dodosse tojajarissa naha tojajari. ⁸ Pohuapa pina iassa naraha pohua tohuini nahicca inana-jerajaro. Imehicca dosse-nijidsana ibora tajari. Najaria Imehi Attipa Bedidsa: –Madija tinassijabaquina –najaripaja. Imehi Attidsa ihibora dsanapolaria aja porimacossanidsa inanadsoquemanajaripaja. Nadsama porimacossanidsa dsodsoquemana najaripa oppina tanicca. Najarodsapa madija bobotide, madija pohua tesse inanadsoquedaridenina, dsodsoquemana najari. Naraha Jesocristopa nama najararaha najaro porimacossanidsa inanadsoquemanajari. ⁹ Najarodsapa ibora tadsapa Abi Dio Pohua Bedi Jesocristo deni inanajari. Memecca huapimadsa, namicca huapimadsa pohuana denima bica tajaripaja. Najaria Abi Dio Pohua Bedi Jesocristo oni icanacanidsapa madija huapimadsa Jesocristo onina deni tojaridsajaropaji. ¹⁰ Nadsama nidsa dsama jicadsa Jesocristo oni mittamanadsapa memehuaji madiridsamanajarideni, namihuaji madiridsamanajarideni tedseje, nami bodihuaji animanajarideni naco aja Jesocristodsapa jehe quina-jarajarideni jicapoari, Satana pocca dodosse tabaquima, huapima Jesocristocca dacorehejine cappinamanadsapa: –Jeso deni tijani –quinahijine pohuadeni pitodsapa jassi tahitohui. ¹¹ Nadsama huapimapa: –Jehe, Jesocristopa ia Medsede, huapimacca tamine –quinahitohui. Abi Diodsa naco: –Bica tinani, deni tijani, tijani –quinahitohui.

Jesocristodsapa toquejenajaridenipa ajijaro dsamacca dsidsinidsa pina jojororo ssiaja tajarissa quinajari

¹² Ohuemecotedeni, tiadenidsa ohuati huana tani. Jesocristo tahimari huajiradsa tiadeni mari mari ohocanaquiqui nadsa iboraquiqui tiquinade. Naraha jidapapi tiadenihuaji omadi-jeradsa naqui denima Jesocristocca marinajadsara iboraquiqui tiquinana. Pohuajine ticassiejeranijinepi madie dsati ticajimanani. Dio Corimepa tibodidenidsa aniridsahi. Diocca ejedeni tiquejenani. Najaro ima tossamo-jeranijine Dio noppine ticappinamanadsa mohuaradsa timadimananissa taji. ¹³ Aji tibodideni ima bicanitohui tiquinajaropi Dio Pohuajine. Pohuapa tiadeni acco acco totocambaquiqui najari, ima bicanira tinanamana-dsanaponijine. Dio Pohua jipa tahicccara tinanamananijinepi Pohuadsa bica tajaro.

¹⁴Nadsama Dio jipa tahicca tinanamanadsa, timadimanicca huapima tinanamanadsapi jamimana tejeradsa tidsepedeni ijimanaji. Timecotedeni tedseje ahuaji atti, ahuaji atti tiquinejeraji. ¹⁵Nahi Jesocristodsa jehe quina-jarajarideni tiadenidsa: –Tabaccoraququiri nahi –quina-jarahijine. Tibodidenidsa imasiri quejema-gerani ima ahuato tanijine, onajaro. Diocca ejedeni tiquejenaropi tiadeni tecahuamananissa taji, imasiri tinanamana-geranijine. Naraha Jesocristodsa jehe quina-jarajaridenipa ajijaro namicca imatohui quinadsapa tabaccoraququiri najari. Bodidenidsa huananehe ijijaro. Pohnadenipa dsidsinidsa madiridsa-manajari. Naraha tiadenipi pina abadsico bedi dsidsinidsa ssiaja tararissa tiquinajaro. ¹⁶Nani tijinedenina Jesocristo tahimari icassiegeranijinecca ima ahuatoridsaponi nanijine. Nahi Cristo ccanipomadsa ticcadeni ima nahato onadsapi ohuatidsenitohui. Pohnama Dio Atti mari ocanaridsabaququide onegeranijine. Jesocristodsa quequeriqquimana nahihuaji ima cattemade ponima ja ojade onegeranijine. ¹⁷Jesocristodsa jehe tiquinajaro ticcadeni madie Diodsa teccoramajaropaji. Najaroa ticcadeni danaququinaja Diodsa da tiquinajarossa najaropaji. Diodsa tidsepedeni ihijimana najaro naqui Diodsa tetteccoramana najaropaji. Nadsama ohua naqui Jesocristo tahimari ohuacomera-ridsajaro acconi ohua inanadsoqqe-manadsa odsoqqueni bica tani. Occa madiepi pina occa daniji Diodsa dada onajarossa najaro. Nadsama ticcadeni daniji Diodsa denima pajiranissa tanijinepi occa daniji, ticcadeni tadsajani quejemadsapi ohuatidseni. Occa huatidsehe tiadenidsa tojadsapi huapima etidsenitohui. ¹⁸Jehe, ohuadsama tetidsemanaji, onajaro.

Diocca madietohui idissesserani dsanapona

3 ⁷Jehe, aji ima huapima ohuacahuapjaropi ohuadsa bica tade. Naraha Jesocristocca ojadsapi jidapana ima tahideccadsa: Deni tojanicca onegerani. Paji oneborini. ⁸Aji ohuadsa ima deni tojapjaropi jidapana ohuadsa pina nohuerajarossa nani. Jesocristodsa ojararocca imana ohuadsa denima bica tani ojari najaro. Jidapapi Jesocristo tohuina onadsapi occa ima tahideccadsa occa madija: –Bica tani –quiquina najaripa oneboridsehe jicani. Pina dsamatapa tabotto nebojarissa

nani. Jidapapi Jesocristodsa onocco tojidsera-dsanaponijine tohuini onajaro. ⁹ Jesocristocca ojadsapi pohnadsa omadi-dsanaponitohui. Tahidepi Diocca marinaja Jodiodenidsa anipojaro ohuacahuapojarde. Najarodsa obodi tobicanitohui ohona naraha, ohua Jesocristocca ojajaropi Diocca marinaja Jodiodenidsa anipojaro jirehe Pohnadsa ojajarode. Pocca ojadsapi pohnajine Diodsa bica onani. Jidapapi ohuatti: Pajissa Jesocristo occa imasiri manaconi tojajari onajarojine ohuadsa Dio Attipa: –Occa ejedenidsa pajissa tadsapi ticca ima ohuadsa bica tani –najaripaja. ¹⁰ Nema najaro Jesocristodsa onocco tojidseranijine jipa onajaropaji. Pohnuapa dsoqqueraha nahatonijari. Najaro nahatoniecca dacorehetohui onadsapi: Najaro dacorehe ocajina, onajaro. Jesocristo ocasserani ahujaridsa ohuati huana tadsapi ohua naqui pina pohna ocasserani ahujarissa onana, onajaro. Pina pohna dsoqquejarissa najaro onahananijine jipa onajaro. ¹¹ Jesocristodsara dissera odsanapona onajaropi nidsa Diodjine Jesocristodsa toquejenajarideni nahatonimanadsapa ohua naqui pohnadenidsama onahatoninijine, onajaro.

¹² Ohuapi Jesocristocca madiedsa opajiranissa tanijinepi pocca nahatonietohui dissera, pocca dacorehetohui dissera, obodi tobicanissa tanijine tohuini dissera onaraha najaro ima huapima bacco onanissa tani onejerajaro. Naraha ohuapi Jesocristocca imatohui dissera onaccani. Tahidepi Jesocristo pohnajine Diodsa ojajaro. Pohnajine pocca dacorehe, pocca nahatonie, pocca biquehe ohuadsa tojajaro. Pohna tahimari mari ocanabaqqihijine naqui ohuadsa inanajaro. Nema odsanaponijine dissera odsanapona, onajaro. ¹³ Ohuemecotedeni, ohuapi Jesocristocca dossenijidsa opajiranissa tani onejerajaro. Occa ima tiadenidsa huati onana. Onattihujicca imapi ohuati ajimanissa tani. Jidapapi otedsejemacca ima Diocca madietohui onadsa odisserani najaro. ¹⁴ Ohuapi Diohuaji omadinitohui onadsa, ima bicani onananijinera obodi huatoni ojari najaro. Diohuajina Dio pocca daniji ohuadsa tojanijine, onajaro. Jesocristocca iquejenajaropi Dio itohui huahua najari, pocca madiedsa ipajiranissa tanijine. Nidsa Diohuaji bacco inadsapi pocca daniji camittehe jiquejeranicca iadsa tojanitohui.

Bica tanicca tohuira tibodideni huatomaji

4 ⁴Huajjiradsa ia Medsededsa tetetidsemana naji. Tiadenidsa huati omanipomajaro: Ia Medsededsa tetetidsemana naji, onajaro. ⁵Ohuattipi tiadenidsa ajima onajaro: Joneqquri tiquinadsa timadimanaji. Nahi madija ohuaha attidenipa: –Pohuadenipa bicaqquri nahi –tiquina nahijine, onajaro. Ia Medsede ccanihi huajira tahi.

⁶Huapima ticappiramananicca tohuira tibodideni huatoto cana-jeraji. Ocasserani temanajarodsa naqui tibodideni huahuatomacca nejeraji. Ima huapima tibodidenidsa ahuatomadsa naqui Diodsara huati huati titiquina naji. Diodsa huatide tiquejenadsa naqui Pohujine bica tanicca ticajimanani tibodideni huatonissa taji. Nadsapi Pohuadsa: –Jehe, Tijine bica tani –tiquina naji. ⁷Nema tiquinadsapi Dio tiadenidsa pocca jonehe da inaridsanitohui, tibodideni jassi nanijine. Pocca jonehepi deni tojanicca. Madija iapi pocca jonehecca ima nema nehe iattanijine ipajira-gerani. Jesocristodsa tiquejenaropi najaro jonehe tibodideni ecahua, tibodideni huatohue naqui ecahua najaropaji.

⁸Ohuemecotedeni, jidacca huati onajarocca ima tadsajani ajima tinanamanaji: Ima pajisseheccadsara tibodideni huatomaji. Imadinissa tanijineccara tibodideni huatomaji. Maiderehecca imatohuira tibodideni huatomaji. Ima bicani ponira tiadenidsa tojaridsanijine tibodideni huatomaji. Ima bica tanicca tohuira tibodideni huatomaji. Madija pocca madie toccanissa tajaro tohuira tibodideni huatomaji. Ima bicani pina Diocca imassa najaro tohuira tibodideni huatomaji. Dio ticcadeni imadsa huatidsehijine tibodideni huatomanissa taji. ⁹Aji tiadeni mari ocanabaqquijaropi tiadenidsa tojaji. Tiadeni ocadosse-baqquijaropi pina occa dossenijissa tinanamanaji. Pina occa ima timittamanajarossa tinanamanaji. Pina aji occa madie qqui tiquinajarossa tinanamanaji. Pina aji occa imassa tinanamanadsapi Diopa tiadeni jassi tonanabaqquihitohui. Pohuana jonehe jinede. Tiadenidsa madiridsahi.

Pablotenipa Corosadenidsa ima teppe dosse quinajaro

Colosenses

Introducción: Odsa panani Corosapi Epeso huajira tanidsa odsa panani tojajaro. Pablopa Epesohuaji madidsa Jesocristo tahimari mari icanabaquijari. Nahi Corosacca madija ojaría, oni Epafro, Pablocca marinaja mittadsa Jesodsa jehe najari, quinahi nade. Dsotode pocca odsahuaji toccanidsa pohuana Corosacca madija mari icanabaquijari, quinahi nade. Nadsapa madija mota huapi taha Jesodsa jehe quinajari.

Pablopa Corosahuajicca Jesodsa jehe quinajarideni maride tocca-jararaha poccadeni ima mittadsa pohuadenidsa ajijaro ima teppe dosse inajaro. Aja mamaridedeni ohuaha Corosacca madija mari icanabaquidsa pajissehecca ima jeraraha mari mari quinajari. Poccadeni marinajadsa madija iboraquuri nahijine disseraquiri najari. –Najarodsana ticassiejeranijine –quinajari. Nadsapa Pablo najaro ima mittadsa pohuadenidsa dsodo inajaro.

Pocca dsodonijipi: Cristopa huapima inahatoridsajari. Pohuana huapimadsa deni tojajari. Pohuadsara pajissa inadsapi icassiejeranitohui. Madie dsati naqui icajinitohui. Corosadenipa Dio jipa tahi-ccara inanamananijine pohuadenidsa dsodo inajaro.

- 1.1-14 Pablopa Diocca toquejenajaridenitohui Diodsa huati huati tajari
- 1.15-23 Jesocristo dsoqqejarijinea Dio tedseje icajonerajaropaji
- 2.6-15 Cristopa iadsa camittehe dsati da inajaro
- 3.1-4 Memehujicca Cristocca ima tohuira tiquinaji
- 3.5-17 Icca madie jadanicca ima, icca madie dsaticca ima

Pablo, Timoteo tedseje: –Nija –quinajari

1 ¹Nija imecotedeni. Ohuapi Pablo. Dio jipa tadsa Jesocristocca dodosse ojajaro. Ohuemecote Timoteo tedseje tiadenidsa dsodo inajaro. ²Ajijaro imapi nani odsa

panani Corosahuaji Diocca tiquejenajardenidsa dsodo inajaro. Tiadenipi imecotedeni. Jesocristodsa disseraquiri tiquinajaro. Icca Abi Dio tiadeni tocatidse-baqquijaripa ima bicani tiadenidsa inananijine, inajaro. Dio pocca jonehe naqui tiadenidsa inananijine, inajaro.

***Pablopa Diocca toquejenajardenitohui
Diodsa huati huati tajari***

³Iapi huajjiradsa titohuideni Diodsa huati huati ihina najaro. Ia Medsede Jesocristocca Abi Diodsa huati huati inadsapi etti ajima ihina najaro: –Jehe, Abi Dio, Corosahuaji madimanajardenicca ima bica tadsapi Tiadsa etidseni –ihina najaro Diodsa. ⁴Aji tiadenipi Jesocristodsa jehe tidsanapomanani quinahi ima imittani. Aja Diocca toquejenajardeni huapimadsa naqui tetideni huanaqu岸iri nani quinahi ima imittani. ⁵Nema tiquinajaropi memehuaji iadsa ima bicani aninitohui nahatoto tinajaro. Aji: –Iapi memehuaji imadinitohui –tiquinajarojinea Diocca toquejenajardenidsa tetideni huanaqu岸iri najaropaji. Pajissehecca ima aji Jesocristo tahimari icassiejeranijinecca tiadeni mari tocanabaqu岸ipodsama Jesocristopa memehuaji pocca madijadsa ima bicani inanajorajaro timittamanajaropaji. Nadsapi najaro imatohui timadimanajaro. ⁶Ajjaro Jesocristo tahimaripi pina tiadeni mari tocanabaqu岸ijarissa najaria dsama onihicca, dsama onihicca madija mittaridsamanadsapa Jesocristodsa toquejenajaripaja. Nadsapi ima bicani inanaridsamanajaro. Tiadeni naqui najarossa tiquinajaro. Dio titohuideni huati huana tahi ima timittamanadsapi pocca tohuati huanehedsa pajissa tiquinajarode. Nadsapi tiadeni naqui ima bicani tinanaridsamanajaropaji. ⁷Imecote bicabote Epafrapa pohana Jesocristo tahimari tiadeni mari tocanabaqu岸ijaride. Pohua naco Jesocristocca dodosse tojajari, iadsama dsepe ijijari. Epafrapa Jesocristodsa dissera tadsapa tiadeni tonahatta-baqquihijine dsepe ihiji najaride. ⁸Epafrapa pohana titahimarideni iadsa huati nani-dsa imittajarode. Tiadenipi Jesocristocca toquejenajardenidsa tetideni huanaqu岸iri nani naqui imittade. Dio Corimejine Cristocca tohuati huanehema tetideni cahanari canajaropaji. ⁹Nadsapi titahimarideni imittaponidsama titohuideni Diodsa huatide inebo-jerajaropaji. Dio Pohua jipa tahicca nahatoqu岸iri

tiquinanissa tanijine inadsa Pohuadsa huati huati ihidsanapo najaro. Tiadenidsa Pohua Corimecca nahatohue, pocca tohuattehe huapima da inanijine inadsa Pohuadsa huati huati ihidsanapo najaro. ¹⁰Jehe, Dio Corimecca tohuattehe ticajimana-dsapi timadimananissa tanijine nahatoqquiri tiquinanitohui. Pina ia Medsede jipa tahiccassa tinanamananijine. Ima bicanira tinanamanadsapi ia Medsede huatidsehitohui. Tijinedeni ima bicani tojaridsadsapi tidsepedeni ijie huapima ahuato tanitohui. Pina ahua bono ocassa tahicca bono jiderajarissa tiquinanitohui. Nema tiquinadsapi Diodsa denima tinocodeni tojidsera-dsanaponijine inadsa Pohuadsa huati huati ihidsanapo najaro.

¹¹Diocca dacorehepi deni tojanicca. Najaro dacorehema tiadeni tonadacorabaquihí nahijine inadsa Pohuadsa huati huati ihidsanapo najaro. Nani ima ocassera tanicca tiadenidsa anidsapi dacoco tijiradsa mohuaradsa tinahanamananijine. ¹²Tetidsemanadsa naqui tettideni Diodsa: –Abi Dio, epejeni, tijine bica tani –titiquina nanijine inadsa Pohuadsa huati huati ihidsanapo najaro. Diopa ia tonapajirabaquihí tadsa Pohua dsamari memehuaji ia tonamadi-baquihitohui. Huapima pocca iquejenajaropi aji Pohuajine ibodi ssiaja tajaropaji. Najaroa aji pocca daniji bicani iadsa inanajorajaropaji. Nidsa Pohua madihihuaji Pohua ssiejenedsa bacco inadsapi iadsa da inanitohui, inajaro. ¹³Dsidsinidsa imadipodsapi imasiri iadsa dacorapode. Naraha Dio ia joca toninebaquidsa pocca ejedenicca cacahuehedsa ia tonanabaquijaride. Diopa Pohua Bedidsa huati huana tajari. ¹⁴Pohua Bedi Jeso dsoqquejarijine icassiejarajaro. Icca imasirijine iadsa najidsohue ssonarinitohuiraha pohuajine jicanissa tadsapi Diopa iadsa: –Epeje, ticcadeni imasiri ohuati ajimani –najaripaja.

Jesocristo dsoqquejarijinea Dio tedseje icajonerajaropaji

¹⁵Cristopa Dio Bedi. Pina Dio Pohuassa najari. Diopa inoccodsa qqui inajarahi. Naraha Dio Pohua Bedi Jesocristo qqui qqui tojajaripa pina Dio Pohua qqui inajarissa najari. Cristopa nami nahato-jeraccadsama madipojari. Aja huapima cajiridsa-jaripa dsotode inahatoridsajari. ¹⁶Diojine Pohua Bedina huapima inahatoridsajari. Aja memehuaji aniridsajari inahato, aja namidsa aniridsajari inahato najari. Aja inoccodsa qqui inaridsajari

huapima inahato, aja inoccodsa qqui inajarajari naco huapima inahato najari. Aja inoccodsa qqui inajarajaridenicca taminedeni naco inahatobaqqui-ridsjari. Cacahuehe cajimana, dacorehe cajimana, nahatohue cajimana najarideni huapima pohuana pohuadeni nahatodedeni tojjari. Huapimapa pocca. ¹⁷Cristopa dsama nahato-jeraccadsama madipojari. Aja huapima aniridsamana-jaripa pohuajine nahatoridsajari. Memecca, namicca huapimapa pohuana ecahuadsa aniridsahissa tajari. ¹⁸Aja Cristopa pohuadsa ijariqquijaro ia Dossede. Puhuapa pina itatissa najari. Iapi pohua assiressa inajaro. Puhuapa nadsama madipojari. Puhuana dsoqquehedsa tahide nahatonijari. Najaroa aji nahatoniecca ima pohuajine iadsa najorajaropaji. Nani pohua natti jaijamissanijine. Puhuana ima huapimadsa deni tojjari. ¹⁹Dio Pohua jipa tadsa pocca nahatohue nema nehe, pocca deni tojehe nema nehe, pocca dacorehe nema nehe huapimapi Jesocristodsana anijaro. ²⁰Diopa memehuajicca, namihuajicca animanaridsajari huapima Pohua tedseje cajonerahijine jipa tajari. Nama nadsapa Pohua Bedi Cristo icadossejari, huapima inajonebaqquihijine. Cristopa ahua porimacossanidsa dsoqquedsapa pohua emene toccajari. Najarojinea icca imasiri jicadsapi Dio tedseje icajonerajaropaji. ²¹Tahidepi Diodsa jidsaqquri tiquinaccade. Tibodidenidsa Diodsa jiperaqquri tiquinaccade. Tabaccorehe tinanamana-jarojine Diocca huadi tiquejenaccade. ²²Naraha jidapapi Jesocristojine Diodsa tijonemanajaro. Aja Jesocristopa pohua assire pina essiressa najarodsa dsoqquehijine ocasserani ahujari. Nama najaria aja nidsa pohua Imehi Diohuaji ia tohuaccamacossani-baqquidsapa Imehidsa: –Ajararidenipa occa madija –nahitohui iadsa. Nahi Dio ia qqui tabaqquidsapa imasiri jirehe ibodi ssiajaqquri nehe ia qqui tabaqquihijine. Dio iadsa naco: –Tabaccoraqquri tiquinani –najarahitohui. Jesojine iadsa ima nohuereje najaro. ²³Nema tiquinanijinepi Jesodsa paji jehe tidsanapomanarini naji. Aji Pohua tahimari icassiejeranijinecca timittamanapojaro naqui tinebomana tejeraji. –Jesocristojine icassiejeradsapi Diodsa bacco inadsa etidsenitohui –tidsanapomana naji. Nadsama pohua tahimari huati huati onajarona dsama huapimadsa ecomeraridsadsa tojaridsajaropaji. Ohua Pablo naqui Jeso ohua cadossedsa pohua tahimari maride ojaridsajaropajide.

Cristopa iadsa camittehe dsati da inajaro

2⁶Ia Medsede Jesocristo tahimari timittamanapodsapi pohuadsa jehe tiquinajarode. Nema tiquinadsapi pohuadsara timadimananissa dsanapoji. ⁷Pohuadsa tidisseramanani dsanapona. Pina ahua jabo nami bodihuaji toccabaquidsapa assire huahi dacorajarissa tiquinaji. Jesodsa tijabodeni denima napidsanapona. Ajijaro marinaja pajissehecca tiadeni mari tocanabaquui-manajarissa tinanamanaji, ticcadeni jeheniji dacoranijine. Huajjiradsa Diodsa naqui: –Jehe, epejeni. Tijine bica tani –tiquina naji.

⁸Paji, madija ima ponimacca huati toquinahi caji tahi. Pohuadenipa poccadeni imadsa jehe tiquinanijine titohuideni quinahi. Naraha attidenidsa jehe tiquinejeraji, onajaro. Poccadeni imapi pina pajissassa naraha maidsehe. Poccadeni ima huapimapi pina Jesocristo tahimari icassiejeranijineccassa nejerani. Poccadeni imapi pina ididenicca ima ponimacca huarijonajarossa najaro. Pohuadenipa ajijaro namicca dacorehe cajimanadsa: –Ajima tinanamanadsapi ima bicani bacco tiquinanitohui –quiquina naraha maidsamanajari.

⁹Cristopa madijassa naraha Diocca huapima pohuadsa anijaro. Diocca dacorehe, nahatohue, deni tojehe, biquehe huapima cajijari. ¹⁰Nama nadsapa Cristona huapimadsa deni tojajari. Aja tocorime tamededeni dacorehe cajimanaraha Cristona najaridenidsa deni tojajari. Nadsama tiadeni Cristocca tiquejenajaropi pohuadsa tipajira-mananissa tani. Pohua cajijari huapima naqui ticcadeni. ¹¹Cristocca tiquejenadsapi pohuajine ticcadeni imasiri jeo tehe jicajaro. Najaropi pina *huissinajacca imassa najaro. Jodiodenipa Diocca madija toquejenahijine dsoporideni eteroni mota huissi nani cacajimana najari. Najaropi assiredenidsara ahuato tajaro naraha tiadenipi tibodidenina Cristojine tohuirejarona paji. ¹²Nadsama totopa ticajimanajaropi pina Cristo tedseje ppa tidsamanajarossa najaro. Dio pocca dacorehedsa Cristo inahatonijaridsa pajissa tiquinadsapi Cristo pohua tedseje tinahatoni-manajarossa tiquinajaro. ¹³Tahide tibodidenicca imasirima timadimanapodsapi pina tecotajarossa naccade. Diocca madija tiquejena-geraccade. Naraha jidapapi Diojine pina Cristo tedseje tinahatonimanajarossa tiquinadsapi camittehe dsati ticajimanajaropaji. Cristojine Dio icca imasiridsa:

–Epeje, ohuati ajimani –najari. ¹⁴Aji tahide Diocca marinajadsa iboqquri inajaropi pina Diodsa cuenta icajjarossa, pina Dio debe inajarissa najaro. Icca ibohue manaconipi Dio ia tonajidso-baqquihitohuiraha aja Jesocriso ahua porimacossanidsa coba idsanamanadsapa Diojine icca ibohue manaconi inajicajaro. Pina ahua porimacossanidsa coba idsanajarossa najaropaji. ¹⁵Cristo ahua porimacossanidsa dsoqquedsapa Diojine tocorime tamindenicca dacorehe, poccadeni deni tojehe huapima inassamoridsajaropaji. Dio Pohuajine najarideni ajamani toquejenahi huapimadsa ahua to inanajaro. Pina jadsiredsa ajamani toquejenajarideni todsepe toquejenajarissa quinajari.

Memehujicca Cristocca ima tohuira tiquinaji

3 ¹Aji tiadenipi Cristodsa jehe tiquinapodsama ticca-deni imabote tinebomanadsapi pina Cristo dsoqquedsa nahatonijarissa tiquinajaropaji. Cristo pohua tedseje tinahatonimanadsapi memehujaji aji Cristocca ima tohuira tiquinaji. Nahi memehujajipa Cristo Imehi Dio inori nahatonihujaji huittarijari, Pohua tedseje dodossesse najari. ²Nani memehujajicca ima tohuira tibodideni huatomanehe timadimanaji. Aji namicca ima tohuipi tetideni huatomana-jeraji. ³Tiadenipi pina aja Cristo pohua huatiajarissa tiquinajaro, ajijaro namicca denima tohuini tiquinejeranijine. Ticcadeni camittehe dsatipi Cristodsa anijaro. Diona tiadenidsa ecahuajaro. ⁴Ticcadeni camittehe dsati jinedepa Cristo pohuana paja. Nidsa pohua ccanipomadsapa pohua dsibehinema, pocca deni tojehema ccanihitohui. Tiadeni naqui pohuadsa jidsera tanimana-pomanitohui. Nadsapi pocca deni tojehe tiadenidsa tojaropaji ahua to tanitohui.

Icca madie jadanicca ima, icca madie dsaticca ima

⁵Ajjaro namicca ima aji tohuini tiquinanicca tiadenidsa aniraha tinajicamanaji. Maqquidejedeni, jidapapi amoneje onihi aja ajapi tinebomanaji. Aja dsabisso tabiradeni naco dsohuato ticaji-jerajaro aja ajapi tinebomanaji. Amoneje tiadeni naqui aja maqqui ticajimanaraha maqquideje ohuaha naja najapi tinebomanaji. Huananehe denima oppina tanicca naqui tinebomanaji. Aji tiadeni tohuini tiquinanicca tohui tiadeni dosse dosse nejeranijine tinebomanaji. Aji ima tabaccora tajaro tohuini tibodideni

huahuatoma najaro naqui tinebomanaji. Madija dsepetaji qqui tiquinadsa naqui tohuini tiquinejeraji. Madijacca tarabaidsa bica tanicca acconi naqui tedimana tejeraji. Nadsama aji dsiniro, todsepetaji huemani ticajimanadsa tetidsemanajaropi pina madija Dio pajisseheccadsa huatidsemana-jaradsa pohuadeni cacahuade pohuamaccadsa huahuatidsemana najarissa tiquinarana. ⁶Ajjaro namicca ima nema najarojinena Diocca huadie bacco nanitohui. Nidsa Dio Attidsa iboqquri najaridenidsana najidsohue oppina tanicca ssonarinitohui. ⁷Tiadeni naqui Jesodsa jehe tiquina-jeraccadsapi ajijaro namicca imadsa timadimanaccade. Ticcadeni madie jadani pina Dio Attidsa iboqquri najaridenicca madiessa tinanamanaccade. ⁸Naraha jidapapi ima tabaccora tajaro huapima tinebomanaji. Huadie tinebomanaji. Madija tinajidso-baquimana tajarajo. Madijadsa ima tinanamananijine naqui huatimana tiquinejeraji. Madija tamasso tamasso naqui tinebomanaji. Ima bica tejeranicca jidsehe naqui tinebomanaji. ⁹Madija ohuaha tedseje maidsa maidsa ticanaridsera tejeraji. Nani aji ticcadeni madie jadani tinebomanadsapi pina aji eterobote coro tiquinajarossa najaropaji. Jicajaro. ¹⁰Aji tiadenidsa madie dsati tojajaropi pina aji etero dsati tedsamanajarossa najaropaji. Nadsama aji tinahatomani-manadsapi Jesocristocca camittehe, pocca dacorehe tiadenidsa tojadsanopojaropaji. Najarojinea aji tiadeni Nahatode Diodsa ticahattera ticahattera dsanapodsapi aja tiadenidsa tojidsera-dsanopjaripaja, Dio Puhuassa tiquinanijine. ¹¹Jidapapi Jesocristocca madiedsa toquejenajaro, tibodideni dsati tojadsapi aja madija ohuaha ohuaha inaridsaraha Jesocristodsa ijariqquinissa tajaropaji. Jehe, aji tijariqquijaro motapa jodio quejena-jarajari, motapa jodiodeni Cristodsa toquejenajari. Motapa huissinaja cajimanajari, motapa huissinaja cappiramanajari. Motapa dsama onihicca madija, motapa ssamoqquri najarideni. Motapa medse toquejenajarideni, motapa medse toquejena-jarajarideni. Huapimapa Cristodsa toquejena-ridsajaripaja. Puhuana ima huapimadsa deni tojajari. Puhuapa ia huapimadsa aniridsajari.

¹²Dio tiadeni tocattejidsa-baqquijaripa pocca madija bicaqquri tiquinanijine. Diopa tiadenidsa huati huana tajari. Nema nadsapi tiadeni naqui madijadsa tetideni huanaqquri nadsa acco acco titicama-baqquimana najo. Bicaqquri

tiquinadsa ima bicanira titinanamana naji. –Ohuana deni ojani –tiquinejeraji. Jonequiri tiquinadsa madijadsa catidsequiri tiquinaji. Tidsepedeni ijjarocca najo tadsa naqui nebomana tejeraji. Madija mari ticanamanadsa naco tohuattajaradsapa tedimana-jeradsa mohuaradsa mari ticanamanapomana, onajaro. ¹³Madijajine tiadenidsa bica tejeranicca inanamanadsapi mohuaradsa tinahanamanaji. Tedimanageradsa: –Tijinedeni ohuadsa bica tejeraraha epeje ohuati ajimani –titiquina naji. Pohnadenidsa tijinedeni bica tejeradsa naqui nama quinadsana bica tani. Pina ia Medsede ticcadeni imasiridsa: –Epeje, ohuati ajimani –najarissa tiquinaji, onajaro.

¹⁴Tohuati huanehema timadimanaji. Ima bicani huapi taraha tohuati huanehena deni tojajaro. Eti cahanerara canadsana Cristodsa ijariquinissa tajaro. ¹⁵Cristocca jonehe tibodidenidsa deni tojana. Najaro jonehema timecotedeni tedseje timadiridsa-manaji. Nema tiquinanijine Dio titohuideni huahua najari, pina Jesocristo pohua assire ojarijarissa tiquinanijine. Nema nadsapi Dio Pohnadsa naqui: –Jehe, tijine iadsa bica tani –titiquina naji.

¹⁶Jesocristocca marinaja bicabote tibodidenidsa madsanapona. Aji tiadeni huapima Diocca tohuattehema titessedeni tedseje ahuaji mari, ahuaji mari titicana-baqquimana najo. Diocca tohuattehema naqui titessedeni tedseje ahuaji nahatidse, ahuaji nahatidse titiquina naji. Diodsa tetidsemanadsa naqui jiri jiri titiquina naji. Aji Dabicca jijiricca jiri jiri titiquina naji. Aji Dio Atti dsodo nanicca jijiri tojanidsa naqui jiri jiri titiquina naji. Dio Corimejine jijiri ticanahatomanadsa naqui jiri jiri titiquina naji. Jiri jiri titiquina nadsa naqui tibodideni: –Jehe, Abi Dio, epejeni. Ticca daniji iadsa bica tani –titiquina naji. ¹⁷Nadsama aji Jesocristodsa tiquejenajaro huati huati tiquinadsa naqui ima tibodideni tinajoramanadsapi: –Ohuapi Jesocristocca ojani, ima bicanidsara huati huati onana –titiquina naji. Tidsepedeni ijimanadsa naqui pina ia Medsede Jesodsa tidsepedeni ijiridsamanajarossa tiquinana. Ticcadeni madiema naqui ia Medsede Jeso onima timadiridsamanaji. Tidsepedeni ijimanadsa, huati huati tiquinadsa naqui Jesocristo pohua onima Abi Diodsa: –Jehe, epejeni. Tijine iadsa bica tani –titiquina naji.

Pablotenipa Tesaronicadenidsa ima teppe tahidecca dosse quinajaro

1 Tesalonicenses

Introducción: Tesaronicapi dsama Masedoniacca odsa panani deni tojanicca, bica tajaro. Nahihuaji Pablo Jeso tahimari icassiejeranijinecca maride toccajari. Pohnadenipa tahide Jesodsa ssamoqquiri napojari. Naraha dsotodena madija mota huapi taha Jesodsa jehe quinajari. Pohnua huatimade Sila tedseje maride toquejenajari. Maride toquejenahicca semana 3 nadsapa pohnadenidsa huadiqquiri najaridenijine mohuaniji ssonarijaro. Nadsapa Pablo Sila tedseje damama quinahitohuiraha odsa panani Bereahuaji dsome dsaja tajari. Najari tahimaridenipa Rocana dsodo inajaro, Jesocca dodosse tabaqqi tahimarideni 17'dsa.

Dsotodena Tesaronicahuajicca Jesodsa jehe quinajari tahimari-deni Pablo mittadsa pohnadenidsa ajijaro ima teppe dosse inajaro. Pohnadenipa nanajidso toquejenaraha Jeso inebomana-jara-jari. Poccadeni jeheniji dacorajaro. Nadsapa Pablo bodideni acco icamabaqquihijine dsodo inajaro. Diodsa madimanahissa tahijine tocatterahijine dsodo inajaro.

Dsotode naqui Tesaronicahuaji madimanajaridenidsa ima teppe onihi dsodo inapomajaro.

- 1.1-10 Tesaronicacca Jesocristodsa jehe quinajari tahimarideni
 - 4.1-12 Icca madie ajima nadsana Dio huatidsejari
 - 4.13—5.11 Ia Medsede ccanipomahi tahimari
-

Pablotenipa: –Nija –quinajari

1 ¹Nija imecotedeni. Ohua Pablo, Silvano, Timoteo inadsa tiadenidsa dsodo inajaro. Nani odsa panani Tesaronicacca Jesocristodsa jehe tiquinajaro titiqueriqui najaro icca Abi Diodsa, ia Medsede Jesocristo pohnadeni pamahadsa tijari-qqui-manajarodenidsa icca ima dsodo inajaro. Abi Dio tiadeni tocatidsebaqquidsapa tiadenidsa ima bicani inanadsanapona, pocca jonehe naqui tiadenidsa inanadsanapona, inajaro.

***Tesaronicacca Jesocristodsa jehe quinajari
tahimarideni tojaridsajaro***

²Diodsa huati inadsapi: –Jehe Abi Dio, epejeni. Tijine imecotedeni Tesaronicacca bicaquqiri nahi –ihina najaro. Titohuideni ibodi huatoma-dsanapodsapi Diodsa huati huati ihidsanapo najaro. ³Jehe, Diodsa huatide iquejenadsapi ticcadeni ima bicani eti ajima-jerajaro. Ticcadeni jeheniji dacorajaroa tidsepedeni ihijimana najaropaji. Diocca dossehedsa tidsepedeni ijimanadsa naqui tohuati huanehema tidsepedeni ihijiridsamana najaropaji. Ia Medsede Jesocristocca tossiejehetohui timadimanasapi tiadenidsa ocasserani ssonariraha tinahamananijine dacoraquqiri tiquinajaro. ⁴Imecotedeni, Diopa tiadenidsa huati huana tadsa pocca cacatidse tabaqqi tiquejenajaro. Dio tiadeni tocattejidsa-baqqujaricca ima nahatoto inajaro. ⁵Nadsama aji ia naqui Jesocristo tahimari icassiejeranijinecca tiadeni mari mari ihicanabaqqi nade. Etti poni motta ojari jerani. Dio Corimecca dacorehema mari mari ihina najaro. Puhajine Dio Atti tiadenidsa tojajaro. Jesocristo tahimaripi pajissa inadsa huati huati inajaro. Tiadenidsa imadidsa naqui icca madieqqi tiquinade. Iapi deni iquejenanijine idsepe iji-jerade. Dio Atti tiadenidsa tojanijinena idsepe ijjarode.



⁶Tiadenipi pina aji icca madiecca imassa, pina aja ia Medsede tahimari timittamanajaro pocca madiecca imassa tinanamanajaropaji. Najaroa aji Dio Atti timittamanadsa jehe tiquinadsapi Dio Corimejine tetidsemanajaropaji. Aji ocasserani teridsamanaraha Dio Corimejine Dio Attidsara tetetidsemana najaropaji. ⁷Nema tiquinadsapi titahimarideni tojaridsajaro. Aja Jesocristodsa toquejenajarideni ticcadeni dsama arobeni Masedoniadsa madimanajarideni, dsama arobeni Acaiahuaji madimanajarideni naco

mittaridsamanajari. Nadsapa ticcadeni imajine pohuadeni bodi todacorani nadsa attidenipa: –Ia naqui pina Tesaronicacca imecotedenissa inana –quinajaripaja. ⁸Tijinedeni Jesocristocca marinaja Masedoniahuaji mittamana, Acaiahuaji mittamana najaripaja. Naraha nahidsaha mittamanahi ojari najarahi. Dsama huapimacca naco mittaridsamanahi. Aji Diodsa jehe tiquinanissa tajarocca imapi dsama huapima nahatoqqiri naridsahi. Nadsama aji dsama onihi onihi naridsanihuaji Dio Atti maride jaijaridsadsapi ticcadeni jeheniji tahimarini nahatoqqiri napojarijine huati inejerani pohuadenidsa. ⁹ICca ima aji tiadenidsa bacco inaponicca ecomera-ridsanijineraha pohuadenina iadsa huati huati toquinade: –Aja Tesaronicahuaji Dio Atti mari ticanabaqqiipodsa naco tiadenidsa bicaqqiri nade –quinajari. Aji ticcadeni siba nahatonidsa epeje tiquinanissa tajarocca ima naqui iadsa huati toquinade. Attidenipa: –Poccadeni siba nahatonidsa: “Ia Cacahuade” quiquina naporaha jidapapa Dio pajissa Camitta tajaridsana: “Ia Cacahuade” quinajari. Manaco najaridsana iboraqqiri najari –quinahi naqui imittade. ¹⁰Dio Bedi memehuaaji ccaronapomahitohui tinajoramanajaro naqui iadsa huati toquinadsa imittade. Najaripa Jeso dsoqqueraha Imehi Diojine nahatonijari. Nidsa Diocca najidsohue oppina tanicca bacco tadsapi Jeso pohuajinena dsori icaniredsa icassiejeranitohui, inajaro.

ICca madie ajima nadsana Dio huatidsejari

4 ¹Imecotedeni, jidapapi ia Medsede Jeso onima tiadenidsa huati inanissa tanijine. Tiadeni mari icanabaqqiipojarossa tinanamanani Dio qqii tadsapa tiadenidsa huatidsehitohui, ihina nade. Jidapana nema tinanamanadsapi nema tinanamana-dsanapoji, inajaro.

²Diocca marinaja tiadeni mari icanabaqquijaropi nahatoqqiri tiquinani. Iapi Jesocristo ia tocadossebaqquidsa tiadeni mari icanabaqquijarode. ³Dio Pohua jipa tahiccapi ajima najarona paji: Tibodideni ssiaja, huire tadsa imasiri jirehe timadimananijine. Nema tinanamananijinepi huananehecca tinanamana tejeraji. ⁴Diopa aja maqquideje amoneje caji-jaripa pocca amonejera inajari-dsanaponijine jipa tajari.

Nani ticcadeni amonejedsa tetideni huanacquiri nadsa ticcadeni amoneje tecahuamananissa tanijine. ⁵Nema tiquina-dsapi pina aja Diodsa ssamoquiri najaridenissa tiquinejeranijine. Pohuadenipa Diocca marinaja ssamoquiri nadsa pohuama tohuini quinadsa huananehedsa caji caji cacana najari. ⁶Timecotecca amoneje, amoneje onihi naqui tijamana tejeraji. Timecotecca amoneje tijadsapi pina timecotedsa nanajidso tajarossa najaro. Nadsa tiadenidsa Diocca marinaja huati inapode: –Paji, nema najaro imapi oppina tani –ihina napode. Nema najaro ima tinanamanadsapi Dio tiadeni tonajidso-baqquihitohui. ⁷Diopa imasiri inananijine itohui huahua najarahi. Imasiri inana-jeranijinena itohui huahua najari. Diopa ibodi huire, ssiaja tanijinena itohui huahua nanaja najari. ⁸Ajjaro marinaja madija ettajomanadsapi madija atti ettajomana-jarahi. Dio Attina ettajomanajaro, pina Dio Pohua Corime iadsa da inajari huahuattajo inanamanajarissa najaro.

⁹Nadsama timecotedeni tedseje tetideni cahanerera cananica imapi nahatoquiri tiquinani, Dio Pohuana tiadeni mari tocanabaqupodsa. Nema nadsapi najaro ima tiadenidsa dsodo onejerani. ¹⁰Najaroa aji dsama arobeni Masedoniahuajicca timecotedeni huapimadsa tetideni huanacquiri najaropaji. Naraha iapi tiadenidsa huati inajaro: Ticcadeni tohuati huanehe denima tinanamanaji, inajaro. ¹¹Mohuaradsa timadimananissa tanijine tibodideni huatonissa taji, inajaro. Pina ticcadeni imadsara tibodideni huatomanaji. Madija ohuahacca imadsa tiquejemamana tejeraji, inajaro. Mohuaradsa tidsepedeni ijiridsamananissa taji, inajaro. ¹²Nema tiquinadsapi madija ohuahadeni ticcadeni ima bicani qqui toquinadsapa: –Pohuadeni cacahuade nahatoquiri nahi –quiquina nahijine. Tidsepedeni ijimananissa tadsa naqui ticappiramana-jeranijine, inajaro.

Ia Medsede ccanipomahi tahimari

¹³Imecotedeni, ssamoquiri tiquinejeranijine ticcadeni madija dsodsoququemana najaricca ima tiadenidsa dsodo inajaro. Aja madija Jesocristodsa ssamoquiri najaridenipa poccadeni madija dsoqquedsa oji oji quinadsapa: –¿Icca madija qqui imani-jarapadsaja? –quiquina najari. Naraha tiadenipi

pina pohnadenissa tiquinejeranijine Jesocristocca madija dsodsoququemananajaridenicca ima timittamanaji. ¹⁴Aja Jeso dsodsoququeraha nahatonijaridsa pajissa inadsapi nahatoto inajaro. Najaria aja Jesodsa pajissa quinajari dsodsoququemanajarideni naco pina Jeso Dio inahatonijarissa quinahitohui.

¹⁵Ajjaropi ia Medsedecca marinaja tiadenidsa huati inajaro. Ia Medsede ccanipomadsa imadinipaji nadsapi iaha tahide ia Medsededsa bacco inapo-jeranitohui. Aja imecote jicapojaridenina pohnadsa bacco bacco toquinapohuitohui. ¹⁶Jehe, ia Medsede ccaronahijinepa tahide memehuaji atti mohui taha huahua nahi imittanitohui. Diocca dodosse tabaqquidenicca tamine naco huahua nahi atti imittanitohui. Diocca jejeidsa jejei nahi naco imittanitohui. Nadsana Jesocristo memehuaji ccaronadsapa pohnadsa pajissa quinapojarideni jicapojaritahide nahatoni-manahitohui. ¹⁷Dsotodena aji ia camittaququiri inajaro jicapojarideni tedseje huapima ia tohuaccamacossani-baqquihitohui. Meme essenima jaijamacossanitohui. Meme napicossanidsa ia Medsede tedseje bacco bacco icananitohui. Nadsapi ia Medsede Jesocristodsa imadidsanaponitohui. ¹⁸Nadsama najaro imadsa timecotedeni tedseje ticatidserara canana, onajaro.

5 ¹Naraha imecotedeni, aja Jeso ccanihicca huada tahimarini tiadenidsa huati onapode. Nadsapi dsodsoonejerani. ²Aja ia Medsede Jeso ccanihicca huada bacco tannicca imapi nahatoququiri tiquinani. Najaropi ajima napode: Eti ajimama canaraha ccanihitohui. Pina dsome bobotide icca odsadsa botide qqedsimahicca ima ssamo inajarossa nahitohui. ³Jeso ccanihicca huada bacco tabote nadsapi madija attidenipa: –Jidapapi jadsire tomossi, oppinehe tomossi najaro –quiquina naraha amadsati pohnadenidsa oppina tehe ssonaridsapi dsori taja cama-jarahitohui. Pina ejedeni comahicca huada amonejedeni ssamoququiri najarossa najaro. Amadsati tossonahijinecca huada bacco tadsa amonejepi ejedeni comene dsori teje cama-jerani. ⁴Naraha imecotedeni, tiadenipi ssamoququiri tiquinejerani. Dsidsinidsa timadimana-jerani. Nidsa ia Medsede ccanihicca huada bacco tadsapi pina bobotidejine odsa jinede jabojo najarissa tiquinejeranitohui. ⁵Diodsa tiquejenajaropi pina ssiajanidsa

timadimanajarossa tiquinani. Dio ssiejene tiadenidsa ahuato tajaro. Iapi dsidsinidsa madimanajaridenissa inejerani. ⁶Pina najarideni pohuama cahadijajarissa inejerana. Icca madie ecahuanissa dsanapona. Jesocristo tohuira ibodi huatohue imadina. ⁷Aja Jesocristo ccanihitohui bodideni huato-jarajaridenipa dsidsinidsa madimanajari. Dsomepa cacahadija najari. Noccodeni janoqquri nahijine tohui quinadsa naco dsomedsa coma tanicca dse dse quinajari. ⁸Naraha iapi ssiajanicca madija iquejenajaropi inocco janoraqquri nehe imadijaro. Ibodi huatohue imadijaro bica tani. Iapi pina soldado jadsiredsa biquera-jarahijine pohua bacco cacahuahijine ccara tanicca caji, pohua tati cacahuahijine ccara tanicca caji najarissa inana. Imasiri inana-jeranjine ia ecahuanijinepi Diodsa icca jeheniji icaji, Diocca tohuati huanehe icaji najaro. Icassiejeranjine tohuini inajorehe imadijaropaji. ⁹Dio ia tocattejidsa-baqquijaripa ia tonajidso-baqquihijine jarahi. Dio ia tocattejidsa-baqquijaripa ia Medsede Jesocristo ia tonassiaja-baqquihijinena paja. ¹⁰Jesocristo itohui pohua ccaccoradsa dsoqqejari. Nama najaripa camitta inaccadsa, idsoqquedsa naqui pohuadsa imadinitohui. ¹¹Nadsama tiadenipi timecotedeni tedseje ticatidserara canaji. Ticcadeni jeheniji todacorani nanijine naqui acco acco titicana naji. Najarossa tinanamanajaropi nema tidsanapomanana, inajaro.

Pablotenipa Tesaronicadenidsa ima teppe dsotodecca dosse quinajaro

2 Tesalonicenses

Introducción: Tesaronicapi dsama Masedoniacca odsa panani. Nahicca madija mota huapi taha Jesodsa jehe quinajari. Poccadeni quequeriqqui cajimanajari. Pablopa najaro odsa pananidsa tahide Jesocristo tahimari icassiejeranijinecca mari icanabaqquipojari. Naraha toccahi nattipa mamaride ohuahadeni ima pajissa-geranicca mari icanabaqquimanajari. Poccadeni marinajapi: –Jesocristo ccanipomajari –quinahi nade.

Najarojine Pablo Tesaronicadenidsa ajijaro ima dsodo inajaro, Jeso ccanihicca ima pajisseheccara nahatoqquri nahijine. Ajaropi pocca ima teppe dsotodecca pohuadenidsa dosse inajaro.

1.1-12 Jesocristo ccanipomadsapa ima ajima nanitohui

Pablotenipa: –Nija –quinajari

1 ¹Nija, imecotedeni. Ohua Pablo, Silvano, Timoteo inadsa tiadenidsa dsodo inajaro. Nani odsa panani Tesaronicacca Jesocristodsa titiqueriqqui najaro icca Abi Dio, ia Medsede Jesocristo pohuadeni pamahadsa tijariqqi-manajarodsa icca dsodo inajaro.

²Abi Dio, ia Medsede Jesocristo pohuadeni pamaha tiadeni tocatidsebaqqi-manadsapa tiadenidsa ima bicani inanamandsanapona, poccadeni jonehe naqui tiadenidsa inanamandsanapona, inajaro.

Jesocristo ccanipomadsapa ima ajima nanitohui

³Imecotedeni, ticcadeni ima bica tadsapi titohuideni Diodsa huati huati ihina najaro: –Jehe, Abi Dio, bica tani. Imecotedeni Tesaronicahuaji madimanajaridenicca ima bica tadsa Tiadsa etidsejaro –ihina najaro. Nema inanipi bica tani. Aji ticcadeni

jeheniji Jesocristodsa todacorani-dsanaponicca ima imittani. Tetideni cahanerara canehe denima denima tidsanapomananica ima naqui imittani. ⁴Nadsapi titahimarideni Diocca madija quequeriqquiridsamana najaridenidsa huati huati ihinaridsa najaro. Ajima inajaro: –Tesaronicahuajicca imecotedeni Jesocristodsa jehe quinahissa tajari. Aja madija Jesocristodsa jiperaqquri najari huadierideni pohuadenidsa ssonari ssonari nadsa naqui mohuaradsa inahanamana inahanamana najaro. Ocasserani ahuamanaraha Jesocristodsa disseraqquri nahi –ihinaridsa najaro. ⁵Jehe, nanajidso tiquejenaraha aji nanajidso tiquejenajarodsa Dio ima cattemade pajirahissa tajari ahuato inananitohui. Nidsa huapimacca ima cattemade tojadsapa tiadenidsa: –Occa cacahueheda tiquejenana –nahitohui. Nadsama tiadenipi najarotohui najidsohue mohuaradsa titinahanamana najaropaji.

⁶Nidsa dsotode tiadeni najidsodepa Dio inajidso-baqquihitohui. Nema nadsapi madija tiadenidsa tabacco-rehe inamanajararo manaconi Dio inapajiranissa tanitohui. ⁷Aji ocasserani temanajaropi Dio tiadeni jassi tonana-baqquihitohui. Ia naqui Diojine nema inanitohui. Najaro jassinajacca imapi nidsa ia Medsede Jesocristo memehuaji nebodsa namihuaji ccaronapomadsana iadsa tojanitohui. Puhuapa pocca dodosse tabaqqui dacoraqquri najarideni tedseje jororoni imenima ccaronapomahitohui. ⁸Nadsapa madija inajidso-baqquihitohui. Aja madija Diodsa noccodeni jidsaqquri najarideni, aja ia Medsede Jesocristo tahimari icassiejeranijineccadsa iboqquri najarideni naco inajidso-baqquihitohui. ⁹Ia Medsede bacco nanidsapa poccadani imasiri manaconi najidsohue jicaquera tanihuaji madimanasanapohuitohui. Ia Medsededsa huajiquiri nadsa madimana-hijine Dio dosse inabaqquihitohui. Nadsapa Jesocristocca deni tojehe, pohua dsibehine, pocca nahatohue qqui toquinajarahitohui. ¹⁰Naraha ia Medsede namihuaji ccaronapomadsapa pocca madija huapima pohuajine imarideni tobicajarideni pohuadsa: –Jehe, tiapi bica tinani, deni tijani –quinaja, huahaha huahaha canaja nahitohui. Aja Jesocristo pohuadsa pajissa quinajari huapima pohua qqui toquinadsapa: –A., ia Medsede dacorajari, bica tahi –quinahitohui. Nadsapi aji

tiadeni naqui Jesocristo tahimari tiadeni mari icanabaquipojarodsa pajissa tiquinajarojine pohuadsa tetidsemananitohui.

¹¹ Ajijaro ima huapima tiadenidsa tojanijine Diodsa huati huati ihina najaro. Dio ticcadeni madie qqui tadsapa: –Occa huahua tabaqquinajapa ohuadsa disseraqqiri nahi. Ponima pohuadenidsa huahua onejerajaro –nahijine inadsa Diodsa huati huati ihina najaro. Ima bicani tinanamananijine tohuini tiquinadsa naqui Dio pocca dacorehema ticcadeni ima bica tanijine inadsa Diodsa huati huati ihina najaro. Diodsa jehe tiquinajarojine Pohuadsa tidsepedeni ihijimana najaro naqui ticcadeni ima toccanissa tanijine inadsa Diodsa huati huati ihina najaro. ¹²Nadsapi ticcadeni ima bicani nema tinanamanajarojine ia Medsede Jesocristo tahimari madija mitta-manadsapa: –Jehe, pocca ima dacorani. Pocca nahatohue naqui pocca madijadsa qqui inani –quinahitohui. Manaco Jesocristo tiadenidsa: –Bicaqqiri tiquinani, occa madija tiquejenani –nahitohui. Jehe icca Dio, ia Medsede Jesocristo tedseje titohuideni huatideni cahanarimana canajarijine tiadeni tonapajira-baqquihissa tajaripaja.

Pablopa Timoteodsa ima teppe tahidecca dosse inajaro

1 Timoteo

Introducción: Timoteopa dsabissodsama Jesodsa jehe najari.

Pablo huatimade tojadsapa pohuadsa ccaccaridsa najari. Pablo Timoteo mari icanadsa Jesodsa jehe najari, quinahi nade. Nama najaria Pablo Timoteodsa: –Occa ejedenissa nahi –nanaja najari. Pablodsa ccaridsajarijine Jeso tahimari tohuattahissa tajari. Dsama onihi, onihihuaji huedaridsadsa Jesocristo tahimari icassiejeranijinecca mamariri naridsajari.

Odsa panani Epesohuaji tohuedadsapa nahidsa Pablo Timoteo inebojari, pohuadeni maride tojahijine. Dsotodena ajijaro ima teppe pohuadsa dosse inajaro. Diodsa pohua dsepe ijihissa tahijine dsodo inajaro. Jesodsa jehe quinajari maridedeni bicaququiri najarira icattejidsabaququihijine dsodo inajaro, mamaridedeni biji accodedeni icattejidsabaququihijine naco dsodo inajaro. Najarideni nejecoma quinahijinecca ima pohuadsa dsodo inajaro.

2.1-15 Diodsa huatide disseraququiri inanina bica tani

3.1-7 Jesodsa jehe quinajarideni maride toquejenahijinepa ajama quinahijine

Jesodsa jehe quinajarideni Diodsa huatide toquejenahijinepa ajama quinana

2 ¹Timoteo, ohuatti denima tiadsa dsodo onajaro. Najarossa tinanana, onajaro. Tahidepi madija huapimatohui Diodsa huati huati titiquina naji, onajaro. Pina pohuadeni cappiramanahicca Dio pohuadenidsa inanahijine, pina Dio pohuadeni ecahuabaququihijine, pina Dio pohuadeni acco icamabaququihijine Diodsa huati huati tiquinaji, onajaro. Diodsa huati tiquinadsa naqui tettideni: –Jehe, tijine bica tani –titiquina naji, onajaro. ²Dsama huapimacca taminedenitohui naqui Diodsa huati huati tiquinaji, onajaro. Aja tamine deni toquejenahiccatohui, tamine ohuahadenitohui naqui Diodsa huati huati

tiquinaji. Poccadeni cacahuehe bica taniccara inanamanadsapi icca dsamadsa ima oppina tanicca nohueranijine. Ia naqui mohuaradsa imadidsa Diodsa iboraquiquiri inadsapi madija ohuahadeni icca madie bica tani qqui toquinahijine. ³Diodsa huatide disseraquiquiri inadsapi bica tani. Ia Tonassijade Dio huatidse tahi. ⁴Pohuapa madija huapima tocassiejerahijine tohuini najari. Pocca pajissehe tocahatterahijine naco tohuini najari. ⁵Diopa ojarijari; pina pohuassa najari ohuaha nohuerahi. Icca ima Pohuadsa tobicanijinepi icca ima tonanabicade madija ojaria anihi. Madija ohuaha pina pohuassa najari nohuerahi. Najaria aja Jesocristopaja. ⁶Jesocristopa dsoqquehijine pohua ccaccoradsa icca imasiri manaconi dsoqquejari. Najaro ima madija huapima mittaridsamanahijine Diojine ahuato inanadsa pajissa tojajaro, aji Diojine najoraponicca huada bacco tadsa, onajaro. ⁷Najaropi Jeso pohua tahimari ohuacomeraridsanijine otohui huahua nadsapa pohuajine pocca dodosse ojajaro. Jodio quejena-jarajarideni pohua tahimaridsa pajissa quinahijine, pocca pajissehedsa naco jehe quinahijine mari ocanaridsabaquihijine ohua dosse tajari. Pajissehera dsodo onajaro, omaidsa-gerani.

⁸Jehe, nadsama maqquidejedenidsa ohuatti ajima onani: Madija Diodsa totoqueriqquimana nahihuaji toqueriqquidsapa Diodsa huati huati totoquina nana, onajaro. Dio tohuira quinajari bodideni naco huirequiquiri najarina pohuadeni dsepe memehuaji Diodsa da tamacossamanana onajaro. Huadie jirehe Diodsa huati huati totoquina nahijine, madija ohuaha tedseje naco ahuaji atti ahuaji atti quina-jaradsana Diodsa huati huati totoquina nana, onajaro. ⁹Nadsama amonejedenidsa naqui ohuatti dsodo onajaro. Ponidenicca etero huedsamananicca imapi ajima onajaro: Etero bica tanicca huedsamananipi bica tani. Naraha etero huatini ccara taniccapi huedsamana-gerana, onajaro. Etero onihi naqui pina ponideni imani ahuato tanicca huedsamanajerana, onajaro. Ponideni tatini conani naqui icohuamana-gerana, onajaro. Tomattocca dsibehi tanicca oro, huatini ccara tanicca perla naqui mattonideni huanadsapi jipera onani. Ponidenipi bicabote tohuini quinadsa ponideni bodinipi: –Bica onadsa ohua qqui toquinadsapa: “Amoneje bicani” quinahijine –quinaraha

najaropi Diodsa bica tejerani. ¹⁰ Amoneje attinidenipi: –Jehe, ohuapi Diocca ojani –quinajarodeni Dio pohuadsa bicaquiri nanijinepi ajima quinana: Ima bicanira inanaridsamanadsana bica tani, onajaro. ¹¹ Jehe, amonejedeni Dio Atti mittamana-nijinepi didi quinadsa taharibobo canana. Dio Atti maride attidenidsa naqui iboraquiri nana, onajaro. ¹² Ohuatti onihi naqui: Amonejepi madija huapima queriquimanahidsa maride tojajerana, onajaro. Amonejepi maquidejedenisda deni tojajerana ¡poni! onajaro. Pina taharibo canadsa Dio Atti mittanissa tanijine, onajaro. ¹³ Ohuatti nema onajaropi Diopa Adana inahatopojari. Dsotodena Eba inahatojaro. ¹⁴ Adanapa Satanacca maidsehedsa tojapo-jarajari; Ebadzana maidsa-pojari. Ponipi Dio Attidsa ibora tejeradsapi imasiri inana-jaro. ¹⁵ Nema najaroa amonejedeni ejedeni tocassonamandsapi ocasserani ihinahanamana naraha Diopa amonejedeni inassijabaquinitohui. Jehe, ponideni tocassiejeranijinepi Diodsa jehe dsanapomanana, madija huapimadsa huatinideni huanacquiri nana. Ima jirehe Diodsa madimananissa tana. Mohuaradsa ima bicanira ihinanamana nana. Nema quina-dsapi tocassiejeranitohui, onajaro.

***Jesodsa jehe quinajarideni maride
toquejenahijinepa ajama quinahijine***

3 ¹ Jehe, ima onihi pajisseheccapi ajima najaro: Madija attipa: –Jehe, Jesodsa jehe quinajarideni maride ojanijine tohuini onani –nadsapa: –Cacahuehe bicani tohuini najari –quiquina najari. ² Nama nadsapa Jesodsa jehe quinajarideni maridecca madie ajima nanina bica tani: Pihuapa madihissa tadsapa madija ohuaha attidenipa: –Pocca ima tabaccora tani –quina-jarahijine. Pocca amoneje naqui ojarini caji-hijine. Huananehema madi-jarahijine. Nadsama huajjiradsa pohua bodi huatohuissa tana. Imasiri inana-jeranijine pohua cacahuade nahato, madide naco nahato tadsapa pohuadsa madija ohuaha attidenipa: –Pihuapa bica tahi, ima cappirahi –quiquina nahijine. Pihuadsa madija bacco najonadsa pohuadsa dsamatapa da inahijine, pocca odsadsa huadahijine naco bodi nanajorapo nana, onajaro. Dio Atti maride naco nahato tahijine, onajaro. ³ Pohua naco dsedse coma tanicca tohuini

najarana. Dsedse coma taniccajine comani ahua jidera-jaripa ¡pohua! Pohua tesse naco inajidso-jarahijine, onajaro. Johuahuera tadsa jone taha madihijine. Dsiniro huemani tohuini, todsepetaji huemani tohuini dissera tajarana, onajaro. ⁴Pohuapa pocca odsacca madija cacahuade nahato tana. Pohua attidsa pocca ejedenideni naco iboraqquri nahijine. Pocca ejedenipa pohua noppine cappinaqquri nadsa madimanahissa tahijine, onajaro. ⁵Naraha pocca odsacca madija cacahuade ssamo tadsapa ¿Diocca madija cacahuade nahato taco? Ssamo tahi. ⁶Jesodsa jehe quinajarideni maride tojahijinepa madija Jesodsa jehe dsatipa ¡pohua! onajaro. Nama nadsapa pohua atti: –Ohuana deni ojani –narana, onajaro. Nama nadsapa manaco Diopa inajidsorana. Pina maittaccadsama Diodsa Satana attipa: –Ohuana deni ojajaro, tiapi ajimani tijani –napojarissa najarahijine, onajaro. ⁷Nadsapa Jesodsa jehe quinajarideni maride tojahijinepa pohua tahimari toccanissa tadsapi Jesodsa jehe quina-jarajarideni attidenipa: –Jehe, pohuapa madija bicahi, ima cappirahi –quinahijine. Naraha maridecca madie nema nejeradsapi jehe quina-jarajarideni attidenipa: –A, pohuapa Jesodsa jehe quinajarideni marideraha pocca ima tabaccora tani –quinahitohui, onajaro. Nadsama pohuajine pocca ima nema nadsapi pohuapa pina Satanacca maidsehedsa cobara tajarissa najari, onajaro.

Pablopa Timoteodsa ima teppe dsotodecca dosse inajaro

2 Timoteo

Introducción: Timoteopa odsa panani Epesohuaji madijari. Nahicca Jesodsa jehe quinajaridenidsa Dio Atti maride tojajari. Pablo Romahuajicca toponi cocorodsa huedsadsapa ima teppe dosse inapomajaro Timoteodsa. Pablopa Timoteo bodi inahatidsehijine pohuadsa dsodo inajaro. Jesocristodsa pajissa dsanapohuijine, tabaccorehedsa tohuajihi nahijine naco dsodo inajaro. Diodsa dsepe ijihissa tahijine, Epesodenidsa Dio Atti maride dissera tahijine naco dsodo inajaro.

- 1.1-14 Jesocristo tahimari ecomeraridsanijine
 - 2.1-15 Timoteodsa: –Pina soldado ibora tajarissa taji –najari
 - 2.22-26 –Ticca madie Diodsara pajiranissa taniijine dissera tinaji –najari
 - 3.14-17 Dio Atti dsodo naniccapi Dio Pohuajine dsodo quinajaro
 - 4.1-2 –Dio Atti mari mari taridsaji –najari
-

–¿Nija? –najari Pablo

1 ¹Nija Timoteo, ¿bica tinaqui? Tiadsa ima teppe dsodo onajaro. Ohua onipi Pablo. Dio jipa tadsa pohuajine Jesocristocca dodosse ojani. Ohuapi Jesocristo tahimari, aji pohuadsa jehe inadsa camittehe jiquejeranicca icajijaro tahimarini mari ocanaridsabaquihijinepa Abi Dio, pohua Bedi Jesocristo tedseje ohua dosse quinajaro.

²Jehe, Timoteo, tiadsa ohuati huana tani. Cristodsa jehe tadsapi ohuadsa pina occa ejedenissa tajararo. Nadsapi tiadsa ohuattia: Icca Abi Dio, ia Medsede Jesocristo tedseje tia icatidsemanana. Poccadeni tohuati huanehema tia acco icamanana. Poccadeni jonehe naqui tiadsa tojana, onajaro.

Jesocristo tahimari ecomeraridsanijine

³Diodsa: –Jehe, epejeni, tijine bica tani –onajaro. Dio pohuadsa ibora onani, pina occa idideni Diodsa iboraquiri nadsa dsepedeni ihijimana najarissa onajaro ohua naqui obodi huire tadsa Diodsa odsepe ijijaro. Nema onadsapi dsome ssiaja, dsome ssiaja Diodsa huatide ojadapi titohui ohuati ajimejeradsa huati huati ohona najaro. ⁴Tia ohuaquibodsapi otohui oji oji tade. Najaro obodidsa ohuati ajima-gerani. Nadsapi tia qqui omaninijine tohuini onajaro. Tia qqui omanidsapi ohuatidsenitohui. ⁵Jesocristodsa pajissehera jehe tanissa tajaro nahato onani. Tahidepi ticca ini Roida jehe najaro, ticca ami Eonise naqui jehe najaro. Najarodenicca jehenijissa tajaro Jesodsa ticca jeheniji nahato onani.

⁶Nema nadsapi teti ajima-geranijine ohuatti tiadsa ajima onajaro: Dio pocca daniji bicani tahide tiadsa da inapojaro tiadsa anidsanaponijine dissera tinaji. Najaropi Dio Atti maride tipajiranissa tanijine tiadsa bara onadsa Diodsa huati onadsapi tiadsa tojade. ⁷Diopa cappinehe huapimapi iadsa da inejerani. Dio iadsa Pohua Corime da inaridsajaripa ibodi cappina-geradsa daco ijiranijine, tohuati huanehema madijadsa eti cahanari cananijine, Diocca dacorehema ia ecahuanissa tadsa imasiri inana-geranijine. Najarona Dio iadsa da inajaro. ⁸Nadsama madija ohuahadenidsa ia Medsede Jesocristo tahimari tecomeradsa naqui comehi tina-geradsa mari ticana-baqquiridsana. Aji ohua toponi cocorodsa ohuedsani tahimarini timittadsa naqui ticomehi tejerana. Aji ohuapi Jesocristo tahimari mari mari onaridsajarojine todsepe oजारode. Tia naqui Jesocristo tahimari icassiejeranijinecca tecomeraridsajarojine ocasserehe tinahanaraha nema nehe oji tejeraji. Pina tetidseridsana, onajaro. Dio tibodi inadacoradsanaponitohui. ⁹Diopa ia tonassijabaqquijari. Pohua bicaquiri inanijine ia tocattejidsabaqquijari. Naraha najaropi ia ijine gerani. Dio iadsa huati cahanari canadsa: –Madija onassijabaqquihitohui –napojari. Nama najaria maittaccadsama dsama inahato-geraccadsama iadsa huati cahanari canapodsapa Pocca Cattaniji Jeso iadsa da inahijine najorapojari. ¹⁰Diopa pohuajine ia Tonassijade Jesocristo iahuaji ccaronadsapa pocca tohuati

huanehe iadsa ahuato inanajaro. Jesona dsoqqueraha nahatoni-
dsapa pohuajine dsoquehe paji idsoqquerinica inassamojaro.
Nadsapi pohua tahimari icassiejeraniccadsa pajissa inadsapi
paji idsoqquerini nejeranitohui.

Idsoqqueraha inahatonidsapi camittehe jicaquera taniccana
icajidsanaponitohui. Jehe, nema nadsapi tohuati huanehepi
najaro ima bicani Dio iadsa ahuato inanajaro.

¹¹Najaro ima bicani ohuacomeraridsanijinepi Dio otohui
huahua nadsa pohuajine pocca dodosse ojararo. Pohua
tahimari mari ocanabaquidridsahijine ohua dosse tajari.

¹²Nema nadsapi jidapana toponi cocorodsa ohuedsadsa
nacasserehe nahanaraha comehi onehe ohuedsa-jerani.
Ajina, Jeso pohuadsa jehe onapodsama maidsera tahi nahato
onajaro. Ajijaro ima naqui nahato onani: Aji Jesocristo
pohua tahimari icassiejeranijinecca ohuadsa ahuato inana-
jaropi tossamo-jeranijine pohuana cacahuade pajirajari.
Ecahuadsanapodsapi pohua ccanihicca huada bacco tanitohui.

¹³Jehe, Timoteo, Jesocristo tahimari pajissehecca tia
mari ocanapojaropi tinebo tejeraji. Nema tinanadsapi Diocca
Cattaniji Jesodsa jehe tidsanapona. Pohuadsa tijadsapi pocca
tohuati huanehema teti cahanari canana, onajaro. ¹⁴Jesocristo
tahimari icassiejeranijinecca tecahuanissa taji. Dio Corime
ibodidsa madijaripa tia acco camadsapa nema tinananijine.

Timoteodsa: –Pina soldado ibora tajarissa taji –najari

2 ¹Timoteo, tiapi pina occa ejedenissa tani Jesocristocca
tohuati huanehema daco tijiraji. ²Madija huapima occa
marinaja mittamanadsapa tia naqui ohuatti timittade. Najaro
marinajapi Diotohui disseraquiri najaridenidsa maride tijaji.
Manaco pohuadeni naco madija ohuahadeni maride pajira-
manadsapa mari icanaridsabaquimanahijine, onajaro.

³Ocasserani tiadsa bacco tadsapi nema nehe tinahanaji
onajaro. Jesocristocca dodosse tijadsapi pina soldado ibora
tajarissa taji. Pina soldado ocasserani ahuahijine najoraha
madijarissa taji. ⁴Ajana, madija soldado tojararipa soldado
jarajaridenicca madiacca imadsa quejema-jarajari. Pohua
dossedecca dossenijidsara iboradsanapojari, pohua dossedec
inahatidsehijine, quiquina najari. ⁵Jesocca dodosse naco pina

madija ittomedsa joppa tajarissa najari. Ittome cacahuade attissa inanadsa tahide bacco nanipodsapa manaconi caji-hijine. Naraha ittome cacahuade attissa inana-jeradsa ajamani dsodonidsapa bacco naniporaha manaconi caji-jarahitohui, quiquina najari. ⁶Jesocca dodosse tojajaripa pina madija huidsaja ppade dissera tajarissa najari. Tarabaiadsade ibora tadsapa pohana pocca ppaniji bono jipapohuijine bica tahti, quiquina najari. ⁷Jehe, aji soldado tahimari, ittomedsa jojoppade tahimari, huidsaja ppappade tahimari dsodo onajaropi tibodi huatonissa tana. Ia Medsede Jesocristopa ima huapima timittanissa tanijine tia acco canahitohui, onajaro.

⁸Ajaro ima naqui tibodi huatoma huatoma dsanapona: Jesocristopa dsoqqueraha dsotode nahatonijari. Pahuapa tamine Dabi potemahi. Najari tahimari icassiejeranijinecca mari mari onaridsajaro. ⁹Najari tahimarijine ocasserani onahanaridsajaro. Aji, pina tabaccorehe inanamanajaro-denissa nehe cadenadsa ohua jore quinadsapi ohua coroidsimamanajaro. Ohua jore quinaraha Dio Attipi jore quinanijine ssamo tani. Najaroa Jesocristo tahimari icassiejeranijinecca tojaribaquijaropaji. ¹⁰Nadsapi oji onejeradsa ocasserehe huapima onahanajaropaji. Nema onajaropi Dio icattejidsabaquipojarideni Jesocristo tahimari icassiejeranijinecca mittamanadsa pajissa quinadsapa Dio inassiajabaquihitohui, Dio pohua ssiejenema pohuadsa madimana-dsanapohuijine.

¹¹Ajjjaro imapi pajissa tojani:

Pina Cristo pohua tedseje ecotajarossa nadsapi nidsa dsotode Cristo pohua tedseje imadinitohui.

¹²Ocasserani eraha oji inejeradsa inahanadsapi nidsa dsotodepi pohua tedseje dsama huapima dossede iquejenanitohui.

Ia ettipi: “Jesocristocca ojajerani” inadsapi manaco Jeso atti: “Najaripa occa madija jarahi” nahitohui imehidsa.

¹³Iapi ettissa inana-jeradsapi imajisa tani. Naraha pahuapa pajissehera pina pohua attissa inanajaro. Ia tonebobaquijarahitohui.

¹⁴Jehe, Timoteo, ticca mamari tabaquipa occa marinaja huatideni ajamamana-jarahijine pohuadenidsa huati huati

tinaji. Pohuadeni attidenidsa cahadirere cana-jarahijine pohuadenidsa huati tinanissa taji. –Diopa etti mittahi, ticahadirere cana-jeraji –tana pohuadenidsa. Najaro huadie-jinepi ima tobica-jejanitohui. Najaro huadie mittamana-dsapa poccadeni jeheniji tossamorana, onajaro. ¹⁵ Diocca dodosse bica tinanijinepi ibora tinadsa tidsepe ijinissa taji. Dio tinahatidsedsapa pohua atti tiadsa: –Jehe, bica tinani –nahitohui. Pina tatarabaidssade dissera tajarissa taji. Tarabaidsa tanissa tadsapi tia dossededsa ticappinejejanitohui. Dio Atti pajissehera dsori tejejanijine mari tanissa taji.

**–Ticca madie Diodsara pajiranissa
tanijine dissera tinaji –najari**

²² Dsabissodenipa pohuadeni tohuini quinahicca caji tani. Tabaccorehe tohuini inacomamana tani. Nadsa Timoteo, tia naqui dsabisso tijani. Nema nanicca tohuini tejeraji. Najaro tabaccorehedsapi tajini naji. Ticca madie Diodsara pajiranissa tanijine dissera tinaji. Jesodsa jehe tajaropi tinebo tejeraji. Diodsa teti huana, madija huapimadsa teti huana tehe timadiji. Jone tinehe timadidsanapona. Ia Medsedecca madija bodideni huireququiri najarideni tedseje imasiri jirehe nema tidsanapomanaji, onajaro. ²³ Ima ponimacca aji pina madija pohua bodicca huati tajari timittaraha pajissa tejeraji. ¡Poni! tana. Nahato tinani ima nema naniccapi huadie toja tani. ²⁴ Naraha Ia Medsedecca dodossepa huadi tajarahina bica tahi. Madija huapimadsa pohua atti majida tadsa huati huati tahijine. Madija mari icanabaqquihijine naco nahato tana. Pohuadsa madija nacasseraququiri nadsa naco mohuaradsa inahananijine. ²⁵ Pohuadsa jiperaququiri naraha nama naha mohuaradsa mari icanabaqquidsanapona. Nama nadsapa Djojine pohuadeni bodi cacajiquimerahijine itide. Nadsana marinaja pajisseheccadsara pajissa quinahijine, onajaro. ²⁶ Nadsana Djojine pohuadeni bodideni huatomahissa tadsapa Satanacca maidsehe naqui inebomananijine. Pina Satanacca maidsehedsa todsepe toquejenajarissa quinaraha Dio tappa inabaqquijari.

***Dio Atti dsodo naniccapi Dio
Pohujine dsodo quinajaro***

3 ¹⁴Pohuadenipa nama quinaraha Timoteo tiana Jesocristo tahimari tia mari icanajarodsa pajissa tade. Najarodsa pajissa tidsanapoji, onajaro. Tia maridedeni nahato tinani; maidseraqquri inani. ¹⁵Ejedeni tijapodsama Dio Atti dsodo nani tiattadsapi tohuattehe ticajjonajaro nahato tinani. Najaro tohuattehe ticajidsapi Jesocristodsa jehe tadsa najarojine Dio tia tonassiajajari. ¹⁶Dio Atti nema nehe dsodo naniccapi Dio pohujine bodideni nahatoqquri nadsa dsodo quinajaro. Najaro iadsa anijaropi ponima jerani. Ia acco camanijine pajirani. Ajjaro Dio Attipi pajissehe ia mari cananijine pajirani. Icca imasiri ahuato inanajaro. Icca imasiri cattemanijine pajirani. Icca madie Diodsa bica tanijine ia mari canajaro. ¹⁷Madija Diocca tojjajari Pohua Atti tohuattadsapa Pohuadsa dsepe ijihijine najorahissa tajari. Bica tanicca huapima inananijine pajirahissa tajari.

-Dio Atti mari mari taridsaji -najari

4 ¹Jehe, Timoteo, Jesocristo ccanipomadsa tamine tojadsapa madija huapima ecahuabaqquihitohui. Nadsana camittaqquri najaridenicca ima icattema, jicamanapojaridenicca ima icattema nahitohui. Nadsama Dio, Pohua Bedi



Jesocristo tedseje ohuatti nahatoto tahi. Ohuattissa tinananiijine tia ocadossejaro: ²Dio Atti mari mari taridsaji, onajaro. Huajjiradsa maride tijaridsanijine tibodi titinajorapo naji. Madija Dio Atti mittade jipaqquri nadsapa mari ticana-baqqina. Jiperaqquri nadsa naco nama naha mari ticana-baqqina. Madija ima tonanadsa naco mohuaradsa huati ticanahissa tajo. Pohnadsa: –Ima tinanajarodsapi epeje taji –tana. Madija pohua bodi cacajiquimerahijine naco mari ticanajo, ima bicani tohuira pohua bodi huatohuijine. Tohuattahijine najo tadsa naco nama naha mohuaradsa mari ticanajo.

Pablo Titodsa ima teppe dosse inajaro

Tito

Introducción: Tahidepa Tito, Pablo tedseje dsama onihi, onihi-huaji huedaridsajari, Dio Atti maride. Nadsapa dsama Cretahuaji bacco toquinadsapa Pablo Tito inebojari, nahi Cretacca madija Jesodsa jehe quinajarideni maride tojahijine. Cretapi passo noccoidsa dsama huittidsacossajaro onini. Najaro passo imeni oninipi Mediterráneo.

Tito Cretadsa madidsapa Pablo pocca ima teppe pohuadsa dosse inajaro. Jesodsa toquejenjarideni nejecoma quinahijinecca ima dsodo inajaro. Pohuadeni maridedeni nejecoma quinahijinecca ima dsodo, poccadeni mamari tabaqqui ecahuabaqquimanahijine nejecoma quinahijinecca ima naqui dsodo inajaro.

2.1-15 Dio Attira mari icanabaqquihijine

3.3-8 Jesodsa toquejenjaridenipa ajama quinahijine

Dio Attira mari icanabaqquihijine

2 ¹Naraha, Tito, tiana madija mari ticanabaqquidsapa Diocca marinaja bicaniccama pohuadeni mari ticana-baqquijo. ²Jadahideni ajama quinahijine mari ticanabaqquijo. Mohuaradsa madimanana. Nahi madija ohuahadeni madierideni qqui toquinadsapa: –Jehe, poccadeni ima bica tani –quinahijine. Pohuadeni bodideni huatomamanahissa tadsa ima bicanira tocattejidsade nahatoqquri nahijine, pina aji Diocca imassa najarora icattejidsamananijine. Aja jadahidenipa Jesodsa jehe quinahissa tahijine. Diocca tohuati huanehema huapimadsa huatideni huanaqquri nahijine. Ima ocassera tanicca naqui mohuaradsa inahanamandsanaponijine. ³Najarossa najaro amoneje jadanideni naqui mari ticanabaqquijo. Diocca ima bodinidenidsa anihe mohuaradsa madimananissa tanijine. Madija pohuama

inatabaccoramanahijine ima ponima huati huati nana-ridsamana nejeranijine. Dsedse coma tanicca naqui tohuini quinejeranijine. Ponidenipi ima bicanira maride toquejenanijinena bica tajaro. ⁴Jehe, amoneje imani joconi toquejenapjaropi ajijaro imadsa dsotodedenicca mari icanabaqqimananijine bica tani: Ponidenicca maqquidsa huatinideni huanacquiri nadsa ponidenicca ejedenidsa naqui huatinideni huanacquiri nadsa inamadibaqqimanahissa tahijine. ⁵Bodinideni huatomamananissa tadsa ima bicani tocattejidsade tocahatteranijine. Maqquideje ohuahatohui quinejeranijine. Ima bica tejeraniccatohui bodinideni huahuatomamana nejeranijine. Ponidenicca odsa bica tanijine cacahuadera tocahatteranijine. Ponideni attinideni majida tadsa ponideni tassani acco acco ihicamaridsabaqqimana nanijine. Ponidenicca maqqi attidenidsa naqui iboraqqiri nanijine. Jehe, najaro ima tocahatteradsapi madija ohuaha ponidenicca madie qqui toquinadsa: –Diocca marinajapi tabaccora tani –quinahijine ssamo tani.

⁶Jehe, Tito, najarossa najaro dsabissodeni naco bodideni huatomamanahissa tahijine mari ticanabaqqiyo, nahi ima bicanira tocattejidsade tocahatterahijine. ⁷Tito, tia naqui timadinissa taji, ticca madie pohuadenidsa ahuato tanijine. Nahi dsabissodeni ticca madie qqui toquinadsapa: –Ia naqui nema inana –quinahijine. Mari ticanabaqquidsa naco maidsehe jirehe pajissehera Dio Attira pohuadenidsa ahuato tinanaji. Jidsehe jirehe Dio Atti poniradsara mari ticana-baqqiyo. ⁸Ticca marinaja bica tadsa tinapajiranissa taji. Nahi ticca marinajadsa: –Bica tejerani, pajiranissa tejerani –quinajarahijine. Nadsapa madija ticca marinajadsa jiperaqqiri najarideni tiadsa ima inanamananijineraha pohuadenipa cappinamanahitohui. Tetti pajiranissa tadsapi iadsa ima inanamananijine ssamomo tahitohui.

⁹Nadsama aja madijacca medse mamadimani najarideni naco ajama quinana: Pohuadeni medse attidenidsa iboraqqiri nahijine. Pohuadeni medsededsa naco poccadeni huatidsehema dsepedeni ihijimana nahijine. Pohuadeni medse attidsa naco tossonidsimamana-jarahijine.

¹⁰Pohuadeni medse dsepetaji naqui botimana-jarana.

Pohuadeni medsededsa maidsamana-jarana. Pohuadeni medsede atti inapajiramananissa tana. Nahi poccadeni madie qqui toquinadsapa: –Ia Tonassiajade Diocca marinaja bica tani –quinahijine.

¹¹Jehe, Diocca marinaja bicanipi Dio madijadsa huati cahanari canadsa madija icatidsebaqquihi ahuato inanajaro. Najarodsa madija huapima tocassiejarahijine pajirani. ¹²Dio ia tocatidsebaqquijaricca imapi aji ibodicca imasiri inebonijine ia mari canajaro. Ajijaro namicca ima tohuini inajaro inebonijine ia mari canajaro. Ajijaro namidsa imadidsa icca madie bica tanijine ia mari canajaro. Ibodi huatomanissa tadsa ima bicanira tocattejidsade icahattera, icca ima Diodsa pajiranissa tanijine icahattera, Dio Pohua tohuira dissera inanijine icahattera najaropaji. ¹³Ajijaro naqui aja Dio ia tocatidsebaqquijaricca ima ia mari tocanabaqquijaro. Najaroa Jesocristo ccanipomahicca huada bacco tadsapi etidsenitohui inajaro. Aja Icca Dio bicabote ia Tonassiajade Jesocristo ccanipomadsapa pohua dsibehinema pocca deni tojehema ahuato taha ccanipomahitohui. ¹⁴Jesopa itohui huati huana tadsa pohua ccacorajari. Tabaccorehe huapima inanaridsehe imadiporaha ia todinibaqquihijinea aja Jeso dsoqquejaripaja. Najaroa aji pohuadsara pocca iquejenani ojari nanijine ia tonahirebaqquijaripaja. Najaroa aji ia pocca madija iquejenajaropi ima bicanira inananjine disseraqqiri inajaropaji.

¹⁵Jehe, Tito, aji ima huapima ojine dsodo onajarocca naqui mari ticanabaqquijo. Pina aji Dio Attissa inanamananjine tinahatidsebaqquijo. Aji Dio Attissa inanamana-jeradsapi tetti dacorehema huati ticanabaqquijo. Pohuadenidsa: –Najaro imapi bica tejerani –tana. Tiadsa madija attideni: –Tiapi ajimani tijani, ponima huati huati tinajaro –quina-jarahijine ticappina-jeradsa daco tijiraji.

Jesodsa toquejenajaridenipa ajama quinahijine

3³Ia naqui tahidepi Dio tahimari ssamomo inapo- dsapi ponima imadiridsaccade. Diodsa naqui iboqquri inaccade. Aji ia tohuini inaniccadsa, ia inahatidsenijinecca tohuini inajarocadsa medse iquejenaccade. –Jehe, ima nema najarona bica tani –ihinanaridsa naccade. Tabaccoraqquri

inaccade. Itesse dsepetaji acconi huadiquiri ihinanaccade. Aji ia huapima naqui ahuaji jipera ahuaji jipera inaridsaccade.

⁴Naraha aja ia Tonassiajade Dio Puhua madija huapimadsa huati huanajideradsapa pocca biquehe, pocca tohuati huanehe dsama huapimacca madijadsa ahuate inanaridsajaropaji.

⁵Diopa ia tonassiajabaquijari. Naraha najaropi ia bica inana-jarojine jerani. Diona itohui huati huana tadsa: –Madija onassiajabaquina –najari. Ia tonassiajabaquihijine Puhua ibodi inahiredsapi aji ibodi dsati tojajaropaji. Dio Corimejine madie dsati icajjaropaji.

⁶Diopa Puhua Bedi Jesocristodsa Puhua Corime da inadsa manaco ia Tonassiajade Jesocristona iadsa inanaridsajaripaja. Puhua Corime nama naha iadsa tojaridsajaripaja. Jesocristo ia tonassiajabaquijaria aja Dio iadsa accora tadsa Puhua Corime iadsa inanaridsajaripaja.

⁷Dio nama najaripa iadsa huati cahanari canadsa ia tocatidsebaquijaripaja. Aja Puhua Bedi Jesocristo eccoradsaha Dio Atti ajama najaripaja: –Jidapapi ticcadeni imasiri manaconi Jesodsana jicani. Occa ejedeni tiquejenajaro bica tani –najari-paja. Nadsama aji Diocca ejedeni iquejenajaro pocca camittehe jiquejeranicca tohuini imadjaropi aji iadsa inanajorajaropaji.

⁸Nadsama Tito, aji tiadsa ima dsodo onajaropi pajissa. Ajijaro imadsa Jesodsa jehe quinajarideni maride dissera tinaji, onajaro. Nahi ima bicanidsa dsepedeni ijiridsamanadsa, madija naco acco icamaridsabaquimanahijine. Najaro imapi bica tani. Najaro imadsana madija huapima tobicaridsamanahijine.

Pabloa Piremaodsa ima teppe dosse inajaro

Filemón

Introducción: Piremaopa Pablo tesse Jesodsa jehe najari. Pohnuapa Corosahuaji madijari. Pocca odsadsa naco Jesocristodsa jehe quinajarideni quequeriquimana najari. Pohnuapa dsepe sse tajari. Pocca dodosse tabaqqi cajijari.

Piremaocca dodosse ojaria onipa Onesimo. Najaripa pohnu dossededsa huatirahi huaji tanihuaji joppa tajari. Odsa panani Romahuaji Pablodsa bacco tadsapa Jeso tahimari mittadsa jehe najari. Nadsapa pocca ima icattemanijine –Ohua dossededsa occanina –najari.

Ajijaro ima teppe Pablo dsodo inajaropi Piremao pocca dodosse Onesimo inajidso-jarahijine. Pablo Onesimodsa huati huana tadsapa Piremaodsa dsodo inajaro, Piremaopa Onesimocca imadsa: –Epeje, ohuati ajimani –nahijine.

1.1-7 Piremaopa Jesodsa jehe nahissa tajari

Piremaopa Jesodsa jehe nahissa tajari

¹Nija Piremao, ¿bica tinaqui? Tiadsa ima teppe dsodo onajaro. Ohua onipi Pablo. Ohuapi Jesocristo tahimari mari mari ohona najarojine toponi cocorodsa ohuedsajaropaji. Jehe, Piremao, imecote Timoteo tedseje tiadsa ¿Nija? inajaro. Tiapi itesse bica tinade. Titohui eti huana tani. Jesocristo tahimari maride tia inadsa idsepe ijjarode. ²Jehe Piremao, ticca odsahuaji Dio Atti mittamanahijine totoqueriqui najari-denidsa naqui ajijaro ima dsodo onajaro. Aji imecote Apia ponidsa naqui dsodo onajaro. Imecote Araquipo, Jesocristo tahimari maride ihicaberaridsa najaridsa naqui dsodo onajaro. Huapimadsa ¿Nija? inajaro. ³ICca Abi Dio, ia Medsede Jesocristo tedseje poccadeni tohuati huanehe, jonehe naqui tiadenidsa inanaridsamanana, onajaro.

⁴Jehe, Piremao, titohui Diodsa huati huati onadsapi: –Abi Dio, epejeni, tijine bica tani –ohona najaro. ⁵Nema onajaropi tijine ima bica tani quinahi omittajaro. Aja ia Medsede Jesodsa jehe tanissa tajaro. Diodsa toquejenajarideni huapimadsa teti huana tajaro. Najarojinea Diodsa ohuatidsejaro. ⁶Diodsa ticca jeheniji pina icca jehenijissa najaro. Jesocristo iadsa huati huana tajarijine iadsa ima bica tanicca inanajaro. Najaro pocca daniji huapima timittanissa tanijine Diodsa huati huati odsanapojaro. ⁷Jehe, ohuemecote Piremao, Diodsa toquejenajarideni huapimadsa teti huana tadsa bodideni acco ticanabaqquidsapa huatidsemanajari. Najaro ima omittadsapi ohua naqui ohuatidsejaro, obodi tobicani napomani.

Tohuatti ebreo cajimanajaridenidsa ima teppe dosse inaridsajaro

Hebreos

Introducción: Jodiodenipa Isaraeri potemahi. Poccadeni idipa Abarahao. Pohuadeni atti oninipi ebreo. Pohuadenidsa naco: ebreodeni, quiquina najari.

Ajijaro ima dsodode onipa ssamo inani. Pablo jarahitide quina-jari. Jodiodeni Jesodsa jehe quinajarideni nanajidso toquejenadsa Jeso inebomanabote nadsa ajijaro ima pohuadenidsa dosse inajaro. Jeso inebomana-jarahijine dsodo inajaro. Moisesicca marinajapi ia tonassiaja-baquuinijine pajira-gerani. Jesocristodsa pajissa inajarona denima bica tajaro, najari pocca dsodonijidsa.

Maittaccadsama jodiodenipa poccadeni imasiri manaconi tojahijine bani bedi bicahi inanadsoqqe-manadsa emene Diodsa da da quiquina najari. Najaro bani bedi emene dada Jesocristojine nebojaro jodiodeni mittamanahissa tahijine pohuadenidsa dsodo inajaro.

- | | |
|---------|---|
| 1.1-4 | Diopa iadsa huati tahijine Pohua Bedi dosse inaronajari |
| 4.12-13 | Diodsa ibodicca ima ahuato tajaro |
| 4.14-16 | Jesopa icca ima Diodsa huahuati toqqimade deni tojahicca |
| 9.11-14 | Jesocristo pohua emene da inajaropi pajiranissa dsanapojaro |
| 9.15-22 | Diocca jehe canireniji dsati |
| 9.23-28 | Jesocristocca danijipi imasiri inajicanijine pajiranissa tajaro |
| 11.1-40 | Diodsa jehe quinahissa tajari tahimarideni |
| 12.1-4 | Jeso tohuira icattomama canana |
-

Diopa iadsa huati tahijine Pohua Bedi dosse inaronajari

1 ¹Maittaccadsama Diopa Pohua Atti cacomeraquiri najari-denidsana huati tadsa najaridenina icca ididenidsa huati huati ihiquimamana najaro. Diopa pocca marinaja, madija

pohuadeni tedsejemacca ima ahuato inanajaropi onihi onihi inanajaro. Naraha Pohua Attidsa huati tahi ojari jerani. Pohua Atti cacomeraquiri najaridenicca huadadsa ahuato inanajaro naqui, bodideni inahattabaquijari naco. ²Naraha jidapana dsama jicanicca tohuajiradsa iadsa huati tahijinepa Pohua Bedi dosse inaronajaride. Najarina iadsa Imehi Atti huati huati ihiquima najarode. Jehe, Pohua Bedipa tahide Imehi tedseje meme, nami, huapima aniridsajarocca inahatomanapojaro. Nadsama Diopa Pohua Bedina cacahuade inanajari. Huapima jinede tojajaripaja. ³Jehe, najari Dio Bedijinena Imehi Diocca dacorehe, deni tojehe, canahatori canehe iadsa ahuato tajaro. Pohuapa pina Imehi Diossa najari. Nahato tajari. Bica tajari. Meme, nami, huapima aniridsajaricca pohua atti dacorajarodsa: –Anidsanapona –nadsa pohujine anidsanapojari. Nadsama itohui dsoqquehijine ibora tadsapa pohua emenejine ibodicca imasiri jeo tadsa ibodi tohuirejaro. Dsotode Djotine deni tojadsapa memehuaji toccamacossanidsa Dio Pohua inori nahatonihuaji huittarijari.

⁴Jehe, Dio Bedi Imehi inorihuaji huittarijaripa Diocca dodosse tabaqquids deni tojajari. Najarossa najaro Dio Pohua Bedi oni icanacanijaripa pocca dodosse tabaqqi onidenidsa deni tojajaro.

Diodsa ibodicca ima ahuato tajaro

4 ¹²Dio Attipi dacorehe caji, camittehe caji najaro. Pina jadsirecca massito cajadsire-qqumerajarossa najaro. Najaro massitopi bani imedsa jaro tocadsimadsa tone tohuarihidsa tajo tahijine pajira, appone ahuatohujine tone icanarobehijine pajira najaro. Najarossa najaro Dio Atti ibodidsa toqquedsimadsapi icca ima nattome inajaro. Ibodi huatohue, ibodidsa tohuini inanicca huapima bica tanicca, tabaccora tanicca ahuato inanajaro. ¹³Jehe, Dio huapima inahatoridsajaripa huapima qqui tahissa tajari. Pohua qqui tajarahijine inajimahi ssamo tani. Icca ima naqui Pohuadsa ahuato tajaro. Nidsa icca ima ecomeranjinepi Pohua baccohuaji idomo huanitohui.

***Jesopa icca ima Diodsa huahuati
toqqimade deni tojahicca***

¹⁴Dio Bedi Jesopa Imehi madihihuaji toccamacossanidsapa jidapana memehuaji madijari. Puhuapa icca ima Imehi Diodsa huahuati toqqimade deni tojahicca. Ohuaha pina pohuassa najari nohuerahi. Puhuadsara pajissa inadsa pohuatohui disseraqqiri idsanapona. ¹⁵Jesopa pina iassa naha namidsa madidsapa imasiri totonanade nattome inajari, pina ia nanattome najarissa najari. Imasiri totonanade attia: –¿Jesopa ohuattidsa ibora taco? ¿Ibo tarana? –naraha Jesopa Imehi Diodsara ibora tadsa imasiri inana-jerajaro. Nama nadsapa iadsa huati huana tahi. Ibodi mijira tani nahato tadsa ia acco camade jipa tahi. ¹⁶Pohuadsa iajiressina. –Jesopa dacorahi, ia acco tocamabaqquihijine pajirahi –inana. Puhuapa bica tahi. Iapi bica inejeraraha iadsa huati huana tahi. Iadsa ima anidsapi imasiri inana-jeranijine pohuadsa huati inadsapi ia acco tocamabaqquihitohui.

***Jesocristo pohua emene da inajaropi
pajiranissa dsanapojaro***

9 ¹¹Naraha jidapapa Jesocristo iadsa anihi. Puhuapa icca daniji Diodsa dada toqqimade, icca ima huahuati toqqimade deni tojahicca. Puhuana icca ima Diodsa inana-bicanijine pajirahi. Puhuapa memehuajicca Dio anihi-huaji toqquedsimajari. Nanihuajipi Dio tadsari bani etero ssequi nahiccassa nejerani. Madija icanahatomana-jerani. Ajijaro dsamacca jerani. Memehuajiccapi denima bica tani. Pajiranissa tani. ¹²Jesocristo nahihuaji toqquedsimadsapa edede jidsadsa chivo emene dsojo icadsima-jarajari. Bohui bedi bicabote emene naco dsojo icadsima-jarajari. Pohua pohua emenena da inanijine toqquedsimajari. Toqquedsimahi ojarahi. Nidsa dsotode pohua emene dade toqquedsimapomajarahitohui. Pohua emene da inajaropi pajiranissa dsanaponitohui. Nama nadsapa imasiri manaconi najidsohue iadsa ssonari-jeranijine ia todinibaqquidsapa tossiejehe jiquejericca iadsa inanajaro.

¹³Diocca marinaja tahidecca aniccadsapi madija ima oppina tanicca inanadsapi Diodsa dada toqqumahuaji toqquedsimade oppina tani. Naraha bani bedi emene dissa naridsa assire ppaja tojadsana pocca ima tobica tani. Ima onihi oppina tanicca toppineranijinepi edede jidsadsa chivo emenedsa huissa inarijari. Ima onihi oppina tanicca toppineranijinepi bohui maqqui emenedsa huissa inarijari. Ima onihi oppina tanicca aji madija huatiahi assire bara inadsapa bohui dsohuato jierani botta tani ononi passodsa quejemadsa ima cajijari tetepihuaji dissa dissa narijari. Nadsapa assire ppaja tojadsa pocca ima toppinera tani. Nama nama quiquina nadsa assiredeni tohuiremanadsapa Diodsa dada toqqumahuaji jai tojedsimapomahijine toppinera-manapomajari. ¹⁴Nadsama najaro marinajassa inanamanadsa bani bedi emenejine assiredeni tohuiremanadsapa dacorehe cajini ahuato tajaro. Naraha Jesocristo emenena dacorehe denima cajijaro. Dio Pohua Corime Camitta taha nama dsanapojari Jeso inadacoradsa icca daniji bicabote tojahijine pohua pohua ccaccorajari Imehi Diodsa. Jesopa ima cappirajari, bodi huire tajari. Icca imasiripi najidsohue jiquejeranihuaji ia tohuaccanitohuiraha Jeso emene toccajarojine icca imasiri sse inajaro. Ibodi inahirejaro. Nema nadsapi icca Dio Camitta tajari Attidsa ibobora idsanaponijine ipajirajaro.

Diocca jehe canireniji dsati

¹⁵Jehe, Jesocristo pohua ccaccoradsa pohua emene toccajarojine pohana Diocca jehe canireniji dsati iadsa inanajaro. Aji Diocca jehe canireniji tahideccadsa madija iboqquri nadsapa imasiri ihinanamana najaro. Najaro imasiri manaconi Jeso dsoqquejaripaja. Nama nadsapa Dio pocca madija toquejenahijine icattejidsa-baqquijarideni pocca biquehe jiquejeranicca cajimanasanapohuitohui, pina Dio Pohua huati tapojarissa inananitohui.

Jesocristocca danijipi imasiri inajicanijine pajiranissa tajaro

²³Jehe, nadsama memehuajicca Dio tadsaripi assirani. Namidsa anijarocca odsapi corimani. Najaro odsa bodidsa aniridsajari huapima Diodsa tohuirenijine bani bedi emene huissa inariridsamanadsa tohuireridsajaro. Naraha memehuajicca assirani aja Dio madihihuaji pajissehecca

tohuireridsanijinepi bani bedi emene pajira-jerani. Nanihuajicca tohuirenijinepi denima bica taniccana pajirani. ²⁴Jesocristopa aji namihuajicca –Dio anihihuaji bica tanicca –quiquina najaridsa toqquedsima-jarajari. Najaropi madija icanahatomanajaro. Dio tadsari pajissehecca corimanira. Puhuapa memehuaji pajissa Dio madihihuajina toqquedsima-jari, nahidsa icca ima Imehidsa huati tadsapa Imehi: –Epejena, ohuati ajimani –nahijine. ²⁵Puhuapa Dio madihihuaji toqquedsimadsa naco huajijiradsa pohua emene toccanijine pohua pohua ccaccaccora najarajari. Aja namidsa madijari Diodsa dada toqqumade deni tojahiccapa madijacca imasiri manaconi bani emene dsojo dsojo ihicadsima najaro. Dio anihihuaji huada ojariedsa toqquedsima, huajano ohuahadsa naco huada ojariedsa toqquedsimapoma, nama nama dsanapojari. Pohua emene jeraraha Diodsa da da ihiquima najaro. Naraha Jesocristopa nama najarajari. ²⁶Huajano huajijiradsa pohua emene toccanijine pohua ccaccaccora najonadsapa nahissa dsama nahatoponidsama dsoqqehe tonahanajonanaja. Naraha jidapana dsama jicanicca huada tohuajiradsa iadsa ccaronajari. Dsoqqehejine pohua pohua ccaccorahi ojarihi, icca imasiricca dacorehe inajicanijine. Nama nahi ojari nadsapa apaja. Nama napoma-jarahitohui.

²⁷Madija ia naqui idsoqquenitohui. Idsoqqueraha idsoqqeni ojarinitohui. Najaro nattinipi Dio baccohuaji idomo huadsa ia tocattejidsabaqquihitohui. Puhuadsa toquejena-jaridenidsa pocca biquehe da inanitohui, Puhuadsa toquejena-jarajaridenidsapi pocca najidsohue inassonarinitohui.

²⁸Jesocristo naco dsoqqehei ojarijari. Imasiri manaconi pohua pohua ccaccorajari. Puhuajine icca imasiri jicaridsajarodenipi huapi inani. Nidsa ccanipomadsapa icca imasiri manaconi dsoqqepoma-jarahitohui. Puhuatohui imadijaro ia tonassiaja-baqquihijinenana ccanipomahitohui.

Diodsa jehe quinahissa tajari tahimarideni

11 ¹Diodsa jehe inanissa tadsapi: –Diopa Pohua Attissa inananijine pajirahi –inajaro. Nema inadsapi pajissa iadsa tojanijine tohuini imadijaro. Iadsa huati tapojaricca qqui inejeraccaraha nidsa iadsa tojanijine ibodidsa nahatoto

inajaro. ²Maittaccadsama icca idideni Diodsa jehe quinahissa tadsapa Dio pohuadenidsa: –Tiadenipi ohuadsa bicaququiri tiquinani –najari quinade. ³Ia naqui Diodsa jehe inanissa tadsapi Dio Pohuajine meme nami huapima inahatoridsapojaro nahatoto inajaro. Pohuajine nahatoridsani qqui inajaro huapimapi nohueraporaha Pohua Attidsa inahatoridsajaro.

⁴Maittaccadsama Abeopa Diodsa jehe nahissa tajari. Nama nadsapa pocca daniji Diodsa da inajaropi bica tajaro. Naraha pohua imecote Cainocca danijipi bica tejerajaro. Abeocca danijipi denima bica tajaroline Diopa: –Jehe, pocca daniji ohuadsa tojana –najari. Nadsapa Dio Atti naco: –Abeopa bica tahi. Pocca ima naqui pajiranissa tani –najari quinade. Nadsama Abeopa maittaccadsama dsoqueporaha pocca jehe-nijina iadsa huati huati dsanaponipaji najaro.

⁵Maittaccadsama Enoco naco Diodsa jehe nahissa tadsapa huatia-jarajari. Camitta taha Dio iaccamacossanijari. Nadsapa ajijaro namidsa assire bacco quina-jarajari. Pohua tahimari Dio Atti dsodo nanidsa dsodo napojaropi Enoco Diodsa ibora tadsa pohuajine Dio huahuatidse nadsapa Dio pohua iaccamacossanijari quinahi nade. ⁶Ia naqui Diodsa jehe inejerasapi ijine Dio huatidsehijine ssamo tani. Madija Diodsa tohuajiressihijine tohuini nadsapa tahide pohua bodi: –Jehe, Dio anihi. Pohuatohui quinajaridenidsa pocca biquehe da ina tani –napodsana Diodsa tohuajiressihijine pajirahi.

⁷Maittaccadsama Nohue naco Diodsa jehe nahissa tajari. Pohuadsa oppinehe tahimarini Dio huati tajari: –Najarodsa huapima onajicaridsahitohui –najari. Madija huapimapa nema nanicca qqui toquinapo-jararaha Nohuena: –Pajissa Diopa Pohua Attissa inananitohui –najari. Nadsapa Nohue, pocca amoneje, pocca ejedenideni, poccadeni amonejema tocassiejerahijine canoa imenibote icanahatojaro, pina Dio pohua icadossejarissa inanajaro. Dio Attidsa pajissa nadsapa ajijaro namicca madijadenidsa: –Dio Attidsa pajissa tiquinejeradsapi tijicanitohui –najari. Dio naco Nohuedsa: –Ohuadsa pajissa tanissa tadsapi tia onassijanitohui –najari. Nadsapi ppani ccajonadsa Nohue pocca madijapa tocassiejeraraha madija huapimapa Diocca najidsohuedsa tojicajari.

⁸Maittaccadsama Abrahao naco Diodsa jehe nahissa tajari. Pohuadsa Dio huahua nadsapa Pohua Attidsa ibora tajari. Pohuadsa Dio Attipa: –Ajijaro dsama tinebodsas ticcaji. Dsama onihitiadsa nohue onanitoahui. Najaro dsama tiadsa, tipotemanidenidsa da onanitoahui –najari. Nadsapa pohua toccaahuajissamo taraha pocca dsama inebodsas toccajari. ⁹Abrahaopa Dio Attidsa jehe najarijine Dio huati tapojaricca dsamahuajibacco tadsapa pocca tojajeraccaraha nahidsa madijari. Najaro dsamacca madija pocca madija jararaha pohuadenidsa quejemanaha madimanajari. Abrahaopa pocca odsa coro ssequi nahidsa madiridsajari. Pohua bedi Isahaca, pohua jinodi Jacobo naco nama naridsamanajari. Najaridenidsa naco Dio huati tapojaric: –Tiadenidsa ajijaro dsama da onanitoahui –napojari quinade. ¹⁰Abrahaopa odsa nema naniccadsa madiridsapojaripa nidsa dsotode memehuajicca odsa panani bicani totabaccorarera tani-cadsa madihijine tohuini bodi huatodsanapojari. Najaro odsapananipi Dio nahato tadsa inahatojaro.

¹¹Abrahaopa Diodsa jehe nahissa tajarijine pocca amoneje Sara tadsajani ejedeni jiraha jadahi tocajamanahissa taraha Dio Pohuajine ejedeni cajimanajari. Abrahaodsas Dio Attipa: –Ojine tipotemani tohuapihitohui –najari. Nadsapa Abrahao pohua bodidsas: –Diopa Pohua Attissas inananitoahui. Dsori tejeranitoahui –nadsa pohuadsas Diocca dacorehe inanadsapi ejedeni cajimanajari. ¹²Nadsapa Abrahao jadahi tocajahissas taraha bedi cajidsapas najari potemahidenina tohuapijari. Pina abadsico bedi huapi tajarissas quinajari, pina passos imeni inidiccas ssiqui nema nehessas quinajari. Tohuapidsanapodsasaponideni hua quinahijine ssamos tani.

¹³Abrahao, Isahaca, Jacobodenipa Dio pohuadenidsas huati tapojaricca qqui toquina-jaradsas jicapojari. Qqui toquina-jararaha bodideni: –Dio iadsas Pohua Attissas inananitoahui –quinajari. Pohuadenipas huajitandisas ccasjonanis qqui toquinajarissas quinadsas attidenipa: –Nidsaranibotes iadsas baccos najonanitoahui –quinadsapas huatidsemanajari. Pohuadeni bodidsas nahatoqquiris nadsapas: –Ajijaros dsamadsas imadirahas dsamas onihiccas madijassas inajaro. Ajijaropis iccas dsamas jeranis. Ajijaros dsamadsapis issoniqquimanitoahui –quinajari. ¹⁴Jehe, madijas attideni namas quinajaridenipas iadsas ima

ahuato inanamanajaro. Pohnadenipa poccadeni dsama tojanijine tohui qqi naridsamanaccajari. ¹⁵ Abrahaodenipa poccadeni dsamabotetohui bodideni huahuatomamana najarajari. Poccadeni dsamabote tohuini quinadsapa jai tojanihijine pajiramanaraha. ¹⁶ Pohnadenipa memehuaji Dio madihicca dsama denima bica tanicca tohuini quinajari. Nama quinajarijine Diopa Pohnadsa: “Abrahaodenicca Dio” quiquina nahijine comehi tajarajari. Nama nadsapa odsa panani memehuajicca pohnadenidsa inanajorajaro.

¹⁷⁻¹⁸ Abrahaopa Diodsa jehe nahissa tadsapa Pohna Attidsa ibora tajari. Dio Abrahaodsa huati tapojari: –Ticca ejedeni Isahaca potemahidenidsana: “Abrahaopotemahideni” onanitohui –napojari. Naraha dsotode Abrahaocca jehe-niji nattome inajaro. Pohna Attipa: –Abrahaopotemahideni ohuadsa ticca daniji teccorajo. Ohuadsa da tadsa ono tojahissa tahijine –najari. Nadsapa Abrahaopotemahideni ojariraha Diodsa eccorajari, ono tojahijine. ¹⁹ Abrahaopa nahato tajari: –Diopa dsoqqejari inahatonihijine pajirahi –najari. Nadsapa Abrahaopotemahideni bodi nama najarijine poccapotemahideni ejedeni tossiajajari. Nadsapa poccapotemahideni ejedeni dsoqqe-jararaha pohna tahimaripi pina dsoqqe nahatoni najarissa najari, inajaro.

²⁰ Maittaccadsama Isahaca naco Diodsa jehe nahissa tadsapa pohna bedi pamaha Jacobo Esaho tedsejemadenicca ima huati tajari: –Diopa tiadenidsa ima bicani inananitohui –najari.

²¹ Jacobo naco Diodsa jehe nahissa tadsapa pohna dsoqqehicca huada tohuajirajonadsa pohna jinodi Josecca ejedeni pamaha pohnadeni tedsejemadenicca ima huati tajari: –Diopa tiadenidsa ima bicani inananitohui –najari. Nadsapa poccapidsodsa pohna tocahuejidsa nadsa Diodsa huatidsejari. ²² Jose naco Diodsa jehe nahissa tadsapa pohna dsoqqehicca huada tohuajirajonadsa pohna imecotedeni aja Isaraeripotemahideni quiquina najaridenidsa pohnadeni tedsejemacca ima huati tajari: –Jidapana Ejitohuaji timadimanaccaraha nidsa dsotodepi Diodsajine jai tijeninenitohui. Nadsapi otone naqui dsojo tinanimanana, icca abicca dsamabote Canahadsana ppa tidsanimananijine –napohui nade huatia-jaradsama.

²³ Maittaccadsama *Moisesicca abi amideni naco Diodsa jehe quinahissa tadsapa poccadeni ejedeni inajimamanajari.

Pohuadenipa: –Dio icca ejedeni ecahuahitohui –quinadsapa dsama Ejitocca taminecca dosseniji noppineni cappinamanagerajari. Taminecca dossehepi: –Isaraeri potemahidenicca ejedeni maqquideje tossonamanadsapa totojica nana –nanaja najari quinade. Naraha Moisesi tossonadsapa pocca abi amideni: –Icca ejedeni bica tahi, dsoqqe-jarana –quinadsapa abadsico huatimade tocajari naha inajimamanajari. ²⁴Moisesi biji ccaradsapa Diodsa jehe nahissa tajari. Tossonapohuipa Ejitocca tamine bedenicca medse tojaporaha napidsapa pohuadsa: –Tamine bedenicca medse –quinahijine jipera tajari. ²⁵Pohuadsa ajijaro namicca imapi imasiri. Najarodsa huatidsehijine jipera tajari. Najaropi jicaca tani nahato tajari. Pohuapa Diocca madijadsama najidsohue tonahanahijinena pohuadsa bica tajaro. ²⁶Moisesipa Diocca madija tedseje pohuadeni Idinide Cristo ccajonahi tohui madimanajari. Najarojine ocasserehe inahanamanajaro. Naraha Moisesipa pohuadsa Diocca biquehe tojanitohui nahato tapojari. Najaro tohuira madidsapa dsama Ejitocca biquehe tohuini najarajari. Diocca biquehena pohuadsa denima bica tajaro. ²⁷Moisesipa Diodsa jehe nahissa tadsa Ejitodsa nebodsapa toccajari. Ejitocca taminecca huadie noppineni cappina-jarajari. Diocca dossenijissa inananijinena dissera tajari. –Epeje onana –najarajari. Ia Cacahuade Dio ahuatora taraha Moisesipa pina Dio qqui tajarissa nadsa pocca dossenijidsa ibora tajari.

²⁸Moisesipa Diodsa jehe nahissa dsanapodsapa ejete *Pascoa inahatopojaro. (Pascoa ettidsapi: Dio tossoniqquimajari, inajaro.) Moisesipa pocca madija Isaraeri potemahideni icadossebaqqijari, poccadeni noccobiji inidicca ahuadsa



edede emene sse naridsamanahijine. Nama quinadsapa Diocca dodosse memehuaicca madija nanajicade ccajonadsa poccadeni ejedeni maqquideje tahidecca inajica-jarajari. Poccadeni odsadsa tossoniqqumajari. Naraha dsama Ejitocca madija-denicca odsadsa edede emene nohueradsapa huapimacca ejedeni maqquideje tahidecca inajicajari. ²⁹Dsotode Isaraeri potemahideni Diodsa jehe quinahissa tajari. Dsama Ejitodsa jahininedsa jai tojadsapa coridsa imeni onini Mar Rojocca passo Diojine carobedsa nami joco tadsapa jai tojeqqumahissa tajari. Naraha Ejitocca soldadodenipa coridsa bacco toquinadsa: –Jina, nema nehe qquidso inabaquina –quinadsapa huapima je tocaniredsa tojicajari.

³⁰Isaraeri potemahideni Diodsa jehe quinahissa dsanapodsapa Pohua Attidsa iboraqquri najari. Nadsapa odsa panani Jeriocca siba hua nahuajanini idenihuaji jai huajani, jai huajani, jai huajani dsanapodsapa huada 7 nehe bacco tadsapi Diojine siba hua nahuajanini barari-ridsadsa cojo nahuajanijaro. ³¹Rahaba naqui huananariraha Diodsa jehe nanissa tadsapi odsa panani Jeriocca madija Diodsa iboqquri najari-denidsama dsoqqe-jerajaro. Ponipi aja Isaraeri potemahideni pamaha Jericohuaji noccodsade huedajonapodsapa pohuadeni acco icamabaqquijari. Nadsapa siba hua nahuajanini Diojine bararidsa cojo nahuajanidsapi Isaraeri potemahideni jai tojedsimadsapa Jeriocca madija huapima inajicabaqquimanaraha Rahaba ponina dsori tajaro.

³²A, Diodsa jehe quinahissa tajarideni huapi tade. Najarideni huapima tahimarideni dsodo onanijine opajirajerani. Pina Jedeo, Baraca, Sason, Jepete, Dabi, Samohue quinajaridenicca, Dio Atti cacomeraqquri najaridenicca naqui huapima tahimarideni bica tade. ³³Najarideni huapimapa Diodsa jehe quinahissa tajari quinade. Ohuahadenipa jadsiredsa dsama onihicca madijadsa deni toquejenajari. Ohuahadenipa pina Dio Attissa inanamanadsa imarideni icattemamanadsa inapajiramananissa tajaro. Ohuahadenipa Dio huati tapojarissa najaro pohuadenidsa tojajaro. Ohuahadenipa dsomaji ajarideni pina moda naridsajarissa nadsa dsori tocanirejari. ³⁴Ohuahadenipa dsippo jororoni ppocoraraha pohuadenidsa pina ohuujarossa nadsa imedeni

camana-jarajari. Ohuahadeni naco jadsirecca massitodsa dsoquemanahitohuiraha dsori tocanirejari. Ohuahadenipa tojaparimanaraha Diojine todacoremani-manajari. Todacoramanadsa jadsire inanamanadsapi poccadeni huadi-denidsa deni toquejenajari. ³⁵ Amonejedeni naqui Diodsa jehe quinanissa tadsa ponidenicca madija dsoquemanadsapa Diojine camittemani-manajari.

Ohuahadenipa todsepe toquejenadsa najidsohue ihinahana-mana najaro. Dio inebomanadsa nanajidsodedeni tappa inabaqqui-manahijineraha najaro tohuini quina-jarajari. Bodideni nahatoqquri napodsapa: –Epeje, idsoquedsapi inahatoninitohui. Nadsana madie denima bica tanicca icajinijine –quinajari. Najarotohui mohuaradsa najidsohue ihinahanamana najaro. ³⁶ Ohuahadeni naco momohua inana-baqquimanajari, itacossimanajari, bijideni, issodeni cadenadsa jore inaridsabaqquidsa toponi cocorodsa coro coro ihidsimabaqquimana najari. ³⁷ Ohuahadenipa sibadsa iquinabaqquimanadsapa tojicajari. Ohuahadenipa huihuissidsa huissi ippiridsamanadsa tojicajari. Ohuahadenipa jadsirecca massitodsa itahuajinamanadsa tojicajari. Ohuahadenipa etero cajicamanadsa edede etero, cabra etero ssequi quinadsa huehuedsamana najari. Cappiramanahissa tajari. Nanajidso toquejenadsapa tohuati nahanaqquri najari. ³⁸ Diodsa jehe quinahissa tajaridenipa ajijaro dsamacca madija tabaccoraqquri najarideni tedseje quejemamanahijine ssamo tani. Nadsapa Diodsa jehe quinajaridenipa dsama huamonihuaji, ssono caji tanihuaji jajai tojabaqquiridsa najari. Odsa cappiramanadsapa ssonocca odidsa mamadiridsamana najari.

³⁹ Najarideni huapima Diodsa jehe quinahissa tadsapa Dio pohuadenidsa: –Bicaqquri tiquinani –najari. Dio nama naraha pohuadeni madimanadsa Pohua huati tapojaricca nema nehepi pohuadenidsa da inajerajaro. ⁴⁰ Pohua huati tapojaricca ima pohuadenidsa da inajerajaropi itohui bodi huatojari. Iadsa naqui Pohua huati tapojaricca inananitohui. Aja Diodsa jehe quinapojaridenipa jicaporaha iadsama Dio huati tapojaricca cajimanahitohui. Nadsana pohuadeni, ia huapima itassaqquidsa Pohua huati tapojari bicabote iadsa tojaridsamissa tanitohui.

Jeso tohuira icattomama canana

12 ¹Jehe, Diodsa jehe quinapojaridenipa huapi tade. Najaridenipa jicaporaha pina inoridsa domodeni huahuajanijarissa nadsa poccadeni jeheniji iadsa nohue quina-jaro. Nadsapi ia naqui pohnadenissa inananijine ajima inana: Icca jehenijidsa mohua mohua najaropi inebona. Imasiri naqui inebona. Ajijaro namidsa imadiccadsama Diodsa jehe inanissa tadsa imadidsanapona. Dacoco ijrana. Pina madija ittomedsa joppa tajarissa inana. Joppade diarahijine pocca etero huapicca ssiti, ohuaha ccanaja tahicca inebo nadsa joppa tajari. ²Pohua tedsejemara tocattadsa paja joppa tarihi nadsapa jicaquinihuaji bacco tajari. Ia naqui Jeso tohuira icattomama canana. Pohnapa icca jeheniji jinede. Pohnapa tahide Diodsa: –Jehe, Abi, Tettissa tinananijine tipajirani –napojari. Pohnajine icca jeheniji pajiranissa tajaro. Jesopa Imehihuaji toccamacossanidsapa huatidsehe imeni cajihitohui nahato tapojari. Najarojine ahua porimacossanidsa dsoqqeque inahanajaro. Aji ahua porimacossanidsa idsoqqenijinepi oppina taraha pohnapa cappina-jaradsa pohna ccaccorajaride. Nadsapa pajissa nahatonidsa Imehihuaji toccamacossanidsapa madija cacahuade tojahijine Dio Pohna inorihuaji huittaritari.

³Nadsama Jeso ocasserani ahujari tahimari tibodideni huahuatoma naji. Imasiri ssequiri najarideni pohnadsa tabaccorehe inanamanaraha nama naha tonahanajari. Tiadeni naqui tabaccorehe tinahanamanadsapi: –Tocasserani nani. Ohuapi epejena –tiquinejeraji. ⁴Jesopa tabaccorehe tonahanadsa dsoqqejari. Naraha tiadenipi tabaccorehe tinahanamanadsa tidsoqqeje cama-jeraccani. Nadsapi dacoco tijiraji, onajaro.

Satiacocca ima teppe

Santiago

Introducción: Ajijaro ima teppe dsododepa Satiaco. Jeso tahimari dsodo naniccadsa madija onideni Satiaco cacanimanahi 4 quinajari. Ojariapa Jesocca dodosseraha najaripa ajijaro ima dsodo inejerani. Jeso ohuaha Satiaco Dsodse bedina ajijaro ima dsodo inajaro quinahi nade.

Satiacopa Isaraeri potemahi jodio madijadenidsa dsodo inajaro. Pocca dsodonijipi: Jesodsa jehe quinajaridenipa ima bicanira inanananina bica tani. Jesodsa jehe najari ima bicani inana-jeradsapi pocca jeheniji ponima tojanitohui. Pocca dsodoniji onihipi: Iadsa ima onihi, onihi ssonaridsapi mohuaradsa inahananina bica tani. Ima ocassera tanicca ssonariraha Diodsa etidsedsanaponijine, najaro.

- | | |
|---------|---|
| 1.1-11 | Dissessera inana, icca jeheniji paji toccarini nanijine |
| 1.12-18 | Ima ocassera tanicca inahananijine iattana |
| 1.19-27 | Diocca marinaja ecahuanissa tajarocca ima |
-

–¿Nija? –najari Satiaco

1 ¹ ¿Nija, ohuemecotedeni? Ohua Satiaco Abi Diocca medse, ia Medsede Jesocristocca medse oजारopi tiadenidsa dsodo onajaro. Aji Isaraeri bedi 12 quinajari potemahi tiquejenajaro dsama huapimadsa timadiridsa-manajarodenidsa: –¿Bicaquiri tiquinaqui? –onajaro.

Dissessera inana, icca jeheniji paji toccarini nanijine

² Jehe, ohuemecotedeni, tiadenidsa ima onihi ssonari, ima onihi ssonari naraha tettidenipi: –Epeje. Nema nehe ohuatidseni –tiquinanina bica tani, onajaro. ³ Ajaropi nahatoqquri tiquinani: Tiadenidsa ima ssonarijaropi ticcadeni jeheniji ahuato tanijine tiadeni nattome tabaqqujaro. Ima ocassera taraha mohuaradsa Diocca dacorehema tinahanamanadsapi tidacoramanani nanitohui. ⁴ Nadsapi Diocca dacorehema ima tonahanade ticahatteraninijine dissessera tinaji. Nema

tiquinadsapi ticcadeni jeheniji Jesocristodsa pajiranissa tanitohui. Diodsa tidsepedeni ijimanani dsori tiquinejera-nitohui.

⁵Tibodideni ssamoqquiri tiquinadsapi Diocca nahatohue-tohui Pohnadsa huati tiquinaji. Diopa tiadenidsa da inanitohui. Pohnapa huapimadsa accora tajari. Tiadenidsa: –Poni. Ssamoqquiri tiquinani –najarahitohui. ⁶Naraha Diodsa huati tiquinadsa naqui tibodideni pajissa tiquinanissa tadsa huati huati titiquina naji. Tibodideni: –¿Diopa iadsa da inapadseje? ¿da inejerapadseje? –tiquinejeraji. Aja madija bodi nama najaripa pina coridsa imenicca passo jojodejine quehemama canajarossa quinajari. ⁷Madija bodi nama nadsapa: –Nidsa Dio ohuadsa da inanitohui –najarana. Diopa pohnadsa da inejeranitohui. ⁸Nama najaripa pohna bodi huatohue pamajaro. Diodsa pajissa nahissa tajaradsapa pohna bodicca ima cacajiqquimera dsanapojaro.

⁹Ohuemecotedeni, tiadeni motapi ticappiramanajaro. Ajimani tiquejenaraha tetidsemanaji. Diodsana deni tiquejenani. ¹⁰Naraha ohuemecotedeni tiadeni mota tidsepedeni ssequiri nadsapi Dio tiadeni ajimani tonanabaquijari. Naraha Diodsa tetidsemanaji. Pohnadsa tiquejenanipi ima denima bica tajaro. Aja dsepedeni ssequiri najaripa madi-manadsanapo-jarahitohui. Pina dsero mohuenissa quina-jari; jicahitohui. ¹¹Maji ppocoradsa dsero dsequeri nadsapi mohueni catoja tani. Dserocca biquehepi amossisi tani. Najarossa najaroa madija dsepedeni ssequiri najaripa denima cajimanahijine dsepedeni ihijimana naraha amossihuajahitohui.

Ima ocassera tanicca inahananijine iattana

¹²Madijapa ima ocassera tanicca pohnadsa ssonari, ssonari naraha mohuaradsa Diocca dacorehema inahanadsapi Dio pohnadsa huatidsehe da inajaro. Dio pohnadsa: –Jehe, tijine bica tani –nadsapa camittehe jiquejericca da inanitohui. Najaropi Dio huati tapojari, aja: –Madija ohuadsa huati-deni huanaqquiri najaridenidsa da onanitohui –napojari. ¹³Nadsama tibodidsa ima tabaccora tanijine tia ticadosseni-dsapi: –Dio ohua cadossejari –tejerana. Diopa ima tabaccora

tajaro tohuini najarajari. Nohuerahi. Diopa tabaccorehetohui ia totocadossebaquui najarahi. ¹⁴Naraha madija pohua bodidsa tabaccorehe inananijine ahuatomadsapi pohua tohuini nadsa tabaccorehe inananijine pohua cacadosse najari. ¹⁵Ibodi tabaccorehe tohuini dissera tadsapi imasiri inana tani. Naraha imasiri inana-dsanapodsapi dsoqqehe jiquejeraniccadsa imadi-dsanaponitohui.

¹⁶Ohuemecotedeni, tiadenidsa ohuati huana tani. Paji, tia tiadeni ticamaidsani-baquimana-jeraji. ¹⁷Huapima bica tani-cca, pajiranissa tajaro iadsa tojajaropi Dio memehuaji madijari da inaridsajaro. Diopa ssiajani jinede. Pahuadsapi dsidsini nohuerajaro. Pahuapa apaja nama dsanapojari; cacajiquimera-jarahi. ¹⁸Dio jipa tadsapa ajima inanjaro: Pohua Atti pajissehe ponira ia mari tocanabaquidsapa iadsa camittehe dsati inajaropaji. Nama najaripa pocca madija Pahuadsa bicaququiri inanjine. Pocca nahatonaja huapima Pahuadsa bicaququiri naraha iana Pahuadsa denima bicaququiri inajaropaji.

Diocca marinaja ecahuanissa tajarocca ima

¹⁹Ohuemecotedeni, tiadenidsa ohuati huana tani. Occa marinaja tetideni ajimamana-jeraji. Tiadeni huapima ima timittamananissa tanijine teribodeni ssiajaququiri nadsapi bica tani. Mohuaradsa tibodideni huatonissa tapodsana huati huati tiquinani bica tani. Amadsati tedimana-jerani naqui bica tani, onajaro. ²⁰Aja madija huadi tajaripa Dio Pohua jipa tahiccassa inana-jerani. ²¹Nadsapi ajijaro namicca tabaccorehe onihi, onihi najaro huapima tineboridsa-manaji. Mohuaradsa Dio Attidsara iboraququiri tiquinana. Dio Atti timittamana, Jesocristo tahimari timittamana najaroa tibodidenidsa madi-dsajaropaji. Najaro Jesocristo tahimaripa tiadeni tonassiaja-baquuihijine dacorajari.

²²Nadsama Dio Atti teribodenidsa timittamanani ojari-gerana. Dio Atti timittamanadsa Pohua Attissa tinamananina bica tani. Pohua Atti ponima timittamanadsapi tiadenira tiadeni ticamaidsani-manarana. ²³Madijapa Dio Atti mittaraha najarossa inana-geradsapi pocca ima pina pipiridsa pohua pano qqui tajarissa najari. ²⁴Pipiridsa pohua pano qqui taraha piti nahuajanidsapa huati ajama najarissa najari.

²⁵Naraha madija Dio Atti mittadsa huati ajama-jaradsapa bica tahi. Jesocristo ia todinibaquihijinecca marinaja iadsa pajiranissa tajaro. Madijapa najaro marinajadsa bodi huatoma huatoma nadsa najarossa inanadsapi pohua dsepe ijeccama Dio icatidsehitohui.

²⁶Madija pohua bodi: –Ohuapi Diocca ojani –naraha pohua ebenodsa imasiri huatide apaja najaradsapa pohua tocamaidsanijari. Pocca jeheniji Diodsa ponima tojajaro.

²⁷Naraha madija Diodsa jehe nahissa tajaripa ajijaro dsamacca imasiridsa quejema-jarajari. Ejedeni medse toquejenajari, amoneje tabira tocajamanajaro ocasserani ahuamanadsapa acco camade jipa tajari. Madija nama najaripa icca Abi Diodsa bica tajari.

Pedrocca ima teppe tahidecca

1 Pedro

Introducción: Pedropa Jesocca dodosse. Ajijaro ima teppepi dsama Asiahuaji madiridsamanajaridenidsa dsodo inajaro. Najaridenipa jodiodeni Jesodsa jehe quinajari. Nanajidso toquejena-dsapa dsama onihi, onihihuaji madimanahijine domo toccajari.

Pedropa najarideni bodideni acco icamabaquihijine dsodo inajaro. Jesocristocca toquejenarijine ocasserehe pohuadenidsa ssonariraha Pedrocca dsodonijipi: nema nehe ima bicanira tinanamana-dsanapona, Diodsara tetidsemanaji, najaro.

1.1-9 Dio ia tonassiajabaquihijine tohuini imadijaro

1.13—2.3 Imasiri jirehe timadimananijine Dio tiadeni tocattejidsabaquijari

4.12-19 Ocasserehe tiadenidsa ssonaridsapi ticappinamana tejeraji

5.1-11 Jesocristodsa jehe quinajarideni madimanahissa tahijine

—¿Nija? —najari Pedro

1 ¹ ¿Nija ohuemecotedeni? Tiadenidsa occa ima teppe dsodo onajaro. Ohua onipi Pedro, Jesocristocca dodosse oajaro. Otohui huahua nadsa ohua cadossejari, pohua tahimari huati onaridsanijine.

Tiadenipi Diocca tocattejidsabaququinaja tiquejenajaro. Jesocristodsa jehe tiquinajarodeni ticcadeni dsamahuaji timadimanaporaha tiadeni totamohuabaquimanadsa tijari-baquimanajarode. Aji dsama Pontohuaji, Carasiahuaji, Capadosiahuaji, Asiahuaji, Bitiniahuaji, najaro dsama huapimadsa tiquejenaridsajarodenidsa dsodo onajaro.

² Jehe, maittaccadsama Abi Diopa tahide nahato tapodsa: “Occa madija toquejenahijine” nadsa tiadeni tocattejidsabaquipojari. Pohua Corimejine tibodideni inahireridsajaro, Jesocristo pohua emene toccajarojine naqui ticcadeni imasiri

tomossijaro. Nadsapi tibodideni huireququiri nadsa Pohua Attidsa iboraququiri tiquinanijine tipajiramanani.

ICca Abi Dio tiadeni tocatidsebaququijaripa tiadenidsa huati cahanari cadsanapona, onajaro. Tibodidenidsa naqui pocca jonehe tojadsanapona, onajaro.

Dio ia tonassijabaququihijine tohuini imadijaro

³Diopa ia Medsede Jesocristocca Abi. Pahuadsa etidsedsa ettipi: ¡Abi Dio bica tinani, deni tijani! inana, onajaro. Pahuapa itohui huati cahanari canadsa Pahuajine ibodi dsati tojajaro. Pina issonapomajarossa inajaro. Jesocristo dsosquedsa nahatonijarijine ia naqui: “Idsoququeraha inahatonidsa imadipomanitohuia” inadsapi inajorajaro. ⁴Najaro tohuini imadijaropi iadsa pajissa tojanitohui. Memehuaji Dio madihidsapi iadsa inananijinecca Pahuana ecahuajaro. Najaro iadsa da inanijinepi bica tanicca ponira. Totabaccoranijine ssamo tani, jicanijine naqui ssamo tani. ⁵Tiadeni Diodsa pajissa tiquinajaropi Dio pocca dacorehedsa tiadeni tohuacahuabaququi-dsanapojari. Pocca dacorehedsa timadimanadsapi nidsa dsama jicanicca huada bacco tadsa pocca tossiejehe najorapojaro tiadenidsa tojanitohui.

⁶Najarotohui tetidsemaneri naraha ajijaro dsamadsa timadimanaccadsapi ocasserehe tinahanamanaccanitohui. Naraha nema nehe tetidsemaneri nana. ⁷Tiadenidsa ocasserehe ssonarijaropi ticcadeni jeheniji nattome najaro. Ticcadeni jehenijipi pina orossa najaro. Ocasserehepi pina dsippossa najaro. Ticcadeni jehenijipi ocasserehedsa nattome najaropi pina oro dsippodsa nattome najarossa najaro. Oropi dsippo ppoconijine totabaccora-jerani. Bica tehe toja tani. Ticcadeni jeheniji naqui ocasserehedsa nattome nadsa dacoradsapi pina orossa najaro bica tajaro. Naraha oropi ajimani, jicaca tani. Ticcadeni jehenijina denima bica tajaro. Najaropi jiquejerani. Jesodsa disseraququiri tiquinadsapi nidsa Jesocristo ccanipomadsa jidsera nani dsapa Diopa tiadenidsa huatidsedsa ajama nahitohui: “Jehe, bicaququiri tiquinani. Ticcadeni jeheniji ponima tojajerani. Occa deni tojehe, occa dacorehe tiadenidsa tojaji” nahitohui Abi Dio.

⁸Tiadenipi Jesocristo qqui tiquinapo-jararaha pohuatohui tetideni huanaququiri najaro. Jidapana naco pohua

qqui tiquina-jararaha pohuadsa pajissa tiquinajaro. Nema nadsapi tibodidenidsa huatidsehe imeni anijaro. Najaro huatidsehepi pina ajjaro namicca huatidsehessa nejerani. Tecomeramananijine tettidenidsa pajira-jeranitohui. ⁹Jehe, Jesocristodsa jehe tiquinajarojinepi Dio tiadeni tonassiaja-baqquihitohui. Najarotohui tetidsemaneri najaro.

***Imasiri jirehe timadimananijine Dio
tiadeni tocattejidsabaqqijari***

¹³Jehe, icassiejeranijinecca ima timittamanadsapi najarotohui tinajoramanehe timadimanaji. Ima bicani tinanamananijine tibodideni huatonissa taji. Nidsa Pohua Bedi Jesocristo ccanipomadsa jidsera nanidsapa Dio pocca biquehe onihi onihi tiadenidsa da inanitohui. Najarotohui tibodideni najorana, onajaro. ¹⁴Tahidepi Jeso tahimari icassiejeranijinecca ssamoqquri tiquinadsa tabaccora tanicca tohuini tiquinehe timadimanaporaha jidapapi nema tiquinejeraji, onajaro. Dio Attidsara iboraqquri tiquinaji. Pina ejedeni imehideni attidsa iboraqquri najarissa tiquinanijine, onajaro. ¹⁵Diopa pocca madija tiquejenanijine tiadeni tocattejidsabaqqijari. Pihuapa imasiri ssamo taja najari. Pohua bodipa ssiaja huire tajari. Nema nadsapi tiadeni naqui tibodideni ssiaja huire tadsa imasiri jirehe timadimanaji. ¹⁶Aji Dio Pohua Atti dsodo nanidsa anijaropi ajima nani: “Tibodideni ssiaja huire tadsa imasiri jirehe timadimanaji. Pina ohuassa tiquinaji. Ohuatti nema onajaropi obodi ssiaja huire tajaro. Imasiri ssamo onani” nahi nade Dio.

2 ¹Nadsapi Dio Attijine tibodideni dsati tojadsapi ticcadeni tabaccorehe nema nehe tinebomanaji. Maidsehe naqui tinebomanaji. Tettideni bica taniccadsa huati huati tiquinaraha ticcadeni madijepi tettidenissa nejerani. Najaro maidsehe naqui tinebomanaji. Madija pohua cajijari acconi naqui tedimana tejeraji. Ima ponimacca huapima huati huati naqui tinebomanaji. ²Dio Atti pajissehecca ponira tohuina disseraqquri tiquinaji. Huajjiradsa Pohua Attira titimittamana naji. Pina ejedeni tossone dsati imeni dsojorinitohui dissera tajarissa tiquinaji. Nema tiquinadsapi Diodsa ticcadeni jeheniji todacoranitohui. Tossiejehe naqui ticajimananitohui. ³Jehe, ia Medsede tiadenidsa bica tahi nahatoqquri tiquinani, pocca biquehe tecatamamanajaro.

***Ocasserehe tiadenidsa ssonaridsapi
ticappinamana tejeraji***

4 ¹² Ohuemecotedeni, tiadenidsa ohuati huana tajaro. Ocasserehe tiadenidsa ssonarijaropi pina dsippossa najaro; ticcadeni jeheniji nattome najaro. Diopa tiadenidsa ocasserehe ssonarinijine ecossa-jeradsapi tinahanamanaanitohui. Naraha tijabojomana tejerana. “¿Nejecotohui Jesocca ojaraha ohuadsa ima ssonarijaro?” tiquina tejeraji. ¹³ Pina tetidsemanaji. Jeso naco ocasserani ahujari. Pina tiadeni tinahanamanajarossa najaro pohuadsa naqui tojapojaro. Nidsa pohua ccanipomadsa pocca deni tojehe ahuatoto inanadsapi tetidsemaneri nanitohui. ¹⁴ Nadsama Jesocristo onidsa tiquejenajarojine madija tiadenidsa attideni tabaccora tadsa atti atti quinadsa naco nema nehe tetidsemanaji. Dio tiadenidsa ima bicani inanajaro. Dio Corime Dacorabote tiadenidsa tojadsapa nama dsanapohuitohui.

¹⁵ Aji ocasserehe tinahanamanajarocca ima huati huati onajaropi tabaccorehe tinanamanajaro manaconi jerani. Madijapa tabaccorehe inanaridsamanani caji tani. Pina ijine ahuadsa, pina botidsa, pina imasiri inanadsa, pina madija ohuahacca imadsa quejemadsa. Nama quinajaridenidsapi najidsohue ssonari tani. Naraha tiadenipi nema tiquinejeraji. ¡Poni! onajaro. ¹⁶ Naraha Jesodsa tiquejenajarojine tiadenidsa ocasserehe ssonaridsapi ticappinamana tejeraji. Pina Diodsara tetidsemanadsa Diodsa: “¡Jehe, epeje, bica tani! Jesodsa ojararojine ocasserani ohujaro” titiquina nana, onajaro.

¹⁷ Diopa madija huapimacca ima icattemanijinecca huada bacco tani. Tahidepi ia Pocca madija iquejenajaro icca ima icattemaponitohui. Aji jidapana iadsa najidsohue ssonari najaropi ajimani ocassera taraha nidsa dsotode Diodsa iboqquri najari aja Jesodsa jehe quina-jarajari pohuadenidsana najidsohue denima ssonarinitohui. A, pohuadenipa najaro najidsohue inahanamananijine pajiramana-jarahitohui, onajaro. ¹⁸ Dio Atti dsodo nanidsa najaro imassa najaro anini. Najaroa aji: “Diodsa iboraqquri najaridenipa tocassiejerahijine pohuadenidsa najo taraha nema nehe inahanamanajaro. Naraha Diodsa iboqquri najarideni, aja imasiri sseqquri najaridenipa

tocassiejerahijine pohuadenidsa ¿najora taqui? ¡Ssamo tani! Denima najo tani” naponi nade Dio Atti dsodo nanidsa.

¹⁹Nema nadsapi tiadenidsa ajima onajaro: Dio ecossa-
jeradsa ocasserehe tiadenidsa ssonariraha nema nehe bicanira
tinanamana-dsanapona, onajaro. Diopa tiadeni Nahatode.
Pohua dsepedsa tiquejenaji; tiadeni tohuacahuabaquihitohui.
Pohua huati tajarissa inananitohui.

Jesocristodsa jehe quinajarideni madimanahissa tahijine

5 ¹Ajjaro imapi Jesodsa jehe quinajarideni cacahuade-
denidsa dsodo onajaro. Ohua naqui pina pohuadenissa
onajaro Jesodsa jehe quinajarideni cacahuade ojani. Ohuapi
Jesocristo ocasserani ahuahi onocodsas qqui onajarocca ohohua-
comeraridsa najaro. Nidsa Jeso pohua ccanipomadsa pocca deni
tojehe tojaridsadsapi pohuadenidsa, ohuadsa naqui tojanitohui.
Nema nadsapi pohuadenidsa ajima onajaro: ²Ticcadeni mamari
tabaqqi Jesodsa jehe quinajari tecahuabaquimanahissa
tajo. Diocca madija cacahuade tiquejenajaropi Dio Pohujine.
Tibodidenipi: “Pohuadeni maride jipera onaraha nema nehe
mari ocanabaquina” tiquinejeraji. Tibodideni huatidsemanadsa
pohuadeni maride iboraqqiri tiquinana, pina Dio jipa tahi-
ccassa tinanamana. Tibodideni naqui: “Dsiniro huemani
ohuadsa tojanijine pohuadeni mari ocanabaquina” tiquinejeraji.
Tibodideni bicaqqiri nadsa pohuadeni acco acco titicanabaqqi-
mana nana, onajaro. ³Tibodidenipi: “Pohuadeni cacahuade
dacorajari ojana” tiquinejeraji. Johuahueraqqiri tiquinadsa tetti-
deni bica tadsa pohuadeni tetecahuabaquimana nana. Ticcadeni
madie bica tanijine timadimananissa taji. Timadimananissa
tadsapi ticcadeni mamari tabaqqi pina ticcadeni madiessa
quinahijine. ⁴Nema tiquinadsapi Jesocristo ia Cacahuade deni
tojahicca pohua ccanipomadsapa pocca deni tojehe tiadenidsa
inanaridsanitohui. Najaro pocca daniji bicanipi jiquejeranitohui.

⁵Jehe, dsabissodeni, tiadenidsa naqui ohuattipi: Jesodsa jehe
quinajari cacahuadedeni attidenidsa iboraqqiri tiquinana, onajaro.

Nadsapi Jesodsa jehe tiquinajaro huapima tiadenidsa
ajima onajaro: Timecotedenidsa tiadeni deni tinanamana-
jeradsa mohuaradsa tibijideni acco acco titicana nana. Nema
onajaropi Dio Atti dsodo nanicca imapi ajima najaro:

“Diopa madija: ‘Ohuana deni ojani, nahatojide ojirani’ quinajaridenidsa jipera tadsapa pohuadenidsa huadibote najari.

Naraha madija: ‘Ohuapi ajimani ojani’ quinajaridenidsana huati huana tadsa najarina acco icamajari.”

⁶Nadsapi tibodidenia: “Jehe, ohuapi ajimani ojani” titiquina nadsapi Dio Dacorajaridsa iboraqquri tiquinaji, onajaro. Nadsapi nidsa dsotode Dio Pohua jipa tahicca huada bacco tadsana Pohuapa tiadeni deni tonanabaqquihitohui. ⁷Diopa titohuideni huati cahanari canajarijine tiadeni tohuacahua-baqquidsapanojari. Nadsapi Pohuadsa tettidenipi: “Abi Dio, obodi huatoto cananikka tinahireji, pina ocappinanicca, oji onanikka, ocappiranicca naqui huapima obodidsa anijeranijine epeje tinanaji” titiquina nana, onajaro.

⁸Tiadenidsa ohuatti onihi naqui: ¡Paji, tinocodeni panaji! Diocca huadi, ticcadeni huadi naco *Satanapa pina dsomaji imehibotessa najari. Ia quino nahijine itohui totororo naridsa-jarissa najari. Tibodideni huatomamananissa tadsa tiadeni tecahuamanaji, Satanajine tabaccorehehuaji tiedimamanajeranijine. ⁹Dacoraqquri tiquinadsa ticcadeni huadidsa tiejidsamanaji. Diodsara disseraqquri tiquinaji, ticcadeni jeheniji todacorani nanijine. Icca huadipa imecotedeni Jesodsa jehe quinajari huapima inajaparibaqquihijine dissera tajari. Naraha ajijaro imapi nahatoqquri tiquinani: Ticcadeni huadi pohuajine ocasserehe tinahanamanani ojari tiquinejerani. Jesodsa jehe quinajarideni dsama huapimadsa madiridsamanajari naco ocasserehe ihinahanamana najaro.

¹⁰Jidapana tiadeni naqui ocasserehe tinahanamanaccani. Naraha nidsa jicadsapi Dio tiadeni tonabicabaqquihissa tahitohui. Jeso tinebomana-jarahijine ticcadeni jeheniji inapajiranissa tanitohui. Pohuapa tibodideni tonadacorabaqquihitohui. Jesodsa disseraqquri tiquinanijine tiadeni acco tocamabaqquihitohui. Jehe, tetideni ajimamana tejeraji: Abi Diopa itohui huati cahanari canadsa pocca cacahuehe bicanidsa imadidsanaponijine ia tocatejidsabaqquijari. Nanihuajipi pocca deni tojehe nema dsanaponidsa Jesocristo tedseje imadidsanaponitohui. ¹¹Pohuapa ia Cacahuade Dacorabote. Pohuana nahatojiderajari. Pocca cacahuehepi jiquejeranitohui. ¡Nema dsanaponitohui!

Pedrocca ima teppe dsotodecca

2 Pedro

Introducción: Pedropa jodiodeni Jesodsa jehe quinajaridenidsa ima teppe onihi dsodo inapomajaro. Pocca ima teppedsa mari icana-baqquijari, poccadeni jeheniji todacorani nanijine. Diodsa madi-manahissa tahijine naco mari icanabaqquijari.

Ima onihipi Jesocristo ccanipomahicca ima dsodo inajaro.

1.1-11 Diopa icca madie bica tanijine ibodi acco
tocamabaqquijari

3.1-15 Ia Medsede Jesocristo ccanipomahi tahimari

-¿Nija? -najari

1 ¹ ¿Nija ohuemecotedeni? Ohuapi Ssino-Pedro, Jesocristocca dodosse ojararo. Pocca marinaja mari ocanabaqquiridsa-hijine ohua cadossejari. Nema nadsapi occa ima teppe dsodo onapomajaro tiadenidsa. Jesocristopa icca Dio, ia Tonassajade. Puhuapa tiadenidsa bica tajari, pocca ima tiadenidsa pajirannissa tajaro. Puhujinena pahuadsa pajissa tiquinajaro, pina ia pahuadsa pajissa inajarossa tiquinajaro. ² Diodsa tinoccodeni tojidseradsanaponijine, ia Medsede Jesodsa naqui tinoccodeni tojidseradsanaponijine titohuideni Diodsa huati huati odsanapojaro. Abi Dio tiadeni tocatidsebaqquijaripa tiadenidsa huati cahanariri cadsanapona, onajaro. Tibodidenidsa naqui pocca jonehe tojadsanapona, onajaro.

Diopa icca madie bica tanijine ibodi acco tocamabaqquijari

³ Dio pocca dacorehedsa ibodi acco tocamabaqquijari, icca madie dsati tojanijine. Puhua Attidsa iboraqquiirinijine naqui ia tonapajirabaqquihissa tajari. Diopa ibodi acco tocamabaqquijarijine Jesodsa nahatoqquiiri inajaro. Jeso pocca deni tojehe, pocca biquehe icajinijine ia huahua

tabaqqujari. ⁴Ajjaro namicca tabaccorehe tohuini inajaro-ccadsa ia inatabaccoranijneraha Diocca dacorehe bicanijine dsori icanirejaro. Dio pocca acco camehe iadsa da inajaropi pina Pohua huati tapojarissa inanajaro. Najaro pocca danijipi deni tojani, bica tani. Najaro iadsa tojajaropi icca madie pina Diocassa inanijine. ⁵Nema nadsapi ticcadeni jehe-niji todacorani nanijine dissessera tinaji. Ima bicanira tinanamanaji. Ima bica tanicca, Dio jipa tahicca nahatoqquri tiquinanijinepi Diocca tohuatthetohui dissessera tinaji. ⁶Tibodidenidsa tohuini tiquinanicca tabaccorehedsa “poni” tiquinanijine ticahatteraji. Ima ocassera taniccadsa, ima najo taniccadsa tedimana-jeradsa mohuaradsa tinahanamananijine ticahatteraji. Ticcadeni madie Diodsa tinanamanadsapi Pohua jipa tahiccara titinanamana naji. ⁷Ticcadeni madie denima bica tanijine ajima tiquinaji. Jesodsa jehe quinajaridenidsa: –Imecotedeni –tiquinadsapi pohnadenidsa bicaqquri tiquinaji. Nema tiquinadsapi madija huapimadsa naqui tetideni huanaqquri naji.

⁸Jehe, najaro ima bicani onihi onihi ticahatteradsa, ticcadeni madie Diodsa tobicadsanapodsapi ticcadeni jehe-niji ponima toja-jerani. Ia Medsede Jesocristodsa nahatoqquri tiquinadsapi pajissa ticcadeni madiedsa ahuato tanitohui. ⁹Naraha madija Jesodsa jehe naraha ima bicani tohuattattera tajaripa, pocca madie Diodsa tobica-jeradsapi pohnapa pina mitta-jarajarissa najari. Pohnapa pocca imasiri tahidecca Dio epeje inanapojaro huati ajamajari. ¹⁰Jehe ohuemecotedeni, tiadenipi pina najari madijassa tiquinejeraji. Dio tiadeni huahua tabaqqujaripa Pohnadsara ibobora tinanijine. Tiadeni tocattejidabaqqujari, pocca madija tiquejenanijine. Pajissa pocca madija tiquejendsanaponijine tohuini tiquinadsapi denima tidissesserani naji. Nema tiquinadsapi imasiridsa tiedimamana-jeranitohui. ¹¹Nadsapi nidsa dsotode Diocca cacahuehedsa bacco tiquinadsa Dio tiadenidsa huatidsedsapa jai tijedsimanijine noccobiji inahabanitohui. Nanidsa jai tijedsimadsapi ia Medsede, ia Tonassajade Jesocristopa tiadeni tohuacahua-baqqui-dsanapohuitohui.

Ia Medsede Jesocristo ccanipomahi tahimari

3¹Jehe, ohuemecotedeni, titohuideni ohuati huana tani, ajijaro occa ima teppe pina tahideccassa najaro tiadeni acco ocamabaquiniijine tohuini onadsa dsodo onapomajaro. Najaro ohuattidsa tibodideni huatonissa tanijine onadsa dsodo onajaro. ²Aji maittaccadsama Dio Atti cacomeraquiquiri najarideni huati toquinapojaricca naqui tibodideni huatoma-manaji. Aja ia Medsede, ia Tonassiajade Jesocristocca dosseniji pocca dodosse tabaqqi ia tiadenidsa ecomerajaro naqui tibodideni huatoma-manaji, onajaro.

³Tahidepi ajijaro ima tetideni ajima tejeraji. Dsama jicani tohuajirajonadsapi madijapa tabaccora tanicca tohuini disseraquiquiri najarideni bacco quinahitohui. Najaridenipa pohuadeni attidsa tiadeni tohuattajobaqqi-manahitohui. ⁴Attideni ocassera tadsa: –Jesocristo pohua ccanipomahicca ima huati huati taporaha ajana ¿ccanico? Ccani-jarahi. Ajina, dsama nahatoponidsama icca idideni jicajonaja najonapohui nahi. Dsamapi jicanijine ssamo tani. Nema dsanaponitohui –quinahitohui. Naraha najaropi pajissa jerani. ⁵Madija attideni nama quinajaridenipa ssamoquiquiri najari. Diopa maittaccadsama meme, nami inahatopojaro tahimarini bodideni huato-manahijine jiperaquiquiri najari. Diopa Pohua Attidsa: –Passo titassaquiniiji nami aninijine –nadsa nema najaro. ⁶Dsotode naqui Diojine passo ppanimadsapi dsamadsa animanapojari huapima je tocaniredsa jicajari. ⁷Naraha aji jidapana qqui inajaro meme, namipi nidsa dsotode Pohua Attidsa huati tapomadsapa diji tehe jicanijine. Najaro najidsohuepi Dio Pohua ecahuaccani. Nidsa madija huapimacca ima cattemanijinecca huada bacco tadsa Dio Pohuadsa iboquiquiri najarideni inajidsobaqquidsa meme, nami naqui diji tehe jicanitohui.

⁸Jehe, ohuemecotedeni, tiadenidsa ohuati huana tani, ajijaro ima naqui tetideni ajima tejeraji. Diodsapa huajano mil nahapa pina huada ojariessa najari. Huada ojarie naqui pina huajano mil ssa najaro. ⁹Ia Medsede Diopa nama naraha madija mota attidenipa: –Dio Pohua huati tapojarissa inananijine najo tahi. Ajana, Jesocristo ccanihicca huada tonajoni –quinajari. Naraha Diopa najo-jarahi. Mohuaradsa titohuideni

madicajari. Puhuapa madija huapima paja jicarihijine jipera tajari. Ojaria dsoqquehijine naco jipera tajari. Puhuapa madija huapima bodideni cacajiquimeradsa Pahuadsa toquejena-hijine tohuini najari.

¹⁰Naraha ia Medsede ccanipomahicca huada pajissa bacco tadsapi pina bobotide icca odsadsa amadsati bacco nadsa ijabojo najarossa nanitohui. Nadsapi mohuini oppinabote dacorehe tomohuidsapi meme amossi nanitohui. Memehuajicca maji, abadsico, abadsico bedi naco diji taridsaha jicahitohui. Dsama nema nehe najidsohue cajidsapi ponidsa animanajarideni huapima diji taridsaha jicadsapa amossihuajahissa tahitohui.

¹¹Nadsama meme, nami jicani tahimarini timittamandsapi ¿nejecoma tiquinani bica tani? Aji najidsohue tiadenidsa toja-jeranjine ajima tiquinanina bica tani: Diodsara ibobora tinadsa imasiri jirehe timadimananissa taji, onajaro. ¹²Jehe, ia Medsede ccanipomahicca huada bacco tanijine tohuini tiquinadsapi najaro huada tonajodsanapo-jeranjine Diodsara tidsepedeni ijimanadsanapoji. Dio dsama inajicanicca huada bacco tadsapi jororoni ppocorabote oppina tehe diji tadsapi memehuajicca maji, abadsico, abadsico bedi naco huapima diji tajarojine ssahuemadsa amossihuajaridsahitohui. ¹³Naraha ia Dio Pocca madija iquejenaropi Dio Pohua huati tapojaricca tohui inajorajaro. Pohua Attipa: –Nidsa meme dsati bicani, nami dsati bicani onahatoridsanitohui –napojari. Najaro dsama dsatidsapa madija bicaquiqui najaridenira imasiri jirehe madimanahissa tahitohui. Najaro tohui imadijaro.

¹⁴Ohuemecotedeni, titohuideni ohuati huana tani, najaro ima huapima tojanitohui timadimanaccadsapi Diocca jonehedsa timadimananjine dissessera tinaji. Imasiri tinanamana-jeradsa timadimanaji. Nadsapi Dio baccuhuaji tidomo huadsa imasiri jirehe tiadeni qqui tabaqquihijine.

¹⁵Tetideni ajima tejeraji: Ia Medsede Diopa icassiejeranjine tohuini nadsa mohuaradsa itohui madicajari. Najaro imapi imecote bicahi Pablo naco pahuadsa Djojine ahuato tadsa tiadenidsa dsodo inapode.

Huanocca ima teppe tahidecca

1 Juan

Introducción: Huanopa Jesocca dodosse tabaqqi ojaría. Jesodsa jehe quinajaridenidsa dsodo inadsapi: –Occa ejedenissa tiquinajaro –najari. Pocca dsodoniji tahideccapi Jeso tahimari. Ima teppe onihi naqui dsodo inajaro. Dsotode ima teppe onihi dsodo inapomajaro. Dsotode jadahi tocajadsa naco Apocalipsis dsodo inajaro.

Jesodsa jehe quinajaridenidsa dsodo inajaropi Diopa ssiaja tahi, Pohua Bedi Jesocristo naco imasiri cappirahi, najari. Pocca dsodoniji onihipi: Imecotedeni tedseje eti cahanerara cananina bica tani. Diodsa imadinissa tanijinepi imasiri jirehe imadina, najaro.

- 1.1-4 Jesocristopa Dio Atti camittehecca
 - 1.5-10 Diopa ssiaja tahi
 - 2.1-2 Jesocristopa icca ima cacattemade
 - 2.3-11 Diocca marinajadsa ibobora inana
 - 3.1-10 Diocca ejedeni iquejenajaro
 - 4.7-21 Diodsa eti huana tadsapi imecotedsa naqui eti huana tanijine
-

Jesocristopa Dio Atti camittehecca

1 ¹Imecotedeni, tiadenidsa Dio Atti camittehecca ima dsodo inajaro. Najaripa dsama toja-jeraccadsama madipojari. Jidapana naco madihi paja nahi. Iapi pohua atti imittade, assire naco qqui inade. Pohuadsa jaijaridsadsa inoccodsa qqui idsanapode. Idsepedsa naco huapi bara inade. Najaripa Dio Atti camittehecca. ²Diopa najaro camittehe iadsa nohue inajarode. Najaro camittehe qqui inajaropi aji ecomeraridsa-jaropaji. Tiadenidsa naqui najaro camittehe jiquejeranicca tahimarini huati inajaropaji. Najaro camittehepi Abi Diodsa anipojaro. Najaro iadsa ahuatojarode. ³Nadsama aji qqui inajaro, imittajaro tiadenidsa huati inajaropi iadsa tijariqqi-mananijine. Pina ia Abi Diodsa ijariqquijarossa, Pohua Bedi

Jesocristodsa naqui ijariquijarossa tiquinanijine. ⁴Aji ima dsodo inajaropi ticcadeni huatidsehe pajiranissa tanijine.

Diopa ssiaja tahi

⁵Aja Jesocristo ia mari tocana-baqquijaricca imaha aji tiadenidsa huati inajaropaji: Diopa ssiaja tahi. Pehuadsapi dsidsini nohuerani. ⁶Ettipi: –Diocca iquejenani –ihinanaraha dsidsinidsa jajjaridsadsapi imaidsajaro. Pajissehe imittaraha najarossa inana-gerani. ⁷Naraha ssiajanidsa jajjaridsadsapi pina Dio ssiaja taha madijarissa inanijine. Nadsapi imecotedeni tedseje ijariquijaropaji. Dio Bedi Jesocristo emene naqui icca imasiri huapima inanamossi-dsanapojaropaji.

⁸Ettipi: –Imasiri ocappirani –inadsapi ia icamaidsa tani. Pajissehe iadsa nohuerani. ⁹Naraha nahatoto inani: Diodsa icca ima ecomeradsa: –Occa ima tabaccora tani. Imasiri ocajini –inadsapi Diopa icca imasiridsa: –Epejena, ohuadi-gerani –najari. Icca tabaccorehe sse inajaro. Dio nama najaripa maidserehe caji-jari. Pocca imapi toccanissa tajaro. ¹⁰Pohua Attipa: –Madijapa imasiri cajiridsamanajari –najari. Naraha ettipi: –Ohuapi imasiri ocappirani –inadsapi pina: –Diopa mamaidsade –inajarossa najaro. Nema inanadsapi ibodidsa Dio Atti nohuerani ahuatoto tani.

Jesocristopa icca ima cattemade

2 ¹Ohuemecotedeni, tiadenipi occa ejedenissa tiqui-najaro. Ajijaro ima tiadenidsa dsodo onajaro, imasiri tinanamana-geranijine onadsa. Naraha imasiri tinanamana tani. Imasiri tinanamansapi ticcadeni ima cattemadepa Abihuaji anih. Najaripa Jesocristo. Pahuapa imari pajiranissa tajaro. ²Aja Jesocristo itohui pohua ccaccoradsapa dsoqqe-jaripa icca tabaccorehe inanamossidsa Diodsa ibicanijine. Icca imasiri manaconi tojajaripa ia motta ojari inanicca manaconi toja-jarahi; madija dsama huapima madiridsa-manajaridenicca imasiri manaconi tojajari pahuapa.

Diocca marinajadsa ibobora inana

³Diocca marinajadsa ibobora inadsapi nahatoto inajaro: Pajissa Diopa iadsa jidsera tajari. ⁴Naraha madija ohuaha attidenipa: –Diodsa nahatoto inani –quinaraha Diocca marinaja

ecahuamana-jeradsapi maidsamanajari. Pajissehepi pohuadenidsa anijerani. ⁵Madijapa Diocca marinajassa inamanajarodenina Dio Pohuadsa huatideni huanaququiri najari. Poccadeni tohuati huanehepi Diodsa pajiranissa tajaro. Ijine ima bicani nema nadsana nahatoququiri inajaro. Pajissa iapi pocca iquejenajaro. ⁶Madija attipa: –Diocca ojani –nadsapa, pocca madie pina Jesocca madiessa nadsana bica tani.

⁷Jehe, ohuemecotedeni, Diocca marinaja tiadenidsa dsodo onajaropi dsati jerani. Aji tahide timittamana-pojarocca tiadenidsa dsodo onapomajaro. Pocca marinaja anipojaropi: “Timecotedenidsa tetideni huanaququiri naji” najaro anijonajaropi timittamanani paji naccani. ⁸Naraha aji jidapana tiadenidsa Diocca marinaja dsodo onajaropi dsati. Najaro marinajapi Jesocristodsa ahuato, iadsa ahuato tajaropaji. Dsidsinipi tohuatorajonani. Ssijajani pajisseheccana tossiajairidsajonani.

⁹Madija attidenipa: –Iapi ssiajanidsa imadijaro –quiquina naraha pohuadeni imecotedsa nacasseraququiri nadsapa dsidsinidsa madimanahipaja naccajari. ¹⁰Pohuadeni imecotedsa huatideni huanaququiri naha madimanadsana pajissa ssiajanidsa madimanajari. Ssiajanidsa madimandapsa pohuadeni imecotedsa imasiri inanamana-jeranitohui. ¹¹Naraha pohua imecotedsa nacassera tajaripa dsidsinidsa madijari. Dsidsinidsa ccaridsajari. Pohua jahine ssamo tahi. Dsidsinijine pina noccosirissa najari.

Diocca ejedeni iquejenajarrocca ima denima aniccani

3 ¹¡Qqui! Abi Diopa itohui huati cahanari canajarijine madija iadsa: –Diocca ejedeni –quiquina-najari. Nadsapi pajissa pocca ejedeni iquejenajaro. Naraha ajijaro dsamacca madija huapimapa Diodsa noccodeni jidsaququiri napoja najaria iadsa naco noccodeni jidsaququiri najaripaja. ²Ohuemecotedeni, jidapapi Diocca ejedeni iquejenani. Naraha itedsejemacca ima denimapi ssamomo inaccani. –¿Iapi pina nejecossa inapadseje? –inaraha najaro imapi iadsa ahuato tejeraccani. Naraha ajijaro imana nahatoququiri inajaro: Nidsa Jesocristo iadsa ahuatoni-pomadsa pohua qqui inahissa tadsapa iapi pina pohuassa inanitohui. ³Nadsama aja madija attideni: –Jeso

ahuatoni-pomadsapa pina pohuassa inanitohui –quiquina najaripa pohuadeni cacahua-manahissa tajari, bodideni huire-qquiri nahijine. Pina Jeso pohua imasiri cappira, bodi huire tajarissa quinahijine.

⁴Naraha aja madija imasiri ihinanamana najaropi Diocca marinajadsa iboqquri najari. ¿Imasiripi nejecoma najaro? Imasiripi aji Diocca marinajadsa huattajo inajarona imasiri.

⁵Naraha tiadenipi nahatoqquri tiquinani: Aja Jesocristopa icca imasiri inajicanijine namihuaji ccaronajari. Pihuapa imasiri cappiraja najari. ⁶Nadsapa pohuadsa madimanahissa tajaridenipa imasiri jiraha madimanajari. Naraha imasiridsa disseraqquri najaridenipa Jesodsa noccodeni jidsaqquri najari. Pihuadsa bodideni ssamoqquri najari. ⁷Ohuemecotedeni, occa ejedenissa tiquinajaro. Paji, madija ohuaha tiadeni tocamajadsa-baqquirana. Ima pajissapi ajima najarona paji: Jesocristopa ima bicani ponira pajiranissa tehe cajijari. Aja madija ima bicani pajiranissa inanamanadsapi pina Jesojinessa inanamanajaro. Pihuadenipa Dio inapajira-baqquihissa tapoja najari. ⁸Naraha madija imasiri totonanadedenipa Diocca huadi Satanacca madija. Satanapa imasiri inanapojarojine nama dsanapojari-paja. Najaricca tabaccorehe inajicanijine Dio Bedi ccaronajari.

⁹Nadsama Djojine dsati iquejenadsapi imasiri ihinana nejerajaropaji. Diocca daniji madie bicani icajijaro. Diocca ejedeni iquejenadsapi imasiri inanadsanaponijine ssamo tani. ¹⁰–¿Nejecojaridenina Diocca ejedenideni? ¿Nejecojaridenina Diocca huadi Satanacca ejedenideni? –titiquina-naraha nahatoqquri tiquinanijinepi ajima najarona paji: Madija ima bicani ihinanamana nejerajarodenipa Diocca ejedeni quejena-jarajari. Madija pohuadeni imecotedenidsa huatideni huaneraqquri najarideni naco Diocca ejedeni quejena-jarajari. Najaridenina Diocca huadi Satanacca ejedeni quejenajari.

***Diodsa eti huana tadsapi imecotedsa naqu
eti huana tanijine***

4 ⁷Ohuemecotedeni, iapi itessedeni tedseje eti cahanerara canaridsana. Tohuati huanehepi Diocca iadsa ccajonajaro. Tohuati huanehe cajimanajaridenipa Diocca ejedeni quejena-jari. Pihuadenipa Diodsa noccodeni jidseraqquri najari.

⁸Naraha tohuati huanehe cappira-manajaridenipa Diodsa noccodeni jidsaqqiri najari. Diopa tohuati huanehe jinede. ⁹Diopa iadsa huati huana tadsa pocca tohuati huanehe iadsa ahuato inanajaro. Najaria aja Pohua Bedi ojariraha namihuaji dosse inaronajari, icassiejeranijine. ¹⁰Iapi Diodsa eti huanaqquri napo-jeraraha Diopa iadsa huati huana tadsa Pohua Bedi iadsa dosse inaronajari. Bedipa itohui pohua ccaccoradsapa icca tabaccorehe inanamossijaropaji. Najarona tohuati huanehe pajissacca.

¹¹Ohuemecotedeni, Dio iadsa huati cahanari canadsapa ia naqui itessedeni tedseje eti cahanerara canaridsana, onajaro. ¹²Madijapa Dio qqui toquinaja cama-jarahi; naraha eti cahanerara canadsana Dio iadsa madijari. Pocca tohuati huanehe iadsa anini ahuato tajaro. ¹³Nadsama Dio Pohua Corime iadsa da inajarojine Dio iadsa madihi nahato, manaco Diodsa imadini nahato inajaropaji. ¹⁴Aja Jeso innocodsa qqui inajari tahimari ijine ahuato tanijine inadsa pohua tahimari huati huati inajaropaji: Abi Diopa pocca Ejedeni dosse inaronajari, icca dsama huapimacca tocassiejerahijine. ¹⁵Nadsapa madija attia: –Jesopa pajissa Dio Bedi –najarina Diodsa madijari. Dio naco pahuadsa madijari.

¹⁶Diopa iadsa huati cahanari canahi nahatoqquri inajaro. Najarodsa pajissa inajaro. Diopa tohuati huanehe jinede. Tohuati huanehema imadjaropi Diodsa imadijaro. Dio naco iadsa madiridsajari. ¹⁷Pajissa imecotedenidsa eti huana tadsapi ajijaro ima nahatoqquri inapojaro: Nidsa Dio madija huapimacca ima cattemade tojadsapa Dio pocca quejenajarajaridenidsa najidsohue inassonari-nitohui. Naraha iapi icappina-jeranitohui. Nema inajaropi pina Jesocristo ajijaro namidsa madidsassa inajaro. ¹⁸Tohuati huanehe anidsapi cappinehe marani. Tohuati huanehe iadsa pajiranissa tadsapi ibodicca cappinehepi toqquena tani. Naraha Diocca najidsohue noppineni icappinadsapi Diocca tohuati huanehe iadsa pajiranissa tejeraccani ahuato tajaro.

¹⁹Aji Diodsa eti huanaqquri najaropi Dio Puhua iadsa huati huana tapojari. ²⁰Naraha madija attipa: –Ohuapi Diodsa ohuati huana tani –naraha pohua imecotedsa nacassera tajaripa mamaisade. Najaripa pohua imecote pohua noccodsa

qqi taraha Diopa qqi tajarajari. Pohua imecotedsa huati huanera tadsapa Dio qqi tajarajaria huati huana tahijinepa ssamo tajaripaja. ²¹ Ajjaro marinajapi Jesocristo ia mari tocana-baqqijaride: –Diodsa tetideni huanaqqiri nadsapi timecotedenidsa naqui tetideni huanaqqiri nana –najaride iadsa.

Huanocca ima teppe dsotodecca

2 Juan

Introducción: Jesocca dodosse tabaqqi Huanopa pohua imecotedeni Jesodsa jehe quinajaridenidsa dsodo inapomajaro. Pohuadenidsa: –Ia huapimapi eti cahanerara canana –najari.

Ima onihi naqui dsodo inajaro, aja mamaisadedenicca maidsehedsa pajissa quina-jarahijine.

1.1-6 Diocca pajissehe icajidsapi eti cahanerara canana

Diocca pajissehe icajidsapi eti cahanerara canajaropaji

¹Nija ohuemecotedeni. Ohuapi Jesodsa jehe quinajari-deni cacahuade ojani. Dio Attidsa titiqueriqui najarodeni huapima Diocca tocattejidsa-baqquinaja tiquejenajaro. Diocca pajissehedsa iquejenarojine tiadenidsa ohuati huana tajaro. Ohua ojari onejerani, aji ia huapima Diocca pajissehedsa nahatoqquri inajaropi tiadenidsa eti huanaqquri najaropaji.

²Diocca pajissehe ibodidsa anijarojinea tiadenidsa eti huanaqquri najaropaji. Pocca pajissehe ibodidsa anidsanaponitohui.

³Abi Dio, Pohua Bedi Jesocristo tedseje tiadeni tocatidsebaqqi-manahitohui. Poccadeni tohuati huanehe, poccadeni jonehe naqui tiadenidsa inanaridsana, onajaro. Nadsapi Diocca pajissehedsa timadimanadsapi timecotedenidsa tetideni huanaqquri nehe timadimananjine.

⁴Ticcadeni madija mota Diocca pajissehedsa madimanahissa tahi qqui onadsapi ohuatidsejaro. Poccadeni ima nema nadsapi pina Abi Dio ia tocadosse-baqquijarissa quinajari. ⁵Nadsama ohuemecotedeni, ajiaro marinaja dsodo onajaro: Ia huapimapi eti cahanerara canana, onajaro. Najaro marinajapi dsati jerani, aji Jesocristocca ima icahatterapodsama najaro marinaja imittapode.

⁶Tohuati huanehepi ajima najarona paji: Pina Diocca marinaja huapimassa inanaridsajarona paji. Dio pocca marinaja timittamana-podsama pocca tohuati huanehema timadiridsa-manaji.

Huanocca ima teppe dsotodemanicca

3 Juan

Introducción: Jesocca dodosse Huanopa pohua tesse Caiodsa dsodo inajaro. Caiona Jesocristo tahimari maridedeni acco icambaqquidsapa pohuadsa: –Tijine ohuatidseni –najari Huano. Mamaridedeni denima acco ticamabaqquidsa Dio Atti denima mari mari naridsamanahitohui, najari.

Ima onihi naqui dsodo inajaro, aja madija oni Diotrepecca ima bica tejerani naraha madija ohuaha Demetriona ima bicani inajaro, najari.

1.1-8 Caiocca imapi bica tajaro

Caiocca imapi bica tajaro

¹Nija Caio, otesse bica tinade, tiadsa dsodo onajaro. Ohuapi Jesodsa jehe quinajarideni cacahuade ojani. Diocca pajissehecca imadsa jehe inadsapi tiadsa ohuati huana tajaro.

²Jehe, ohuemecote, titohui Diodsa huati huati onajaro. Diodsa jehe tanissa tadsapi ohuatidsejaro. Ticca madiocca ima huapima naqui toccanissa tanijine Diodsa huati huati ohona najaro. Nomi tinehe timadi-dsanaponijine naqui Diodsa huati huati ohona najaro. ³Jesodsa toquejenajarideni ajahuaji bacco najona-manadsa ticca ima huati najonamanadsapa ohohuatidsejaro. –Imecote Caiopa Diocca pajissehedsa dissera tahi –quinahi ima omittajarojine ohuatidsejaro. ⁴Jehe, Caio, tiapi pina occa ejedenissa tajaro. Jesodsa toquejenajari pina occa ejedenissa quinajaridenipa pajissehedsa madimanahissa tajari ima omittadsapi ohuatidseri najaro. Huatidsehe onihi aniraha ajijaro huatidsehena ohuadsa denima bica tajaro.

⁵Ohuemecote, Jesodsa toquejenajarideni acco acco titicama-baqqui nadsa tijine ima pajiranissa tajaro, pina

Diocca marinajassa tinanajaro. Imecote huaji tanihuaji madi-manajarideni Jesocristo tahimari mari mari nanaridsamana najari, pohuadenisa tinocco jidsa taraha tiahuaji bacco bacco toquinadsa pohuadeni acco acco titicama-baqqui nadsapa tijine bica tani. ⁶Najarideni icca Dio Attidsa ihiqueriqqui nanihuaji ticca ima huati nanimanajari: –Caiopa iadsa huati huana tajari –nanimanajari. Nadsapa pohuadeni tiahuaji bacco toquina-pomadsapa poccadeni benehi denima jai tojapomahijine acco ticamabaqqui-pomana. Cappiramanahicca pohuadenidsa da tinadsapi Dio jipa tajari. ⁷Aja pohuadenipa Jeso tahimari madija mittaridsa-manahijine maride jai tojajari. Naraha Diodsa jiperaqquri najarideni naco –Mamaridedeni acco icamabaqquina –quinaraha mamaridedenipa poccadeni danijidsa: –Jehe, iadsa –quina-jarajari. ⁸Naraha ia Jesocca iquejenajarona pohuadeni acco icama-baqquihijine bica tani. Nadsana icca danijijine najari mamaridedeni Diocca pajissehe denima mari mari naridsa-manahitohui, onajaro.

Jodacca ima teppe

Judas

Introducción: Joda Satiacodenipa ia Medsede Jeso ohuahadeni. Ajaro ima teppepi Jodana Jesocristodsa toquejenajaridenidsa dsodo inajaro. Pohuadenidsa: –Paji, tabaccoraqquri najarideni tiadeni tocamidsabaqqui-manarana –najari. Poccadeni jeheniji dacoranijine naqui pohuadenidsa dsodo inajaro.

1.17-25 Jesocristodsa disseraqquri tiquinaji

Jodacca marinaja jehe quinajaridenidsa

¹⁷Naraha ohuemecotedeni, titohuideni ohuati huana tani, aja ia Medsede Jesocristocca dodosse tabaqqui tiadenidsa huati toquinapohuicca tetideni ajima tejerana. ¹⁸Pohuadeni attipa: –Dsama jicabote nadsapi madija jidsehe tabaccora tajarodsa jidsa jidederabote animanahitohui. Pohuadenipa tabaccorehe tohuira madimanahitohui –quinapode Jesocca dodosse tabaqqui attideni. ¹⁹Najarideni madija tabaccoraqquri najari attidenijine ticaroberidsa-mananitohui. Pohuadeni tohuini quinahicca tabaccorehe tohuinira bodideni huahuato najari. Pohuadenipa Dio Corime cappiramanaja najari.

²⁰Naraha ohuemecotedeni, titohuideni ohuati huana tani, Jesodsa ticcadeni jehenijipi bicani ponira. Dacoco tijiradsa



najarodsa disseraquiri tiquinaji, onajaro. Dio Corime tibodideni acco camadsa Diodsa huati huati titiquina nana, onajaro. ²¹Diopa itohui huati cahanari cadsanapohuitohui. Najaro ima tetideni ajima tejerana, onajaro. Ia Medsede Jesocristopa jone tadsa itohui huati cahanari canadsa iadsa camittehe jiquejeranicca da inanitohui. Najaro ima tohuira timadimana-dsanapoji, onajaro.

²²Timecotedeni Jesodsa jehe quinaraha poccadeni jehe-niji japari tadsapi pohuadenidsa tetideni huanacquiri nana. Bodideni acco ticanabaquimanadsapa poccadeni jehe-niji todacorani nanijine. ²³Jesodsa jehe quina-jarajarideni najidsohue oppina tanihuaji toquejenaraha tocassiejerahijine acco ticanabaquimanajo. Pina dsippo jororo cananidsa madija ssonidsanaraha tidimoranimanadsapa dsori tinamanajarissa tiquinaji. Madija ohuahadeni naco poccadeni tabaccorehedsa disseraquiri nadsapa ticcadeni tohuati huanehema acco ticanabaquimanana. Naraha paji, tiadeni tecahuamananissa tana; poccadeni tabaccorehe tiadenidsa dsapa torana. Poccadeni imasiridsa jiperaquiri tiquinaji, onajaro.

Jodapa jicanicca dsodode tojadsapa Diodsa huatidsejari

²⁴Dio dacorajaridsa etidsena. Icca jeheniji tossamo-geranijine ia tohuacahuabaqqui-dsanapojari. Najaro pocca dacorehejine Pohua baccohuaji Pohua ssiejene bicabote aninidsa huireqquri inehe idomo huadsapi huatidsehe imeni icajinitohui.

²⁵Nema nadsapi Dio ia Tonassiajadedsa etidsedsa: –Abi Dio bica tinani –inana, onajaro. Dio ohuaha nohuerahi. Diopa ojarihi. Pohua Bedi ia Medsede Jesocristo dosse inaronajarijine icassiejeraropaji. Dio Pahuadsa: –Icca Tamine bicabote deni tijani –inajaro. –Tiana denima daco tijirani –inajaro. –Huapima dossede deni tijajaro. Nema tajonajaroa aji jidapana naqui nema tani paji nani. Nema tidsanaponitohui –inajaro Diodsa. Epejeni.

Jesocristopa Huanodsa itedsejemacca ima ahuato inanajaro

Apocalipsis

Introducción: Jesocca dodosse Huano jadahi tocajadsapa dsama bedeni onini Patimo passo imenidsa huittidsacossajarodsa madijari. Aja Romanodenicca tamine Jesocristo tahimaridsa jipera tadsa Huano dama inadsa Patimohuaji dosse inajari. Nahi Patimohuaji madijaripa pina toponi cocorodsa huedsajarissa najari. Nahidsa madidsapa pina pocca huadassa nadsa Dio Corime itedsejemacca ima pohuadsa ahuato inanajaro. Nadsapa Huano pohua qqui tajaricca dsodo inajaro.

Ajijaro imapi Jesocristodsa jehe quinajaridenidsa dsodo inajaro. Motapa Romanodenicca nanajidso toquejenajari. Motapa tojicajari, mota tocassiejerajarideni ajijaro ima mittamanadsapa poccadeni jeheniji todacorani nanijine pohuadenidsa dsodo inajaro. Ia naqui Romanodenicca nanajidso iquejena-jeraraha ajijaro ima imittadsapicca jeheniji todacorani nanijine pajirani.

Ajijaro imapi Djojine Huanodsa ahuato inanajarocca imittani. Jeso ccanibote nadsapa ajijaro dsamadsa tojaridsa-ponijinecca ima dsodo, dsama jicanicca ima dsodo inajaro.

Huano qqui tajaripa bica tanicca, oppina tanicca, jidsa tanicca, ijabojo nanicca. Pohua qqui tajari huapimapi jidsa taraha ima deni tojanicca cajini.

Ajijaro imadsa Jesodsa: Edede Bedi, najari. Pohuadsa nama najaripa tahide jodiodeni poccadeni imasiri manaconi edede bedi Diodsa da da quiquinanapojari. Jesopa huapimacca imasiri manaconi tojadsa pohuadsa: Edede Bedi, nanaja najari Dio.

Ajijaro imadsa Jesodsa: Edede Bedi, najari. Pohuadsa nama najaripa tahide jodiodeni poccadeni imasiri manaconi edede bedi Diodsa da da quiquinanapojari. Jesopa huapimacca imasiri manaconi tojadsa pohuadsa: Edede Bedi, nanaja najari Dio.

1.1-3 Jesocristojine Huanodsa jidapanacca ima ahuato, nidsa dsotodecca ima ahuato inanajaro

1.4-8 Huanopa Jesocristodsa quequeriquimana najari 7 najarodsa dsodo inajaro

1.9-20 Huanodsa Jesocristo ahuatojari

12.1-18	Amonejecca ima, Huama imehibotecca ima
13.1-10	Bani siri jidsabote passo imenidsa qqemorajari
13.11-18	Bani siri ohuaha namidsa qqenajari
14.1-5	Edede Bedi 144 mil quinajarideni tedseje
14.6-13	Diocca dodosse tabaqqui 3 quinajaridenicca ima
21.1-8	Meme dsati, nami dsati najaro tahimarini
21.9—22.5	Jerosare dsati tahimarini
22.6-21	Jesocristo ccanipomahicca imapi huajira tani

***Jesocristojine Huanodsa jidapanacca ima ahuato,
nidsa dsotodecca ima ahuato inanajaro***

1 ¹Diona Jesocristodsa itedsejemacca ima ahuato inana-
pojaro; manaco Jesocristopa pocca medsedenidsa
ahuato inananijine. Ajijaro ima iadsa ahuato inananijine
Jesocristo pocca dodosse memehuajicca ohuadsa huati tajari.



Pohujinena ohua qqui
onajaro. Ohuapi Huano,
Jesocristocca medse ojani.
pajissa huati onajaro. Aji
dsodo onajaropi pajissa Dio
Atti Jesocristojine ohuadsa
ahuato inanajaro.

³Aji itedsejemacca ima
Diojine ahuato tajarocca madija
hua hua najaripa huatidsehema
madihitohui. Mittamanajarideni
naco aji dsodo naniccassa
inanamanajarodeni naco
huatidsehema madimana-
hitohui. Diojine ahuato inana-
jaropi tohuajirajonani.

***Huanopa Jesocristodsa quequeriquimana
najari 7 najarodsa dsodo inajaro***

⁴Ohuapi Huano. Aji occa ima teppe nani Asiahuajicca odsa
panani 7 nanihuaji titiqueriquimana najarodsa ajijaro ima

dosse onajaro. Jesocristodsa pajissa tiquinajaro tiadenidsa dsodo onajaro. Diopa madihi. Puhuapa nadsama madipojari. Puhuapa nidsa ccajonahitohui. Puhuapa tiadenidsa ima bicani inanaridsana, onajaro. Pocca jonehe tiadenidsa inanana, onajaro. Dio Puhua dosse dosse nanaja nahicca huihuittari tadsajanima Puhua Corime 7 quinaha domo huajarideni naco tiadenidsa ima bicani inanaridsa-manana, onajaro. Poccadeni jonehe tiadenidsa inanamanana, onajaro. ⁵ Jesocristo naco tiadenidsa nema inananiijine, onajaro. Puhujine Dio Atti ahuato inanaridsajaro. Pajissehe maride dissera tadsa puhua nanadsoqqueraha jicapojarideni huapi taraha Jesona tahide nahatonihí ojari napojari. Puhuapa dsama huapimacca tamine deni tojajari. Huapimadsa dosse dosse najari. Jesocristo iadsa huati huana tajari. Imasiridsa imadiraha puhua emene toccajarojine icca imasiri inajicaridsajaro. ⁶ Puhujine pocca cacahuaniijidsa iquejenajaro. Puhujine pocca Abi Diodsa idsepe ijijaro. *Diodsa dada toqquimade, huahuati toqquimade iquejenajaro. Nadsapi Jesocristo puhuadsa ehetidse nana. ¡Puhuapa bica tahi, deni tojahi! Pocca nahatonaja huapima ecahuadsanaponijine pocca deni tojehe pajiranissa tajaro. Apaja puhuapa nama dsanapohuitohui, inana, onajaro. Pajissa nema nani, onajaro.

⁷ ¡Ticattomama canaji!

Jesocristo meme essenima ccaronahi qqui tiquinahitohui. Huapima qqui toquinahitohui.

Aja Jesocristo nanadsoqquededeni naco qqui toquinahitohui. Dsama huapimacca madijapa puhuatohui oji oji quinahitohui. Najaro imapi pajissa. Nema nanitohui.

⁸ Ia Medsede Dio Attipa: –Ohuapi ohua. Ajijaro dsama nahatopo-jeradsama omadipojaro. Nidsa dsotode ajijaro dsama jicaraha ohuapi omadidsanaponitohui –nade ia Medsede Dacorabote Attipa. Puhuapa madihi. Puhuapa nadsama madipojari. Puhuapa nidsa ccajonahitohui.

Huanodsa Jesocristo ahuatojari

⁹ Ohuapi Huano timecotedeni ojani. Titedsejedeni Diocca cacahuehedsa iquejenajaro. Madija Dio Attidsa jipera-qquiri najaripa ia totonajidso-baqquimana najari, naraha Jesocristojinepi huatidsehema ima inahananiijine ipajirani.

Ohuapi passo nocconidsa dsama huittidsacossani Patimodsa ohua inebomanadsapi pina toponi cocorodsa ohuedsajarossa najaro. Ohuapi Dio Atti mari ocanabaquidsa, Jesocristo tahimari ohuaccora-ridsadsapi Jesocristodsa jipera-qquiri najaridenijinepi todsepe ojajaro. ¹⁰Ia Medsedecca jassinajacca huadadsa jassi onaneje ohuedehuaji Dio Corimejine mohuini dacorehema omittajaro. Atti mohui pina jei jei mohui mohui tajarissa nadsa omittajaro. ¹¹Atti ajama najari: –Ajijaro huapima tiadsa nohue onajaropi papeodsa dsodo taji. Aji dsama Asiahuajicca Jesocristodsa quequeriquimana nahi 7 naridsajarodsa ima dosse tinaridsanijine. Odsa panani Epesohuaji, Esemirnahuaji, Peocamohuaji, Tiতিরাহুয়ী, Saradisiohuaji, Piradeopiahuaji, Laodiseahuaji dosse tinaridsaji –nade atti mohui tadsa. ¹²¿Nejecojari atti? onadsa piti onahuajanidsa qqui onanaja jojororo pinine dsibehi tajari orocca 7 quinaha qqui onajari. ¹³Qqui onanaja jojororo pinine cacahueri nahi nocconidsa pina *madijassa naha hua canajari. Pocca etero dequerajaro amoridsa bacco tajaro. Pohua biji mete ssoosque dsibehi tajaro pina orossa najaro. ¹⁴Tati conepi nopo tajaro. Bica tani. Noponi ponira. Pohua noccopa pina dsippo jororonissa najaro. ¹⁵Pohua amori naqui dsibehi tajaro, pina ccarara onini *bronze jiti nani todsibehijarossa najaro. Pina ccara tahicca dsippo ppoconijine tojadarijarissa najaro. Pohua atti dacorajaro, pina passo dacorehema ssahaha canajarossa najaro. ¹⁶Pohua dsepe nahatonihuajicadsa abadsico bedi 7 canaha cajijari. Pohua ajaridsapi pina jadsirecca massito cajadsirequimera najarossa najaro qquenajaro. Pohua pano naco dsibehi tajari pina maji itetepidsa ssiejene dacorajarissa najari.

¹⁷Ohua qqui onadsapa pina ohuatiajarossa najaro. Pohua amorihuaji ohuedimadsa oponajaro. Naraha pohua dsepe nahatonihuajicadsa ohua bara nadsa huati tajari: –Ticappinajeraji. Ohuapi ohua. Ajijaro dsama nahatopo-jeradsama omadipojaro. Nidsa dsotode ajijaro dsama jicaraha ohuapi omadidsanaponitohui –nade. ¹⁸–Ohuapi camitta onani. Odooqueporaha onahatonidsapi omadidsanaponitohui. Ohuapi pipico ocajini. Najari pipicopa Diodsa iboququiri najari tojjicapjarideni corimedeni madimanahihuajicca pipico –nade

Jesocristo ohuadsa. ¹⁹Nadsapa ohua cadossejari: –Aji huapima qqui tinजारocca dsodo taji. Aji jidapana tojaridsजारocca dsodo, nidsa dsotode tojanijinecca dsodo taji. ²⁰Aja abadsico bedi 7 canaha odsepe nahatonihujiccadsa qqui tinajari, jojororo pinine orocca 7 naha qqui tinajaripa ima cacomeheccaraha imapi ajima najaro: Aja abadsico bedi 7 canajaripa otahimaridsa quequeriquimana najari 7 najaro cacahuade toquejenajari-denicca ima. Aja jojororo pinine 7 najari naco otahimaridsa quequeriquimana najari 7 najaro –nade Jeso ohuadsa.

Amonejeca ima, Huama imehibotecca ima

12 ¹Ima nahatoqquri inanijine memehuaji amoneje ahuatojaro. Ponicca eteropi pina maji ssiejenessa nehe huedsajaro. Abadsico tetepidsa huarijaro. Tatiniccapa pina tamine tatideniccassa najaridsa abadsico bedi 12 canaha cajihuajanijari. ²Najaro amonejepi idsonidsa ejedeni huittidsajari. Tossonahijine comadsapa johua johua najaro. ³Dsotode naqui memehuajicca ima onihi nahatoqquri inanijine ohuadsa ahuatojaro. Qqui onanaja pina huama imehibotessa naraha jidsa tajari. Macco tajari. (Caria attidsapi: dragón, quinajari.) Tatipa 7, ori 10 najari. Tati 7 najarodsata totaticca pina tamine tatideniccassa najari huittariridsajari. ⁴Nadsapa huama imehibotepa abadsico bedi mota (Caria attidsapi: tercera parte, quinajari) pohua dsoporidsa jadsirema johue inaronabaqquidsapa namihuaji hua inaronabaqqujari. Nadsapa huama imehibote amoneje idsoni comajaro tadsajanima huajari. Ejedeni tossonadsapa amadsati jipahijine najorajari. ⁵Naraha ponicca ejedeni maqquideje bedi tossonadsapa madijari. Najaripa nidsa dsotode dsama huapimacca tamine dacorabote tojahitohui. Pocca dsodsojo ccanaja tajaridsa pocca madija dosse dosse nahitohui. Naraha ponicca ejedenipa todini-macossanijari. Nahi Dio Pohua huittarihidsa dossede huittaritari. ⁶Naraha imenipi dsama huamoni ssono caji, siba caji tanihuaji joppa tajaro. Aji poni joppa tanihuaji madinijinepi Djojine najorapojaro. Nanihuajipi taparini cajidsanaponijine huada 1,260 nehe madijaro.

⁷⁻⁸Dsotodepi meme nopicossanidsa jadsire tojani qqui onajaro. Diocca dodosse tabaqquidenicca tamine Miqueopa pocca dodosse

tabaqqi tedseje huama imehibotedsa jadsire inanamanajaro. Huama imehibotepa pocca dodosse tabaqqi Miqueocca dodosse tabaqqi tedseje cahadiremanaraha huamadenipa deni toquejenahijine pajiramana-jarahi. Memehuaji madimana-pomahijinepa jicani. ⁹Nadsapa huama imehibote cco inaronamanajari. Najari huama imehibotepa maittaccadsama pina maccassa naha ahuatopojari. (Najarina Adana Ebadeni icamaisabaqqipojari.) Pohua oni ohuahapa: Diocca huadi *Satana, quiquina najari. Pohua, pocca dodosse tabaqqi namihuaji hua inaronamanadsapa namidsa catojaronajari. Nama nadsapa dsama huapimacca madijadsa maidsa maidsa nanaridsa najari.

¹⁰Nadsapi memehuaji tohuatti mohuini omittajaro attipa:
–Jidapanana ia Medsede ia tonassijabaqqihicca ima bacco tani.

Jidapanana Diocca dacorehe, pocca cacahuehe iadsa ahuato tani.

Dio pocca Cattaniji Cristo-Mesia pohua dosse dosse nahicca ima bacco tani.

Ajana, imecotedeni tahimari pohuama huatijiderabote Satanapa coro inaronajari.

Dsome, ssiaja, dsome, ssiaja icca Abi Dio tedsejema imecotedenicca ima huati huati nanaja naraha jidapapi pocca ima jicani.

¹¹Imecotedenipa deni toquejenajari. Satanapa ajamani tojahi.
*Edede Bedi Jeso dsoqquedsa emene toccajarijine, pohua tahimari ecomeraridsa-manajarojine naco deni toquejenajaripaja.

Pohuadenipa dsoqqehe noppineni cappinamana-jarajari.
“Idsoqquedsa naqui bica tani. Dio inebo-jarahitohui”
quiquina najari.

¹²Nadsama memehuaji timadimanajaro huapimapi tetidsemaneri naji.

Naraha aji namihuaji timadimanajaro, passo imenihuaji timadimanajardenipi tohuati nahanaqquri tiquinani.
Tiadenidsa ima oppina tehe tojaridsanitohui.

Diocca huadipa tiadenidsa huadihijine toccaronajari.

Pocca ima jicabote nani nahato tadsapa huadie imeni cajijari
–najari memehuaji tohuatti mohuini omittajaro.

¹³Huama imehibote bodi huatodsapa: –A, namihuaji ohua coro naronajariraha –najari. Nadsapa amoneje ejedeni maquideje bedi cajije najaro inanadsoqquenijine qquidso qquidso naridsajaro. ¹⁴Naraha amoneje huaji tani toccanijinepi pina ssibiri imehibote eppessa najari capamaha da quinajari. Nadsapi poni madinijine dsama huamoni ssono caji, siba caji tanihuaji huama huaji tahihuaji toccanijine appani cajijaro. Nanidsapi poni ecahuamana-dsanapodsa huajano 3 denima huajano arobedsa madinijine. ¹⁵Naraha huama imehibotepa amoneje toccanijine najorani qqui tadsa pohua ajaridsa passo motarema capiri inajaro, hueni tocajadsa totabonijine. ¹⁶Naraha namipi amoneje acco icamajaro. Nami odini tohuabajaro, pina ajarini cajijarossa najaro. Nadsapi huenicca passo nema nehe dappi idsimajaro. ¹⁷Nadsapa huama imehibote amonejedsa denima huadi tadsapa poni potemanidsa jadsire inananijine toccajari. Aja Diocca marinajadsa iboraquiri najari, Jesocristo tahimaridsa disseraquiri najari-denidsa jara jara najari. ¹⁸Nadsapa huama imehibote passo imenicca ssiquidsa huajari.

Bani siri jidsabote passo imenidsa quemorajari

13 ¹Ocattoma cananaja bani siri imehi jidsabote passo imenidsa quemorajari. Tati 7, ori 10 naha cajijari. Ori huapimadsa totaticca pina tamine tatideniccassa najari huittariridsajari. Bani siri tati huapimadsa tohuaoni tabaccora tanicca dsodo naridsajaro. Tohuaonipi Diodsa ocassera tani, pina Dio onidsa tatamasso najarissa najaro. ²Bani siri jidsabote qqui onadsapa assire pina dsomajissa naraha amoripa pina bani imehi oni oso amorissa najari. Ajari naco pina dsomaji huahuade ajarissa najari. Huama imehibotepa bani siri jidsabotedsa pocca dacorehe da inajaro. Taminecca huihuittari bicabote naqui pohuadsa da icanajaro. Najarodsa huittaridsa dossehe dacoraniccadsa dosse dosse nahijine huama imehibotepa pocca dossehe naqui bani siri jidsabotedsa da inajaro. ³Bani siri jidsabote tati 7 naraha tati ojariepi biqueradsa pina dsoqquejarossa najaro. Naraha bejorini ccaqquidsapi camitemanijaro. Nadsapa dsama huapimacca madija huajo caniredsa pohuatohui disseraquiri

najari. ⁴Huama imehibotedsa huatidsemanajari, aja bani siri jidsabotedsa pocca dossehe da inajarojine. Bani siri jidsabotedsa naco huatidsemanajari. Pahuadeni attipa: –Bani siri jidsabotepa dacorajari. Pina aja pohuassa najari nohuerahi. ¿Nejecojarina pohuadsa ssonaridsa deni tojahijine pajirahi? –quinajari.

⁵Bani siri jidsabotepa Diodsa tatamasso nadsapa: –Dio nohuerahi, ohuana huapimadsa deni ojani ojari onani –nanaja najari. Naraha Diopa bani siri jidsabote dossede tojahijine ecossa-jeraccajaro. Abadsico 42 canaha dossede tojjaccajari.

⁶Nadsapa atti tabaccora tadsa Diodsa atti atti dsanapojari. Dio oni ajimani inanajaro. –Diocca mamadi tabaccora tani –nanaja najari. Memehuaji madimanajaridenidsa naco tatamasso najari. ⁷Nadsapa bani siri jidsabotecca ima huacossa-jeradsapi Diodsa toquejenajarideni tedseje cahadiremana-dsanapojari. Deni tojadsapa motapa inajicaridsajari. Nadsapa madija huapideni onihi onihi cajiridsa-manajarideni, madija tohuatti onihi onihi cajiridsa-manajarideni, madija dsama onihi onihi naridsajarocca naco bani siri jidsabote pohuana dosse dosse najari. ⁸Ajjaro namidsa madiridsamanajarideni camittehecca papeodsa onideni dsodo nani nohuerajaropa bani siri jidsabotedsara huatidseridsamanajari. Najaro papeo dsodo nanipi dsama nahatoponidsama Edede Bedi Jeso pohuana ecahuajaro. Pohuana camittehe issiajanicca icajiridsanijine dsoqqejari.

⁹Teribodeni ticajimanadsapi ohuatti timittamananissa taji. Bani siri jidsabote tamine tojadsapa Diocca madija ajama quinahitohui:

¹⁰Diocca madija toponi cocorodsa hua todsimahijinepa itadamamanadsa hua todsimahitohui.

Diocca madija huahuajinadsa itahuajinamanahijine naco huahuajinadsa tojjicahitohui.

Najaro ima tojadsapi Diocca madijacca ima ahuato tanitohui. Diocca madijapa oppinani ahahuamana naraha Diocca dacorehema mohuaradsa inahanamananitohui. Attidenipa: –Diopa icca ima nahato tahi. Ocasserani eraha Dio inebojarahitohui –quinajari.

Bani siri ohuaha namidsa qquenajari

¹¹ Qui onapomanaja bani siri ohuaha namidsa qquenajari. Ori pamajari, pina edede bedi orissa najari. Naraha pohua attipa pina huama imehibote attissa najari. ¹² Puhuapa dossehe cajihijine tahidecca bani siri jidsabotena pocca dossehe pohuadsa da inajaro. Nadsapa bani siri dsotodeccana namihuaji dossede tojadsa aja tahidecca bani siripa cattade huajari. Namidsa madiridsa-manajarideni huapima tahidecca bani siridsa huatidsemanahijine icadossebaquijari. Najaridsa huatidsemanajaripa tati biqueradsa dsoqqueraha bejo ccaquidsa camittemanijari. ¹³ Bani siri dsotodecca naco canahatori canajari. Puhujine memehuaji jororoni ccaronadsa namidsa bacco naronajaro. Madija huapima qqui toquinajari. ¹⁴ Namihuajicca madija icamaidsabaquihissa tajari. Tahidecca bani siri jidsabote cattade huahihuaji canahatoriri canadsa madija huapima pocca maidshedsa pajissa quinajari. Puhadeni icadossebaquidsapa tahidecca bani siri jidsabote corime sibadsa inahatomanajaro. Najari bani siripa massito jadsira tocanajarodsa tati biqueraraha madicajari. ¹⁵ Naraha bani siri dsotodecca ima Dio ecossa-jeradsapi najarijine tahidecca bani siri corime camitta inanadsa atti cajijari. Puhua corimedsa huatidsemana-jarajarideni huapimapa icadossebaquidsa jicaridsajari. ¹⁶ Nadsapa bani siri dsotodeccana denima ima inanajaro. Madija huapima tahidecca bani siricca nanajanodsa inajanoridsahijine icadossebaquijari. Ejedeni, jadahi, dsepe ssequiri najarideni, cappiramanajarideni, medse toquejenajarideni, medse toquejena-jarajarideni huapima inajanoridsajari. Motapa dsepedeni nahatonihuaji inajanoridsa, motapa assaridenidsa inajanoridsa najari. ¹⁷ Aja bani siri jidsabotecca nanajano madija motapa pohua oni dsodo nani cajiridsa-manajari. Motapa pohua onicca numero dsodo nani cajiridsa-manajari. Madija pocca nanajano cappiramanadsapamitta quinahijine ssamo, da quinahijine ssamo tanitohui.

¹⁸ Ajijaro ima nahatoquqiri tiquinanijinepi madija Diocca nahatohue cajijari bodi nahato tajarina bani siri jidsabotecca numero inatassaquina. Pocca numeropi madijadenicca. Najaro numeropi 666 najaro.

Edede Bedi 144 mil quinajarideni tedseje

14 ¹Nadsapa ocattama cananaja *Edede Bedi Jeso ssono *Siodsa hua canahi qqui onade. Pohuadsa madija 144,000 (144 mil) quinaha domo huajari. Assaridenidsa dsodo nanipi Edede Bedi Jeso oni, Imehi oni cajimanajari qqui onajaro. ²Nadsapi memehuaaji mohuini bica tehe omittajaro, pina hueni huapima ssahaha canajarossa najaro; pina ttottorode dacorabote mohuinissa najaro; pina titirededeni huapi taha tire tire quinajari mohuissa najari. ³Nadsapa 144 mil quinaha ajie dsati jiri jiri quinajari. Pohuadenipa Diocca huihuittari bicabote tadsajanima aja camittaquuri najari 4 quinajari tedsejema, cacahuadedeni 24 quinajarideni tedsejema jiri jiri quinajari. Madija ohuahadenipa poccadeni ajie tocahatterahijine ssamo-qquuri naraha 144 mil quinajaridenira najaro ajie jiride nahato-qquuri najari. Najaridenipa ajijaro namidsa madimanaporaha Dio idinibaquipojari. ⁴Poccadeni ima ssiaja tajaro. Huananehe jirehe madimanajari, amonejedsa ssamoquuri najari. (Najaro imapi dio pohuamaccadsa huatidsemana-jarajari.) Edede Bedi Jesodsa disseraquuri nadsapa pohuadsara ahuaaji jai toja, ahuaaji jai toja naridsajari. Najaridenipa namicca madija mota Dio idinibaquipodsa Pohuadsa toquejenahissa, Edede Bedi Jesodsa toquejenahissa tahijine pina madijadenicca daniji bicabote Diodsa toजारissa quinajari. ⁵Pohuadenipa maidsehe huatira-qquuri najari. Imasiri cappiramanaha madimanajari.

Diocca dodosse tabaqqi 3 quinajaridenicca ima

⁶Nadsapi Diocca dodosse ohuaha qqui onade. Memehuaaji ccahuajadsa ia tonassiaja-baqquihijinecca ima huati narona-hijine dsojo inahuajajaro. Dsama onihi onihi naridsajarodsa huati, madija huapideni onihi onihi cajiridsa-manajaridenidsa huati, madija tohuatti onihi onihi cajiridsa-manajaridenidsa naco huati naridsahijine. ⁷Nadsapa pohua atti mohui tadsa huati tajari: –Dio noppine ticappinamanaji. Diodsa: “Tiana deni tijani” tiquinaji. Dsama huapimacca madijacca imasiri manaconi najidsohuepi Dio Pohuajine tojabote nani. Pohuana meme inahato, nami inahato, passo imeni inahato, bijini huapima inahato naridsajari. Pohuadsara tetidsemanaji –najari.

⁸Dsotode Diocca dodosse ohuaha toccamissajari. Pohua attipa: –Odsa panani Babironia jicani, jicani –najari. –Najaro odsa pananica madijajinepi dsama huapimacca madija Dio inebomanadsa imasiridsara toquejenajari. Babironiadenicca dio pohuamaccadsa naco toquejenajari. Babironiacca marinajapi pina dsedse coma tanicca da icanabaquijarissa najaro –najari.

⁹Dsotode Diocca dodosse 3'cca toccamissadsa atti mohui tadsa huati tajari: –Bani siri jidsabotedsa, pohua corime nahato-huidsa madija huahuatidsemana najaridenipa Diocca najidsohue inahanamananitohui. Bani siricca nanajano cajimanahijine iboraquiri nadsapa assaridenidsa cajimana, dsepedenidsa cajimana najaridenipa Diocca najidsohue inahanamananitohui.

¹⁰Pohuadenidsa Dio huadidsapa najidsohue imeni najorajari. Diocca dodosse tabaqui, Edede Bedi tedseje pohuadeni cattomama canahihuaji Dio nanajidso inanabaquidsa jororoni *azufre quejemanicca inahanamananitohui. ¹¹Najaridenipa bani siri jidsabotedsa, pohua corime nahatohuidsa huahuatidsemana najari. Bani siricca nanajano cajimana-jarahijine poni quina-jaradsa pohuadenipa dsippo jororonijine ocasserani ahuamana-dsapa dsome, ssiaja, dsome, ssiaja jassi quina-jarahitohui –najari.

¹²Najaro ima tojadsapi Diocca madijacca ima ahuato tanitohui. Diocca madijapa oppinani ahahuamana naraha Diocca dacorehema mohuaradsa inahanamananitohui. Najaridenipa Diocca dosseniji inapajiramananissa tajaro. Jesocristodsa naco disseraquiri najari.

¹³Nadsapa memehuaji atti omittajaro. Ohuadsa ajama najari: –Ajijaro ima bicani dsodo taji –najari. –Aji jidapanaccadsama ia Medsede Jesocristodsa toquejenajarideni jicamanapodsapa pohuadenidsa ima bicani tojanitohui –najari.

Nadsapa Dio Corime attipa: –Jehe, najarideni tojicadsapa jassi quinahitohui. Najo tanicca dsepedeni ihijimana najaro jicani. Aja Diodsa dsepedeni ijimanadsa pohuadenijine ima bicani tojajaroma memehuaji jai tojamacossahitohui –najari.

Meme dsati, nami dsati najaro tahimarini

21 ¹Nadsapi qqui onapomaneje meme dsati, nami dsati qqui onajaro. Aji tahidecca meme, nami najaropi amossi najaro. Passo imeni naqui amossi najaro. ²Dio pocca

odsa panani bicabote Jerosare dsati qqui onade. Dio Pohua tedsejema memehuaji ccaronade. *Jerosarepi pina amoneje maqqui cajinijine najorajarossa najaro, bicaridsaponi nade. ³Nadsapi memehuaji deni tojahicca huihuittari bicabote cahittarinihuaji tohuatti mohui tehe omittajaro: –Jidapapa Dio madijadsa madihi. Pohuadenidsa madidsanapohuitohui. Madija huapima Diocca cacahuehdsa toquejenahitohui. Diopa pohuadeni Cacahuade tojadsanapohuitohui. ⁴Pohuapa inocco ppajani sse inanitohui, denima oji inejeranijine. Iadsa Dio madidsapa dsoqqehe nohue, ojie nohue, ettima oji oji inajaro nohue, coma inajaro naqui nohueranitohui. Aji ima huapima namidsa caji tapojaropi jicanitohui –nade.

⁵Nadsapa aja deni tojahicca huihuittaridsa Huittari canajari Attipa: –Ohuapi huapima dsati onanaridsahi –nade. Pohua Atti onihi naqui: –Ajijaro ima dsodo taji. Ajijaro imapi pajissa. Najaro imadsa: “Jehe, pajissa” tiquinanijinepi bica tani –nade. ⁶Nadsapa ohuadsa huati tajari: –Ajijaro ima huati onajaropi tojanissa tehe jicani. Ohuapi ohua. Ajijaro dsama nahatopojeradsama omadipojaro. Nidsa dsotode ajijaro dsama jicaraha ohuapi omadidsanaponitohui. Madija bacco dsaridsapa passo camittehecca qquenajaro dse nahijine pohuadsa da onanitohui. Pohuadsa: Manaconi, onejeranitohui. ⁷Aji occa dacorehema timadimanadsa ohuadsa jehe tiquinajaro tinebomana-jeradsapi jidacca huati huati onapojaro huapima tiadenidsa tojaridsanitohui. Ohuapi ticcadeni Dio ojanitohui. Tiadenipi occa ejedeni tiquejenanitohui. ⁸Naraha ohuadsa toquejena-jarajaridenipa najidsohue cajimanahitohui. Aja madija: “Jesocristopa ohua Idinide” quinahijine huatide cappinaquiri najari, madija Jesocristodsa pajissa quina-jarajarideni, ima tabaccora taniccadsa disseraquiri najarideni, madija pohua tesse nana-dsoqquede dissera tajari najidsohue cajimanahitohui. Aja huananehecca disseraquiri najarideni, dsoppinejedeni, siba nahatonidsa huahuatidsemana najarideni, mamaidsadedeni naco najidsohue cajimanahitohui. Najarideni huapimapa coridsa imeni *azufre jororo cananihuaji hua todsippahitohui. Najaropi *dsoqqehe dsotodecca. Nanidsapi najidsohue jiquejeranicca tonahanamana-dsanapohuitohui –nade.

Jerosare dsati tahimarini

⁹Nadsapa Diocca dodosse tabaqqi memehua jicca 7 quinaha tasaodsa najidsohue oppina tanicca cajiridsamanapojari ojaría ccajonadsa ohuadsa huati tajari: –Aji ticcajonaji, Edede Bedicca amoneje tojanijine najorajaro tia qqí onanana –nade.

¹⁰Nadsapi Dio Corimejine ima ohuadsa ahuatoto tajaro, pina occa huadassa nadsa qqí onajaro. Ocattoma cananeje Diocca dodosse ssono dequeranihuaji ohua tohuaccajari. Nanihuaji ohuadsa ahuatoto inanajaropi Dio pocca odsa panani bicabote Jerosare Dio Pohua tedsejema ccaronani qqí onade. ¹¹Najaro odsa pananipi Dio pocca deni tojehejine dsibehi tajaro. Najaro dsibehinipi pina siba huatini ccara tanicca diamante dsibehinissa najaro. Ssiaja tajaro pina cristaossa najaro.

¹²Odsa panani huapihuajipi siba hua nahuajanini dequerajaro. Motarema ccahuajanijaro. Noccobiji 12 nehe cajijaro. Najaro noccobijidsa Diocca dodosse tabaqqi ojari ojari naha huahueri naridsajari. Noccobijidsa onideni dsodo naridsajaropi jodiodenicca idi ojaría oni Israeri bedi 12 quinajari onideni.

¹³Maji ccajonahihuajipi noccobiji 3 nehe cajijaro. Maji tocahihuaji naqui noccobiji 3 nehe cajijaro. Arobenihuaji naqui noccobiji 3 nehe cajijaro. Arobeni onihihuaji naqui noccobiji 3 nehe cajijaro. ¹⁴Odsa pananicca siba hua nahuajanijaro tocadacorade siba imeni 12 nehe cajijaro. Najaro siba 12 najarodsapi Edede Bedi pohua huatimadedeni 12 quinajari onideni dsodo naridsani qqí onade.

¹⁵Aja Diocca dodosse ohuadsa huati tajaripa nanattome orocca dsibehi tajaro dsojo inajari. Najarodsas odsa panani, noccobiji, hua nahuajanini naqui nattomede tojaridsajari.

¹⁶Nadsama odsa panani dequeranihuajipi pina bijini matanihuajissa caniquimerajaro. Diocca dodosse odsa panani nattome inadsapi 2 mil, 200 kilometros (2,200) cajijaro. Dequeranihuaji najarossa, bijini matanihuaji najarossa, tetepihuaji najarossa caniquimerajaro. ¹⁷Nadsapi hua nahuajanini nattome inadsa sibanipi 65 metros. Najaro nanattomepi ajijaro nami nanattomedsa Diocca dodosse nattome inajaro.

¹⁸Odsa panani huapihuajicca hua nahuajanijaropi diamantedsa nahatojaro. Odsa pananipi oro poniradsa

canahatojaro. Najaro oropi pina jojo ssiaja tajarissa najaro, tocassiejequimera najaro. ¹⁹Aji odsa pananicca hua nahuajanijaro tocadacorade siba imeni 12 quinajarodsapi siba bedeni dsibehini bicabote nepi naridsajaro. Siba bedeni janonipi onihi onihi naridsajaro. Oninipi ajima najaro:

Tahidecca siba imenidsapi diamante dsibehi tajaro ijiridsajaro. Dsotodeccadsapi sapiro sohue tajaro ijiridsajaro. Onihi 3'ccadsapi acata macconi janoni cajini ijiridsajaro. Onihi 4'ccadsapi esemeraoda sohueni ssiaja tajaro ijiridsajaro.

²⁰Onihi 5'ccadsapi onise sohue tajaro noponidsa quejemajaro ijiridsajaro, 6'ccadsapi robi macco tajaro ijiridsajaro, 7'ccadsapi crisolito huesse tajaro ijiridsajaro, 8'ccadsapi berilo macconi, sohueni, huesseni ijiridsajaro, 9'ccadsapi topasio macco-cco najaro ijiridsajaro, 10'ccadsapi crisoprasa sohueni huesse tajaro ijiridsajaro, 11'ccadsapi jasinto sohueni ijiridsajaro, 12'ccadsapi amatista sohueni idira tajaro ijiridsajaro.

²¹Aji noccobiji 12 najaropi perla noponi dsibehi tajaro 12 nehe huacossaridsajaro. *Perla ojariepi noccobijidsa ojari ojari naridsajaro. Odsa pananicca jahui huapimapi dsibehini oro ponira ijijaro, tocassiejequimera najaro.

²²Najaro odsa pananidsapi Diodsa dada toquima odsa qqui onejerani. Dio Atti mamari naqui nohuerajaro. Naraha ia Medsede Dio dacorabotena nahidsa madijari. *Edede Bedi naco nahidsa madijari. Iqueriquidsa etidsenijinepi poadeni pamahadsana ehetidse nanijine. ²³Diocca odsa pananidsapa maji nohue, abadsico ssiejene nohuerahi. Ssiaja taridsajaropi Dio pocca deni tojehe, Pohua ssiejenena paji. Edede Bedi naco pina jojororossa najari, pohua ssiejene ssiaja taridsajari. ²⁴Aji dsama onihi onihi naridsajarocca madija huapimapa najaro odsa panani ssiajanidsa madimanahitohui. Dsama onihi onihicca taminedeni naco poccadeni biquehe deni tojanicca Diodsa da quinanjine najaro odsa pananihuaji dsojo idsima-mananithohui.

²⁵Noccobiji tohuabehe nema dsanaponithohui. Dsomepi nohuerani. Ssiaja ponira nema dsanaponithohui. ²⁶Dsama huapimacca madija poccadeni biquehe deni tojanicca Diodsa da quinanitohui. Poccadeni dsamacca biquehe naqui da quinanitohui.

²⁷Najaro odsa pananihuajipi Dio jipera taticca nohueranithohui. Madija imasiri totonanadenipa jahidsima-jarahitohui. Madija

mamaidsadedeni naco jahidsima-jarahitohui. Aja Edede Bedicca papeo camittehe jiquejeraniccadsa onideni dsodo naridsajari-denira jahidsimahi ojaritohui.

22 ¹Nadsapa Diocca dodosse hueni bicahi ohua qqui tonanajaripa passo ssahua tajaro, tocassiejqquimera najaro. Najaropi passo camittehecca. Dio, *Edede Bedi pohuadeni pamahacca huihuittari cahittarinidsa passo qqe-najaropi hueni tocajajari. ²Najari huenipa odsa pananicca jahui nocconi motta tohuaccajari. Ahua camittehecca hueni inididsa ahuaaji hua, jippehuaji hua najaro. Abadsico cajari cajari bobono najaro. Huajano ojariadsa bononi cajijaropi 12 najaro. Najaro ahua appanipi dsama huapimacca madija nomi-qquiri naha madimana-dsanapohuijine. ³Nanihuajipi tabacco-rehe nohue, Diocca najidsohue naqui nohueranitohui. Najaro odsa pananidsapi Dio, Edede Bedi pohuadeni pamahacca huihuittari cahittarinitohui. Diocca medse huapima pohuadeni pamahadsa huatidsemanahitohui, jiri jiri quiquina nahitohui. ⁴Dio Pohua assire qqui quinahitohui. Pohua oni pocca medse huapima assaridenidsa dsodo naridsanitohui. Najaro imapi Dio Pohua pocca toquejenajari. ⁵Nanidsapi dsome nohueranitohui. Nahihuaji madija madimanajaridenipa jojororo tohui, maji ssiejene tohui quina-jarahitohui. Ia Medsede Diona huapimadsa ssiaja inaridsanitohui. Nadsapa Dio pocca medsedeni huapima dossede toquejena-dsanapohuitohui.

Jesocristo ccanipomahicca imapi huajira tani

⁶Nadsapa Diocca dodosse ohuadsa huati tapomajari: –Ajijaro tohuattipi pajissa. Imapi pina ajijaro tohuattissa nehe tojanitohui. Ia Medsede Diopa Pohua Atti cacomera-botedenidsa Pohua Atti inaridsapojaro. Najari Diopa ohua dosse naronajari. Ohuapi pocca dodosse, pocca medsedenidsa pohuadeni tedsejemacca ima tojabote nanicca ahuaato onanijine occaronajaro –nade ohuadsa.

⁷Ia Medsede Jeso attipa: –Occanibote nani –najari. –Diocca ima itedsejemacca ajijaro papeodsa dsodo nanidsa ibora tajaripa occa biquehe pohuadsa onananitohui –nade.

⁸Ohuapi Huano, aji jidapanacca, itedsejemacca Djojine huapima ohuadsa ahuaato inaridsa omittajaro, qqui onajaro.

Najaro jicadsapi Diocca dodosse ohuadsa huati huati tajari baccohuaji opitodsa ohuittajaro, pohuadsa ohuatidsenijine.

⁹Naraha pohua attipa: –Nema tejeraji. Ohuapi Diocca medse ojani. Pina tiassa, pina timecotedeni Dio Atti cacomerabotedenissa onajaro. Aja madija huapima ajijaro ima papeo dsodonanidsa iboraqquri najaridenissa onehe Diocca medse ojani. Diodsara tetidseji –nade.

¹⁰Pohua atti onihi naqui: –Diocca ima ajijaro papeodsa dsodo najaropi madija hua hua quinahijine ahuatoranidsa tecahua tejeraji. Ajijaro ima dsodo nanicca tojanijinepi huajira tani. ¹¹Najaro ima tohuajiradsapi madija tabaccora tajari, bodi oba tajari naco poccadeni tabaccorehe inanamanaccanijine. Apaja, bodideni cacajiquimerahijine pajiramana-jarahi. Naraha madija bica tajari, bodi huire tajari naco ima bicani inanamana-dsanaponijine bica tani –nade Diocca dodosse ohuadsa.

¹²Ia Medsede Jeso attipa: –Jehe, occanibote nani. Ima bicani inanaridsa-manajarodenipa najarossa nehe pohuadenidsa da onaridsanitohui. Naraha ima tabaccora tanicca inanaridsa-manajarodenipa najarossa nehe pohuadenidsa da onaridsanitohui. ¹³Ohuapi ohua. Ajijaro dsama nahatopojeradsama omadipojaro. Nidsa dsotode ajijaro dsama jicaraha ohuapi omadidsanaponitohui –nade Jeso.

¹⁴Nadsapa madija pina poccadeni etero ssahua quinajarossa nadsa bodideni tohuireridsadsapa Dio pocca biquehe pohuadenidsa inanaridsanitohui. Najaridenipa ahua bono camittehecca jipamanahi bica tahi. Diocca odsa pananikka noccobijidsa jai tojedsimahi naco bica tahi. ¹⁵Naraha aja madija Jesocristodsa pajissa quina-jarajarideni, dsoppineje doridsa disseraqquri najarideni, huananehedsa disseraqquri najarideni, ijinedeni ahuamanajarideni, siba nahatonidsa huahuatidsemana najarideni, maidsehedsa disseraqquri najarideni, pohua tesse mamaisadedeni, najarideni huapimapa Diocca odsa pananidsa jai tojedsima-jarahitohui.

¹⁶–Ohuapi Jeso ojani. Otahimaridsa titiqueriqquiridsamana nanihuaji ajijaro ima ticajimananijine tiadeni huapimadsa ohuatti ccaccaronade ocadossejari –nade. –Ohuapi maittaccadsama Isaraeri potemahidenicca tamine Dabi potemahi ojani.

Ohuapi pina dsidsidsamassacca abadsico bedi ssiaja tocana-jarissa onajaro –nade Jeso.

¹⁷–Nija, ticcajonaji –quinahi Dio Corime, Edede Bedicca amoneje tadsajani. (Najaro amonejecca imapi Jesocristodsa ihiqueriqui najarocca ima.) Madija ajijaro ima mittamana-jarideni naco: –Jehe, ticcajonaji –quinana. Passotohui bacco dsarijari dsede jipa tadsapa ccajonana, passo camittehecca manaconi jirehe dse nahijine.

¹⁸Diocca marinaja itedsejemacca imapi ajijaro papeodsa dsodo nani mittamanajaridenidsa ohuatti ajima onajaro: Madijapa ajijaro imadsa ima onihi inaharini oppina tani. Ima onihi tonaharidedsapa Dio pohuadsa ima oppina tanicca inassonarinitohui. Ajijaro papeodsa dsodo nanicca ima oppina tanicca pohuadsa tojanitohui. ¹⁹Nadsama madija ohuaha itedsejemacca ima ajijaro papeodsa dsodo nanicca mota inebo-dsapi manaco ahua bono camittehecca jipa-jarahitohui. Odsa panani Jerosaredsa naco toqquedsima-jarahitohui.

²⁰Ajijaro ima huapimapi Jesocristo huati tajaricca. Iadsa pohua attipa: –Pajissa, occaninijine huajira tani –nade.

Nadsapi ia etti: –Jehe, nema taji. Ia Medsede Jeso ticcaniji –inajaro.

²¹Ia Medsede Jesocristo tiadeni huapimadsa pocca biquehe inanana, onajaro. Pajissa imapi nema nanitohui.

Glosario

Azufrepi nami bodicca siba. Huesse tajaro, majoni tabaccora tajaro. Diji tadsapi ssahuema tani. Poni jororonipi ppocorajaro, sohue najaro. Nidsa dsotode ajijaro dsama jicadsapi tabaccoraquiri najarideni huapimapa coridsa imeni azufre jororo cananihuaji ocasserani ahuamana-dsanapohuitohui.
(Apocalipsis 14.10; 21.8)

Bani bedi Diodsa da tahijinecca imapi **Danijicca** imadsana qqui taji.
(Maraco 11.15; 12.33)

Broncepa ppejo dacorajari oni. Najari ppejodsa dsiniro ccarara inahatomana, beobeo inahatomana, maittaccadsa-macca toto bononi naqui inahatomana najari. Bronce bica tadsapa macco tajari. Botedsa tosohuejari. Bronce bica tajari jiti tadsapa dsibehi tajari.
(Huano 3.14; Apocalipsis 1.15)

Coloniapi odsa pananissa najaro. Romacca coloniacca imapi ajima najaro. Dsama Itariacca tamine deni tojahiccapa odsa panani Romahuaji madijari. Najari taminepa pocca soldado-denidsa dosse dosse nadsa dsama huapimadsa jadsire inamanajaro. Dsama Masedoniadsa deni toquejenadsapa nani-cca odsa panani Piripodsa Romacca tamine pocca madija inamadibaquijari. Romacca madija pina 300 quinaha nahi Piripocca madijadenidsa madimanajari. Nadsapa Piripocca madija huapimapa Romacca taminecca marinajadsa toquejena-jari. Huapimapa pina Romacca madijassa quinajari. Poccadeni dsiniro mota tamedsa da da quina-jerani. Poccadeni odsa pananica tamine tojahijinepa pohuadenira ihicattejidsamana najari. Piripopi huaji taniccaraha pina dsama Itariacca odsa pananica imassa najaro cajijarojine ponidsa: colonia,

quiquina najari. Piripopi colonia tojajaro ojari-jerani. Dsama onihi, onihihuaji naqui colonia caji taridsajaro.

(Jesocca dodosse tabaqqi tahimarideni 16.12)

Danijicca imapi ajima najaro. Maittaccadsama jodiodenipa poccadeni daniji Diodsa da da ihiquimamana najari. Caria attidsapi: sacrificio, quinajari.

Daniji ojariapa bani bedi. Jodiodenipa bani bedi ette tojahicca bicahi, imabote, oqui tajarira icattejidsamanajari. Siba hua tamaronidsa dsippo inadsamanadsa ibarimanajari. Emene toccahijinepa ssipori huissi ijidsamanajari. Nadsapa assirepa botta quinajari. Diji tadsapa Diodsa dada toqquimadedenipa bani bedi jinedecca ima Diodsa huati iquimamanajaro. Nadsapa bani bedi jinedecca imadsa Dio: –Epeje, ohuati ajimani –najari.

Jodiodenicca daniji ohuahapa bani bedi jarahi. Ohuaha caji tahi, pina dsamatapa, dsedse, majo bicabote tohuessihijinecca naco. Onihipi Diodsa huatidse-manahijinecca. Onihipi Diodsa toquejenani-pomahijinecca. Onihipi poccadeni ima toppineranijinecca.

Dsotode Jesocristo pohua ccaccoradsa dsoqquedsapa icca daniji bicabote tojajari. Pocca danijidsa naqui: sacrificio, inajaro. Pohua emenena dacorehe denima caji jaro. Jeso emene toccajarojine icca imasiri sse inajaro. Ibodi inahirejaro. Jidapapi najarojinena Dio icca imadsa: –Epeje, ohuati ajimani –najari.

(Maraco 11.15; 12.33; Epesodenidsa 5.2; Ebreodenidsa 9.14)

Diodsa dada toqquima onini cariacapi: templo, quinajari. Najaro odsadsapi jodiodeni Diodsa huahuatidsemana najari. Najaro odsa imenipi sibadsa icanahatomanajaro. Jesocristo tossona-jaraccadsa, ajijaro namidsa madidsa naco najaro Diodsa dada toqquimacca odsapi Jerosaredsa cahittajaro.

Maittaccadsama Diodsa dada toqquimahuaji jodiodenicca dada toqquimadedeni dsepedeni ihijimana najari. Amossinihuajipa madijacca daniji Diodsa da da ihiquimamana najari, nahi Diodsa da tahijinecca huahuanari imenidsa. Diodsa dada toqquima bodidsapi madijacca ima naqui Diodsa

huati huati ihiquimamana najari, nahi –Dio anihihuaji bica tanicca –quiquina nahihuaji.

Nahi Diodsa dada toqquimadsa naco Dio Atti, Moisesicca marinaja, jodiodenicca marinaja huapimadsa mari mari ihicanabaqquimana najari.

Jidapana jodiodenipa Diodsa dada toqquima cappiramanadsa poccadeni Dio Atti mamari aniridsajarodsa quequeriqquimana najari. Cariacca oninipi: sinagoga. Attidenipa: –Nidsa Diojine Pohuadsa dada toqquima dsati Jerosaredsa cahittapomanijine –quinadsa najarotohui madimanaccajari.

(Maraco 1.44; 11.15; Jesocca dodosse tabaqqui tahimarideni 5.42)

Diodsa dada toqquimade caria attidsa: sacerdote, quinajari.

Jodiodenicca daniji Diodsa dada toqquimadedenipa tahide dsama huamoni ssono caji, siba caji tanihuaji Dio tadsari bani etero ssequi nahidsa canahatojarodsa dsepedeni ihijimana najari. Dsotodepa odsa panani Jerosarecca Diodsa dada toqquima odsa imenidsa dsepedeni ihijimana najari. Poccadeni madijacca imasiri manaconi Diodsa da da ihiquimamana najaro.

Diocca marinaja nema nehedsa iboraqquri najari. Najaro marinajadsa poccadeni madija mari mari ihicanabaqquimana najari. Pohuadeni naco Diodsa huahuatidsemana najari. Poccadeni madija naco Diodsa huatidsemanahijine acco acco ihicamabaqquimana najari. Diodsa huati huati totoquina najari, jiri jiri quiquina najari. Comaqquri najarideni tocanomiredsa pohuadeni nohuede dada toqquimadedenidsa jai tojedsima jai tojedsima najari.

Jodiodenipa imasiri inanamanadsa poccadeni imasiri manaconi bani bedi bicahi Diodsa dada toqquimahuaji eccajonamanadsapa dada toqquimadedenina bani bedi ssipori huissi ijidsamanadsa assire botta quinajari.

Diodsa dada toqquimadedenicca taminedsa: Diodsa dada toqquimade deni tojahicca, inajaro. Caria attidsa: Jefe de los sacerdotes, quinajari. Oni ohuaha: Sumo sacerdote, quinajari.

Jidapapa Jesocristo iadsa anidsapa pohuana icca daniji Diodsa dada toqquimade, icca ima huahuati toqquimade deni tojahicca.

(Roca 1.8-9; Huano 1.19; Ebreodenidsa 9.11; Apocalipsis 1.6)

Dsoqquehe ettidsapi essire idsoqqueni, inajaro. Dsoqquehe caria attidsapi: muerte, quinajari.

Dsoqquehecca ima onihipi ajima najaro. Madija Jesodsa pajissa quina-jarajaridenipa dsoqquemanadsa najidsohue jiquejeranihuaji paja toquejenarihitohui. Tohuatti onihipi: dsoqquehe jiquejeranicca. Onihipi: paja dsoqquemanarihi, inajaro. Madija najaro ima cajidsapi pohua assire dsoqquehi natti Dio qqui tajarahitohui. Dsoqquehe jiquejeranihuaji najidsohuedsa madidsanapohuitohui.

(Jesocca dodosse tabaqqi tahimarideni 2.24;
Romanodenidsa 6.23; Apocalipsis 21.8)

Edede bedi oni caria attidsapi: cordero, quinajari. Ia Medsede Jesodsa: –Edede Bedi –ihina najaro imapi ajima najaro: Maittaccadsama Huano Baotistana pohua oni hua inapojari. Jeso qqui tapodsapa: –Ajararipa Diocca Edede Bedi madija huapimacca imasiri inanamosinijine –napojari.

Jesodsa: –Diocca Edede Bedi –inadsapi Diocca marinaja Moisesidsa da inajarodsa ibodi huatomajaro. Tahide Diocca madija jodiodenipa pocca marinaja dsori inanamanadsa poccadeni imasiri manaconi bani bedira Diodsa da da quiquina napojari. Dsotode Jesopa icca imasiri manaconi dsoqqedsapa pocca ima pina edede bedicca imassa najaro.

(Huano 1.29, 36; Apocalipsis 12.11; 14.1; 21.22; 22.1)

Huissinajacca imapi todsopori cotani eteroni mota huissi tojidsani. Caria attidsapi: Circuncisión, quinajari.

Maittaccadsama jodiodenicca idi Abarahaopa pocca madijama Dio tedseje jehe canirehijine Dio Attipa: –Occa madija tiquejenadsapi tiadeni ohuacahuabaqqi-dsanaponitohui –najari. Nadsapa pohuadeni: –Jehe, tiapi icca Dio, tiadsa iboraqqiri inani –quinadsapa poccadeni jehe-niji ahuato tanijine imedenidsa huissinaja cajimanajari. Maqquidejera dsoporideni cotani eteroni mota huissi tojidsani cajimanajari. Ejedeni tossonadsa huadari 8 nadsapa huissinaja cacajimana najari.

Jodiodenipa nama nama quinahi paja naccahi. Naraha huissinaja cappiramanajarideni Jesodsa pajissa quinadsapa

Jesocristojine bodideni tohuiredsa pina huissinajacca imassa najaro cajimanajari.

(Roca 1.59; Jesocca dodosse tabaqqui tahimarideni 16.3; Corosadenidsa 2.11)

Jassinajacca huada caria attidsapi: día de reposo, quinajari. Onini onihipi: sábado, quinajari.

Diopa dsama inahatoponipi huada 6 nadsa pohua dsepe ijiridsadsapa huapima inahatoridsajari. Huada 7'cca bacco tadsapa jassi najari. Pohua Attipa: –Najaro huadapi occa. Madija huapima najaro huadadsa jassi quinahijine –najari. Dsotode pocca marinaja Moisesidsa huati tadsa madija jassinajacca huada ecahuamananijine huati tajari.

Jodiodenicca jassinajacca huadapi viernes maji toccadsa bacco tajaro. Sabado maji toccadsa jicajaro. Isaraeri potemahi jodiodeni jassinajacca huada ecahuamanadsapi dsepedeni ijimana-jarajari. Tarabaiadsade pohuadenidsa oppina tadsa poccadeni odsadsara jassi quinajari. Sabadodsa huaji tanidsa ccaridsade naqui oppina tani. Naraha huajira tanidsa ccaridsade oppinera tani, quinajari. Dio Atti mamarihuaji jajahi tojedsima nahijine bica tani, quinajari.

(Maraco 2.27; 3.2-4)

Jerosarepi Isaraeri potemahi jodiodenicca odsa panani deni tojanicca. Caria attidsapi: Jerusalén, quinajari. Ssono onini Siodsa anijarojine najaro odsa panani onini onihipi Sio cacanijaro. Najaro onini caria attidsapi: Sión, quinajari.

Maittaccadsama odsa panani Jerosarepi madija ohuadenicca tojapojaro. Najaridenidsa jodiodenicca tamine Dabi jadsire inanadsa deni tojadsapa pocca tojajaro. Nema nadsapi Jerosare onini onihipi: –Dabicca odsa panani –quiquina najari. Tamine Dabi dsoqquedsapa pohua bedi Saromo jodiodenicca tamine tojajari. Pohuana Diodsa dada toqquima odsa bicabote Jerosaredsa icanahatopojaro.

Jerosare nocconidsa naqui jodiodenicca taminecca odsa imeni bicabote cahittajaro. Jerosare inorinihuajipi ssono Oribo anijaro, ahua ppa naridsahi oni Jesemani naco anijari. Jidapana Jerosarepi jodiodenicca dsama Palestinadsa anini paji naccani.

Memehuaji Dio madihihuajipi odsa panani Jerosare dsati aninitohui. Nahidsa Dio pocca madija Pohuadsa tohuajiramanajari. Jerosare dsati Diojine Huano qqui tadsapa dsodo inajaro.

(Mateo 2:1; Maraco 1:5; Apocalipsis 21:2)

Jodiodenicca ima cacattemadedeni caria attidsapi: Junta Suprema, quinajari. Isaraeri potemahi jodiodenipa poccadeni ima cacattemadedeni toquejenahijine madija 71 quinaha icattejidsa-baqquimanajari. Diodsa dada toqqumadedenicca tamine deni toजारipa ima cacattemadedenicca tamine. Ima cacattemadedeni motapa dada toqqumadedeni. Motapa jodiodenicca marinaja mamaridedeni. Motapa jodiodenicca ime jocohuideni.

Najarideni huapimapa jodiodeni naraha pohuadeni motana pariseo imadsa jehe quinajari. Ohuahadenipa sadoseo imadsa jehe quinajari. Najarideni huapimapa Moisesicca marinajadsa iboraqquri najari.

(Roca 22.66; Jesocca dodosse tabaqqi tahimarideni 5.21)

Madija Bedicca ima. Jesopa pohua tahimari huati tadsapa: – Ohuapi Madija Bedi ojajaro –nanaja najari. Cariacca onipa: Hijo del Hombre. Tahide Jeso tossona-jaraccadsa Dio Atti cacomerabote Daniel pocca dsodonijidsa dsodo inajaro: –Pina occa huadassa naraha pajissa qqui onajari. Madija bedissa naha meme essenima ccaronahi qqui onajari –nahi nade. (Daniel 7.13) Najarojine jodiodenipa nahatoqquri napojari: – Ohuapi Madija Bedi –nanaja najaripa Diocca dossenijija najari.

Jesopa ajijaro nami nahato-jeraccadsama nadsama Diodsa madipojari. Pohua naco Dio. Pohuapa memehuajiccaraha ajijaro namidsa ccaronadsa madijadsa tossonajari. Pina cappirajarissa naridsajari ajijaro namidsa madiridsajari. Pohua assire cajidsapa ocasserani ahuaridsajari.

Jesopa madija tojaraha Diocca nahatohue cajidsapa canahatori canaridsajari. Nidsa dsotode ajijaro namidsa ccaronapomadsapa huapimacca tamine tojahitohui. Pohua naco Dioja najarijine nidsa Diocca najidsohue tojadsapi ia tonassiabaqquihijine pajirahi.

(Maraco 2.10; Roca 19.10; Huano 3.13; Apocalipsis 1.13)

Moisesipa Isaraeri potemahidenicca tamine tojajari. Pohnuapa Dio Atti cacomerabote. Pocca madija dsama Ejitohuaji medse toquejenaraha iaqqenabaquijari. Huajano 40 naha dsama huamoni ssono caji, siba caji tanihuaji eccaridsabaquijari.

Moisesipa Dio Atti dsodode tojapojari. Dio pohnuadsa huati tadsa Diocca marinaja dsodo inajaro. Isaraeri potemahideni tahimari naqui dsodo inajaro. Pocca dsodoniji Dio Atti dsodo nanidsa anijaro. Najaroa aji Génesis, Éxodo, Levítico, Números, Deuteronomio najaro.

Dio Pohnu tadsari Isaraeri potemahidenidsa aninijinepi Pohnu tadsari corimani Moisesidsa nohue icanadsa pocca madija icanahatomananiijine icadossebaquijari. Bani etero ssequi nahidsa icanahatojaro. Najaropi Diodsa dada toquima tojapojaro.

(Maraco 9.4; Huano 1.7; Tahimarideni 3.22)

Moisesicca marinajapi Diocca marinaja Moisesi dsodo inajaro. Caria attidsapi: la ley de Moisés, quinajari.

Maittaccadsama Isaraeri potemahi jodiodeni dsama huamoni ssono caji, siba caji tanihuaji madiridsamanapodsapa Diopa pocca marinaja pohnuadenidsa da inajaro. Poccadeni tamine Moisesipa ssono Sinahihuaji toqqemorasapa Dio pohnuadsa huati tajari.

Najaro marinaja Moisesi dsodo inadsapi jodiodeni ecahuamana-dsanapojaro. Moisesicca dsodonijidsapi marinaja onihi onihi caji tani, pina Diodsara etidsenijinecca, pina madija tabaccorehe inanamana-jeraniijinecca, pina madija ijine ahuanamanajarahijinecca naqui. Ima oppina tanicca naqui anijaro. Najaropi caria attidsa: impuro, quinajari.

(Mateo 5.17; Jesocca dodosse tabaqqi tahimarideni 4.13; Romanodenidsa 3.21; Carasiadenidsa 3.2)

Oppina tani quiquina najaricca imapi caria attidsa: impuro, quinajari. Caria atti onihi naqui: malo, quinajari. Najaro imapi Diocca marinaja Moisesi dsodo inajarods anijaro. Jodiodenipa Diocca marinaja ecahuamanadsapi oppina tanicca noppineni cappinamanaha madimana-dsanapojari.

Diocca marinajadsa qqui inajaro bani oppina tahicca, dsamacoma oppina tanicca naqui. Bani dsoqquehi damade,

madija dsoqquehi damade oppina tani. Madija jodio jarajari tedseje jipade oppina tani.

Ima oppina tanicca jodiodenidsa anidsapi Diodsa dada toqquimahuaji jai tojedsimahijine oppina tani, quinajari. Pina Moisesicca marinaja dsodo nanissa inanamanadsa poccadeni ima toppineradsana jai tojedsimahijine bica tani. Amoneje ama cajidsa Diodsa dada toqquimahuaji oppina tani, quinajari. Maqquideje dsohuri toccani nattini Diodsa dada toqquimahuaji toqquedsimahijine oppina tani, quinajari.

Dsotode Jesocristo ajjaro namidsa madidsapa ima onihi mari mari najari. Pocca marinajapi ibodi Diodsa bica tanijine, ibodi huire tadsa imadinijinena bica tani. Essiredsa ima oppina tanicca toja-jeranijine ia ecahuani ojari-jerani. Ibodi tabaccorehe jirehe imadinijine ia ecahuanina Diodsa denima bica tajaro, najari Jeso.

(Maraco 1.40; 2.24; Roca 2.22; 15.2)

Pan ssaja tajarahicca ejete. Isaraeri potemahi jodiodenipa poccadeni idideni dsama Ejito inebomanani huatideni ajamamana-jarahijine ejete ihinanamana najaro. Najaro ejete oninipi: Pan ssaja tajarahicca. Huada 7 nehe pan ssaja tajarahicca jijipamana najari. Caria attidsapi: Fiesta de los panes sin levadura, quinajari.

Isaraeri potemahideni pan ssaja tajarahicca inahato-manapojaripa dsama Ejitodsa nebomanabote nadsa Moisesi icadossebaqquidsa inahatomanajari. Pan huassinaja jicahijine pan ssaja tahijinecca quequejema jirahi inahatomanajari. Dsomepi edede bedi tabissehi pan tedseje jipamanajari. Huada ssiajapa Isaraeri potemahideni dsama Ejitodsa joppe-mamanadsapa jai tojajari. Poccadeni benehidsa pan ssaja tajarahicca jipamana-dsanapojari. Najari jicadsapa Dio pohuadenidsa pan onipa mana da da ihinabaqqui najari. Najari jipamana-dsanapodsapa dsama Canaha bacco toquinajari.

(Roca 22.1, 7)

Pascoapi jodiodenicca ejete imenibote. Ettidsapi: Dio tosso-ni-qquimajari, inajaro. Isaraeri potemahi jodiodenipa dsama Ejitodsa nebomanajarideni tahimari potemahideni huatideni ajamamana-jarahijine ejete ihinanamana najaro.

Moisesipa pocca madija Isaraeri potemahideni tedseje ejete Pascoa inahatomanojaro. Diopa Moisesidsa: –Ajima tiquinaji –nadsa pocca madija icadossebaquijari. Tahidepa edede bedi inanadsoquemanajari. Nadsapa poccadeni noccobiji inidicca ahuadsa edede emene sse naridsamanajari. Edede bedi ibanamansapa pan ssaja tajarahicca tedseje jipamanajari. Najaro dsome madija huapima cahadijadsapa Diocca dodosse memehuaajicca madija nanajicade ccaronadsa dsama Ejitocca madija najicade ccaridsajari. Ejitocca madijadenicca odsadsa edede emene nohueradsapa huapimacca ejedeni maququideje tahidecca inajicaridsajari. Naraha Isaraeri potemahidenicca odsadsa edede emene qqui tadsapa tossoquimajari.

(Roca 22.1; Huano 13.1)

Pentecostespi jodiodenicca ejete. Tahidepi ejete imenibote onihi Pascoana tojapojaro. Najaro ejete jicani nattini semana 7 nadsana ejete Pentecostes tojajaro. Semana 7'pi huada 49 cajijaro. Huada ssiajapi huada 50 bacco tajaro. Nadsana ejete Pentecostes tojajaro. Pentecostes dsama creciacca attideni. Ettidsapi: 50, inajaro. Najaro ejete onini onihipi Dsamatapa poredecca ejete. Caria attidsapi: Fiesta de la Cosecha, quinajari. Nama quinajari dsamatapa ppa nahi bono tahide porequinapojariccapa Diodsa da da quiquinanajari. Diodsa dada toququimahuaji da idsimamanajari, Diodsa tojahijine quinadsa.

Jeso dsoqquehi natti huada 50 nadsa ejete Pentecostes tojajaro. Najaro huadadsa pohuadsa jehe quinajarideni queriquimanadsapa Dio Corime pohuadenidsa tojaridsapojari.

(Jesocca dodosse tabaqqi tahimarideni 2.1)

Perlacca ima. Passo imeni abari pina huenicca codsopissa najari oni cariaccapa ostra. Najari bodidsa ssiqui toqquedsimsadsapi pina sihitissa najaro moro tajaro. Ostra pohua emene ssiqui huapihuaji sse inadsa tomotadsapi perla tojajaro. Perlapi nopo tajaro, dsibehi tajaro. Onihipi sohueniraha dsibehi tajaro. Perla bica tadsapi manaconi cajini. Poni manaconipi huatini ccara tani. Perla huijo tadsapi tomattoccajine ssequi inanijine bica tani. Tohuaribocca naco inahatohui bica tahi.

(Mateo 7.6; 13.45; Apocalipsis 21.21)

Rehuita quiquina najaripa Diodsa dada toqqimade bijideni accodedeni onideni. Cariacca onipa: Levita. Pohuadenipa maittaccadsama madijari Jacobo-Isaraeri bedi 12 quinajari ojaría onipa Rebi (Levi). Rebi pohua potemahi ojaría onipa Arao (Aarón). Arao potemahina Diodsa dada toqqijmade toquejenajari. Rebi potemahi motadenipa dada toqqimade bijideni accode toquejenajari. Diodsa dada toqqimacca odsa cacahuadedeni toquejenajari. Pohuadeni naco Dio Atti nahatoqquri naraha dada toqqimadedenidsa ajamani toquejenajari. (Roca 10.32; Huano 1.19; Tahimarideni 4.36)

Romanodenidsa dsiniro da tanijine nanaccadepa madijacca dsiniro mota ihinaccaridsa najaro. Nanaccade ohuahapa jahui imeni inididsa odsa bedenidsa huittidsadsapa todsepetaji dadadedenicca dsiniro mota ihinacca najaro. Nanaccade oni caria atticcapa: cobrador de impuestos. Dsiniro mota da da quinajaro cariacca oninipi: impuesto. Najaro dsiniro inaccamanajaropi romanodenicca tamine deni tojahiccadsa totoja najaro.

Maittaccadsama dsama Itariacca madija romanodenipa jodiodenidsa deni toquejenajarijine jodiodenipa romanodenicca taminecca dossenijidsa poccadeni dsiniro mota da da quiquina najaro.

Dsiniro nanaccadedenipa jodiodeni; romanodenicca taminecca dossenijidsa dsepedeni ijimanajari. Naraha poccadeni madija jodiodenipa pohuadenidsa nacasseraqquri najari. Pohuadenidsa attidenipa: –Icca madija jodiodeniraha tabaccoraqquri najari. Icca huadideni acco camade toquejenajari. Pina imasiri sseqquiri najaridenissa quinajari –quiquina najari.

(Mateo 5.46; Maraco 2.15; Roca 19.2)

Samariapi dsama arobeni onini. Samariapi dsama arobeni Jodea inorinidsa anijaro. Samariacca madijadsa: samaritano, quiquina najari. Poccadeni ididenipa Abarahao, pohua bedi Isahaca, pohua bedi Jacobo-Isaraeri quinajarideni. Nama quinadsapa samaritanodenipa Isaraeri potemahiraha jodio quejena-jararjarideni tedseje caji caji canaridseradsapa quejemamanajari. Najarojine dsama Jodeacca madija

jodiodenipa pohuadenidsa jiperaquuri najari. Jodiodeni attipa: –Samaritanodenipa ia jodiodenissa quinajarahi –quinajari. –Inoricca madija, pohuadenidsa bicaquuri inana –quina-jarajari. Pohuadenidsa quejemamanahijine oppina tajaro. Nadsapa jodiodeni samaritanodeni tedseje ahuaji jipera, ahuaji jipera quinajari.

(Roca 10.33)

Satanapa Diocca huadi, icca huadi tojjari naco. Pohuapa dacorajari, nahato tajari, deni tojehe cajijari. Pocca dodosse tabaqqi cajijari. Madija imasiri inanamananijine dissera tajari. Madija inajidsobaqqihijine, inatabaccorabaqqihijine naco dissera tajari.

Satana etticcapi: imasiri totonanade, maidsehe jinede, toponi nanajcade, tabaccorehe jinede, najaro.

Jeso namidsa madidsapa Dio Attidsa tohuibohuijine Satana nattome najari. Jeso imasiri inananiijine dissera taraha Jesopa imasiri inana-jerajaro.

Nidsaranibote Jeso ccanipomadsapa Satanadsa deni toja-hitohui. Satana ajimani tojjadsapa Diocca najidsohue pohuadsa ssonarinitohui. Poni ehuerani diji tehe nema dsanaponihuaji Diona dosse inahitohui.

(Maraco 1.13; Epesodenidsa 6.11; 1 Pedrocca 5.8; Apocalipsis 12.9)

Siopi odsa panani Jerosare onini onihi. Dio Atti dsodo nani-dsa Jerosare tahimarini dsodo nanidsa onini Sio naqui aniridsajaro. Caria attidsapi: Sión, quinajari.

Siopi ssono onini naqui. Najaro ssono Siodsapi odsa panani Jerosare inahatomanajaro.

Ssono Siocca ima onihi naqui ajima najaro: Nidsa memehuaajicca odsa panani Jerosare dsatidsa Diodsa iajressinitohui. Nahidsa Jeso qqi inahitohui.

(Apocalipsis 14.1)

Tohuatti onihi jidsa tanicca huatide caria attidsapi: hablar en lenguas, quinajari. Dio Corimejine Jesocristodsa toquejenajari motapa tohuatti onihi jidsa taniccadsa huatide

nahatoqqiri najari. Najaro tohuatti onhipi tocahattera-jararaha Dio Pohua Corimecca nahatohue pohuadenidsa da inadsapi tohuatti onihidsa huati huati totoquina najari.

Tohuatti onih huatide tahide tojaridsaponi imapi Roca dsodo inajaro. (Jesocca dodosse tabaqqi tahimarideni 2.4)

Pablo naco tohuatti onihicca ima Corintohuaji madimanageridenidsa dsodo inajaro. (1 Corintodenidsa 12.10)

